

黟縣四志卷十四

雜志

前志藝文志所載者皆係文藝詩歌而書籍反載雜志之內蓋因流傳寥落勉依康熙府志之例非得已也茲志凡駢體散文以及詩歌詞等概入諸雜志之內分爲文錄詩錄至書籍一門則併前志所載者悉入藝文志符史例也

文錄 傳 贊 序 跋 碑 記 銘 誄 雜體文

卷十五

詩錄 詞附

卷十六

黟縣四志

卷十四

雜志 文錄

一

古蹟 邱墓 寺觀



雜志

文錄傳 贊 序 跋 碑 記 銘 誄 雜體

傳

湯徵君球傳

華陽 王秉恩

湯君諱球字伯玕黟縣人少劬學從同邑俞先生正燮汪先生文臺游博通諸經篤守家法隱居教授章句訓詁以鄭氏爲主諸生舉經義相質必引據師說徐下已意決其異同無穿鑿無附會宣歙間學者宗之黟山縣僻小而士皆潛心經術實君爲之繼也其事親以孝聞父永懿老病且篤君謝絕人事壹志侍疾衣不解帶者逾數月父竟獲

黟縣四志

卷十四

雜志 文錄

二

痊以耄壽終居喪哀毀盡禮杖而後起性耿介授徒奉親束脩外不受一無名錢鄉里敬其清操亦無敢干以私者咸豐初皖中爲賊蹂躪郡縣承檄練鄉兵當事者浼君直練局君自謂非禦侮材且鄉兵訓練無素不足辦賊死非所懼懼爲賊污耳遂避地去後賊果大至始服君先識高蹈云君願身長髯多聞強識早歲覃精銳思治疇人學中西算法靡不洞曉尤善天官家言開元占經悉能成誦星緯推步研究其奧而不屑以藝事名亂定後聚書數千卷杜門著述補輯鄭氏逸書九種孝經論語注蒐采尤備並補輯劉熙孟子注劉珍等東觀漢紀皇甫謐帝王世紀譙



周古史攷傳子伏侯古今注等書皆前人輯本所未逮又以晉書爲唐所修房元齡傳稱其時史官多文詠之士好采碎事競爲綺艷劉知幾亦言自貞觀中更加纂錄凡所修撰多聚異聞言晉史者皆棄其舊本廼廣蒐載籍以補其闕而糾其譌撰錄成帙凡二十三種曰王隱虞預朱鳳何法盛謝靈運臧榮緒蕭子雲蕭子顯沈約九家晉書皆正史類也曰陸機干寶曹嘉之鄧粲劉謙之王韶之徐廣裴松之郭季產九家晉紀曰習鑿齒漢晉春秋孫盛晉陽秋檀道鸞續晉陽秋杜延業晉春秋蕭方三十國春秋皆編年類也又輯常璩和苞田融王度陸翹范亨張詮王景

黟縣四志

卷十四

雜志 文錄

三

暉高閭裴景仁姚和都張諮劉昞喻歸車頰段龜龍等所撰偏霸各史而崔鴻十六國春秋百卷爲鉅觀又補撰年表一卷校定纂錄十卷其所刪訂足正屠本之失蓋君平生精力唯此書最深邃矣又旁輯兩晉詔鈔晉起居注鈔庾詵晉朝雜事張敞東宮舊事車灌修陵故事盧緄八王故事四王起事應詹陶公故事桓元僞事傅暢晉諸公叙讚晉公卿禮秩故事荀綽晉後略記晉百官表注晉百官名寮屬名杜預律本賈充晉令張裴漢晉律序注摯虞決疑要注皆典午一代掌故所資其區宇則輯太康地記鄴中記林邑記凡三種其言行則輯晉諸公別傳袁宏名士



傳郭頌世語裴啟語林山公啟事凡五種又著錄晉別集三百家晉文集三百家皆手自校寫草稿具存至被兵時所燬卷帙不在此數其纂述可謂勤且闕矣同治六年詔舉孝廉方正同縣程先生鴻詔以君行誼白大吏應其選而君抗志冲雅不就一官以著作終其身鳴虜非所稱博文君子者歟光緒辛卯廣雅書局刻君所輯十六國春秋秉恩提點局事獲預校讐因據程君所述事略及譔錄書目次爲傳庶以備延閣之采焉

論曰史官之替久矣馬班而後世重范書體大思精歎爲絕作觀其自敘亦博采衆家而成承祚國志稱良史才裴

黟縣四志

卷十四

雜志 文錄

四

世期補而注之遂以不朽晉代記載炳乎藝林陸機干寶何法盛習鑿齒諸賢大雅宏達皆有鑒裁卓然成一家言唐修晉書始用衆手貞觀中房元齡奏令許敬宗來濟陸元仕劉子翼令狐德棻李義府薛元超上官儀等八人分功撰錄典著作者多文藻之士又雜取世說新語以放誕相高然則子元所譏其事蕪穢其辭猥雜異乎記功書過彰善癉惡者非過論矣自太守著論總題御譔新製旣出舊史遂佚今君於散亡之餘据拾叢殘又兼采霸朝各史攷覽異同倘就所錄刊入史註必能參覈詳洽首尾該備以方世期又何愧焉厥緒未竟墓草已宿遺書盈篋懇就



湮沒惜哉

宣統三年安徽巡撫部院朱家寶咨部題請奉  
旨入祀鄉賢

汪公漁溪傳

歷城 鄭元良

公諱濱字振邦號漁溪安徽黟縣人也新安大好山水故  
其人率厚重樸誠篤於天性汪氏自唐以來始光大逮清  
尤以經學顯有文臺先生者著有十三經注疏補遺七家  
漢書英吉利攷畧行於世卽其叔祖也公三歲失怙終鮮  
兄弟賴母氏黃太宜人以養以教至於成人隴右安君維  
峻曾撰傳紀其事黃亦黟望族有諱銘鼎者爲甘省良吏

黟縣四志

卷十四

雜志 文錄

五

諱銘新者司鐸懷寧皆公諸舅也初咸同間粵氛大熾江  
南郡縣淪陷公年僅舞勺負母而逃一日爲寇所偏倉猝  
避入山更闌矣慌竄中若有微光前導者公獨見之得免  
於險及亂甯家亦中落乃商於贛贛黟接壤易歸省也乙  
卯公舅銘鼎登賢書將之京太宜人謂公曰吾家世累儒  
不願自汝而斬命隨侍俱北未幾舅氏銓授甘肅正甯縣  
又相偕度隴跋涉數千里未嘗一日廢讀太宜人志也光  
緒乙未滄中變起公舅調西甯司饟運請以公從一切恃  
無纖失事平制府達諸朝獎以七品藍翎而公業亦援例  
爲尉矣當是時關中纏民據邠州未下東路不通太宜人



念子切電召公南返公立趣裝從關外間道行舅氏尼之不可諸僕無敢伴者獨一犬名護符子隨之公語犬曰此去荒漠八百里萑苻出沒無常聞聲則至爾毋吠也自是犬竟如所誠公歸見太宜人耳目聰強猶如曩昔設錢肆於贛之彭澤以謀菽水歲壬寅公病將不起有同肆族人名某某平素爲公所恩植者心忌之買急足至九江相稔處顛倒盈虛冀傾其業適過公肆而護符子之乳犬突出嚙其衣不使行肆中人知有故搜其身獲所齎函公肆得以無恙異哉公卒年春秋五十有九夫人葉氏溫恭淑慎鄉里稱賢亦享壽六十有七子承寬承緒承傑承烈孫正鐸正烜正國正鈞女孫四承傑字冠英與予同官於隴云贊曰孝德感物信孚豚魚吾初以爲適然今觀之護符子乃知古人不予欺也豈使人不若使犬哉噫

李麗川先生傳

歙縣 徐承祐

公姓李氏諱淦字汝明號麗川黟縣人幼穎悟三歲長老示以孝友二字故顛倒之輒能辨識旣冠補邑弟子員舌耕養親親疾侍湯藥衣不解帶者十閱月親歿哀毀骨立祭葬盡禮光緒六年游閩福州將軍穆果勇公延爲幕賓明年果勇調任東三省練兵大臣挈公偕往奏派爲行營提調兼總文案歷保以知縣留閩補用先後充發審通商



等局委員勤勞卓著光緒十五年臺灣咨調人才中丞劉公銘傳檄署淡水縣淡故劇邑號難治既蒞任興利除弊政以大成遂真除次年鳳山奸民聚眾爲亂巡撫邵公檄公率兵往勦公建議眾本烏合曉以大義解散自易若猝臨以兵則眾畏死固結恐殺傷滋多遂單騎馳往剴切勸諭懲首要宥脅從不兩月而事平邵公奇公才以心精力果膽識兼優聞於朝得旨嘉獎奏保以直隸州在任候補均報可治鳳五載興水利設書院徃榛之俗爲之一變十九年調回淡水淡民焚香以迂途爲之塞甲午之役當軸議割臺灣和敵公以割臺非策爭之大府謂國家土地尺

寸不可與人並歷引石晉南宋讓地危亡往事爲證已而和議成奉命內渡頗有歸休之志築屋數椽課耕督織榜曾文正早掃考寶書蔬魚猪八字爲庭訓旋部議以臺灣裁缺人員應歸福建補用復起公知長樂縣事廿七年福州將軍增公移節奉天以公曩佐東省練兵著能名奏調同往遂以知府改官奉天增公治奉以墾荒爲急務奏派公爲錦州大凌河牧廠墾務總辦闢地數千萬頃歲得地價銀六十萬兩奏保以道員留奉補用并加二品銜賞孔雀翎復奏派交涉局會辦兼哈爾濱鐵路交涉局會辦及全省營務處幫辦身兼數差積勞致疾乞假回籍就醫時



閭邑明倫堂議加修葺又議仿朱子社倉法儲穀公各捐資飲助碧陽小學校爲全縣模範羣推公爲勸學總董公極力提倡勞怨不辭宣統三年五月二十日以疾卒於家壽六十有二三代以公貴贈榮祿大夫封一品夫人配邵氏封一品夫人子學源附貢生浙江補用知縣

贊曰公去臺時臺民攀轅號泣如失慈母雖感於時勢亦公之德澤有以深漬其心也穆公增公世稱名宦然練兵懇荒諸要政皆倚公若臂指然公之才顧以一邑一官盡哉近時宦業飾詞誇耀其實碌碌無足稱洎乎退老氣勢熏灼置義務漠不關懷而公晚年猶惓惓於興學救荒利益桑梓洵出處無憾者矣

黟縣四志

卷十四

雜志 文錄

八

世醫李君傳

歙縣

汪宗沂

李君諱能謙字光瑞小字啟贊黟之三都人也兄弟五人行次居首先世名文意列邑志尙義父壽昌名重六邑君承祖父學益自振拔弱冠發名存心正直在家孝友不僅以醫術見予僑居三都其子姓先後示予醫案屬爲傳謹授舉大畧焉湘鄉曾文正師在祁門行營得病時方暮春或疑爲怔忡宿恙投以藥未效君診之曰脉弦數而濡兩顴紅乾嘔熱未退而肝風將作乃平素陰虛之質感疫也非大承氣湯不可衆難之君於本方中加入犀牛角羚羊



角鮮石斛生地丹皮元參生竹茹料豆綠豆衣銀花荷葉  
生黃土一劑效二劑可遂如廁結糞下乃瘳始以補心丹  
真珠琥珀善其後於時疫氣流行所救活以千百計惜遇  
兵燹案存留不多也祁門洪斐庵歛醫葉馨谷之姻家也  
積寒凝督脈玉枕疽發改服溫補瘡潰膿不化薦君治之  
君乃以意處方取豬脂膏填塞瘡口令滿以燈芯從而灼  
之再灼方知痛進以陽和湯瘡始斂後十餘年厥子永鐸  
遇斐庵猶嘖嘖頌君神悟變炙法以延已之生也方張文  
毅公之治軍新安也因痰滯逆上衝頭作痛甚劇休醫腐  
至泛投養血疏風至頸硬喉梗牙緊肢涼痰聲漉漉起始

黟縣四志

卷十四

雜志 文錄

九

迎君君至辭弗任堅挽之徐思厥逆極寒痰固結將閉矣  
疲藥忌再投以附桂大劑抉齒強灌之受再進以金鑑桐  
油餞法寒痰多嘔出病機乃轉然後以半夏白芥子逐其  
痰以麝香牙皂通其竅以升麻薑桂達其陽遂下膠痰斗  
餘而疾愈君乃歎曰養血之品多生痰疏風之藥損陽氣  
治病必識病丹溪成法未可泥也祁門汪某得單腹脹家  
素貧乏力延醫君壹意以桂附理中治之甘餘劑而危疴  
得痊同邑漳川林氏子濕溫失治成骨蒸則又純以滋陰  
拯之干路汪氏子濕熱反胃呃甚將成瘞厥與以鮮石斛  
金沸草黃芩木通澤泄陳皮山查甘草代赭石加柿蒂藟



蒂而呃止熱淨婺源詹太史之雅孫脾虛吐利變亂時俗  
所云慢驚風者百治不愈延醫滿座君至曰是當內外分  
治以甦脾陽調補至月餘而獲痊徽郡守何家驄患三陰  
瘧以素嗜魚腥海味致邪深入診其脈寸關細尺微而滑  
是病邪深伏內有頑痰徒補無益以溫通兼桃枝柳枝爲  
煎方以草果白寇二仁爲丸方以白胡椒雄黃精生半夏  
末爲丸和以葱薑蜜汁爲納臍之方封以紅布膏三法並  
用而瘧悉退此外如休陽黃侍郎之淡陰太平崔贊善之  
痲痺浮梁石邑令之中風陳觀察之哮喘黟邑令劉之腸  
風田之懸癰王之肺痿均以大劑起之案逸未著錄君由

黟縣四志

卷十四

雜志 文錄

十

徽防成績保六品銜年六十有九子五人永澤永泗永鐸  
永鉉永堃永泗今猶世厥業孫雲川習醫濟世培源培芳  
均入學特以儒醫著稱

論曰吾人生秉陰陽二氣以成形莫大乎能生人能殺人  
用兵貴以殺止殺今兵事學堂林立而獨醫術無學堂生  
人何賴焉昔在中江與亡友袁公漸西縱言至今醫袁公  
新刊隋楊上善太素成因言曰外邦軍營中以醫士爲第  
一等人敬禮畢至今天下行省取營醫備數而已瘡痍之  
不卹而欲兵氣揚能乎否乎予心違其言黟之三都隋府  
基其中多名醫李氏以醫傳家凡六世黟人通稱三都先



生益信軍營上選當旁求而食舊德者之學之萬不可以輕視也

名醫李聲遠先生別傳

歙縣

汪宗沂

予家世業商足衣食者百有餘年先大夫獨嗜醫術儲書孔多予年八九歲時侍親側恒以醫案當小說讀之以是得知醫及長出就槐塘程先生學每假旋先妣許太宜人輒開方與食謂讀書苦當清心以免疾也比就碧陽學館居碧山聞碧山李氏以醫術遞衍至六世心慕之得與儒醫李子培芳相過從培芳年少有雋才一日出其父事狀屬爲文予旣傳乃祖世醫矣誼不可以默顧厥祖之治案

黟縣四志

卷十四

雜志 文錄

十一

兵燹多所遺而聲遠先生際承平時方案具存培芳方將編定之今特述其大者謹案狀先生諱永泐字聲遠父能謙自有傳先生事父孝親歿思慕甚繪像堂上事如生朝斯夕斯無倦色兢兢以克承先業昌明所學爲義務終竟名噪一時所活及千人而先生之心亦稍慰矣嘗訓培芳云醫之精義盡在書不達書理而欲成名醫未之有也培芳由是發憤力學先生卒年六十猶及見培芳之入鄉庠也

贊曰從古良醫綜賅內外洄溪特起動中竅會於維先生孝友型家著望三都蘇邇拯遐我來碧山公評在鄉僉云



先生尤擅瘡瘍其於察脈實有心得陽癰陰疽不差不忒  
休陽迤北金姓危病曰葉曰唐施治或訛先生往視喟曰  
非也脈沉無力按兩尺下是名骨痠豈作腰疽肺葉焦枯  
肝腎陰虛捨外取內治參六味及虎潛圓腫消未潰真知  
特見畧著一斑允矣先生今歸道山人失所恃郎君繼起  
內外兼長令聞不已予按孔祁鄉校同遊以視君家義方  
勉儔孝德仁風必昌永世下筆弗慚於焉詮次

李輝亭觀察傳

長洲 朱孔彰

李君宗煥字輝亭號爰得黟縣人少極貧苦逾冠遭寇亂  
行賈銅陵大通自黟出攜番銀一餅臨歧時妻言米肆中

黟縣四志

卷十四

雜志 文錄

十二

所貸未償奈何君卽以銀易青錢千三百餘留其半屬少  
償之因就道步至中途遇雨無蓋見置廁有敝笠取戴之  
同行者竊笑君晏如也及賈稍贏設小肆於荷葉洲有湖  
北舟人常載客貨往來大通君識面一日相選淚盈眦君  
問之曰遭風失貨須賣舟償之君見其幼穉多不操舟必  
死曰吾代償是時君訾不過百數十千錢竟分其半救人  
用是鄂舟往來者皆頌李君賢賈歲終贏數倍時長江初  
通九洑洲尙未克淮鹽窰而不行曾文正公筦鹽政改綱  
爲票加意招徠納貲三百掣籤許多得票不得者亦必酬  
一君乃集貲往掣得十三票江南平淮鹽暢行利數倍不



數年君爲富人矣如晉豫大饑燕齊蘇皖粵西江右鄭州諸大水凡助賑七八萬兩銅陵江隄獨修七千數百丈衛民田費復踰萬其他善舉非一端君不以此自多若行所無事然見善人則加敬見不善人則不甚爲禮或言君富宜人人加禮君曰奈吾胸中不能無是非不覺然而然吾本一窶人貧而富富而貧天之道也吾何憂君先交桐城蕭君敬孚蕭君博雅士也遵義黎君蕤齋蕤齋使日本回君與蕭君買舟訪之一見如舊相識蕤齋當 穆宗朝以諸生上萬言書陳利弊今 上擢用爲東西洋使臣託志忠雅文采照耀鄰邦常鄙夷一切不輕許可獨心許君故

黟縣四志

卷十四

雜志 文錄

十三

君歿後爲文表君之墓余讀黎君拙尊園稿愛其文之樸茂足傳君余又知君貧時事故爲此以補黎氏所未及君按前哲遺書先後助剗厠不下萬金如黟俞先生理初癸巳存稿汪先生南士集七家後漢書先君官黟有臨嘯閣遺書皆無傳本者余又感之不能忘君晚年喜讀漢書每令人講說其義君坐聽之凡忠孝事復與人言娓娓不倦嘗與子英元述卜式助邊及疏廣教子孫賢而多財則損志愚而多財則益過語往復流連喟然太息曰爲人不當如是耶子孫遵而孝謹旋以助晉賑功得旨賞道員卒之日喪自大通過黟遠近弔送凡數千人湖北舟子與洲邊



窮黎益感泣焚香不置云

贊曰孟子有言分人以財謂之惠教人以善謂之忠李君雖不仕蓋合於惠忠之道矣助國養民而不市德鍾離子之儔歟葉陽子之儔歟

胡君廷賢傳

朱師軾

胡君廷賢字希聖號軼士黟城古杏墩人生時母有夢麟之瑞故少名賜麟家貧年十一隨父習賈六安肆主人江姓父子皆名諸生愛君勤敏暇則授之讀通四書大義弱冠遂推君司肆事由是積累開錢醫各舖每業必與江合曰吾不敢忘本也父年甫五十君微窺其衰跪請歸養歲

黟縣四志

卷十四

雜誌 文錄

十四

時遺甘旨必豐必備二十餘年如一日父疾歸侍醫藥至病革未嘗解衣帶人以爲難母後父十餘年卒君聞訃跣行歸里逕奔殯所臥柩旁月餘晝夜哀號不絕聲宗族至今稱其孝君習儉自奉甚嗇然遇善舉施舍不吝在六倡修徽州會館又大洪嶺圯捐貲修治行旅便焉事具碑志雅喜儒術爲諸子擇師嘗誡之曰讀書須學古聖賢若徒標辭華博虛譽吾不取也有弟少魯旣授室更分業給之晚歲思集宗人修譜牒未果咸豐間粵匪擾六君隻身歸家人有慰藉之者君笑曰寇警時吾嘗私誓設遇之死耳今得還實天幸雖半生創業悉付浩劫然里中田廬無恙



可以庇風雨力耕種視學賈時衣履不完不猶愈乎黟亦數被賊但保不復警於願足矣十一年五月督師曾文正公由祁門移軍東流賊乘勢犯黟庚寅防營兵變賊尾之入城紳民猝不及避遇害甚衆君爲所刼不屈罵賊斷舌死語詳邑乘當賊氛之遽逼也家人走失於事後傳聞與君同時畢命者數十人其藁埋邑柏山之原時盛暑尸腐不復可辨至光緒年間始用人言盡收忠骨改葬焉吁亦慘矣哉予三文煥文運文郁文煥妻葉氏婉纔一月聞變同時抱子赴水死同治二年文運妻汪氏被賊掠至邑之松嶺完貞自刎死與君俱 旌如例文郁字篤修府學生員精岐黃術孝友敦行有父風

黟縣四志

卷十四

雜志 文錄

十五

朱師軾曰予與君族裔敬庵爲同門友因之得交哲嗣篤丈篤丈痛父之倉猝狗賊也而生平純詣懼或無傳爰以事畧求傳敬庵復爲君行述促迫之因節次成此篇俾後人知君敦孝行型家人實蘊蓄有素故臨難能無苟免而節烈萃一門焉以視世之邂逅捐軀倖厠於忠義之林者蓋有間云

汪奠階傳

汪潤烈

公諱承恩字殿華號奠階卜築近鶴山別號招鶴山人先世以業鹺起家公幼嗜學不染鹺務中陋習日手一編隨



侍父遊陽羨旋遭父喪越月餘有友載酒攜妓招偕遊艤舟催促公艤然堅却之遂與絕交時年纔弱冠其操守已如此厥後家中落與伯兄支撐會計不暇習舉子業然詩古文辭未嘗頃刻棄也婺源齊梅麓太史僑居陽羨公時以詩就正擊節稱賞由是交日密學亦日進時有徐曉村潘鶴亭者名下士也聯諸文人開社課屆期面作詩賦聞公名折柬招之公欣然入社每課輒壓倒元自我徽客陽羨者約千人向無新安公所創捐成之六邑旅櫬賴以安立義塚歲時祭掃無缺咸以爲公之力云生平論古有卓識與汪阮如相友善遊歷所至發爲詩歌哀集之不自是

黟縣四志

卷十四

雜志 文錄

十六

適潘紅茶師來黟阮如勸將稿求鑒定潘師許之遂刊行卽蘿摩別墅詩鈔也時年僅四十耳中歲遭烽煙警備歷艱辛未嘗形諸色當曾文正之駐祁門也毅然曰戡亂有人矣不可不直抒所見爰條數千言多中肯綮文正閱未終篇急請見惜有尼之者不果用公以義命自安嘗撰一聯云釜已生魚懶作朱門彈鋏客株猶待兔愛聽黃口讀書聲嗚呼可想見公之品概矣六十後境益困心益堅日以詩歌自娛書法益進索書者盈門不少吝與人交無疾言遽色惟誘掖後學則諄諄然勸戒之勉勵之必詳必盡博覽經史子集遇疑義必考證詳明使無遺憾乃已若堪



輿說猶餘緒耳晚歲家居歌詠弗輟手訂詩古文辭及雜著藏於家惜亂離中有散失者嘗憾焉屬續之先命孫曾環侍因言曰我邑可傳者若俞若汪若程數人而已有專集行世不至湮沒也吾人以道德爲先科名次之何用徇俗哉聲朗朗有喜容隨歌曰東魯常傳周禮樂西秦空佐漢山河歌畢食少許聲息漸微乃左右顧含笑考終享壽八十有三議叙同知授奉政大夫公父諱雲翮字南羽能詩稿有存者長子諱彬雯字孟卿邑庠生季子諱彤雯字季卿邑庠生俱工詩有聲庠序觀察姚公嘗叙其三世詩稿以待刊行云

黟縣四志

卷十四

雜誌

文錄

十七

儒林郎姚君三世小傳

程朝儀

君諱勝隆字有朋姓姚氏系出西漢龍驤將軍袞其後有諱剛者十世孫仲遷黟雙溪南十四傳而生修職郎諱宗佑卽君之父也娶汪氏有子四人伯勇仲遠季高叔卽君也君幼而歧嶷舉動若成人父母愛之鄉里器之及長事親孝事兄弟居家理謙已篤實樂善不倦有古人風乾嘉之際發著於浙江之常山縣其地有芳村之橋路則修之捐金以倡其事有爐山之祠宇則葺之輸地以廣其基施金而不吝有勞而不伐舉世所不能爲不肯爲之事而君毅然爲之非其向善之篤亦烏能是又在常買桐桑崗之



地在黟買料兒窟之地以爲義塚其貧不能葬者更量力  
貲助之昔范忠宣之麥舟猶依故舊君此舉豈出忠宣下  
耶君細行美不勝書姑述一二以爲當世風焉卒年七十  
有五以貲授州同銜階儒林郎葬黟四都干塘黃村埕子  
嘉全先於君二年卒別有傳

嘉全字瑞武幼聰敏性純謹雅好勤儉不尙浮華遇事樂  
善好施能如其父終身事親未嘗有疾言遽色寡兒幼視  
從兄弟如手足少長隨父習於常山規矩動作無違嘉慶  
初常邑荒偕弟嘉庭與邑紳襄辦賑饑事全活無算邑之  
人甚德之浙撫黃公獎額曰雅誼足嘉常邑侯羅公贈嘉

黟縣四志

卷十四

雜志 文錄

十六

庭額曰惠周里黨十六年復大饑君又出米六十餘石白  
金三百餘以賑弟嘉允復同彼地紳商力籌平糶并輸金  
二百接濟浙撫烏公奏聞君議敘九品嘉允加鹽知事銜  
其後甲戌乙亥天災疊告君又屢賑之久益不懈於是其  
地無有遠邇無間賢愚聞君名者皆知君之爲好善人也  
嗚呼如君者可謂善繼人之志者矣卒年僅三十有六未  
竟所爲知者惜之以孫同知銜加級贈朝議大夫葬十  
一都嶺下雙連井娶吳氏贈恭人子成鳳

成鳳字德勳年十三失怙哭踊如成人事祖父以孝謹聞  
越二歲而祖父卒君益發憤讀書納粟爲太學生及長之



常理先業循先人遺規不失尺寸凡值歲歉平糶兼賑邑人士交稱之君無德色亦無倦容可謂有祖父風矣嘗買童僕月餘詢其家乃單丁惻然削券遣之僕感泣泥首而去君此舉洵得古人繼絕意蓋其好善出於性生無所強而爲大都類此溪南舊有義塾圯廢君重築之藏書千卷使族人弟子肄業其中延邑中績學士爲師裁成不少至於修道路造橋梁置義塚施樁送藥諸善舉書不勝書鄉之人皆能道之姑舉一二以識盛德卒年六十葬一都洪水坑之蝴蝶山以長子振鐸同知加級贈朝議大夫娶汪氏繼娶吳氏皆贈恭人次子縉書邑庠生振思例貢生孫

四銘恭邑庠生廷棟廷選聯詔皆國學生曾孫九俱幼程朝儀曰易曰積善之家必有余慶昔萬石君訥言而躬行子弟皆馴行孝謹官皆至二千石天之報施善人固不爽哉儒林君以好善率後人宜其康彊逢吉胡爲朝議君竟不永年豈天道有時不可問乎然以儒林君爲父以太學君爲子朝議雖死而孫枝實蕃縹緲能繼猶不朽也

余積堂族伯傳

余攀榮

公諱大慶一名長慶字積堂黟城名賢里人捐職江西試用縣丞父尙標以謹厚聞公性爽直與弟長齡俱有名於時咸豐六年髮匪竄黟公與紳耆規畫防禦得獎六品頂



戴九年辦團出力張都堂保以本班儘先卽補曾爵相督  
大軍駐祁進取甯國黔與甯太接壤知公道路熟悉又營  
米業委與卞姓者會同採辦軍糧藉偵匪踪其後敘功又  
賞加五品銜終以母老絕仕進念足見公之天性純厚者  
矣軍興以來縣設練局籌餉辦團以輔官力之不逮公朝  
夕從事不避勞怨與貴勢不相階而貴勢亦卒不敢侮同  
治癸亥大兵之後野無青草室如懸磬公措資至江西南  
河購米回籍平糶每斗較原價減錢百文受惠者奚止萬  
家公其黔敖之流亞歟地方善舉必踴躍捐資不稍吝惜  
德本財末之旨公其有合乎居鄉規行矩步疾惡若仇強

黔縣四志

卷十四

雜志 文錄

二十

暴亦所不畏而對於端人正士無論老幼必接以禮貌鄉  
里惡少有所敬憚而改過者蓋不可勝數焉嘉慶癸酉九  
月生光緒庚辰四月卒得年六十有八德配王宜人先公  
二十八年卒生子發熙懷才未遇齋志以歿繼配林宜人  
生子五發煦國學生發駿縣學生發昌國學生發鐸發澤  
均從九品職曾在臺灣福建奉天等省從公

論曰古人以不官爲高今人以得官爲榮古今人何不相  
及若是耶嗚呼國家之敗由官邪也才智之士日孜孜於  
利祿之途此豈國家之福耶若公之得官而不爲蓋有古  
人風焉



李麗春先生傳

何承培

先生姓李氏諱有祥字麗春黟之鶴山人其先世自祁門遷黟祖諱時照父諱尙永並有隱德先生昆弟三於次爲季少失恃事父以孝聞先生生性淳實言動不苟年十六學賈於城肆會計精密不數年屈其儔人居恒恂恂無幾微市井氣遇衆紛亂徐出片言解之無不當意以去暇輒涉獵圖史旁及葬書卜祖兆於深坑仙鶴林之陽天豁地闢非執形家言者所能殫究其精識類如此李氏在黟雖名族而子姓未大蕃先生旣足不出鄉里彌篤於所親咸豐朝邑遭洪楊之亂族中祀產簿籍俱灰滅有老農名世

黟縣四志

卷十四

雜志 文錄

三

祥者饒心計習知族舊事而先生下之歲收遺產所入以供報饗世祥病亟先生乃卽其榻致慇懃條諮縷記復周履阡陌顧佃衆無異詞於是挾冊記註盡復舊觀而族祀益以光大先生嘗曰吾家貧不能興義田義莊以贍吾族願我族人奉厥先疇俾勿并於豪強淪於兵火而已嗚呼其志亦可思矣生平惟以未服儒服爲恨有三男子長世祿次世祜次世福先生當中歲極困時猶命世祿出就名師師課其勤惰先生喜怒亦因之及世祿爲諸生有名而先生下世矣卒年五十有九階從九職銜累贈奉政大夫贊曰咸豐同治間髮匪數躡吾黟世家大族公私彫敝亂



定能光纘前緒者十無四五先生際兵火之際旁皇於一老農修其先業以無墜祀事功在李氏著於家乘傳以示後宜已承培與世祿同學宦世祿守庭誠吏閩有能聲值國變歸不復出命其子則綱創修宗譜狀先生而屬承培爲之傳因論次之如右益嘆先生所爲豐其族昌其後者遠矣

汪冀階先生別傳

戴之傑

雷岡汪氏爲黟北望族然以詩鳴者百餘年來伯英先生之後先生一人而已先生諱承恩字殿華號冀階天懷清曠淡於榮利自少卽絕意進取遨遊陽羨間從婺源齊梅

黟縣四志

卷十四

雜志 文錄

二十三

麓受詩法已復過錢唐觀廣陵濤攬孤山西湖之勝所得山川奇秀之氣一皆寄之於詩當是時士方肆力舉子業博取科第案頭所習者率兔園冊子六經或不能盡讀見先生著作輒斐斐訾議而先生若罔聞惟與二三勝流唱和而已所居正面東山前臨大溪南湖隔溪斜抱先生於宅傍隙地植桑數百本晨起扶筇瞻眺東山曉翠如潑湖水溪光映旭日浮動作金色牆下桑清露未晞濃陰團罩如在綠天中每誇於人曰只此便可澹心靈延年壽不必遠求蓬山餐沆瀣也嘗過吾祖譚詩竟日不倦值吾祖連日遊山謂吾家人曰近處有人撲殺虎子虎母咆哮覓子



若歸戒勿登山恐逢虎怒也吾家人笑領之晚益無聊賴  
遇市人輒令道異聞或辭無有轉請先生說便隨意捏造  
然事多關懲勸易動人聽故人雖知所言之詭皆樂聞不  
厭也書初法香光晚年刻意大令旗亭驛館多先生筆蹟  
然非其人卽求隻字不可得光緒八年以壽考終年八十  
有三所著摩蘿別墅詩鈔已刊行世仍有續鈔藏於家家  
世及子孫詳家乘此不具

贊曰之傑兒時聆先生說詩不喜山谷後讀山谷集頗異  
先生言昔東野詩爲昌黎推重而東坡乃有空螯小魚之  
誚遺山且目爲詩囚夫兩公之論東野誠似過當然固各  
有特見非膚淺者所解吾乃因先生所不喜推先生所喜  
而先生詩之所詣可想見矣彼向之芟芟訾議者惡足語  
於斯

李永鐸先生傳

胡兆瀛

爲子孫計者人皆有是心爲祖宗計者則杳不多得先生  
邑之碧山人李其姓永鐸其名鳴遠崑石又其字若號爲  
名醫能謙字光瑞公之第三子遭家不造年六歲喪母十  
三喪父十四始從伯兄永澤學醫十六饑驅出走懸壺豫  
章甲申歲豫章洪水爲災幾成澤國先生於是戒心歸  
而攜眷易地隣邑之祁門冷淡生涯門堪羅雀歲丙戌復



遷本邑二都蓬廈恃三指供數口綠米紅鹽日呼將伯賴德配查氏克勤克儉憂少解漢劉向謂王政自內始先生得賢內助也生子二女四子少者夭長者成讀書已博青矜先生心存好善囊無餘資癸卯年旋歸隴西故里醫名始噪日無甯晷然雖一醫人確有疏太傅不爲老悖遺錢害子孫見除置住宅田產祀會夜燈周急等事外更憂心於家廟之不宏積銖累寸頗有毅力於丙辰丁巳二年中相宅龍田重建祠堂心勞力竭形神俱憊致家廟甫成而梁木已壞嗚呼傷矣其不爲子孫計而爲祖宗計者竟如斯而已乎天道茫茫何堪搔首幸有猶子培芳能繼厥志

黟縣四志

卷十四

雜志

文錄

十四

覆簣成山鄉人皆以賢竹林目之前乎此者先生照清例由從九報捐州同請二代封典覃恩奉直大夫以增宗族光寵復送其父位入邑崇教祠永享春秋馨香祀出乎報本之忱也先生居家居鄉之昌江之鳩江皆接人以禮和藹可親性耽花木尤嗜名山到黃海四次每次必買松歸植不吝值凡有求先生醫者必勸人勿食牛肉一言語間尙見善心流露故爲醫四十年死者生之活人無算有與乃父齊名而爲我邑醫家之首屈一指今年民國戊午正月十六日先生感春溫症而終距生同治甲子十二月初九日享年五十有五先生長子仲侯悲其父屬傳於予以



予與先生居比鄰交莫逆深知其詳不致貫一漏萬亦以見其孝心也予愧不文勉爲之傳

贊曰松筠其操圭璧其躬頌方施藥妙奪化工惟勤業廣惟志功崇仰瞻祠宇造福無窮鄙寬薄敦先生之風

### 黃孝子小傳

戴之傑

黟北際村有孝子曰黃永壽同治時人宋侍御黃葆光公之支裔也幼失怙兄亦早逝家赤貧以擊柝養母母中年失明起居服食永壽朝夕調護備至巾裙厠踰躬親浣滌夜出擊柝先視母就寢與否務令安帖乃敢出隆冬滿安梢柎於爐以進每當朔風夜號急霰打窗永壽擊柝從外

## 黟縣四志

### 卷十四

雜志 文錄

三十五

歸齒戰戰作響母令取爐溫則對曰兒此間別有爐實則已爐中火燼無暖氣取敗絮裹以自護終不忍取母爐也鄰人納日南檐永壽負母出雜衆人中談笑已則倚牆捫蝨暑夕負母當風坐已從旁驅蚊揮葵扇拍拍有聲同村戴之雋善永壽永壽擊柝過之雋門望窗中燈火呼曰先生何未睡乎夜已深矣之雋開門招之辭以母未寢值已寢入亦不久留尋村中設更房置街衢中爲抱關人寢食之所永壽有時負母同往過市中市人笑之母或聞而笑永壽亦啞然笑也偶得肉食盡以奉母有餘留以再進已惟蔬食而已嘗自言已不肖不能娶妻供甘旨奉養承歡



惟執賤役餬口實無以對老母言已輒潛潛淚下後母於光緒二十八年以壽終永壽居喪日夜悲號竟以哀卒距母歿才二十餘日

戴之傑曰吾兄嘗爲予言永壽事母予偶經永壽門見瞽媪坐中庭知爲永壽母因諦眎之髻髮如銀皆就理顏色豐潤身上衣雖敝然補綴齊整澣濯光潔因以向所聞於吾兄者徵諸其鄰言皆無間夫孝庸行也而世顧以割股療親詫爲奇孝一二賢者復爲文以張之永壽事瞽親無驚人之行然其境至苦其事至難歷二十餘年無幾微懈怠雖欲不謂之孝不得也予愧不能表揚永壽而永壽實可傳不忍聽其泯滅無稱也故爲之傳嗟乎庸行若永壽泯滅無稱者豈少也哉

李壯士傳

李世祿

壯士姓李氏佚其名咸豐時人也膂力絕人而宅心仁厚洪楊之亂大江以南無淨土夥當浙贛往來之衝蹂躪彌甚寇至其前行者號曰先鋒或數人或數十人所至村落有守望者易其徒少聚而殲之及大隊至知其事焚掠慘殺而全村爲墟矣乙卯嶺下之役迄今邑人言之有餘痛焉同治二年春有先鋒數人至我村村中老羸婦孺逃散幾盡獨壯士居守不去寇見壯士擬之以刃壯士施其拳



勇立斃之餘寇怒悉來鬪壯士空拳虎吼大呼曰吾恨不能盡殺若輩以除民害然殺一賊則除一虎狼亦快事也乃賈其餘勇鬥不數合斃二人焉其一欲逃壯士復追而斃之謂令一人生還則吾村無噍類矣俄而旗幟如林大隊且至壯士無撓色將避去旣而念曰賊善復仇今屍具在見之必遷怒吾家不足惜其如吾村何乃悉將賊屍移置池中覆以稻稈滅其跡而後去寇退乃集而埋之一時見者聞者交口稱曰壯士壯士余以是傳之云

贊曰壯士大呼殺賊人知其勇矣而移屍以免全村之禍又何其智且仁也世俗不古專務嫁禍於他人以視壯士憾族父老曰是名翊枝其或然歟

黃敦禮別傳

王立中

君名敦禮字緯仁姓黃氏黟之黃邨人年二十餘爲諸生不異常人性端謹從抑齋先生遊受程朱學深入間出若有宿契嘗終日正襟危坐有所論辨口吃若不能析其始卒見之於書亦復遲回審顧揭笠摯以出之予文質無所底頗廣涉衆流君獎勸備至又時時引程朱之說閑其放逸懇懇焉若出於不得已生平不事著述所爲札記散在同志予亦藏其數紙皆平日論學惟恐不當出而與同志



商權者平甚無奇顧細細讀之均衷於爲學律已字裏行間時露其戒慎恐懼之忱君所居距城十餘里月必來會每當風雨之夕抑齋先生坐聽事中門懸一青布幔用御寒氣燈火青熒坐及門二三子論所講業君則端坐聽受少間難退輒記所語請益焉年四十餘死於水悲夫

余君玉文家傳

清史館協修

王崇烈

君姓余氏黟人諱榮麟字玉文璘齋其號也黟之余姓爲邑望族君之先有曰環山先生者在元季以耆德應邑侯聘保障之功在鄉社於是時始遷居城西之名賢里其後族日以大而代有聞人明天順中有諱衍者以春秋學舉

黟縣四志

卷十四

雜志 文錄

二十六

壬午科經魁歷仕至福建建寧同知治行爲當時第一列名宦鄉賢祠祀蓋君之五世支祖也自環山先生以降十數傳至君之曾祖及祖若父皆以厚德貽子孫爲鄉人所矜式曾祖諱立隴祖諱有餘父諱瑞珍舉丈夫子二君於次居長幼歧嶷爲伯祖諱承恩所鍾愛少長能讀書善悟會年十二讀論語至其爲人也孝弟章憬然曰孝弟者爲人之本也苟不孝弟小則犯上大則作亂顧可乎哉因榜所居曰務本蹟君平生立身行事殆無不於此基之初君伯祖有子二長早卒次有廢疾一日率君謁祖墓喟然曰吾死誰展吾墓者君俯伏涕泣曰從孫猶孫也公之事卽



孫之事請銘諸心書諸家乘世世子孫毋得忘公其善養  
春秋也後伯祖卒哭泣之哀幾踰禮時人以是知君之篤  
於天性旣而以食指繁棄所習舉子業乃學賈漢陽中更  
髮匪紛擾顛沛之際人不堪其艱苦而君處之夷然奉事  
諸長者無少懈生養死葬一準以古禮論者尤難之而尤  
爲人所難能者則莫過於整理祀產一事蓋余氏祀產素  
豐腴兵燹而後蕩析無存君於喪亂之餘躬規復而振興  
之使一一如舊貫舉先世所謂歲時之祭祠墓之修孤獨  
之養鰥寡之贍喪葬之賻婚姻之資使無毫髮遺憾得以  
餘力助賓興賑荒災修橋路至於今其鄉之人猶津津樂

稱道若其平居教子弟睦宗族慈祥惠愛咸得其所未或  
能有間言也又嘗訓其子毓元曰吾族所急以待舉者莫  
若修宗譜以崇本源立學校以培子弟凡此皆讀書人事  
可不勉乎今公子毓元將已次第行之於以知君之願終  
克償而重惜君之不及見也君生於道光丙戌卒於光緒  
甲午得年六十有九嘗入貲爲候選從九以次孫崑職例  
贈奉直大夫元配徐宜人早卒別營兆域繼配汪宜人卒  
以民國三年五月與君合葬於城西黃土嶺之原子一卽  
毓元優廩生五品職銜今記名知事女二長殉咸豐辛酉  
之難次適黃陂汪皆汪宜人出孫五長壽峻清翰林院孔



目次壽崑清光祿寺署正次壽照壽堯壽巖俱業儒孫女  
四曾孫二長善學次崇仁俱幼

王崇烈曰公子毓元持行狀囑爲傳旣敘其大情如前矣  
顧猶有未盡者據狀載君臨終誠毓元語曰願後世子孫  
謹慎勤儉不忘孝弟之本能自立爲人則足慰所望矣嗚  
呼推君之語充君之志固猶是宋諸大儒理學之宗傳也  
抑君居近紫陽故里濡染者深耶或根諸先世所留貽而  
發於天性然耶烈旣備位史官例以揚善傳行爲職覽君  
行狀謹敘次其事以備採擇且寫寄公子毓元以應家傳  
之求是爲傳

黟縣四志

卷十四

雜志 文錄

三十

余博思先生傳

休甯 汪善昌

先生黟城名賢里人姓余氏諱士溥字博思尊翁國炳公  
之第三子少習舉業以洪楊之亂習商於休之和村鹽棧  
與吾父爲道義交以此先生之歷史耳熟能詳先生年十  
七喪父事母孝母患風疾需人扶持先生日侍湯藥弗離  
左右母歿哀痛成疾心神恍惚者數月德配程孺人行婚  
之初岳家以難辦妝奩不受聘禮尊翁手批田園兩處以  
爲服飾之資及析產時先生謂孺人曰迭遭兵燹家徒壁  
立卽奩物亦復無存我父拔給之田仍與兄均分孺人深  
明大義欣然聽從先生之孝友如此先生性嗜學手不釋



卷無事不出戶庭家貧力難置書或假於親友或租於書肆焚膏繼晷每至夜深楷字鈔錄盈筐累篋學問淵博雖通儒尙不逮焉醫書汗牛充棟各執一偏先生融會貫通獨有心得以古聖經書爲體以後賢時書爲用臨症時細心體會議病立方故能著手成春活人無算求醫者踵相接當時不取醫金病愈不受酬謝貧不能藥者且資之數十年如一日巨室富家雖重資延請亦不往朋友有疾或不請而至以是休之士大夫常樂與之遊先生管理棧務事必躬親獲利則較人見優折耗亦較人見少六旬以後精力漸衰同人皆勸其節勞先生則謂食焉而不盡其職

必有天殃享清閒福非在棧供職所宜同人益加勉勵循規蹈矩如對嚴師先生有過必規雖居停亦爲之敬畏有輕佻子弟經先生苦心婆口無不改革前非薰其德而善良晚歲在棧失血汗脫者再氣冷如尸同人倚牀抱之相嚮而哭歷數時始蘇猶不忍釋手其維持調護無異家人父子非恩德入人之深胡能致此當時擬送先生回家養疴而先生以東君副經理均不在棧爲辭同人曰脫有不幸將若何先生曰死生有命死於棧猶死於家也同人曰請弗許星夜促令子至服侍湯藥閱數日副經理到交代清白乃返於以見先生爲人謀事之忠雖臨危不變也先



生家居日少治家以勤儉爲主而以身先之一布衣十餘年非祭祀賓客不茹葷獨於培植子弟讀書不稍吝惜親朋無故借貸常不輕與遇有慶弔無不從優飲助銖積寸累而家計亦稍裕如惟不營產業有以權子母言者先生則謂與其取之多不如用之少不節若則嗟若雖多何益後世子孫能讀書明理師吾儉足矣而多財則反爲子孫之累先生歿於清宣統三年春秋六十有六子一名麟紱清附貢生孫春泉春煌曾孫文達

傳者曰先生予父執也予少年多疾先生藥到病瘳以爲先生之技神矣及長聆先生之言論繼而觀其行事乃知先生苦心孤詣濟人利物求之當世士大夫中其品學殊不多覯誠所謂不爲良相必爲良醫者易曰積善之家必  
有餘慶知先生之世澤長矣

汪君遜修家傳

江西南豐 趙惟熙 芝珊

君姓汪氏諱選敏字遜修世居安徽黟縣石門屢曾祖諱嘉裕祖諱朝月父諱廷週累世力農有隱德君父習商業服賈蘇州君年十四從父蘇州學爲賈每念母在家勤苦輒不樂父因使歸治貿易於鄰邑休甯西鄉曰江潭數年業大贏江潭僻處萬山中距黟七十里三兩月必歸省母胡氏歿哀痛慘成喪葬盡禮旋以其父年事日高遠貿爲



慮遂之蘇迎歸奉養越二年粵寇興大江南北蹂躪幾遍  
黟被禍尤烈乃奉父避亂於江潭族戚相隨而往者老幼  
男女百數十人皆仰食於君供給周到寇退族戚還鄉悉  
資以錢米歸皆不至於凍餒向使非君以遠貿不能養母  
之故不營江潭一肆則髮匪之亂不僅無此樂土奉養椿  
庭閤家完聚卽族戚避亂之百數十人皆無所倚賴不知  
流離何狀矣僉謂爲君之篤行所感召信也君性善施與  
凡屬義舉無不竭資贊助然平居飲食服用未嘗稍奢靡  
終其身不改行卒年五十歲詩曰雖無老成人尙有典型  
君豈不謂古之老成人耶配程氏生子士基業儒早逝繼

黟縣四志

卷十四

雜志 文錄

三十三

配李氏生子士琳字佩玉六品銜在任候補縣丞甘肅靈  
州吏目恭遇覃恩加二級贈君爲奉直大夫並如其官程  
氏李氏均贈宜人季子維善字仲玉縣學生君卒之年李  
宜人年三十守節撫孤有純德懿鄉人胥敬重焉孫哲字  
學甫以縣學增生援例爲縣丞分發甘肅補用以勞績保  
升知縣加同知銜孫登藻曾孫賢相賢書皆已成立

前史官趙惟熙曰予以編修出守甯夏抵任後君子佩玉  
在靈州吏目任以僚屬來謁見予夙知其供差惠農渠局  
治渠著績爲甯夏平羅兩邑民所愛戴爲之立石紀功君  
孫學甫好學能文又爲予之僚屬多所倚畀子若孫之賢



達誠所謂德積厚者流自光也國體改革後君孫回籍省親予亦辭職入都今年秋君孫來京謁予謂黟邑重修縣志手狀求爲家傳予苦病艱於構思然重君之篤行樂善不倦誼不能辭乃執筆爲傳次於右以爲君之鄉人垂典型於不朽也

汪君佩玉家傳

山東福山 王崇烈 漢輔

汪君哲持其尊公佩玉先生行狀屬崇烈爲作傳崇烈再拜而受迴環讀之不禁擊節歎曰若汪公者可以不朽矣公於光緒二十六年權寧夏府經歷案牘之暇究心水利嘗手鈔寧夏水利志全書以資掣討初寧夏有惠農渠爲

黟縣四志

卷十四

雜誌 文錄

三十四

境內四大渠之一歷年被河水冲刷渠道斷入黃流久失灌溉之益寧夏平羅兩邑民罹其苦至公乃身自履勘繪圖貼說謀於當道曰惠農渠自葉昇保俞家嘴引水入口蜿蜒而下抵楊和堡之南東偏黃河西倚黑湖今河與湖連須從湖中直築兩埝建立渠身而是時已仲春尤須先築湖堤一道劃分河湖引上游渠水注之湖中再由湖引水入渠方於春耕不悞復於湖中建築兩埝三閱月可竟其功當道素知公能卽檄公董治其事至期一如公言計成正閘一旁閘四尾閘一暗洞七飛槽六渠正身長三百五十里大支渠十四道長二百六十九里溉兩邑民田約



五千頃邑人感戴立碑堤上曰汪公堤并勒石紀其績蓋渠廢者三年今淤水既注於黃流而湖西偏新淤之地蓄泥皆成沃壤居復闢湖田萬畝上裨國計下裕民生殆亦公之始願所未及者也公家有世德幼遭髮亂蕩析之餘產遂中落及公成立事母撫弟讀書治商咸有條理業日益復會公外舅黃小颿先生選授甘肅正甯縣知縣乃偕往爲綜理署中事以其暇日佐治文書精心律例旋援捐例以州吏目指分甘肅嘗一署甯夏典史一署甯夏府經歷初補涇州吏目續補靈州吏目在甘久有政聲如甘源道聯公星樵布政使曾公懷卿王公晉卿及總督陶勤肅

公皆知公者也故治保甲防回匪綜理甘新糧台創立靈州巡警膺特保升縣丞辦理平羅教案僅治首犯一人悉釋株連無辜公之政績卓卓可稱者類如此光緒三十一年公以樵靈金吳捐局差道經楊和堡爲紳耆偵知不約而集者千餘人爭遮道進酒食挽留三日及公歿後宣統元年公子哲以樵花定鹽局事再經該堡而耆舊猶相問起居及語以捐館舍無不泣下失聲噫公之德澤在人者深矣公諱士琳字佩玉徽州府黟縣人生於咸豐壬子年二月初八日歿於光緒戊申年十二月二十四日享年五十有六太學生六品銜序補甘肅靈州吏目候補縣丞以



子哲職晉贈奉直大夫曾祖諱朝月祖諱廷週父諱選敏配黃氏晉贈宜人子一卽哲同知銜甘肅候補知縣女一適舒氏孫一賢相孫女一字程氏

王崇烈曰余昔聞黃河未入山西境凡所過處民間有一水一麥之利蓋一石水而六斗泥水過便淤爲沃土今觀汪公之治渠而乃恍然於地勢雖不同亦賴有人事範圍於其間也使聽其泛濫冲合安見地之自得其利也耶雖然公之治績僅在一隅而其功德聲譽比之古人善治水者鄭國白公何加焉若使今日言水利者皆能如公之殫力所事則其惠可勝言哉然而汪公自不朽矣

黟縣四志

卷十四

雜志 文錄

三十六

清封朝議大夫何公東樵傳

浙江蕭山

俞省三

公諱震字東樵號寄園南屏里人里有淋瀝古刹故朱子講學地公讀書其中喜爲徑大字雄勁有古致老師宿儒咸驚異之性孝友嗜古成癖成童卽好篆隸按左右列金石文百數種課餘輒摩擬不勦年十四父朝議大夫鶴年公母汪太恭人相繼歿家中落適粵寇竄南京文正督師祁門黟祁毘鄰寇踪蹂躪殆徧公挈昆季流離避難家藏篆隸諸刻悉付於火兄弟四人恹恹無以爲生公喟然棄儒而賈游吳中從木客往來販運得貲以贍家暇仍瀏覽經史或摹臨漢魏碑版日以爲常湖口高碧湄先生碩望



傾一世尤長漢隸見公書激賞之引爲金石友劉都轉蔚卿亦好古隸得公如舊相識昕夕接席論文字析奇疑公於談文外無干求其品概侔乎遠矣公既承當代名公推重益致力於書心慕手追垂三十年迺稿集三漢碑訪德清俞曲園太史吳縣吳清卿中丞費屺懷太史皆潛挈金石世所稱泰斗者咸重公書題記數四晚年復臨西嶽華山孔廟禮器史晨諸碑未付刻惜俞吳諸公未見也公雖業商而手不釋卷居恒以朱子小學教子弟吳中士夫崇公品誼爭樂與遊性慷慨好族誼以是家無恒產冬一敗裘蕭然行李毘鄰盛方伯旭人雅重公遣价贈百金爲卒

黟縣四志

卷十四

雜志 文錄

三十七

歲貲並游揚於蘇撫奎樂峯迨奎中丞聘書至而公又臥病於白蘋洲不果往嗣八陽湖余太守澹湖幕東南最契洽太守歿公卽僑居吳門日模金石以自娛不復涉世事矣會山東大災公以所節六秩壽貲助賑由太學生加翰林院待詔配余恭人勤儉有淑德子五長次三均歿四致祥經商武林有聲循直隸災賑例獎同知銜加一級爲公請封誥命至而公已瞑矣幼致綸以府經歷需次鄂省歷辦要差值武昌起義大總統黎公被推爲都督知致綸才羅入幕府充秘書官孫男六嘉玉嘉琪嘉恒嘉椿嘉第嘉箴嘉玉已畢業中校獎入文科大學餘與孫二皆幼讀公



於歷朝金石無所不窺臨幕輒得其意不拘拘襲其貌余與致祥爲尹邢得徧讀公所臨刻碑版紙上虎虎有生氣未嘗不擊節歎賞其晚歲所書尤精蓋純而進乎化矣公生清道光癸卯年九月初十日卒於光緒甲辰年九月十五日享壽六十有二卜葬於杭州拱宸橋之北謝村巽山乾向贊曰公之才足以用世公之學足以名世生丁憂患棄儒就商不克竟其志又不遇於時而僅以書名蒼蒼者何豐其德而嗇其遇耶然而公之書傳矣公亦不朽矣

汪淦庭先生入祀泗安徽州會館傳 甯 濟

汪先生學禮字淦庭從九銜世居徽州黟縣之七都瑪坑

黟縣四志

卷十四

雜志 文錄

三六

以道光十年某月生父諱載陽字芳林母某氏第二學義學廉皆先後隨父貿於浙之泗安娶李氏未育卒繼娶李氏生一女先生少以孝友聞強幹有爲習典衣業旣冠東君張公幼翹服其能竟以肆務悉畀以執旣接事兢業以圖歷獲優利咸豐間賊踞甯國廣泗壤地相接寇賊往來靡定雖避遷山深林密無不被掠數四先生恐負付託之雅通籌熟計將貨物雇船揚帆運浙不數月泗賊退先生歸泗安將貨物冊籍逐一交卸統計貨資羨餘倍舊聞者慕之嗣以母喪父老辭職遄返東君故留逾數晝夜至泣數行下先生喟然曰欲顧友誼有虧子職非道也母旣喪



父漸老侍奉隨歸歸而後來或其可也東君韙其言乃任還家逾年抵泗筦理如初先生信義久孚聞望益著泗之徽人嘖嘖稱道無論已卽其間之鄉先生靡不樂聞先生之緒論遇有危疑之事徑就先生以調劑胥渙然冰釋年既老退而家居捐租宗祠歲供祭祀地方義舉竭棉飲助從前父遺逋負積算三百外悉償無缺二弟歿遺孤三歲三弟歿有子三均幼先生飲食教誨撫如己子李孺人亦善體先生之志而贊助以成孺人歿以三弟次子儉亨爲後二弟後各分以租贍其食用另備祀產輪值時祭使無缺乏以光緒三十二年某月某日卒享年七十有七旣歿

不數月泗安諸董事以栗主書其銜名姓氏送入徽州會館先達龕中座其主於第三崇德報功永垂久遠其子儉亨時以治喪在家未之知也明年出質泗安始悉其事乃奔殮諸公之門且哭其父位前然則先生之於泗安平昔之足繫人思者亦約畧可知矣是宜系之以論

論曰吁嗟乎徽質泗安自昔至今實繁有徒而享祀者位僅有三是非之辨去取之嚴可謂慎矣豈若世之入貲奉主盡人子之孝思永春秋而享祀者比哉雖然泗安之待汪先生於死後要必先生生前之德行道義見諸地方公益公利與夫持已及物甚孚於世道人心然後世道人心



服之不已繼且感之感之不已又思所以表彰於既往樹  
範於來茲以存不忘之思云爾濟與先生不相識茲讀吾  
師胡蔭吾先生書與先生事狀知吾師與其子儉享有甥  
舅之誼不能以不文辭謹按狀爲立傳並系以論如此

何安禔翁家傳

盧琪

翁姓何氏諱朝名字安禔號萼樓太學生南屏人其先世  
從婺源菊徑遷黟碧山由碧山分遷中軸由中軸分遷南  
屏父諱永椿生子四曰祿曰名曰壽曰萱翁居次性孝友  
父歿家貧母有所欲必竭力致之母逾八旬舉動需人翁  
侍左右不懈卽賤役亦躬親焉昆弟蚤逝撫諸孤成立不

黟縣四志

卷十四

雜志 文錄

四

足者分財以周之翁生平尙義好施與咸同間黟屢遭寇  
擾避亂者轉徙流離多餓莩翁憫之庚申冬倡設粥廠於  
南屏山下之喜槐亭用寓賑於售之法全活者以萬計時  
或雨給以笠寒給以炭無蔽體者給以衣履甚且病者施  
藥歿者施棺兵燹後暴骨纍纍倡買烏株山脚以瘞之囑  
子孫歲時祭祀曾文正公督兩江時獎額曰義重鄉閭又  
曰敦善不怠時年五十也六十後猶樂善不厭凡義舉靡  
不力爲贊助休邑復建藍渡石橋翁捐貲爲倡翁經商屯  
溪且往返督工不辭勞瘁光緒十年與本邑程君輝堂青  
陽曹君履安績溪胡君允恭倡修屯溪石橋衆推翁司理



總帳捐費不敷多方墊欸以蔽其事他如造屯溪河街石  
路置休邑義塚建橋亭購水龍及修油榨下咨口大路善  
行不勝枚舉年七十江蘇巡撫吳贈額齒德兼隆年八十  
安徽學政錢贈額杖朝碩望光緒辛卯年三月初三日卒  
距生於嘉慶壬申年三月初八日享壽八十配汪宜人先  
翁卒側室葉氏侍翁十二載卒子乘龍克繼父志服賈吳  
中凡施棺掩骼修道路給旅費濟孤貧諸善舉屢爲之又  
精形家言置雞公山黃陂坦嶺頭等地爲義塚七十生辰  
盡以壽貲賑皖北水災捐職從九請封翁登仕佐郎孫六  
二五六均沒長觀華性好古多藏古書畫由太學生捐州

黟縣四志

卷十四

雜志 文錄

四十一

同加二級請封贈翁奉直大夫三致傑隨父商於吳光  
緒丁未徽州水災致傑在蘇省勸募洋六千元先以四千  
元交屯溪公濟局發賑後事寢仍剩二千元添設蘇省徽  
州會房舍四致翰敦厚有祖風曾孫四崇範嘉義嘉桂嘉  
澎崇範南京中學畢業餘均幼元孫一翁初葬七都漳坑  
復遷葬傅岩山

盧琪曰翁沒數十年矣迄今遇善舉都人士無不思翁猶  
津津稱道弗衰以翁家不中貲而好施不倦故享高年孫  
曾輩亭亭玉立人以爲翁之陰德所致世之擁厚貲以貽  
子孫而不顧公益者視翁有慚色矣



何公朝貴忠義傳

程珏

南屏十二世忠義公姓何諱朝貴字治平少聰敏秉性忠直父宇橋公服賈休陽母劉孺人勤儉持家有子四公居長事親以孝著里有淋瀝古剎爲故朱子講學地黟多樸學經師宿常於此授徒公往旁聽輒大領曉兼通術數時人以嚴君平目之古築有膳灶龍曾從公學爲人卜卦聲噪十二都公尤愛經訓館於家廟儒雜並治適粵寇竄南公隨辦鄉團施粥施衣於本村喜槐亭同治二年寇至公殉難於家廟中所編輯卜筮堪輿悉爲灰燼殉難時公罵賊以終妻黃氏孺人聞耗義憤填膺直前齧賊渠亦殉之

黟縣四志

卷十四

雜志 文錄

四三

產五子長曰燮次曰堃三曰謨四曰訓五曰業二三四早沒公輕財好義故歿之日家無餘貲五子業營業江蘇追思先德上其事於當道贈額曰義烈堪欽入主黟忠義祠

胡麗生先生傳

門生

李世祿

先生姓胡氏諱桂金字麗生安徽黟縣人家世習商先生崛起爲儒者父某公商於池州東流挈先生往從師學師嚴課程密惟先生獨完隔日課率常先子夜豫習之達旦不寐志學之勤如此弱冠以第一名入縣學再試食廩餼先生爲文日益工有述作斐然之志無何洪楊亂作東流地介江表爲池甯衝勢垂岌岌先生遂隨父罷業歸旋丁



艱哀毀如禮又念貧甚不能煮字爲活因竭力設城肆以養母朝夕甘旨必豐必備內外稱孝無間言亂定後重溫舊業復以造就人才爲己責弟子日進數試鄉闈薦不中額先生遂壹意教授每解經義使人怡然渙然故出其門者言動謹飭望而知爲先生弟子鄉之耆儒碩學咸推服焉世祿年十四受業門下閱二載以貧故欲易業先生止之誼誼以憂道相勗時祿年尙少意亦動卒從先生言今齒髮弁衰雖學宦不必如人然身歷滄桑竊硜硜有以自守慄先生教也先生貌豐體修自奉甚約束脯所入悉推以濟族親其世父家無擔石儲從兄又多子女先生收養

黟縣四志

卷十四

雜志 文錄

四三

之無德色無吝容猶子榮達遭亂相失先生遍訪擊之歸爲立家室今其子孫粲然先生道充於身義周於親類如是祿侍先生僅聞舉業不能狀先生學行之什一又語錄無傳甚可痛也先生卒年五十有六孺人潘氏子一女五孫二曾孫一皆能承先志不墜家聲今距先生之卒四十年矣謬承先生文孫錫誥之囑謹按其狀而論次之

論曰今世學者皆取法歐西歐西人相高以藝學者亦未肯竟學也視先生孤詣將惑而迂之使先生而在何所施其教抑易其途耶此關世風矣然學行如先生化行於鄉恩逮於家表裏粹然無媿爲安定先生後也敢述其畧以



存古師弟子之義云

李勝清公傳

程宗顯

公諱元罷字勝清吾黟農家希模公之子也六歲而孤兄元熙早逝家貧乏食母氏余傭工以教養年十四學賈於江西之浮梁縣逾五年學成歸取又逾年歸省親適粵匪陷金陵懼遭蹂躪廼力食故鄉爲侍親避亂計不出游者四年粵匪亂時商賈之壯者負販隨官軍利三倍公同族之經營斯業者以公少而健召從行歲終稍以食物勞之公固慷慨頗不以介意然甚不欲倚他人爲生活謀諸母資典田銀七兩隨官軍貨綢布諸產跋山涉水備極艱辛

黟縣四志

卷十四

雜志 文錄

四四

不數月竟贏餘首先贖典田謂區區者亦不可不光復以辱先人旋以匪竄我邑奉母避於江西時曾文正克復江西全境都市無恐公與其從堂兄弟集股爲錢業先後合創者四以公之力皆贏多金閭閻中羣以再世陶朱目之公儉樸未嘗鮮衣美食獨公德義舉不惜巨貲爲世倡於景德鎮興孤魂祀會又購地爲義塚咸頌弗衰事母得歡心避亂至江西之明年母病亟公衣不解帶者半月未幾沒公椎心泣血不欲生以人言勸勉忍痛畢大事越八年扶襯歸葬又六年歸瘞宗室血疾劇遽卒時光緒二年丙子也享年四十五娶胡氏子三亨得早殤亨潔治商業承



伯氏桃亭潤邑諸生

顥曰嘗聞二三管見者道惟大功名大學問者可以傳惟奇氣異行犖然不可一世者可以傳竊以爲紀一人之生平行事蓋俾方來君子得以考覽而觀感焉非第留以俟千百年後之譽揚稱頌者夫人一善片長稍稍有裨於風俗人心皆不可以不記李公要不愧鄉里之賢者故以所聞爲公傳

余石洲先生傳

胡元吉

先生姓余氏黟名賢里人也父鴻善畫工詩箸有黃山紀游畫梅雜咏諸集邑乘所稱雪江道人是也同父昆第十

黟縣四志

卷十四

雜志 文錄

四十五

人先生最少甚鍾愛幼名順昌父垂沒諸子環泣請訓父曰能順我意資少弟以學則吾家其昌乎此吾命名之指也從里儒汪長齡學甚器之長齡卒家貧不復能從師乃假僧寺以讀寺居湫隘牆垣不具至懸藁薦以障風縛蓋以禦雨而讀不輟粵寇擾黟抱先人遺書奉母避地山中因樹爲屋一年數遷或藜藿不充與弟子講習論文如平時或題詩以見志云同治四年入邑庠光緒十二年始以增生貢成均年已五十矣先生雖齎於遇而處之泰然從學之士又多以文行見稱由是里黨咸孚門人益進中歲後館於城北先祠祠前隙地闢爲圃雜植花卉手自灌溉



與同族桂峯學博及許質人孝廉王六潭山長胡約軒上舍交最篤每春秋佳日時有文酒之會玩心高明蕭然意遠念先人澹園羣芳吟不傳暇日哀其詠花諸什百餘篇以續之陳小農學博爲序以比南陔補亡之作爲時所重如此又箸有續夢軒隨筆並藏於家光緒三十二年卒年七十有一杜門授徒五十餘年束脩外餽遺一無所受非公事不見邑宰平時恂恂言若不出諸口及遇有興革或風化攸關輒侃侃昌言不爲左右袒其不苟同徇俗大都類此人多稱之娶奕村李氏續娶南屏葉氏俱以賢淑稱人謂先生安貧守約得閨門之助者爲多云子燦藜能繼其業

黟縣四志

卷十四

雜志 文錄

四六

胡元吉曰黟自倪道川先生以洛閩之學教授霞阜而儒術以興其徒類多韜光剗彩不求人知流澤所被於今未艾先生殆聞風而起者乎堅苦力學無師而成何其偉歟其在易曰困而不失其所亨先生之謂矣

余桂三家傳

永溪 凌驤遐

公諱 淮字桂三聯桂其號也爲人質朴和易羣稱爲寬厚長者事母能力以謹處兄弟能力以敬視族人能愛以均此公之孝弟醇厚根於天性也遺產不豐生計不裕乃從事貨殖積居與時逐獲其贏利業日隆家日饒公之善治



生有雍伯師史風焉兄弟同居不肯別籍異財嘗建別墅顏曰怡怡示友愛也管理祀產未嘗取涓滴潤悉心經紀更能拓產置田此公之介然於義利公私間也遇族中義舉尤能慷慨言行其房有一會名曰清明每歲春秋祭祀等費充然有餘則公首捐金所立者也洪楊之亂支祠毀於火爾時祀產無幾建復維艱公提倡捐貲生息積累日多至今興築有資不久將復舊觀以成公志此公之豔於爲義迥異薄俗也

驥遐

與公之孫啟元遊啟元善工詩相

與訂文字交有年矣聞公行義甚悉心竊慕之既而啟元捧公之行狀請爲傳

驥遐

不文何能彰公之美第敘其大

黟縣四志

卷十四

雜志

文錄

罕七

概而傳之如此

贊曰世每謂古人務實今人好名一若古今人真不相及也者此豈通論哉夫古今無一定之稱今人古古人後人亦古今人故率真無僞者今之人猶古之人也若公之性純篤務實踐當代士夫中亦罕見况闐闐乎於戲公今之古人哉

族叔時俊公傳

余攀榮

公余氏

諱

成堃字時俊黟城西名賢里人從九品職父

諱

應煥以善事孀母稱公十歲喪父哀毀如成人家貧兄遠質公與母鬻餅爲活衆以庸庸視之咸豐乙卯粵匪擾黟



公負母走山中遇匪公曰毋驚吾親甯盡所藏以獻然囊米外無他物匪曰念爾貧且孝姑舍之明年母歿未及殮而匪又至鄰促其避公曰母尸在牀可遺棄而偷生耶乃自殮居守其後匪駐城三日竟未擾及公居或以爲孝感天相所致已而兄歿遺孤纔七十日嫂氏以時難年荒莫知爲計公慰之曰嫂請乳孤他事當力任不令嫂憂也自此復與嫂合爨日以經營所得爲養節養孤之資其祀會中年願恩惠別爲儲蓄迨姪成室析居後乃取儲資爲置產予之公以貧乏之身而克盡孝弟聲譽因之漸隆羣舉公經理祀會先是咸同兵燹時田荒店燬租息無出族中

黟縣四志

卷十四

雜志 文錄

四六

祀產餘鈔僅八百餘文適經手者畏累辭公乃應舉受任審緩急權輕重視族如家夙夜維勤夢寐中亦口講而指畫不十年荒者墾燬者新國賦祭祀恤賑之費並有所出儼然吾族之良相族人之頌公者備至而公不自伐也對於地方公益尤毅力維持如崇聖祠東嶽行祠明倫堂武廟通濟橋之修葺皆公爲之督理寒暑無間居常愛讀左傳及益陽胡文忠遺集嘗詔其子曰爲文當學左氏爲人當師胡公又曰當難不畏有功不矜吾於胡氏尤欣慕焉夫亦可以見其志矣初公幼時無力入塾嘗問字於其鄰以勞力爲交換公念其德時調護其後人又念本族之孤



苦者與予等聯會教養遺孤資助喪葬其見義勇爲尤足  
溥仁德而厚風俗光緒庚寅年卒春秋六十有二公論事  
準理待人以誠無機心尤不羸以私見德配汪孺人內助  
有賢聲繼配史孺人亦克循婦道汪孺人生子二均從予  
學長旭初年十八入邑庠十九卒次旭升優增生  
傳者曰仲尼有言孝弟也者其爲仁之本歟公以孝弟爲  
根本使假以事權則仁及萬事仁及萬物亦在意計中區  
區一事一物之治又豈足以盡公之才哉

余君祝祺家傳

太平 陳之澍

余君祝祺予曩讀黟程伯敷先生贈序而識其名及其生

黟縣四志

卷十四

雜志 文錄

單九

平行誼光緒己亥予來黟司訓則君已先考終於家不及  
見今余氏修其家譜成其嗣聯珠以狀來請予爲傳按狀  
君姓余氏名昌慶字祝祺系出宋職方司員外郎益祥公  
傳徽州府知府爨公由衢州西安遷於歙之黃墩又四傳  
鉢公避元亂徙居黟之八都府均又六傳贈保定府知府  
蔭甫公由八都遷城西君卽其十六世裔也曾祖滋益配  
汪氏祖高辛配汪氏繼娶汪氏再娶韓氏父發傑國學生  
贈奉直大夫以孝弟稱事載縣志配范宜人治家有禮法  
生五子君其仲也性孝友讀書聰穎弱冠以縣試第一入  
泮秋闈累膺鶚薦咸豐軍興主持練局首以輯睦同志清



慎從公爲本其時兵匪迭乘籌餉犒師決疑定變歷九年而不懈蒙湘鄉曾文正公累保至知縣加知州銜不赴選蓋恬淡其天性也亂平會同邑紳上書文正請裁練局以紓民困平日與程伯敷俞伯岑胡藤圃諸名士相友善嘗自言其志曰不爲禍始不爲福先不爲利回不爲威攝聞者亦以爲然同治間程伯敷先生纂修縣志君與協修與程先生尤相得值五十六十生辰程先生曾兩贈壽序生於嘉慶壬申十二月十九日亥時歿於光緒辛卯八月初七日申時享年八十以長孫初沂捐職花翎同知銜加二級覃恩晉贈中憲大夫元配舒恭人先二十七年卒生子

三人長聯魁繼兄昌齡後次聯珍縣學生早卒三聯珠女二長適五品銜范燧次適六都西遞縣學生胡恩蔭庶娶周氏先君一月卒生子聯璋國子監典籍銜女一適四都古築五品銜孫景澄孫六人曾孫七人程伯敷先生嘗稱君於師友昆弟親舊歡戚一致存往不渝初終無二爲文不屑章句迂儒之學亦無門戶彼我之見存於心意之中故樂與之交久而彌歡人謂當咸豐癸丑軍興君同理邑局推其籌局事洽鄉邦之勞爲最不可及以軍功游保至州牧可以出而仕矣而卒不赴選其善於處禍福威利者不尤可見哉君之內睦外攘實有功於一邑而非止一人



一家也是足傳矣爲詮次其狀俾修家乘邑志者之有所來焉

汪偉卿先生傳

盧 琪

先生吾鄉君子儒也諱潤烈字偉卿號犇汀歲貢生家居授徒從游者衆先生因材而篤善啟發誨人不倦多所成就尤善鑑人琪幼隨先父學賈海陽有舒翁式如者先生姻也謂琪近儒告先父願介紹於先生以學先生一見喜曰此子端慎異於羣兒他日必可成若父之志誨之甚勤琪年十八補博士弟子遂登賢書膺末秩宣統庚戌之官山東瀕行辭先生墓慟哭移時鄉人稱道先生之教感於

黟縣四志

卷十四

雜志 文錄

五十一

人者遠也先生工制藝七膺鄉薦不售光緒乙酉選太湖縣教諭太湖多文學之士舊有龍山書院每月應課者嘗數百卷先生校閱批隲稱量悉當士論翕服太湖忠義節孝祠王兵燹缺失先生考證補定又採訪孤嫠苦節之無力舉報者爲詳請旌表訓戒諸生以勤學植品爲歸於新進束脩未嘗計較居官九年皆敬而愛之督學使錢公穉葺表其行詣奏謂品端行粹學有淵源請賞加五品銜以風庠序焉光緒十九年以疾卒於官年五十有九著有菜根香處詩藁藏於家

論曰教官之職重矣哉人材所自出也自納粟例開猥瑣



者流皆得隨班因資司鐸饗序所謂教所謂諭者違可問哉安得如先生者以示之範也教職之裁所由來矣琪少承先生之誨甫得一官卽遇滄桑退老窮山有負期望尤恐先生之行久而無聞則爲罪滋大爲次其傳以供邑乘之採

族兄南園先生傳

余毓棠

先生姓余氏諱翔麟譜名伯達字星輝居西域名賢里之南園學者稱爲南園先生因以南園爲號曾祖諱錫鏞四品封職祖諱嘉辰縣學生父諱大成登仕郎其行實均見家乘先生自少事親敬長以孝友聞於時而聰明特異嘗

黟縣四志

卷十四

雜志 文錄

五三

爲吾父所賞識授之書能窮其義蘊年十八補博士弟子員以貧故往山中訓蒙館穀年僅二十金乃研求制藝博考課資以養親贍家不給甯節衣縮食終不乞隣於人某顯者慕先生文學欲要以結之而先生不爲所動訓士以尙志爲先不斤斤於文藝之末此先生修己教人一貫之道也先生爲文析理闡義絕不模擬時趨詩如秋雲春花光艷迎人羣方之江文通云精楷書兼工魏碑道勁中別饒姿媚自食餼以至考貢十列一等三舉優行五膺鶚薦當時有文壇健將之稱邑名士許雲琴與訂亡年之友孝廉王嘯秋何蘭石副車汪英齋均兄事之閩中吳肅堂殿



撰督學時獎其文詩可入玉堂之選其學行爲賢士大夫所重如此然數奇秋闈終蹶光緒甲辰入貢成均以訓導待選終以無力納資補缺知者咸爲先生惜而先生淡然不爲意也間於詩篇中發其抑鬱之氣而終歸之於天命無絲毫微求倖進心非卽古所謂安貧守命之君子歟晚年游洪都漢皋潯陽金陵題詠滿篋輯爲叢桂草堂詩集咸豐辛酉年生光緒丁未年以疾終得年四十有七子曉元事母立身能不負先生所教回憶光緒庚寅先生設帳靄門書屋予屢從獲益甚多乃曾幾何時而先生遽歸道山令人不勝今昔之感哲嗣捧狀請傳予不敏曷敢以不文辭因採其大者而次之

黟縣四志

卷十四

雜志 文錄

三

余翁茂春先生家傳

胡元吉

翁黟之名賢里人也姓余氏名開禧字茂春少穎悟喜讀書旣長嗜左氏春秋及太史公書赭寇之亂黟數被兵父命習商於江西浮梁之曲口非其志也未幾父卒兩弟皆



穉家故貧事母孝與諸弟友愛彌篤爲之授室教之習業一門之內斷斷如也中歲以後家漸裕自奉甚約性好施見人之急如己急見人之難如己難故其在里黨中凡積穀修橋築路諸善舉無不以身先之而興學培才尤致意焉光緒甲申祁河水溢百數十里悉成澤國景德鎮尤當其衝飢民嗷嗷道殣相望翁與浮梁余炳文率士紳言於當道發廩以振又募鉅金佐之設廠施粥老弱僻遠不能至者酌資衣米全活無算事定籍其餘更置義園義渡不足翁自捐巨資以成之規畫井然皆翁手定居人至今稱之晚歲家居猶手不釋卷喜作大楷然不輕爲人書曰吾

黟縣四志

卷十四

雜志

文錄

五

以寄趣耳卒年七十有七德配黃宜人稱賢內助子錫楨縣學附生怕謹有父風

杏墩外史曰翁敦厚好義所謂善人也非耶予自辛亥後頗以文墨自娛里中長德夢巖主政石洲文學並見於予文今錫楨又奉翁行狀屬撰家傳觀其陳述歎余氏之名賢也里號名賢有以夫次其可傳者俾載諸譜牒亦以風勵末俗焉

族永澤君家傳

余旭升

君姓余諱士恩字永澤黟名賢里人前清從九品職嗣以四子遵惠州同加級階贈奉直大夫祖諱兆應國學生父



諱添喜贈奉直大夫行實俱見家乘君其第三子也生而  
穎異沈默寡言讀書通大義幼喪母哀毀逾成人事繼母  
以有禮稱繼母所生子君視若同母昆弟蓋孝友其天性  
也年十二學商於邑東漁亭夙夜習勤頗爲人所獎許洎  
粵寇入黟君過歸奉親負販爲養日行百里不爲苦仲由  
負米不是過也咸豐七年遭父憂治喪慰母撫弟諸大任  
君一身當之先是君有同母兄弟五人長次四俱早卒五  
弟又因兵亂離散其朝夕相聚者僅異母弟士華然幼甚  
鞠凶旣降匪燄又熾繼母懷七弟且未產君際艱危當重  
任措置裕如此足見君之善於處變矣兵燹後君知揚子

黟縣四志

卷十四

雜志 文錄

五

江商業當振乃往鳩茲經營日積月累大創厥業獲利鉅  
萬貨殖之善人莫過焉急難見告者揮金不少吝絕不似  
平日節嗇之行遇旅地義舉尤能慷慨解囊今徽州會館  
經費充然則君捐金創立者也里儒胡君蔭吾志行高尚  
不輕交游獨與君爲道義交此尤足證君行誼之超越庸  
流也卒年五十德配胡宜人子四善繼志孫三均志於學  
論曰西漢賤商禁其乘車衣錦一若商之不齒於人類也  
者蓋戰國以後商人居奇壟斷不以實私橐爲能卽以競  
豪華爲尙富者不仁久爲世病若君之善聚善散迥異薄  
俗已屬難能可貴而況內行之篤雖士大夫亦不多見又



豈可以闐闐中人而少之哉

胡在乾先生傳

婺源方新振民

昔戴東原先生撰戴節婦家傳而首論及吾郡多平原曠野依山而居商賈東西行營於外以就口食然生民得山之氣質重矜氣節雖爲賈者咸有士風且窮巷里曲之婦人女子其節操比於丈夫蓋歎風俗之美如此予曾述黟縣城南杏墩胡徵君節母家傳而於徵君叔父在乾先生之爲人又嘗熟知之以爲誠如東原先生之說賈而有士風者可傳也先生諱作霖字在乾先世出自晉新安太守明季始遷杏墩以好義旌於朝世稱爲義門胡氏父學濟

黟縣四志

卷十四

雜誌 文錄

五十六

生母氏吳早歿繼母氏余撫育之幼時從同縣程孝廉元超受書以穎慧稱年十二值洪楊之亂黟屢被兵燹父經商江西彭澤馬當家中僅婦孺亟告母曰居此甚危不如徙馬當母然其言遂治裝適父亦遣人來迎及至父奇之令從彭澤姚耕禮先生讀書嘗曰爲偉器嗣以兄某某體弱父令讀書而先生改服賈清同治庚午兄歿嫂孫氏年二十一有遺腹秘喪不使知父昕夕不甯復多方慰解及明年送兄櫬歸泣然流涕顧慰嫂曰幸嫂有遺腹若生男令讀書成名繼吾兄之志家事余當獨任之不使分勞以慰兄在天之靈未幾生男卽徵君勤劬顧覆愛如己子長



令從同縣湯南田程抑齋二先生專志於學並遠造興國  
謁萬清軒先生師事之及至應徵作宰山東政聲卓然先  
生乃喜曰今吾姪如此吾願遂矣先生事繼母至孝母素  
患目疾晚而喪明奉養尤謹每先意承志母若不知有疾  
病之苦又生平嘗以勤儉和忍四字自矢自父歿後守先  
人之業三十餘年不取薪金不置私產布衣蔬食早起晏  
休殊爲人所難家人奉養稍從豐腴則曰非吾志也如此  
反失吾意先後與伯氏同居數十年家口三十餘人有一  
衣一食之微莫不推多讓美遇親族困難及地方善舉則  
無不竭力爲之馬當先業嘗一毀於火竭力經營恢復父

築室未就黽勉落成之萬清軒先生名曰繼述堂于次棠  
中丞爲之記後更置蓮塘精舍與東山別墅皆別營田業  
俾後輩可耕而讀當購蓮塘精舍時舊主人有老母一子  
貧不能並活則鬻其子於某寺僧先生聞之惻然急邀其  
親族更出資爲贖歸受者感之至流涕閒居喜聚家人談  
古今名人嘉言懿行嘗教其子曰讀書非徒以取科名當  
知作人爲本噫斯言也在當時咕嗶括帖之士蓋有不知  
者而先生醞醞然有味言之誠傑士也哉先生卒年七十  
二子元鑑元良皆行能自立元鑑業儒嘗從徵君出任山  
東高等學堂教習元良學賈亦從治山東鹽務鑑字朗軒



予與之相處有素尤知爲醇篤之士云

余光徽傳

金熙

余光徽字芳五一字方午邑東南區艾川人儒而隱于商者也貌巖峻凜然若不可犯而卽之殊和易少孤知識異常兒叔祖國謹先生甚器之謂爲余氏子弟中之傑出者事母以孝聞弱冠失恃作孺子啼久久不露齒兄弟間至相友愛翁蚤卒哭之慟其服賈也操勝擅陶朱術誠篤有韓康風抱遠志而恥株守遂懋遷四方於浙則南潯於蘇則上海若常熟所至有建樹夙嗜學籌算餘閒恒坐書城學古輒有獲至暮齒不衰邃于德善養氣而識量過人蓋

黟縣四志

卷十四

雜志 文錄

二十六

其私淑古賢哲者深也自奉儉約雖惡衣食不恥若曰吾家故寒素耳其爲人也秉慈心負俠骨輕財好施所在能急人之急雖離鄉不忘桑梓遇里中故舊必殷勤話短長詢親朋情狀聞某也貧某也躓愀然不樂若抱痼瘵恒饋衣推食不勌每瀕歲暮必滙金歸周給貧乏有時途行遇待哺於道啼飢號寒於室者解囊無吝色鄉之人或落魄無以歸則資而遣之或爲之覓枝棲俾溫飽焉有方氏者游宦常熟以負債嬰訟乃爲奔走營救雙方悉協而地方所有興作若漁亭脩石梁辦自治關於社會事宜一函逕寄卽寄巨金以歸爲儕輩先嘗董治常熟商工業間有爭



執或久不能決得其一言靡不立解商界後進奉若圭臬  
謂能以片言決成敗利鈍歷試不爽云娶蘇氏子二伯昌  
翁卽翰元清府庠生仲昌篋早世昌翁游庠後師事常熟  
潘文熊主政潘名宿也擁皋比於京口南菁書院昌翁隨  
侍講席有年先生書以諭之曰爲學當脩養身心藝術爲  
次畀以陽明先生全集謂讀此卽知卽行實裨世用潘見  
而歎曰若翁具此見解非讀書有得者不能道其平居教  
子義方猶不止此有勸廣置田宅爲子孫計者笑曰唯否  
予寧傾所有以濟人應世不願遺金滿籩留後昆餘蔭養  
其情而害之也聞者趨之直隸籌賑納粟捐國子監典籍  
後晉藍翎五品誥授奉直大夫妻封宜人孫其英畢業開  
智學校曾孫永定卒年六十有九

論曰君子哉若人尙德哉若人方今之世士不率教商不  
守信倫常乖午友朋下石噫微斯人其誰與歸

程克寬世伯傳

胡樹勳

黟之城中桂林程氏望族也其間代產名流錚錚有聲不  
一而足敦孝友睦宗族樂善好施者亦接踵而起余素熟  
知而素所欽仰者則惟程老世伯諱明寬字克寬性聰穎  
尙氣義幼業儒業受學於邑之城南舒伯華先生門下與  
余同宗篤修先生暨城西余桂芬先生爲總角交爲同門



友互相勸勉各具幼學壯行之志無何粵賊肇釁烽火連天老伯逃難四方家貧如洗見機而作棄儒就商自嘆既撤董生之帷從茲力求計然之術投身江右奮志經營辛苦備嘗信實昭著數十年如一日爲商界中嘖嘖稱道弗衰者至其六行悉敦四箴共守解囊賙救貧乏捐資修葺支祠陰德類乎耳鳴善人當然有後所以令子挺楨字耀卿韶年入類旋貢成均與余同窗十餘年賞奇析疑砥節礪行交相親愛如昆弟焉民國二年冬余欲倡設貧民學校一所專收貧家子弟不收學費書籍紙筆概行供給擔負純粹義務原期教育普及之意以告耀卿耀卿極力贊成與之磋商議稟請縣署轉呈立案採辦書籍廣召學生翌年春開學貧家子弟爭相從游此一舉也非耀卿贊成之力安得償余願而遂余心乎足見耀卿成人之美實由世伯教子之方語云是父是子豈不信歟

胡駿卿傳

胡元吉

君名樹勳字駿卿姓胡氏黟橫岡人也始祖育籍隸山東仕晉爲新安太守愛橫岡山水清邃因家焉六世祖明星梁武帝時以太常卿致仕鑿橫溝引城北之水經黃姑壑溉田三千餘畝邑人利之沒祀於鄉子孫繁滋皖浙鄂贛之間其在黟譜牒可稽者猶十有三派惟君族獨居橫岡



如故唐李白詩中所稱十里無餘姓田廬成一村者也今祠址尙存君性孝友不言而躬行見義勇爲遇族黨里閭之顛連無告者每量其厚薄資給之年二十補縣學生員清帝遜位絕意進取以教育後進爲己任設貧民學校於家塾學生數十人不受修脯書籍紙筆俱君供給成就甚衆視學員泣黜者多稱譽以爲罕觀橫溝歲久就淤田漸荒頓民嗟艱食君惻然憫之率族人重濬連歲大熟修家祠成更發宏願鳩同宗各派議建太常公統宗祠於橫岡故址族人感君之義咸樂趨事其規制謨畫多出君手時至杏墩就商元吉以五百年無此舉矣亟慙息成之詎知

黟縣四志

卷十四

雜志 文錄

十一

大業未集哲人先萎環顧宗祊不禁涕泗橫流也君體素健終日治事不覺疲乏往返數十里未曾乘輿戊午十月十日偶膺末疾不起彌留時口中喃喃猶以老父在堂宗祠未就貧民家塾無人付託爲言不及其私年纔五十有一論曰君沒五年矣太常祠宇煥然重新元吉每詣祠下道經君家未嘗不泣然流涕想其爲人不特墓草之哀已爰就平日所聞於君執友吳學博翔藻程上舍挺楨注明經桂所述者次爲小傳俾列於家乘焉

王葆山先生別傳

胡元吉



先生姓王氏諱元瑞字葆山黟人也父朝佐令浙江之瑞安有政聲黃閣學體芳其所得士也先生少喜讀大儒名臣之書隨侍任所受知於温州梁恭辰太守年十八歸娶太守爲賦催妝詩時爭豔之赭寇之亂東南騷動張文毅公以欽差駐徽籌戰守先生杖策謁於軍門文毅喜以爲得先生晚留之幕府擬登薦剡聞父疾踰跟東奔至則已殮乃扶其柩歸文毅還朝繼之者違其節度郡城失陷黟歛遂遭蹂躪先生奉母避地於鍾里鍾里者祁西僻壤也萬峯迴合桑竹蔚然母子相依或時訪其師從祖恕生學博於畫公山中視世事泊如也金陵克復始返故居旋丁

母憂服除棘闈報罷聞法人犯順海疆多故撫髀太息曰士不能逢時遇主手建殊勲猶當假手於賢而在位者以抒其所學於是出佐岑襄勤公於雲南上書條陳滇務襄勤聽之多所採納諒山之役諸路告捷法人不得逞乃以舟師擾我東南福州將軍穆果勇公奉命督師防海襄勤薦先生參其軍稱其壯志請纓名下無虛聞戰有功敘績以知縣候選加鹽提舉銜會廷議罷兵調果勇練兵奉天挈先生偕行居久之果勇卒於軍先生乃東渡依劉壯肅公於臺灣時臺灣新改行省壯肅起家偏裨由提督轉巡撫驟膺殊遇開府邊陲百戰之餘神采奕奕佐皆嚴憚



惟先生多所獻替壯肅嘉其能欲專摺奏保以其稟示布政使沈沈嫉之陽稱其才陰百計阻抑遂格不行先生乃歸歸若干年卒年七十有五先生性坦率無城府不言人過後進片長足錄稱譽不去口用是邑人士多樂與之遊猶憶光緒戊申元吉應徵入都先生與抑齋先生送至東郊皆鶴髮童顏儀觀甚偉在官嘗諷誦其期許之言以爲居身臨民之箴詎意歸及里門喬木如故履迹宛然而兩先生不可復見矣揮涕久之既撰抑齋行狀又輯先生別傳以志傷悼至平生論撰與子孫踵美悉詳於家乘皆不具書

黟縣四志

卷十四

雜志 文錄

三

論曰先生負經世之志值多事之時且得有力者爲之延譽終未得一試惜哉元吉與其嗣君迹鏞迹羲交契又與其婿鄭觀察同門得其行事而哀錄之至其贊美之詞載德清俞太史春在堂集中知德者可以觀矣

二塾師傳

胡元吉

元吉既撰余石洲先生別傳成更求先生弟子得汪塾師錫麟余塾師鍾翰二師元吉皆嘗從問字因書其可傳者附石洲傳後汪塾師錫麟佚其字黟鐘樓厦人也雅有高趣耽吟咏既補博士弟子課徒自給家有廢圃闢其半爲塾隙地雜植花木春餘夏始芭蕉展陰鳥啼樹間蕭然有



塵外意先王父雅重師命元吉與弟元慶受業學徒數十師獨愛元吉課餘嘗攜遊園中坐盤石蔭嘉林口授唐詩及羅忠節小學韻語間舉書中要語命屬對綴句元吉頗知領悟先生喜謂王父曰此子異於羣兒務善視之未幾元慶殤師出遊豫章元吉改從余塾師學光緒某年師卒年五十有七余塾師鍾翰字佐廷石洲先生從子也淡於榮利事父兄以恭謹稱性孤介寡言笑杜門授徒非家祠祭享及姻戚慶吊不出雖比鄰罕見其面元吉從受學時先生年方壯志登賢書治制舉業甚攻苦督教元吉綦嚴有不率教往往撻之流血一日師往祠祭享元吉與同學

爲布陣攻戰之戲登高指揮師歸自後呼之顛就地施以檣楚羣兒皆大笑庚子之役從于公蔭霖率師勤王幕府無事偶憶及此猶懷然若師之在旁也距師之卒已若干年矣年六十一元吉年少氣質不純蓋得師陶鎔之功爲多

論曰二師立教或溫然如春或肅然如秋何其相楹廷耶余師以女妻元吉故望之也深放翁有言授罷村書閉戶睡終年不著面看人師殆近之其古之狷者歟

程堯丞先生家傳

舒斯笏

予與程君松山有姻世誼兼患難交其先大夫堯丞商於



上海業務餘閒飲酒賦詩自遣所交多名流碩彥聲名藉藉歇浦間今松山郵示行狀並以傳相屬何敢辭按狀公諱宏弼號堯丞別號樵雲山人淮渠人生值洪楊之亂黟城被兵尤重其父昌沅公率公等避居六都橫岡性穎悟年十三通五經父母奇愛之爲贍家計令習賈於浙之餘杭公雖日習生業而於學仍勤勤不倦與同學舒公家培孫公玉書相切磋嗣以餘杭地小不足迴旋乃東之滬與友人顧公松泉等創中西大藥房當時海禁初開風氣猶塞華人之服西藥者鮮公以上品之藥售最廉之價遇貧寒者不計資以是銷路日廣生業日隆分設各地分號皆

黟縣四志

卷十四

雜志 文錄

李五

自公權輿家計稍裕命子立東渡日本留學東京警察學校業成而歸爲國効用公之訓子如此待姪亦如之堂姪啟霖幼孤露性聰穎公攜之滬使習英文復使肄業於保定北洋高等學堂業亦成又堂姪啟渙家綦貧公挈至滬使業商成童爲授室公之撫姪如此生平好施與親戚故舊患難相濟有無相通千金無吝色議捐議賑無不先爲之倡於本邑義舉尤力如辦義倉置義地修葺祖祠皆輸鉅款其子立近以數千金購祠畔隙地并作享堂亦公之志性喜詩酒中年著作以家遭回祿盡付劫灰晚年與滬上故人周湘雲黃晉紳顧松泉諸公十餘人結花神三多



等詩社復積詩如千卷名曰刼餘吟又寫樵雲圖裝潢成軸海內名公徵題甚衆年六十五以疾卒於滬寓子立花翎直隸知州升用知府歷任直隸慶雲縣湖北黃安縣及海屬中正場各知事調補陝西省會警察廳廳長孫二女孫三

論曰歐風東漸智術日新芥引溝通端資先導公於西藥研究獨精推行盡利倘本此心以醫國雖沈疴可起也觀其視姪如子長養裁成本原之地早已厚植其基乃歎公之所以大過人者無他善推其所爲而已嗚呼仁矣

王佐虞君傳

山陽

段朝端

黟縣四志

卷十四

雜志

文錄

李六

王大成號佐虞安徽黟縣人兄弟三人大成次居仲幼嗜讀過目成誦九歲畢羣經祖父良濂奇賞之是年父宗榮歿於休甯之屯溪鎮隨兄往運父柩居停胡某見其慧留習商以繼父業兄以弟幼稚辭胡謂年雖幼言動如成人決爲大器胡本黟縣鉅商設肆徧徽屬大成勤於職務外和內介出進無毫髮欺十餘年後綜理一切業隆隆起人多服胡之知人弱冠時道出漁亭鎮適有舟子爲人運鐵遭風沉溺惶急欲投水以徇大成慨然出囊中金爲之募夫役設法打撈卒得原物舟子得不死觀者義之洪楊之亂徽州被禍最慘村落爲墟大成結合鄉里之有聲望者



興練團防開辦平糶他事皆次第脩舉元氣漸復邦人利賴亂平家居益致力於慈善事業歷久不勑然無幾微近名之意家本不豐賴刻厲儉約得以小康治家嚴肅御下仁恕子婦奉翁姑如父母門以內無詬誶聲王氏爲黟縣望族丁口繁盛有鼠雀爭慕大成公正多就取決鑑徹犀剖片言立解生平疾惡如仇能面斥人過人有一善則稱之不容口族有不肖子弟懲勸之使歸於正賢者勗以進取飲食教誨誠懇周至凡戚族之嫠而無子者必爲立嗣更時時周恤之卵翼保全不遺餘力族中本有祭田兵燹後爲勢家所占大成不辭勞怨力反侵地正疆界立椿誌

黟縣四志

卷十四

雜志 文錄

李七

刊圖說招佃開墾取租濟用並新立規條期其遵守故至今族人無不知有大成翁者子二曰圻曰城均先逝大成於光緒十一年卒年七十以子捐輸助賑贈五品封職孫孝祥現爲清江浦中國銀行行長

黟縣李大夫別傳

歙邑

汪宗沂

新安當乾嘉之間經學極盛江汪程凌金戴並出至是蓋稍稍衰矣而黟縣獨以鄒魯稱問其由則鄉人僉曰惟吾李大夫實啟之李大夫者名宗熿字輝亭晚號爰得家本寒素中年豐餘矣以助晉賑擢道員分省江蘇未赴職訪求鄉先生古今著述刊行之若羅鄂州新安志金忠節公



吳殿麟俞理初汪南士諸集是也尤以校刊徐騎省集爲最善本所刊金忠節集治命恤其後人當事感之遂以成名實由大夫倡之風氣旣開人多刻苦自勵大夫歲有給月有餼多方引翼高材士俾專心於學又增佐碧陽書院經費膏火聚奎文會賓興贊絃誦之聲達於四境科第重一方而大夫則旣老矣常遊焦山見阮文達書藏有關者購補以足之又捐存國子監南學古今圖書集成等書多士頌之郡中紫陽書院巽舍東齋毀於賊得太守李公一書立捐贊營建之欲引焦山例儲書講院以卒未果新安固多藏書家近則推南屏李氏蓋大夫之遺澤永矣同時

黟縣四志

卷十四

雜志 文錄

六

黎蕤齋朱仲我皆爲文傳世惟長沙王祭酒師志文特舉其大云

論曰韓嬰詩外傳有言大夫不言得喪士不言通財貨不爲賈道故述偉人者不以貨殖以儒林今李大夫沒世已久聲名在人口議者至謂何地無鄉大夫鄉大夫何人不富而振興文學之實效乃若專歸此一人則以知好士盡其誠之不可以外襲也賢哉李大夫

王芝庭先生家傳

山陽 段朝端

王圻字芝庭城東人候選同知幼習儒遭髮逆亂家產蕩盡遂棄儒而賈生平好任俠廣交遊喜急人之急同治初



海禁大開圻諸習英語能得夷情每有交涉當道率丐圻  
贊助洞中肯綮與香山鄭官應相友善能詩善書畫畫宗  
甌香館爲張子祥高足弟子嘗與滬上金石書畫家合設  
一社名翰墨林爲研究文字之地遇文士尤加敬禮凡計  
借者道出海上圻悉爲噓植僕賃芻秣之費罔不具足故  
飛黃騰達者咸感其恩惠不置承父大成遺訓力崇儉樸  
不作無益事族祠祭器燬於兵春秋兩祀恒展轉假借爲  
用圻懷祭器未成不造燕器之義糾族人集資圖復舊觀  
不足者以私財庀成之由是豆籩鐘鼓煥然一新至今族  
人嘖嘖稱歎惜年未三十而逝妻萬嫻禮法知大義事翁

黟縣四志

卷十四

雜志 文錄

卒九

姑先意承志圻既沒吞金遇救不死無子以翁城之子孝  
祥爲嗣與妣許同撫之得以成立民國中以節孝旌

王樹庭先生家傳

山陽 段朝端

王城字樹庭黟縣人天性孝友幼習商於江西之潯陽嗣  
業鹺於吳城鎮居停爲江浦侯某本淮南大商與城爲莫  
逆交重城信義鹽筴重務累貲巨萬皆倚以集事城亦忠  
信自守持計簿筭財利十數年而產不更饒光緒五年城  
因事假歸侯以孫某暫攝孫更事不多不數月虧累二千  
金城引爲已過將代謀擔負侯不然其說城執不可仍盡  
出其所有以償孫逋聞者賢之不幸病沒客邸妻許素著



賢行年方壯樞歸一慟幾絕誓以身殉翁姑責以撫孤許  
念嗣續之重強起經理訓子極嚴姑晚多病許與婦萬同  
心侍奉十數載如一日婦萬患腹疾許扶持澣濯無怨詞  
無德色人尤以爲難民國中與萬同被旌人咸稱王氏雙  
節云

余國英先生傳

田步蟾

先生諱國英姓余氏黟人也幼讀詩書洪楊變起日侍親  
側服勞勤職醇壹無它鄉先生甚器之有女兒幼弟善處  
之無片時詬誶蓋天性然也甫弱冠寇氛甚惡偪入黟境  
時先生之父病痿痺輾轉床蓐弗良於行先生負之走暑

黟縣四志

卷十四

雜志

文錄

七

雨淋漓炎飈蒸炙踰越險阻備極艱辛父病不自如何叱  
時聞壹無難色時其飲食時溲溺久之或少易人輒不愜  
意閱三載有奇賊勢洶洶徧地未嘗有一日俾父受寇賊  
之驚病革兵事未息先生亡奈何鬻衣傾篋以備飾終之  
禮亂平歸奉母以處言警行惕將順其意昆弟諸婦一無  
間言弟賢外邑姪男三人長養成就籌度必周從堂兄弟  
疾病死喪先生營治之寧已支絀不以爲慮母歿先生哭  
之哀曰吾父病值流離弗克斟藥禮醫俾與吾母偕老今  
母歿是以益悲居室有顏曰思恕先生謂迺祖以思恕名  
堂傳之子孫是宜懷此祖訓先生惇朴而謹愿司祀事數



十年公私井井罔或替且寡言慎行終其事與人無迂洵無忝於名賢之後矣卒年享壽八十有五子二長壽應縣學生員科舉廢就江省地方審判廳書記官捐職四品封贈三代先生封朝議大夫妻胡氏勤內政有遠識前卒封恭人祖元湘祖妣舒氏父士鈴母葉氏繼母金氏封贈如之次子壽康太學生皖省實業工藝廠任事女二長適胡次適歐陽孫六曾孫二先生與胡恭人葬於黟姜家山之陽予與壽應君同官農部訂文字交獲知先生之家世也詳爰敘次而爲之傳

余景伊先生傳

貴池教諭 萬國霖 少禾

黟縣四志

卷十四

雜誌 文錄

七

余景伊字承平城西隅人縣學生父占標武生加捐千總教武學門徒衆多伊初亦習武兩試不售遂棄武就文從拔貢許寶球學天資本明敏加以奮志芸窗朝斯夕斯無時間斷學問與日俱進初出應試卽蒙宗師鑑賞取列膠庠非倖獲也實學力所致也因原從師習舉子業志圖上進適逢粵賊作亂由長江而直抵金陵盤踞十餘載考試盡行停止伊武技諳熟則又棄文就武團練鄉勇以爲保衛桑梓計咸豐七年賊竄隣邑太平之橫潭一帶各嶺俱有防備伊與余嘉邦余長齡等自備資斧帶勇至方干嶺會防壘石爲卡賊見防守嚴密走嶺外而去以功俱給五



品頂戴見前志尙義襄辦閭邑保安總局逐日到不辭勞  
維持祀會與洪太余時俊等力除積弊至今享祀豐隆實  
嘉賴之逮事父母盡敬盡孝友于兄弟人無間言治家嚴  
肅處鄉黨則恂恂如也妻盧氏子三大經大俊大偉孫一  
霖與余桂峯同任貴池教職述其事而請爲之傳因卽據  
其實而直陳之云爾

王守之先生家傳

湖南 胡汝霖 鞠生

公姓王氏諱朝棟字守之八都葉村上田千人誥封五品  
銜自幼稟性聰慧讀書至惟孝友于兄弟乃曰此人生當  
然之事其襟懷曠達早見一斑長習商於江西之景德鎮

黟縣四志

卷十四

雜志 文錄

七三

糧食龔坊店其店係祖遺業乏人料理幾至中落自公努  
力經營不數年仍復舊觀咸豐之季害遭兵燹追烽煙甫  
息家無長物僅錢三百餘文爲川資赴和悅州就業於秦  
昌鹽行每月俸錢二千文歷年所進無多自甘刻苦凡遇  
急難者量力周之胞弟遭兵後艱於生計將產業典質殆  
盡公以累積俸金盡爲贖回歷欠舊糧盡代完納且助金  
爲謀生計其輕財重義如此年甫三十李觀察輝亭鑒賞  
輒以鹽務委任信從之下逾於友愛名譽日隆閒暇時卽  
以勸世文撰成白話用紅硃寫大字沿途張貼無論何處  
茶樓酒館街衢亭廟見之皆知公所寫貼光緒二十六年



和悅州會匪逆亂盤距多日搶擄不堪有羣匪擁入秦昌  
鹽行忽有匪急阻曰此王先生鹽行王先生好善人也毋  
得驚擾匪悉退去故和悅州店均遭害獨秦昌鹽行安然  
無恙可見仁心之感動入人至易深也至於孝乎惟孝友  
于兄弟矜孤恤寡施棺助葬諸善舉人所難能者公以爲  
常事石埭老鴉灘爲大通大路往來如梭當春水發生或  
淫雨多日泛湧橫溢行人憂之公倡首集貲建造石橋及  
今過者猶口頌不置李觀察助賑晉豫大飢燕齊蘇皖粵  
西江右鄭州諸水災及濬修銅陵江隄各巨款皆公贊成  
之力故李觀察嘗曰教人以善謂之忠君真吾忠友也公

黟縣四志

卷十四

雜志 文錄

七三

於光緒二十年在城橫溝菑買置房屋喬遷焉歿於光緒  
丁未年五月十二日申時距生於道光辛卯年六月初四  
日亥時享壽七十有七德配金宜人歿於光緒丙申年七  
月十九日丑時距生於道光丁亥年四月十一日巳時享  
壽七十子一諱廷燦字亮臣爲人質樸待人寬厚事親能  
敬習錢業億則屢中平日勤儉獨公德義舉不吝解囊族  
鄰德之歿於民國丙辰年五月初二日辰時距生於道光  
丁未年十一月十五日亥時享壽七十德配舒宜人孫三  
長崇燭字明軒甯國府開設錢布等業次崇修字省齋三  
崇樹字嶽石均爲閩閩中所推崇曾孫五長正義現省立



第三中學校員次正禮居商有少年老成之稱三正智四正信五正堯元孫四長士康次士華三士培四士學均幼公與霖交有年矣故公之行義悉以知之光緒三十三年任蒞茲土甫敘舊交未一月公竟駕鶴西去探風問俗證以所聞彌增感歎茲欲以申曩昔交情特敘其大概欣而爲之傳

霖曰公歿至今僅十餘年而子復子孫復孫祥呈五世矣詩云振振公族可爲公咏之

李允朋公傳

汪 浚

漢班孟堅云士食舊德農服先疇此可爲憑藉者言之也

黟縣四志

卷十四

雜志 文錄

三十四

若夫一無所憑克自樹立而家業以興門閭以大者則允朋李太翁其人也翁諱時疇字允朋少食貧居無一厘力憑十指然精貿易之術卒易蓄爲豐廣置田產上則孝養父母中和兄弟下育子孫一家之中怡怡如也治家之法井井如也且性好施與喜文教捐輸邑中諸書院不惜多金而又偕兄創造家塾延名師訓諸子弟皆知禮法遇荒歲輒賑飢沐其惠者至今猶嘖嘖人口焉將重建祖祠規模已定後忽攬重疾卒不起臨終時殷殷然猶以此事爲憾嗚呼其事雖不成而其志則尤可嘉也

贊曰鶴山之側代產文人翁不爲士培士有心黨庠家塾



經畫維勤英才蔚起炳炳麟麟有子好學殫見洽聞有孫競秀桂馥蘭芬持身以儉宅心以仁布德行惠洽比其隣緬翁行誼孰與比倫口碑載道奕世猶新

李希甫先生傳

汪浚

先生諱尙字希甫瀟灑人也少好學善事父母以鮮兄弟承父業棄儒就賈暇則讀書藏書至數千卷世居黟北之雞頭山有友誚之曰子雅人也惜所居之地其名不雅馴縉紳先生難言之先生笑而應之曰子未讀史記乎五帝本紀云黃帝西至於崆峒登雞頭南至於江登熊湘予所居地名不雅馴豈史記之文亦不雅馴乎友人愧而不能答一時聞之者皆服其博雅云且性喜詼諧親友有爭訟事羣不能決先生以一二諧語釋之人皆悅服說者謂猶有淳于髡東方曼倩之遺風也

黟縣四志

卷十四

雜志 文錄

七五

贊曰士習詩書商勤轉運猗頓計然遑言學問先生兼之熟習古訓左圖右史有條不紊訓子若孫立身守分維冀奕葉永保令聞

雙溪南三姚先生合傳

胡元吉

三姚者省羣封君振鐸與其弟崇禮茂才縉書位三太學振思也世居雙溪雙溪者黟城西北章霽二水所匯處也石梁跨之有亭翼然姚氏居其南負山臨水林木蔥蒨桑



麻蔚然故亦謂溪南姚氏國初有孝子曰元可其族人也  
父成鳳行誼載邑乘封君幼有雅志善畫能詩以行誼爲  
鄉里所重茂才君質直好義少能文旣補博士弟子耻之  
棄去喜飲酒自放山水間遇田夫野老招與對飲或置酒  
相招怡然就之不以爲忤太學君恂恂謙謹事諸兄如父  
事咨而後行兄歿獨支家政贈給無稍歧異內外咸孚於  
今數世子婦數十人異居同財未聞有詬誶之聲至幼穉  
亦知禮敬非所謂熏其德而善良者歟光緒初常熟屈侯  
承福令黟教民育蠶治絲君家首先遵行惟謹邑人化之  
屈侯序其事郡太守何公旌其閭以風士林至今入其鄉

黟縣四志

卷十四

雜志 文錄

七六

猶有十畝閑閑之意則其經始之善可知矣先世買田於  
浙西常山之芳村兼營商業歲饑卽貶其值以平米價在  
家葺祠修譜牒修橋路合瘍科諸藥施濟鄉閭皆弟子分  
任之具有規模以垂長久云太學君長子銘恭茂才宣統  
元年舉孝廉方正制科元吉始夫也元吉童年猶親見諸  
老人而辱教之又授徒村中其諸孫多從問字知其行事  
爲詳傳其大畧俾藏於家

論曰昔張楊園先生每讀史至世德之門孝義之里或朝  
廷所表或鄉閭所稱輒掩卷而歎謂子孫何幸得生其家  
楊園當鼎之時正明季俗漓道喪之日宜其感憤之深而



寄託之遠也諸姚質行如此惜未及令楊園見之亦由其去中興未遠道揆未移法守具在深山窮谷之中猶有純穆敦樸之意由今以觀已如結繩畫地之不可復覩矣讀楊園語能勿投筆三歎哉

汪贈君卓峯家傳

吳翔藻

君姓汪氏諱源橫岡人也卓峯其字父建唐讀書立行未嘗一試有契友余大令曰孜宰黟相見敘契濶而已大令交卸贈言有念君話舊不言情之句家貧授徒四方每携君俱年十五廢讀而賈赭寇擾黟君在江西之玉山踉蹌奔歸奉父母挈家走避閒關至玉山而江西亦遭蹂躪矣

黟縣四志

卷十四

雜志 文錄

七

肆務殷繁烽煙一月數徙備歷險艱或竟日不食或終夜不寢生平精力瘁於是時而業亦以是漸裕矣迨大局底定奉親歸里買田築室以垂久遠之規至今家門隆盛猶食其舊德云律已綦嚴喜閱先賢格言柏廬家訓念臺人譜尤所服膺訓其子曰名爲讀書人必要宅心忠厚無墜先傳求古人嘉言嘉行以體諸身而淑於世豈特尚文詞博富貴以誇榮鄉里而已哉卽此可以見其志之所存好施與不使人知地方義舉無不樂助不言人過人有善譽之不容口用是人多稱之享年八十子桂附生孫聖書州同銜加二級封贈二代崇書新安中學畢業得獎歲貢肄



業京師法政學校濟書義書皆入學校曾孫二

論曰漢萬石君不言而躬行其子孫皆恂恂篤謹朱子探入小學以爲世法觀君之飭躬訓子何其厚歟純樸敦龐之概尙有先民之風今不可得而見矣特爲表之以風里閭云

舒伯華先生傳

黟縣訓導太平 陳之澍 筱農

舒君英字伯華黟城南人增貢試用訓導明巡按使遷之後裔父文海正人君子也見質行君立身行事一秉父教父歿事母孝朝夕侍奉出必告返必面先意承志務得親歡而心始卽安有延爲西賓者輒以母老不能暫離辭有

黟縣四志

卷十四

雜志 文錄

七六

第三其二異母所出自幼撫養至於成立視如同母弟無絲毫差別家有薄產皆以俾諸弟其敦篤內行如此君於住宅之旁築別墅曰茗香書舍讀書課徒其中爲文一宗於古履膺房薦遇而不遇亦不降格求售與生徒論時文題旨往往得孔孟精意發程朱所未發本城胡文郁明經余攀榮訓導程壽保孝廉皆其高足弟子各有傳而相從最久君爲人誠樸而儀度雍容不苟取與惟樂善好施出於天性清光緒初承亂離之後邑俗漸以偷薄賢令屈公憂之遴選高村有德望宿儒按朔望宣講古昔聖賢義禮以期救正而君與城東胡立培明經實膺其任屈贈額曰



名教宣揚蓋紀實也著有茗香詩鈔切字韻法邑名士程鴻詔欽君品學延課其子弟於家母既歿始應其聘也

湯先生言行紀畧

姚銘棊

湯先生諱作霖字南田嚴泉其號也黜白千人歲貢生祖永懿太學生議敘八品父球邑庠生舉孝廉方正崇祀鄉賢著述書目五百餘種惟晉書輯補十六國春秋輯補俱梓行於世並見邑志先生願身長髯性純全質聰敏事親以孝聞友于兄弟門庭之內怡怡如也少從同邑汪先生浚遊兼秉庭訓銳志潛修通經史能文章年弱冠館紫陽朱氏村中因俗舉孟蘭會請先生撰壇中題詞八十有餘

黜縣四志

卷十四

雜志 文錄

七十九

件翌日需先生揮筆立就讀者奇之性亦廉介束脩外義不苟取人亦不敢干以私非公事不見邑宰有澹臺子羽風粵寇之亂避居無定而不廢講學晚歲設教碧陽先後從游者百餘人因材施教先德行而後文藝及門之士俱造就有成如鄭主政棊何觀察宗遜何孝廉承培范茂才維翰葉貢士自松金副榜熙胡徵士元吉其最著者也先生精舉業每試輟冠其曹督學孫侍郎毓汶按試臨徽以夫子喟然歎曰台下四節題試得先生作大爲嘉賞評云掃盡敷詞獨標真諦喟然一嘆千古一新令六邑傳觀與汪孝廉浦泉程徵君抑齋姚文學茂之相友善程徵君著



四書改錯改多引先生說同治己丑謝邑侯永泰三修黟志先生亦與編纂之事惜常多疾病又困於館課不及著述光緒甲申閏端陽同學設飲賦詩先生喜甚首先落筆有人說奪標誇往事我因採藥重良時之句如先生者豈可謂得天之厚而未免猶有恨也湯氏宗祠兵燹灰燼籌貲重建復立祀會父母喪葬一如禮法歲戊子杖鄉之年三月十有九日以壽終先時囑家屬整潔牀第誦禮經曰吾得正而斃焉斯已矣遂不起斯時異香滿室及含殮亦如之程徵君贈輓聯有念此後遺經獨抱何人更質疑難之語欽佩先生至深也銘恭侍先生左右十有一年受訓

黟縣四志

卷十四

雜志 文錄

六十

實深心喪曷已追思往事愧難盡宣謹將先生言行紀其大畧以備考獻者採擇爲之序傳以垂不朽矣

余光敷家傳

金 熙

余君光敷字輝遠吾姊丈也民國十一年夏歷壬戌三月以疾卒於家年六十有七其子昌第自京師寓書於余謂吾父行誼舅氏知之最稔敢乞敘述俾藏於家以垂厥後余嘉其意而傳之君生三歲而孤賴祖母暨母氏撫養成立幼讀書姿質聰穎及長經商滬瀆有年嗣因蘇之常熟有祖遺店業經營不得人君迺改赴常熟自爲料理店務復興是時祖母母氏春秋高君又不忍遠離遂棄店事而



歸侍養君之曾祖以下親屬外貿者居多家事悉以付託於君族祠祀會亦賴君維持權其出入爲計長久祖母母氏相繼歿哀毀逾常祭葬如禮君無昆季有一姊適橫岡吳氏家極貧夫又早逝君欲迎姊於家以養之姊不許僦居漁亭河東君乃月餽米若干錢若干歷今二十餘年姊獲以存活君平生雖無奇節異行而踐履篤實不愧一鄉善人宜其後嗣克昌也有子五人長昌笙業商次昌第自少從余習舉子業領一衿就學京師現以內務部主事充國務院統計局會計科主任三昌箴天折四昌筦出嗣五昌筦北京法政學校畢業前充北京航空署辦事員現充

黟縣四志

卷十四

雜志 文錄

十一

上海啟新洋灰公司辦事員孫二人均幼

論曰昔孔門弟子多才其稱賢者七十餘人子張高華子夏篤實皆爲聖人之所許然效法子張稍有不善恐不免馬伏波畫虎類狗之譏若效法子夏雖不能至要不失爲篤實君子噫如君者殆所謂卜商氏之儒歟

許映璧先生家傳

胡存慶

許寶光字映璧號晉齋城西人篤志好學早游邑庠壯歲開塾授徒從者日衆嗣因家業衰微無意進取迨先後聘入長樂歸化兩縣幕游昌江得交江公襄辦賑捐事務以績保五品銜中年後雖安閑散凡有類古時飲射讀法之



事恒從鄉老之列善行書筆力雄壯如怒猊抉石渴驥奔泉昔黃山谷謂東坡居士極不惜書然不可乞有乞書者正色詰責之先生不然故先生之書隨處多有人不知惜然喜飲酒不能四五甯已爛醉興酣落筆如風雨頗似東坡何古今人又相及也性和易能善推其居家孝友之心以及於人故士之被其接見者靄如在春風中豈漫效柳下惠之和哉學問深而意氣平先生有之矣入民國初年協辦地方公團維持秩序與有力焉至今人多稱之云贊曰鐘鼎非貴朱紫非華書居六藝亦名一家鍾王虞褚摛藻揚葩矧言幹濟內外褒嘉

黟縣四志

卷十四

雜志 文錄

三

汪荷舫先生家傳

韓壽康

汪君律字和聲一字荷舫翰苑人也贈公培基丈之第三子幼聰敏讀書目數行下十齡從學於予族兄惺園夫子咸以神童目之年十三贈公捐館時兩兄皆外貿君亦棄儒就商暇時手不釋卷早起必臨名帖數百字儒雅風流與庸俗市儈不類君好與文人學士交而生平實以棄儒爲恨故培植後進讀書胞姪端使就外傳一試游庠厥後停止科舉振興學堂復令其子謙入碧陽小學肄習畢業後人有爲君賀者君曰此特初步耳何以賀爲仍時時勉以志學君一生孝於親友於兄相莊於夫婦而切憇於朋



友接物溫然處已淡然德容古貌一望而使人肅然平日  
疎財仗義其最著者如輸葺宗祠以妥先靈督修書舍以  
端蒙養任事必以身先族有絕嗣者捐貲爲立祀產族有  
幼孤者解囊爲完國課更謀衣食以養之給修脯以教之  
他如倡修規川大溪橋路植柳道旁與人庇蔭一切濟人  
利物事增光門戶事靡不倡首規畫踴躍樂爲匪惟鄉閭  
之善士實乃名教之完人豈意天奪其算竟以癸亥年二  
月十六日考終牖下春秋五十有一君配余氏子謙碧陽  
高等小學畢業生有父風孫傳淇幼讀女字予之從孫桐  
蔭予與君旣同榜榆之社復聯葭葦之親其子謙以傳請  
黟縣四志

卷十四

雜志 文錄

八十三

自慚老筆頽唐恐難表揚萬一然誼之所在不獲固辭而  
爲之傳

何君殿超傳

程鴻詔 伯勇

司馬康喪溫公寢地得疾醫李積至而疾已不可爲天其  
不可知耶余觀何君之事殆有天矣君諱元鞏字殿超號  
文堅黟三都人幼孤學賈於江西事母最孝年三十而母  
卒寒冬寢棺側朝夕哭遂病噎進食輒吐不能納米粒念  
已病且死而父母與三代伯叔氏之柩八九未葬皇皇然  
營其事鄂龔生與黟范生賈於鄂聞而敬之賻且聘君助  
爲理力疾治葬畢如鄂遇人教鍊服琉黃病良已居鄂十



年爲龔范發箸致貲乘萬已報其助葬誼乃謝歸復祀產  
修支祠植楨溪祖墓宰木葬外舅姑室其二孫又嘗修路  
合藥賑飢族有家塾久賃人居君始還爲族士肄業之地  
年至八十猶善飲啖行不扶杖能夜細書絳箋手錄歷驗  
方一卷治多效後病熱絕食月餘但飲新汲水醫言丹發  
然竟無害咸豐八年乃卒八十六矣豫知將歿焚券百餘  
紙索清泉漱沐含笑而終君生而面有青色旣具異稟作  
孝同於司馬康而得良醫以享長壽則天鑒誠孝而報之  
獨殊也議敘布政司理問配張文學監商長女封安人事  
姑相夫持家有法子二人應福監生早卒錫鴻議敘九品

黟縣四志

卷十四

雜志 文錄

十四

勤儉忠厚有父風君修沙園路未竟工力成其志孫七人  
興松監生興柏興仁緝熙縣學生候選訓導文蔚軍功八  
品興智興裕曾孫八人咸豐乙卯大盜陷黟余始治鄉兵  
君避地於山齋始接談笑緝熙字麗和時從余游亦與於  
禦賊之役後與余從湘鄉侯相北征由縣學生保選訓導  
署南陵教諭謂余知君以狀請傳乃次而箸之系以贊曰  
丹石之毒乃駐年匪醫藥力孝格天俾壽而富子孫賢文  
孫述德視斯耑碑郭林宗無愧焉吾文因君其永傳

何笠農先生家傳

趙 倜 周人

何宗遜字笠農碧山人戊子優貢廷試第一以知縣用入



都候選旋中丁酉順天榜舉人選授山西太原縣知縣到任七閱月案無留牘士民愛戴縣忽有拳匪之禍宗遜急牒請兵剿辦忤當道意被劾落職晉民惜之時馬忠武公扈蹕莅晉招入幕府派司摺奏兼充武衛前左兩軍文案營務處總理晉撫錫四川提督宋直隸提督馬會奏請開復原官旋以行營防晉剿匪出力保陞知州復以花子溝之捷晉知府加鹽運使銜獎花翎癸卯秋奉特旨召見交軍機處存記丙午直督袁熱河都統廷直隸提督馬奏保才堪大用學有本源器識宏深足膺艱鉅請以道員補用仍交軍機處存記丁未夏馬公奏請代攝武衛左軍事是

黟縣四志

卷十四

雜志 文錄

八十五

年冬署北洋大臣楊奏調直隸派充淮軍營務處總理宣統元年春滇督李復奏調入滇派充督署總文案全省巡防兵備處會辦兼團練事宜旋亂歸值國變河南督軍趙與有舊強之出山逾二年以疾歸卒宗遜生有異稟爲文踔厲風發試輒冠其曹有馬工枚速之目故飛書草檄尤其所長其遇馬忠武也可謂得一知己足以無憾其疆起入洛蓋亦才名爲世所重云所著奏議詩文日記該體用通時務皆藏於家

何竹泉先生家傳

注斯偉

何家俊字竹泉碧山人邑庠生天性樂善內行敦篤五歲



喪母哀毀以孝稱家豐於貲家俊獨衣冠布素無他嗜好  
惟喜蓄書不妄使一錢然遇貧乏親朋則任卹周至中歲  
遭亂家日落至於質鬻田產仍時以錢粟贖人急有尼之  
者曰以有餘濟不足人之情也今君旣自處於不足而好  
行其德不益困乎家俊曰吾行吾心之所安而已信如子  
言必待有餘以濟人使吾生不獲有餘之日遂無濟人之  
日矣惡乎可聞者以爲名言家俊又邃於醫求診者踵相  
接有以禮謝者輒卻之曰吾非以醫市也其生平親師取  
友嚴如程廉訪伯勇汪孝廉昆仲阮如溥泉湯徵君父子  
伯珩南田皆以道德文章負一時人望家俊遭其弟家璧

黟縣四志

卷十四

雜志 文錄

二十六

執經於程汪復禮館湯徵君於家使二子諸姪從受學時  
徵君方修晉史閱五年成十六國春秋輯補一書張文襄  
督兩廣時徵刊以行世論者謂徵君千秋之業得力於君  
家書藏者爲多也晚歲尤善衡文自程汪諸先生謝世後  
湯徵君亦篤老念同時執友足爲二子師者莫溥泉南田  
若嘗謂溥泉之文爲大家南田之文爲名家於是使宗敏  
師溥泉宗遜師南田皆有聲宗敏增貢生宗遜丁酉舉人  
官候補道家俊得子晚卒年七十有一信天之報施善人  
爲不爽云

何友農先生傳

何閏生 梅先



何宗敏字友農何村人增貢生幼聰穎受業於湯伯珩徵君徧誦十三經日數千言人咸異之長能文有聲庠序間與弟笠農齊名惜少嬰足疾憚於跋涉未赴白門應鄉試致終老一衿然學問文章爲士林所宗仰歷充學務科科長勸學所所長教育會會長提倡學務不遺餘力性至孝母疾焚香籲天願減己算以延母壽復研求醫學盡發家藏醫書百餘種讀之久之遂精岐黃術凡隣里鄉黨求醫者靡不立效其存心濟世不索診金不受謝禮與其先德竹泉公先後一轍卒年六十餘所著詩文雜著甚富惜稿多散佚云



節孝姚母吳孺人傳

婺源 汪尙彩

姚母吳孺人者我徽黟縣雙溪南登仕郎嘉全先生妻太學君成鳳母也太學君以母狀來請傳接其人恂恂謹恪知承賢母之善教也按狀孺人生而端靜純一年十六歸嘉全先生先生樂善好施孺人多內助之事翁姑承歡克順十餘年如一日婦言婦德鄉黨咸稱越年十四先生自浙衢常山抱疴歸孺人伺左右藥至必親嘗坐以待旦者月餘而先生病不起當是時也翁姑年耄子女俱幼孺人哀毀不欲生惟念仰事俯育吞聲忍淚弗傷翁姑心家務力爲維持逾二年翁姑繼逝喪葬咸盡禮節方藐孤之未

黟縣四志

卷十四

雜志 文錄

六

冠也延績學士課讀書旣長命之常理先業嘗訓太學君曰脩身慎行業精於勤汝宜三復斯言體先人遺訓修橋路賑捐濟急諸善舉義所當爲謂無違訓其善於教子也者歐陽氏之母當不過是微特營居室建家塾以其志爲子先生平懿行不勝書卒年五十有六計守節二十七年論曰大易有言坤爲吝嗇輕財重義固難當鏡分釵折時孝慈兩全尤難若姚母吳孺人得兼之孝翁姑慈子女相夫賢能祖訓是遵宜邀旌表坊祠不獨矢志礪節有足嘉也余不文烏能傳淑德紀其實亦以塞賢子之請兼用風世云



汪母節孝黃太宜人傳

隴右 安維峻

昔班昭作女誡德言容功統名四德就處常言之也若夫  
柏舟矢志茹苦含辛卒能撫孤成立昌大其門祚家聲此  
尤女德之隆而天之報施苦節爲不爽也光緒戊申余應  
聘總纂甘肅通志於列女一門凡採訪所及鄭重書之不  
使稍有遺漏蓋將以風世也而皖江汪君冠英司馬適以  
是年分發到省一日出其王母節孝黃太宜人行畧乞爲  
家傳以表揚遺徽不敢以不文辭謹按太宜人爲黟縣廩  
生黃公諱文光長女舉人甘肅鎮番知縣銘鼎公暨增生  
英山訓導銘新公之胞姊也少承庭訓通曉詩書年十九

黟縣四志

卷十四

雜志 文錄

九

歸汪爲 誥贈奉直大夫諱錫禧繼室汪氏世家黟縣碧  
山黃陂村有文臺公者以優廩生著有七家漢書十三經  
註疏補遺及英吉利攷畧等書梓行於世奉直公乃其姪  
也家學淵源與太宜人門第相埒太宜人生子一卽後爲  
少尉者少尉甫三歲而奉直公見背時太宜人年二十有  
四飲水泣露誓撫遺孤黽勉綢繆措拄門戶越六載值髮  
逆竄擾江南半壁盡爲逆佔五世書籍全付灰燼太宜人  
攜少尉至外家隨同諸舅氏避難讀書而外祖文光公甫  
卽世家貲亦被匪掠諸舅氏均年少未更事汪黃兩家諸  
務皆太宜人一手料理軍興以來居民十室九空生計之



艱百倍於昔太宜人日以鍼黹所獲佐諸舅氏及少尉讀書之用其時無力延師由太宜人親課之以故諸舅氏及少尉均未出就外傅厥後課孫時雖年逾七旬猶復疊疊其學養兼到從可知矣及銘鼎公登秋榜銘新公游泮宮太宜人始辭歸里門爲少尉授室旋因銘鼎公北上命少尉隨侍左右銘鼎公銓選得甘肅之正甯知縣遂命少尉隨同來甘光緒乙未河湟亂作銘鼎公時署西甯縣事奉文籌辦糧臺詳請以少尉充承辦糧臺委員在事出力經陝甘制府於肅清案彙保獎以七品藍翎旋報捐典史歸甘候補並爲太宜人呈請 旌表節孝蒙給有柏舟勵節

黟縣四志

卷十四

雜志

文錄

九

扁額方將需次省垣而太宜人春秋漸高不欲少尉遠離膝下遂治裝歸奉養太宜人以壽終太宜人卒於光緒丙午某月日距生於道光癸未某月日享年八十有四孫男四長承寬國學生次承緒登仕佐郎三承傑附貢生甘肅候補同知四承烈從九品職銜曾孫男四長正鐸高等學生次正煊幼讀三正國四正鈞尙幼孫女四詩云釐爾女士從以孫子言女之有士行者多賢子孫也太宜人稟承家學作配名門及失所天守義昌後亦旣芳揚彤管矣而孫曾繼繼繩繩行見處則爲通儒出則爲循吏皆太宜人遺澤有以垂裕之證之詩言當益信汪氏之方興未艾有



自來也

贊曰余嘗讀五代史馮道傳敘論中引王凝妻李氏斷臂事謂以一婦人猶能如此見長樂老並婦女之不若他何論焉太宜人雖艱苦備嘗視李氏所處爲幸然其青年勵節作巾幗完人而且婦職餘閒詩書教授母家大家皆倚以振起其衰微置之劉子政十三篇中當爲列女生色余故樂爲載筆竊補國史之闕云

汪節孝婦余氏傳

太平陳之澍

汪節孝婦余氏黟邑黃陂汪承道之妻旣笄于歸以孝順賢淑稱越五載夫患篤疾氏侍奉湯藥曲盡調護踰年夫

黟縣四志

卷十四

雜志

文錄

十一

歿姑及本生孀姑均在堂遺一男夫歿未而月殤本生孀姑亦相繼卒氏迭遭變故雖痛不欲生而均克盡禮又以姑尙待養乃矢節事之人咸稱頌其孝然嘗念夫歿祖先葬祭之禮或多所缺宗祀攸關每憂傷難釋遂致抑鬱成疾人或勸之則答曰夫旣盡瘁家事以終我苟弗克成夫未完之志何以相見於地下適今夏夫之從弟又卒更應祖先營葬無期疾遂不起病革時唯告戚族以事姑未終其事宗祀尤爲至重諳諳相囑託嗚呼其志洵可悲矣黟多節婦而如氏者歸汪八載憂患備嘗而獨知以禮自盡固不徒能以節著以孝稱者已乃竟齎志以歿然其節孝



之心期則已云盡是豈不足風哉邑庠生余毓元氏之胞兄也以狀來請余忝司邑鐸與有風教之責謹次其事并題以節孝二字俾額於閭以爲世之節婦勸

汪節母傳

甘肅 巨國柱

黔縣三都碧山村清六品軍功國學生汪承寬妻胡氏四都陳閭國學生胡廷振次女年廿一歸承寬爲正室和婉善婦道戚黨稱賢始生一女天繼生子正鐸時夫已多病子生甫百日而夫竟不起氏時年已二十九誓以身殉屢欲仰藥爲見者格衆乃曲爲之慰曰所謂節者非徒以身殉夫之謂也夫死而孤存猶未死也潔身撫孤使夫之宗

黔縣四志

卷十四

雜志 文錄

九

桃不至於終墜節孰大焉易曰安節亨又曰甘節吉往有尚此之謂矣氏乃泣而允遂以守身奉翁姑鞠遺孤爲己任然從此恒鬱結積久成疾竟卒於光緒甲辰距生於同治十一年得年三十三子時甫八歲今已成立不可謂非氏節義之功也

子馥氏曰昔洪禔存以抗疏迂旨謫戍伊犁回至肅州傳一節婦大意謂非荷戈萬里莫由知其人而傳之此以見貞節爲天心所默契冥冥中若有莫之爲而爲者斯固才人之極筆未盡爲典要至如貞節爲天心所默契此實理之不可或無也夫節之洪纖難定當解籜之初而不變植



物之中惟一竹生有定耦而不亂動物之中惟有雉與雁人爲萬物之靈淑貞自厲矯然拔出於倫類之表是固間氣所特鍾惡有不爲天心所默契者乎抑吾嘗聞吾師程芑田之言曰吾鄉婺源城居求貞節之婦殆所謂景星慶雲耳我所以移住漳溪也然則表彰節義於皖江以南於以摩厲風俗斯尤司志乘者所當加意而采擇者歟

### 余節婦傳

胡元吉

余節婦胡氏余守發之妻也歸余四年生子方二歲守發疾且革謂節婦曰不幸我死汝能爲吾養親撫孤則我死瞑目矣節婦泣曰諾守發死奉養翁姑撫弱子唯謹粵匪

### 黟縣四志

#### 卷十四

雜志 文錄

#### 十一

擾黟翁病卒始死於兵室宇被掠避居山中日噉糠粃野蔬懷利刃以備倉卒然亦竟無恙也守發同父昆弟五人死亡相繼亂後僅餘夫兄守蒸一子與守慶暨己子而已皆幼穉嗷嗷待哺室餘懸磬節婦杜門刺繡易米作粥以供朝夕慈愛備至且資之入學旣冠授室先猶子而後己子晚年又遭子婦之變更撫其二孫成立卒年八十有七得旌如例

野史氏曰節婦守夫遺言茹荼集蓼百折不回以踐其諾可謂艱貞吉安節亨矣歐陽文忠作五代史取王凝妻以愧馮道諸人然則享人之祿任人之國反顏倒戈受託不



終者聞節婦之概能毋赧汗也歟

江節母汪孺人傳

李世祿

孺人汪姓歸江氏爲同學載璇曾王父懋森公德配也當長子未及舞勺次子尙在襁褓時懋森公以勞過而逝孺人含泣曰從死易養姑難然爲宗祀計安可不勉爲其難乃茹苦含辛守節撫孤夙興夜寐勤勞家務未幾家道復舊二子亦相繼成立豈非矢志靡他有志者事竟成乎咸豐間孺人母氏身得風疾養老其家孺人朝夕侍奉寒暑無間無何粵寇臨黟母氏不良於行自牙難免囑孺人他往以避孺人死守不忍去賊突入強索黃白物無以應乃

黟縣四志

卷十四

雜志

文錄

七

網懸樑間積薪其下將焚之孺人容色不變忽官軍至得解倒懸此所謂吉人天相者耶抑孝忱有以感召蒼穹耳嗟嗟道德頹衰風俗日薄節義孝友之事不講久矣若夫見義勇爲死生禍福不足動其心求之鬚眉男子固已鳳毛麟角而孺人且優爲之洵巾幗中豪傑哉噫可傳矣

何母潘宜人傳

盧琪

何母潘宜人者南屏封翁御六之妻也生有淑質長習禮教性孝謹父母甚愛憐之年十七歸何祖姑在堂事之惟謹得舅姑歡心封翁商於吳以家政屬之宜人上侍重闈克盡孝養下撫子女教以義方內事外事應條赴理封翁



得一志於商而無內顧者皆宜人之助也封翁旅吳幾三十年凡王母之喪男女之婚嫁新居之營建唯宜人是賴宜人區畫綜理一一皆宗於禮焉宜人慈惠鄰里族黨中有遘疾不能醫藥遭喪無以爲殮者宜人欲助之又有幼不能從師壯不能迎娶者宜人周濟之甚有以急難告者家無餘貲不惜典釵珥轉稱貸以應之雖巾幘無異丈夫焉平居里巷相往來閒有婦姑勃谿娣姒詬誶者往往得宜人一言而立解無不和好如初至於族戚吉凶遺問之禮無不從豐而治家儉約布衣蔬食數十年如一日里黨嘖嘖稱之以光緒甲午年四月初二日卒卒之日三黨聞

黟縣四志

卷十四

雜志 文錄

五

之歔歔失聲春秋四十有七子六孫四以長子觀華贈宜人封翁念宜人之賢不忍湮沒也命觀華屬予爲之傳盧琪曰嗟乎婦道凌夷甚矣求所謂行有法度動有禮經者殆寥寥不少概見如宜人者事上以孝教子以嚴待族戚以禮而復濟人之急成人之美處人以寬處己以約如此求之今世亦罕匹焉亟立傳以示來茲俾婦人有所矜式庶可挽後世之澆風也夫

王母謝孺人傳

王母謝孺人者湖洋坑謝貴偉之女城東王攀桂之妻也孺人年九歲父母均喪無依姑迎歸撫養孺人稟性淑慎



達禮翁姑常鍾愛焉十七歲成婚事翁姑尤謹每得歡心  
二十一生一女幼殤翁姑痛切孺人勸解曰無根之嬰孩  
故作累人有去自有來願無痛惜多加餐焉二十三歲夫  
故孺人擗踊哭目已血念二老在堂不可不代子職乃忍  
死奉事盡禮尤勝平日孺人家本極貧迨翁逝後債欸甚  
多孺人佃田播種兼習做香與姑度日有餘卽歸清舊債  
後姑得風疾行動維艱均得孺人抱之當病劇時尿尿牀  
上孺人爲之洗換不嫌污穢無時不在左右不解衣安睡  
雖經日久全無勞苦之態姑歿後偶食甘味尙思姑逝未  
能奉事言念及此淚涔涔下每逢忌日節祭翁姑平日所  
喜者必羅而致之爲祭祀之饜族鄰困苦者常樽節衣食  
以周濟現年七十有六仍勤勞做香易日困而不失其所  
享其此之謂歟

梅溪子曰節婦者非徒夫死不嫁之謂然必事奉庭幃能  
代子盡職焉耳聖經有云事父母其順矣乎孺人事上每  
得歡心死後不忘所生可傳乃傳

### 黃節婦傳

節婦孫氏黃美渭妻卽歲貢黃樹玉之母也幼歸黃門事  
姑盡孝生子未三稔夫故辛苦持家擇師教子處事明達  
不愧巾幗完人鄰里皆德之爾時有孤嫠累積多貲年老



孤居至有戒心慙以積銀八百圓攜乞節婦代藏節婦熟  
悉該嫠爲人清白且知其乞藏實在情形是以當代收藏  
並無人知者逾年嫠夜暴病死詰旦門不啟親鄰撬入始  
悉狀族爲立嗣主喪節婦聞知立將原銀還其子封裹仍  
存舊樣噫嘻世間之貪利而不恤名節者多多矣以視節  
婦宜如何汗顏也夫

### 朱節婦傳

節婦朱氏如珍前任訓導元和朱駿聲先生之孫舉人孔  
彰先生之女也名門淑德幼嫻女誡動容周旋必遵禮則  
家人皆愛之少字一都歷川州同銜汪升圭爲妻升圭稍

## 黟縣四志

### 卷十四

雜志 文錄

七

長頗好學以勞成瘵其父年六十僅此一子思娶婦侍子  
疾且冀得孫使冰人致意於朱氏時節婦母已卒祖母高  
愛之甚以升圭病瘵且不起難之節婦進曰身已字汪則  
汪氏人耳今汪生不幸而病翁始老悲傷必甚復服事其  
子是重困也吾心何安不如允其請幸而汪生病得痊如  
天之福不然代以事父母吾所願也豈以死生之故易吾  
心哉祖母知其志堅乃許嫁焉時光緒十二年冬十二月  
也節婦年僅十七嫁時升圭扶病成禮病日篤日夜侍湯  
藥備極勞瘁終無效明年正月卒蓋歸汪僅數旬耳節婦  
雖悲痛不欲生絕食數日然以翁姑在奉養無人強自抑



畫仍操作如平常百方慰其翁姑不敢稍露哀戚之容惟退居私室飲泣而已而翁姑不知見其奉事之勤慰甚謂人曰吾婦賢雖喪吾子有婦猶子也時族人子弟以翁無嗣頗肆侵陵翁患之無如何節婦周旋其間喻之以理責之以義族人敬而畏之事遂息節婦見翁精神尙強固跪翁姑前請納妾爲嗣續計翁許之納二妾逾年疊生三子翁姑喜曰使吾家有後宗祀不絕者賢婦孝感之賜也既而姑頸患惡疽延及脊間痛苦殊甚呻吟牀蓐血膿沾濡家人皆避不敢近獨節婦不離左右凡湯藥之需洗滌之事皆親任之衣不解帶者四十餘日夜嘗跪禱於神前願

黟縣四志

卷十四

雜志 文錄

九六

以身代因思古有吮癰之法遂取則焉姑患大減遂愈姑常與親戚言曰吾非賢婦老朽早死矣無何翁卒節婦哀毀逾常姑老叔幼喪祭諸事皆一人經理悉合禮節親族咸嘉歎焉今節婦年四十八叔已娶姑猶存尙賴節婦以維持則節婦之困苦艱難冰霜節操卓絕孝行有非尋常所能及者矣

王節婦傳

節婦王氏雙鳳八都王康慶之女幼字江柏山范康育爲妻婦年十八出閣成禮四月其夫出外貿易節婦侍奉太姑及翁姑甚孝夫出外二年患勞症回里節婦親侍湯藥



夜不能寢月餘其夫去世節婦見翁姑悲痛甚切忍著悲啼勸慰翁姑夫君天亡此皆媳之命薄無可如何望與胞叔娶嬪一則慰太姑之心二則以冀早得姪男翁姑聞說欣然從之卽聘城中程氏宜章程松澤之女與次子完姻程氏賢淑同節婦侍奉翁姑操持家務妯娌相處甚是和睦數年後翁姑抱病數月妯娌二人侍奉湯藥不辭勞苦至翁姑壽終家務艱難翁尙欠人之欸債戶登門索取日夜不安叔尙年輕恐其憂慮妯娌相商將首飾釵釵銀出售替翁歸趙旣而叔生一子節婦同心教育猶如己出程氏尊敬節婦如同姑嫜後叔有疾暇居四載衣食不敷妯娌

黟縣四志

卷十四

雜志 文錄

九

只得縫紉度日每至更深從無怨語節婦見姪年長覓以生業令其出外川資行李等件均節婦幫助辦理民國四年冬月叔嬪患病延醫服藥皆節婦日夜看視左右不離及至棄世衣衾棺槨均節婦移挪者也不數日叔在外病故節婦悲傷欲絕回思姪年尙稚祭祀一切推委何人祇得耐心將翁姑及嬪之靈柩一同歸葬免姪幼年擔此重任近日節婦惟有縫紉度日支持家務佐姪成人勞而無怨節婦現年五十歲

韓母王宜人家傳

胡元吉

宜人王氏黟人也清分部主事韓君仲容繼妻優貢紹祖



之母也父雲書與余同里閨宜人幼以賢淑稱及適韓也韓黟望族世治儒業號清門至仲容君文譽籍甚善書得歐米家法橐筆四方於鳩茲於濡須於淞滬舒皖間皆以宜人隨宜人相夫曲盡婦道未寒而衣添未飢而盤餐具仲容君館穀不豐而悠然忘其羈旅之困者宜人力也歸韓十六年未有出撫前妻子紹祖如所生視他人之顧復倍焉紹祖少聰慧得膝下歡旣肄業安徽高等學堂時候官嚴先生復任監督嚴固通儒諸生中少許可獨心契紹祖謂可大成紹祖益發奮卒業試擢優等丁未科授優貢歸而迎娶年未冠也鄉人榮之竟以讀書過勞膺疾至戊

黟縣四志

卷十四

雜志 文錄

一百

申年疾劇甚宜人調護衣不解帶者月餘矣有星者言宜人命宮與紹祖歲運相阨宜人默然泣數行下已而歎曰如此不如我死尙可延韓氏一脉也是夕潛仰藥自盡時二月十六也紹祖後半月卒仲容君旣喪賢妻又失愛子痛不欲生更念其妻其子之賢不可無傳於後走書告余荷澤任所求爲立傳時方多故又不知其死事之詳無以塞仲容之悲歸田後訪仲容君於奇墅里居頽然老矣握手欷歔重申前請泣下沾襟余亦淒然不禁山陽笛聲之感爲次其傳俾列於家乘焉

胡元吉曰古之賢媛殉夫殉父者有之矣未聞殉子子未



死而先身殉尤於古無徵則宜人制行殆未軌於中庸乎雖然宜人之痛懼祖宗之不血食不憚一死以存宗祀純孝至仁之用心也殺身成仁丈夫所難女子能知之而允蹈之嗚呼烈矣宜人與余居比隣固娟秀柔弱女子也而節概如是太史公稱留侯貌如婦人好女其計魁梧奇偉余於宜人亦云

余宜人家傳

胡元吉

宜人王氏者余君克勛之妻也以子捐職得贈宜人父有貴蚤卒母久病孝養甚篤年十八于歸奉翁姑承祭祀以敬謹稱克勛君少從族桂峯學博問業銳志於學讀書每

黟縣四志

卷十四

雜志

文錄

三

過夜分嘗敬伺之或爲粥以備既補博士弟子員雅喜交游汪韜廬京卿陳小農學博及王嘯秋孝廉許晉齋上舍族南園明經時相過從入告具餐卽曰吾知某君來君必欸接已備饌矣克勛君專壹於學又以其餘宣勞於族黨里閭者蓋得於賢助爲多豈知憂勞損壽年僅三十有八竟奄忽長逝宜克勛君撫今追昔錦衣角枕之痛未曾一去諸懷者矣光緒戊戌黟游饑克勛君赴江西輸糧平糶宜人與幼弱在家日惟進粥一餐諸子請具飯誨之曰年饑如此旁舍有未舉火者得粥已屬至幸待爾父歸邑人皆得食食飯未晚諸子屏息不敢言又有夫妹適某氏者



夫故以金飾相屬未以告人無何夫妹又故以所屬金飾送還其家封識儼然或有勸私其所屬者正色拒之曰金飾誠貴須知名譽之貴萬倍於金飾人卽不知能不內愧於心乎言者大慚所言如此豈巾幗人語哉余與克勛君同里閨又申之以姻親素稔其妻之賢今余氏方理家乘其子壽峻等狀其行請作傳揭其大者如此乘之以論論曰昔李中孚求顧亭林爲其母作傳亭林不許謂文必關經術政理之大若一人一家之事不足爲也嗚呼何其固哉亭林宗朱子者也朱子小學所載冀缺梁鴻之妻獨非一人一家之事乎且二南所錄桃夭芣苢采芣采蘋諸

黟縣四志

卷十四

雜志 文錄

三

篇皆婦人女子之事如亭林所云聖人何以不刪且以用之鄉人用之邦國抑又何說歟吾爲宜人立傳豈僅塞克勛之悲而爲余氏家乘之光哉亦以質諸當世之知言者

程母朱宜人傳

朱懋麟 翌如

宜人姓朱氏字寶珩予族慈善家竹農先生之長女也幼秉母氏盧太宜人教性慧嫩耽吟詠有林下風予少時見其背誦唐詩聲琅琅然心竊羨之以爲女學如此吾輩男兒日讀數行書多犖牙難澀且卽遺忘者行滋媿焉年及笄適桂林文純丈伉儷甚篤治家政有條理得威姑歡家本素封前清同治癸亥緒寇犯黟家產遭燹蕩然文純



丈被掠陷賊中旋逸出挈家避地藍田續賃居阜均異地  
羈縻備嘗艱苦寇平後返故居收拾餘燼時文純丈患病  
不治生產闔內外事悉宜人部署之教令嗣醴泉恩勤備  
至勉爲通材族人稱爲賢母醴泉禔躬馴謹誦先人之清  
芬遵母訓慎交游精計然之術兢兢業業家道由是中興  
方冀潔膳南陔時殷孝養詎意疾風吹竈竟於前清光緒  
戊申臘月初三日疾終內寢享壽■十有■歲嗚呼痛哉  
按宜人慈孝恭惠說禮敦詩潔滌灑睦嫺親上愉尊章旁  
葉娣姒臧獲挹其霽顏豆籩申厥古誼教子則名成行立  
蔚爲商界偉人莊莊乎油油乎洵女中之丈夫巾幗之樵

黟縣四志

卷十四

雜志

文錄

三

范者矣醴泉與予爲總角交因述宜人懿行囑爲傳之予  
媿老拙無文辭不獲已輒就見聞所及筆之於書亦本童  
年時欽羨之忱而益申景仰云爾

王氏雙節傳

黟縣王圻妻萬氏邑萬處士女早喪父事母至孝年二十  
歸圻八年而圻歿萬吞金遇救家人衛之嚴終得不死生  
平寡言笑嫺禮法奉舅姑如事父母嘗謂新婦事舅姑苟  
不周至舅姑卽意不適難出於口每小姑歸甯竊詢之曰  
老人得毋有不快者乎小姑答之曰無之則怡然而喜圻  
之弟城妻許氏邑貢生許琳女幼習庭訓熟於古今忠孝



節義事年十九歸城十年而城賈於豫章歿焉家人以許性剛恐其以身殉匿不以告柩歸許慟絕而甦意不欲更生或勸之曰而伯氏無祿而姒早寡翁始年邁門無期親兒女幼稚哀哉而何以死盍強起事舅姑生者安則死者瞑矣許乃不死翁晚年病風痺姑多疾且病足行動須扶持凡飲食醫藥皆兩節婦更任之而行步扶持其姑十餘年圻無子城一子孝祥兼嗣兩節婦共撫之而許教子成人萬生於道光二十四年歿於光緒十三年守節十有六年許生於咸豐元年歿於宣統元年守節三十年圻候選同知城監生按照磨職銜

黟縣四志

卷十四

雜志 文錄

高

錢振鏗曰自來忠孝節義爭光日月不可誣也婦人無非無儀而獨能以其節與忠臣義士並立豈不偉與王氏以雙節爲妯娌此盛事也近年鄉先生輯修省志邑皆有徵訪處吾見邑人具節孝事畧或二三節婦萃於一門不爲之合傳異時收入省志但分列某妻某氏孰知其爲一門之盛者夫世俗科名或父子兄弟同榜世以爲美談况婦人苦節與古忠義並立豈區區科名可比奈何沒其一門之盛而不爲特筆章顯之乎吾願天下之輯志乘者遇有節婦萃於一門或姑婦同節或妯娌同節或凡其門內之有服者同節皆當別爲之目以旌異之凡有徵訪刊此例



以行夫如是然後使人歎仰清門之芬馨婦德之極盛吾國風俗之厚爲不可及也豈不懿與敢以此論爲黟縣王氏雙節發之世之君子幸留意焉

余母江孺人家傳

太平 陳之澍

孺人江氏適城西余榮翰公之德配也幼能孝事父母及笄于歸承順翁姑勤劬操作頗有少君之風公有志仕進入京考取供事未幾卒於京都遺孤未滿三齡孺人含辛茹苦日以侍翁姑撫孤子爲事同治癸亥粵匪擾黟孺人老憊艱於奔避爲匪所執孺人厲聲大罵卒及於難時年六十有三族鄰以孺人守節三十餘年慘遭戕害咸哀悼

黟縣四志

卷十四

雜志 文錄

五

而爲之請旌

贊曰姆訓克嫻翁姑心悅恨結青鸞撫孤守節劫歷紅羊詈賊濺血嗚呼孺人亦節亦烈

余母胡孺人家傳

余攀榮

孺人胡氏適城西余勝祖公之德配也十一都際村國學生胡志奎之女性勤儉公家貧孺人來歸處之泰然姑汪氏夙患癱疾起臥非孺人不適公嘗謂曰卿能得吾母歡心吾無內顧憂矣嗣公歿遺命事親撫孤孺人乃強抑哀痛以解姑憂又以奉養無資勤劬紡織終宵不寐姑有所欲必從容以進如是者二十餘年孺人可謂養志矣卒以



心力勞瘁得疾不起彌留時執其子子康以囑曰予不能奉姑以終爾當代爲養勿悲痛以傷老人心族鄰以其賢孝嘗舉以爲里黨勸

贊曰事上以孝相夫以勤願虛偕老奉養尤殷寒門賢婦姑亦欣欣孺人懿德鄉里共聞

葉母汪宜人傳

葉新第

宜人姓汪氏四都官路村國學生汪公松年女也年十八歸于奉直大夫端書府君曲盡婦道得翁姑歡甫三年而府君卽世宜人痛不欲生其不卽相從地下者以翁姑在堂而繼嗣未立也爰奉翁姑命以二房之子新喻爲嗣娶

黟縣四志

卷十四

雜志 文錄

百六

媳黃氏生孫兆成甫三歲而新喻卽世迨兆成成立娶孫媳舒氏未有所出而兆成又歿一室三嫠慘之至矣宜人於痛定後毅然獨斷於是再謀式穀繼孫杪一曰芳穀係長房同科之子一曰芳增係二房新科之子二孫以次成室議定生子卽繼兆成迨芳穀生子如懷卽爲兆成繼嗣三房鼎盛孫又生孫宜人顧而樂之當亦躊躇滿志矣然剝極而復皆當年之盤根錯節酸楚萬端再造家聲以延血食此非胸有定識斷不能以人勝天也宜人生平沉毅有智畧當粵匪竄黟時潔身遠害及難靖歸來室家如洗樽節旣久漸復小康人有急難相求者必周濟之和於族



里與先母太恭人尤相契第時貧賤宜人獨器重之謂太恭人曰嫂有賢子無憂貧也如有需用可向我家取之不須物質立摺爲據但請爾子新第來我處一言足矣時太恭人已成瘵疾故生前醫藥之費歿後喪用之貲皆取給焉積至二百餘金無一語責償後來事業稍順始并子母而歸之及第館選假旋宜人見之悲喜交集曰惜哉爾母不及見也性勤儉至老不懈園蔬之餘遣婢賣之男女各使執業無一人安坐而食者凡有義舉必力爲之年八旬以各孫所奉壽儀番餅百枚輸入三關神會以手置田地房產除立祀會外俱三房而均分之督學使者以節孝上

聞特與 旌表神主生入邑祠壽享八十有五歲與端書府君合葬於一都西陪從治命也光緒二十二年以曾孫玉達布理問加級請封曾祖父母宜人固親見之

論曰昔李爰得叟稱宜人爲女中傑迹其生平行事有爲鬚眉所不及者第於宜人分居猶子嘗隨侍太恭人往來其家聽言觀行心敬佩之其迭經盤錯絕而復續且親見孫曾之鼎盛焉天殆先嗇之而後裕之乎

邵母陸夫人傳

程定保

夫人姓陸氏贛人也生有媿德淑慎其身年十五歸清封通奉大夫邵君載之爲側室凡六年而寡又三十三年而



病卒春秋五十有四以所生子鐸階二品晉封夫人媵於邵敬事大婦守禮唯謹與嫡子婦共處親睦無愆儀邵本素封而夫人勤儉操作如窶人婦未嘗有纖毫驕矜色凡諸男錢女布以及浣濯烹飪瑣屑事必躬親之人皆稱之曰賢性好施與里鄙有匱乏者周卹必饜其意蹙額而來軒眉而去善行之感人也深矣光緒壬午季秋通奉君疾終於贛擗踊泣血幾不欲生轉念子女幼小已欲從殉是煢煢者將累嫡母更重已罪乃忍哀痛偕嫡子等扶襯旋黻教養弱息至於成人畢婚嫁子鐸得以保世滋大皆秉慈訓也居恒敬神語家人曰吾非感禍福果報之說特祈

黟縣四志

卷十四

雜志 文錄

一頁

佑汝曹安卽以慰汝父在天之靈也嗚呼可傳也已贊曰星雖小也而煌煌其彩雲乃慈也而縵縵其華性貞靜德柔嘉崇勤儉戒驕奢是以能宜其家令子玉樹孫蘭芽國恩家慶蒸雲霞榮膺象服耀筭珈節孝慈仁四美具彤管表德芬詩葩傳之家乘兮永永無涯

胡節母傳

孫寶琦

胡節母姓孫氏名茂林黟縣贈文林郎廷玉妻也年十八歸胡氏逾三年而贈君卒以遺腹生子元吉贈君故貧士既死其家益困父母咸在堂無恙節母以婦代子奉養無缺舅卒姑因疾失明性嚴切小有不適輒用譙訶節母左



右就養旦夕不敢離先意承志常使怡悅如是者十年元吉體素弱少小多病節母保抱提攜顧復備至年稍長力督之學逮弱冠補諸生聞譽藉甚安徽布政使于公蔭霖按察使趙公爾巽修書聘長敬敷書院于公撫湖北復延贊戎幕會拳匪構禍各國聯軍入都兩宮西狩于公移節河南元吉當從聞母病遄歸省視甫入門節母拊牀切責曰于公遇汝厚此何時也于公報國汝當報于公不速去吾不起矣詰旦元吉嚴裝啟行于公見其至喜甚聞其事歎曰賢哉母也異於絕裙者矣和議既成各省創興學校厲行教育以圖自強元吉復歸襄理安徽學校每遇伏臘

黟縣四志

卷十四

雜志 文錄

三頁

歸省節母必詳詢校况與學生成績戒之曰汝父讀書未就齋志以終汝能盡力訓勉多所裁成亦庶慰先人於地下也逾數年趙公總督兩湖以元吉應求才詔得旨以知縣用分山東任荷澤知縣荷澤爲曹州首邑素多盜號難治元吉撫循柔輯民感其德寧謐無擾未幾武昌起事敵軍洶洶且至元吉力籌守禦節母遺之書告以上不負君下不負民若事有不測便當致命遂志勿以母故貽先人羞也及遜位詔下元吉奉節母之教解職歸大吏及荷澤民留之竟去不顧士大夫聞之皆曰賢哉節母能使其子爲節士此晚近所難能也元吉歸侍九年而節母卒年七



十有二

論曰古之英賢特達之士出於節母之教者代有聞矣以元吉之賢方可大用於世逢國變遂隱遯奉親終養其母母爲節母子爲節士尤古今所罕有也元吉之宰荷澤余巡撫山東時頗識之因詳其爲人並詳節母行義嗚呼劉中壘所稱母儀賢明仁智諸婦節母豈多讓哉

復山汪母李恭人傳

上饒 鄭崧生

恭人姓李氏居黟縣之鳳山父鴻翥爲邑諸生恭人明敏幽閒事之惟謹稍長習女紅兼綜內政鴻翥雅愛之選婿於同邑汪君錫祥錫故大賈受賈於江右之玉山居奇致

黟縣四志

卷十四

雜志 文錄

三

富以勲階入敘累贈至中憲大夫恭人贈如其職歸汪氏時年甫十七閱八年而夫疾疽發於背日潰膿數升衾蓐皆徧恭人爲雪垢搨葺歷寒暑無倦容至病革中憲泣謂恭人曰我病且死固知爾能從我顧吾大母及父母皆在承歡之託辱在於爾爾第行吾志卽不我從吾瞑目矣且鏞兒果肖吾自有不死者存爲我善視之言訖而歿故中憲歿後垂二十年而恭人提六尺孤奉兩代養不以哀毀而傷其生者從治命也恭人旣失所天念汪氏先世業商不欲以夫死失業乃趨其夫弟偕父往賈於玉山恭人經紀家政秩然有緒時粵匪踞太平石埭間連年不解謀且



至黜其太姑聞變疾轉劇因逝恭人走伴白夫弟問道回里賊勢洶洶黜之人無長幼皆不業獨恭人子崇鏞尙幼恭人恐亂世失讀則命之入玉就師學甫成而信州告警崇鏞尙未婚十徙間關棲遲靡定恭人爲供帳具綴履絰裳無虛日辛酉三月崇鏞始畢婚十月其舅卒又五年其姑亦卒恭人躑躅哀號連治數喪俱如禮里婦之稱賢者咸以恭人爲最先是警報至漁亭舉家賃居潁川棲息數年不戒於火閭舍一空更徙復山距漁亭五里許有坂曰汪村路通浮婺盛暑戒途無苦蓋以蔽風日恭人構亭其間烹茶餉客路無病渴者嘗誡其子以輕財恤困非正人

黟縣四志

卷十四

雜志 文錄

三

不使近蓋好善其天性也恭人凡遭大故者三納子婦者二中更喪亂未敢言病然坐是勞瘵得心悸症氣漉漉如不續其子延醫治少瘥更歷數歲而終大吏請旌於朝樹楔於漁山之陽鄉之多恭人才者至是始以節稱而恭人不死矣恭人子崇鏞與予姍姍樹芝交最善以狀來請爲傳予故知之甚稔焉

論曰烈婦不可爲而可爲節婦可爲而不可爲非節之難於烈也風燄雨疾引決於一時苟知自憤者能之至於忍死間關從容就義雖古志士猶難而況責之巾幗中哉方恭人當其夫易簣時執手泣訣如不欲生可死而不死意



蓋有賢於死者卒之孀居矢志歷家難而保遺孤喪死養生克終遺命其事難而似易人多忽之者爲錄其大端著於傳

李節母葉太恭人傳

江峯青

天地嚴正之氣上爲日星下爲河嶽其鍾於人也爲孝子爲忠臣爲貞女爲節婦蓋巾幗中有丈夫冰霜中有奇節如吾鄉李母葉太恭人者可以傳已恭人爲晉徽黟邑南屏村葉丈季女性孝謹不苟言笑丈晚年多病恭人侍湯藥不離牀蓐歷數年如一日迨丈夫歿相繼謝世恭人依兒嫂以居友愛彌篤嫂歿後恭人以弱女子佐兄經理家

黟縣四志

卷十四

雜志

文錄

三

政內外整肅人無閒言年及笄歸同邑霞坦村四品封典候選按經歷李選功先生宸爲繼室舉梁鴻之桮相敬如賓挽鮑宣之車不自暇逸無何髮冠擾徽甯風鶴之警一日數至時先生伯兄瀛航司馬賈於鄂之天門縣岳口鎮招之往遂攜家赴鄂先生性伉直多與俗忤恭人時以和平養性相勸慰先生常爲之動容居鄂八年生二女至同治庚午春先生感受寒溼病漸劇恭人禱天乞代卒不應時恭人年二十七欲以死殉夫因有遺腹冀一索得男以延夫祀又念兩女均幼拊畜需人勉徇妯娌請起治事逾數月生子名念璽舉家悲喜交集恭人夙嫻姆訓識大體



私念未亡人不宜久居外地乃挈小兒女扶柩返徽間關  
跋涉蓋艱苦備嘗矣抵家營葬事畢輒屏去婢媪躬自操  
作人有詢之者恭人曰兒幼家僅中人產來日大難且敬  
姜猶績我何人斯而敢一日坐食也念璽長恭人延名師  
課讀不惜重費子姪中無力婚娶者恭人必竭力飲助親  
鄰緩急酌量周濟無吝色無德色兩女次第出閣均豐儉  
如儀又爲念璽聘婦光緒丁亥念璽年十八婚娶有日矣  
詎又一病不起恭人此時之傷心慘目誠有不堪言狀者  
然終以故夫嗣續爲大擇諸猶子中賢者幼舫廣文秉瑩  
入繼廣文生長鄂省在岳口時早爲恭人所鍾愛髫齡入

黟縣四志

卷十四

雜志 文錄

三

學食餼名噪膠庠以訓導候選至是憑宗族議立爲恭人  
後恭人視若己出天倫之樂洩洩融融先世坟塋毀壞及  
厝棺木未葬者廣文遵奉母命分別修理安葬恭人一生  
以不逮事舅姑爲恨每先人誕日或值忌辰必手具羹飯  
致祭盡禮至老不衰居恒無疾言遠色誘掖後輩娓娓不  
倦見之者咸肅然起敬聞其教者亦潛移默化而不自知  
蓋其大節有以服人而其淑德又足以感人也恭人疊遭  
憂患心血耗損晚歲多病僅能食饘粥益復愛惜物力劬  
於內政恭人以道光甲辰三月十七日辰時生光緒丙午  
八月二十六日戌時歿計享壽六十三歲守節三十七年



其族人公呈提學使者請於朝得旨旌表如例并崇祀節孝祠嗟乎恭人於女道婦道妻道母道均一一實踐幼觴廣文亦善承母志能文章蓄道德恭人苦志積累數十年將於廣文發之蓋善無不報而忠孝節烈之必有後也峯青與廣文交最稔因熟知恭人卓行懿德既爲之傳而贊之曰

巴婦畸行梁媛高節恭人方之如出一轍井水盟清池冰  
嫵潔水平不波冰堅弗裂地有時陷天有時缺皦皦寸心  
萬古不滅

余母汪孺人傳

姚國儀

黟縣四志

卷十四

雜志 文錄

四

余母汪孺人桂芬廣文之母也廣文長予七歲予兄之少本相歡既冠同社課文藝又互相心賞故兩家往來最勤相知亦最深歲甲午廣文奉太翁敬修先達暨孺人安葬邑之西麓先達遺像得郡人汪京卿題贊既詳既贍廣文孝思不匱將臚孺人嘉言懿行存於家乘謀之於予予應曰讀書半世彌愧不文然傳孺人德無如予者謹按孺人碧山汪氏年十九賦于歸維時翁姑幸健在而家計稍中落或疑孺人不堪其清寒而孺人手調甘旨務得二老歡心或又疑孺人在翁姑前強修愉惋之容而孺人日操井臼夜任織紉曾無幾微之愠見於言面孺人淑慎寡言家



居無俚妯娌之間或刺鄉鄰細故以資言談相爲歡笑孺人獨默然有請其故者則曰內言不出某家事某人言予烏乎知之且予輩今日之言笑安知無他人刺取之以爲言笑者聞者爲之悚然詩曰婦有長舌爲厲之階聞孺人風可以愧而知返矣黟常言三代不儒則弱三代不商則貧廣文少時家計旣非充裕故羣以習賈爲宜孺人獨否曰貧非不幸子弟不能知書達理而納於邪僻乃家門之不幸以此廣文業儒之議遂定同城伯華舒先生能文章蓄道德之君子也孺人遣廣文師之雖極拮据束修之奉至撤簪珥無難色舒先生感孺人之意於廣文督責特嚴

黟縣四志

卷十四

雜志 文錄

五

觀今日廣文之所成就雖嚴師之教抑非孺人之賢不及此孺人生子一卽廣文生於嘉慶辛未歿於咸豐丁巳論曰自父兄之教不講而擇師重道之風微也久矣村學究句讀不明兒童蒙養以呶語數行畢乃事無論矣卽自謂能得師者亦惟趨權勢之所在冀求援繫又進而上之亦不過豔慕文藻之富乞其餘瀝以獵科名若夫望道德之門牆求義理之切磋者固斷斷乎其無有然則孺人之擇師教子可謂難矣

余母黃宜人傳

胡存慶

余母黃宜人者黃村太學生學文公之次女清授奉直大



夫茂春封翁之繼配也華標胄緒柔協鞏絲諳內則女子巾脫之編工河北婦人織紉之事父書能讀女誠夙聞固已珍若掌珠名齊柳絮年十八于歸茂春封翁鳴雞戒旦挽鹿同車既中饋之能修亦壺儀之足法詎知琴瑟乍調之日正值杼軸其空之時邱文振舉室播遷蕭條生計桓少君提甕出汲供奉高堂五夜篝燈機聲不息一畦春韭菜味偏濃蓋早識女子宜有職業毋徒倚賴於他人數口欲免飢寒斷必支撐夫家政也夫布衣耕織孟光婦椎髻而改裝傭食辛勤仲子妻灌園以食力此惟處境之迍遭制行之高潔而然也而宜人當茂春封翁與其弟西江作

黟縣四志

卷十四

雜志 文錄

粟

賈之時陶朱三徙富致千金從願多田家比萬石乃猶布裙淡素儉守叔鸞之家風并曰操持勤效馮妻之辛苦木奴千頭足封君而患無德義耳黃金滿籬豈遺子以與爾鄉黨乎蓋其指困濟急焚券救貧慈善成若天性慷慨不讓丈夫也其尤著者如房叔耀廷由甯病歸中道而歿四壁徒存有誰贈賻六尺無託更少脫驂宜人不但經理喪殯廣爲飲助而且推吾老吾幼之心兼食子收子之任按月周給其老母與幼子焉白髮黃口咸被恩私九世一門庶幾彷彿不甯惟是積之先生其服叔祖也值衛武公戒飲之年有漢袁安臥雪之慨宜人誼篤葛藟情殷桑梓一



封尺鯉廻文直達藁砧百里西江餘波已沾涸轍則早送積之先生於肆中供養餘年矣庚子歲饑邑民乏食斗米千錢呼庚諾癸痛天災之乍降甯富室而獨安宜人乃請命於姑函咨茂春封翁由江西辦米來黟自雍之降役竟起乎泛舟賤發貴儲法乃仿乎平糶此皆出自婆心成斯公益尙已先是戊戌變政科舉遂停莘莘學子漸汲文明嫋嫋娉婷獨淪黑暗思爲女界啟一線之光明必興女學作全邑之嚆矢宜人憚爲登高之呼作將伯之助由是其族淑範女學校成立而以其孫女多福入校肄業爲之倡請從隗始五丁敢開山立功爲之河先萬流讓宿海居

黟縣四志

卷十四

雜志 文錄

二百七

上然而蠶以絲盡而身死刀以銳減而鋒磨蓋因丁巳年茂春封翁由江西抱病歸里煮藥必嘗腸愁九轉祈天求代憂焚五中匪僅遣之問樊英衣不解帶者屢矣幸竟沈痾之遇秦緩疾占勿藥也霍然矧又奉養慈姑勤謹備至食少事煩其能久乎積勞成疾職是故耳至是而慈雲已散寶光無輝矣卒年五十有七子二人長錫楨縣學生次錫麟蚤歿

余母舒孺人傳

江西玉山

任壽祺

孺人舒氏屏山聯桂公女幼知禮則年十九歸余羽儀先生事翁姑惟謹妯娌相待以和翁老家居翁店付託翁第



折其本並負債孺人出奩具助償債務無吝色日種茶桑  
習女紅以補家計後羽儀先生復舊業家稍裕孺人勤勞  
如故荆布依然當時羽儀先生父母俱逝食指漸繁家務  
紛紜而能盡力於外以營商業無內顧憂皆孺人補助之  
力也歲壬午羽儀先生卒長子開禧次子開慰俱成年孺  
人笑而誠之曰父沒觀其行今而後爾兄弟當互相親愛  
無改父道免墜家聲爾弟妹皆穉教養之責吾自任之不  
爾累也孺人乃與妯氏葉節婦長齋繡佛足不踰閫日課  
子婦理家務每逢翁姑忌日必豐潔粢盛竭盡誠敬光緒  
甲申年有親屬年少喪父孺人憐其貧節衣縮食年年以

黟縣四志

卷十四

雜志 文錄

頁六

之周給孺人異母弟舒君文成年四十貧未娶妻孺人出  
資爲其授室並葬父母封墓樹碑輝遠汪先生孺人次婿  
也當王文韶爲雲貴總督聘入幕府主任保留本省以知  
縣用迭來銀幣孺人分濟貧無力者庚子饑函囑其子開  
禧由江西運米回黟平糶八旬悅辰節壽筵濟鍾山火災  
其他立祀會刊善書津貼族親冠婚喪祭指不勝屈清光  
緒丁未年七月十四日無病而終壽八十有六子三女二  
孫八曾孫十一五世同堂鄉人榮之予丁巳歲長江西省  
議會因時雨農君創辦珠山額消鹽局得與其令孫錫楨  
錫蕃同遊二君皆清諸生能文章善書畫與時君爲世好



時君因談孺人之嘉言懿行爰爲之傳以誌欽慕云  
論曰古人有言君子之道造端乎夫婦然則婦德所關雖  
細實鉅觀孺人本慈善之心相夫教子推惠鄉鄰此亦陶  
孟之流非尋常男子所可及烏得以其爲婦人而忽之

### 查烈婦傳

查烈婦姓江氏名龍英江村江長嘉長女幼聰穎工刺繡  
父賈於潯陽年十八歸同邑查訓庭查亦僑潯者也閱十  
載訓庭病瘵婦侍湯藥維謹乙卯秋訓庭自度不起執婦  
手告曰我命垂殆親老子幼家徒壁立斷難責爾守節歿  
暮年可別嫁婦恚曰君病尙可治請息慮期速痊設不幸

## 黟縣四志

### 卷十四

雜志 文錄

一百九

願以身殉訓庭晒曰生出矢言死則背之吾見屢矣能從  
吾言亦免爲門戶羞婦不語面壁流涕適醫至診脈畢出  
私語人謂病入膏肓非草木之功所能濟宜速備後事婦  
從隔牆竊聽悉卽黯然入內抱幼子哺以乳安置於牀復  
從容出投屋旁井中有擔水者遙見疾趨往救無及大聲  
呼鄰人羣集拯出則氣已絕時七月二十七日越六日訓  
庭亦卒合葬九江府黃土嶺新安山

### 節孝胡母孫太夫人家傳

婺源方新

吾郡黟縣位郡之西北以黟山名黟水出焉山秀水清代  
產清懿風俗醇美女德尤敦篤過其境見操作田間農婦



猶高髻而長裙縞紅其士大夫之家閨闈禮俗益可想見矣予夙景仰其縣先哲俞理初程伯敷先生並得見其前輩朱仲我程抑齋先生而於近今乃獲交城南杏墩胡敬庵徵士嘗爲學子講徵士講朱子學兩次過黟謁其盧登堂拜見其母孫太夫人愈肅然想見古賢母之風焉予之獲交徵士於皖城也時爲清光宣之交固嘗聞徵士稱母賢節其言曰某遺腹子也吾母年十八歸吾先嚴至二十一吾先嚴見背而某始生蓋自嬰齠以至成人均秉吾母之教當能讀書時母卽爲擇師使事程抑齋先生先生篤信朱子者也某得識讀朱子之書而窺其學實自茲始其

後以程先生之教往謁湖北萬徵君斛泉徵君亦講朱子之學者也繼而受知於皖布政使于公蔭霖按察使趙公爾巽延以爲省敬敷書院學長院中所講亦以朱子爲宗故某之學受於師而實於母予聞之肅然歎守節撫孤易教子擇師難母豈尋常女子所及哉徵士後以于公巡撫湖北參贊戎幕值庚子之變兩宮西狩調撫河南徵士聞母疾歸省至則母以負于公切責促仍赴豫後吾皖於省城設高等學堂延徵士爲修身國文歷史講師每寒暑假歸母又必告之曰汝父讀書未就而早終汝宜勤教職以作人才而慰先人於地下也及奉詔被徵出宰山東正當



鼎革之際蒨澤又當直豫之衝母年六十餘矣每寄書皆以勤求治理見危授命無顧老身爲言至於清帝遜位徵士謝官歸里課耕授讀藉資菽水或爲之不堪而母則又怡然曰如此固吾家之分也於是徵士亦遂竟其志而無或變易蓋自壬子以後至於庚申十月母卒凡越九年徵士未出里門與母晨夕相依年五十而如孺子慕其樂融融皆母之志也當予造其廬時嘗游其郊外東山田舍讀其暇日從容吟作之詩哀然成冊氣韻如陶靖節又於月明下聽其援琴奏平沙落雁曲意境翛然清曠有非復人間之想乃益歎賢母之始終克成賢子爲善於處境也以

是醞釀而門庭以內盎然古懽如登春臺飲醇醪尤有非尋常士夫所能及者易曰地道無成而代有終也又曰家人利女貞不其然哉近人嘗有援理初先生節婦貞女之說以爲不重事貞操也者聞母之風亦可以思矣謹爲是傳以告世之言女教者倘有采於斯歟

余宜人傳

歙縣

許承堯

宜人黟縣清廩生汪君觀旦女適同邑余氏夫玉文字璘齋國學生候選從九當宜人初歸家極貧璘齋君買漢陽宜人拮据夜績事姑暨王舅姑能盡孝養奉親饌必敬恪時其匱乏或忍飢無怨色積金爲叔娶婦粵匪寇黟宜人



奉姑匿山中叔婦某氏不及避被賊傷僵卧宜人率其女名鸞嬌者偵得之負以走賊追及宜人疾奔免鸞嬌弱躍澗殞宜人哭鸞嬌極哀而兼慰其家人慶叔婦得更生鸞嬌以穉年能見危殉節母教也後生子毓元稍長家漸給宜人猶攜之種豆山麓日哺毓元飢求歸宜人曰兒暫飢耳若吾與而姊昔年常如是也毓元泣宜人亦泣光緒二十二年年六十六歿子毓元優廩生民國記名知事孫五壽髮崑照巖巖以次孫崑授光祿寺署正贈宜人宜人和淑喜施及其歿也人尤思之邑人士會葬者三百餘人

汪節婦傳

黟縣四志

卷十四

雜志 文錄

三

汪節婦黃氏黟官麓人太學生尙鵬之妻也尙鵬高祖曰國仁有子四其三子光燾亦四子長昭厥次昭歟三昭敦厥無嗣以歟子令鉞嗣尙鵬父也節婦年十九歸汪氏生一女一子子生僅十日而尙鵬死婦悲哀欲自經或責以養姑因俛默久之子呱呱然泣於懷婦撫之曰已己吾死不難所難堪者吾姑與吾孤耳汪氏三世僅此弱息我死將焉置此技泣起操勞如平常養姑十餘年姑死喪葬如禮子長賈於安慶之宿松客死婦聞慟絕而蘇者再哭曰吾夫平生宅心仁慈不應絕嗣汪氏之祖累世積德允宜血食環顧門內期功之戚無可繼者惟夫總弟德鴻年近



四十貧不克繼室因鬻己產爲之續娶餘年生一子婦名之曰福鴻又死福今九歲婦撫之如自出邑人上其事大吏爲之請於朝詔旌其門

論曰節婦之女適吾族祖雲浦翁故知節婦爲詳避暑山間聽雲浦翁述續祀事慄然骨悚赤日亭午忽不知暑氣之侵人也節孝真誠感人如此嗚呼可以風矣

清旌節孝胡母孫太夫人傳

潘 陞

節母胡太夫人姓孫氏黟之望族也世標峻譽家挺賢聲太夫人純潔天姿靜嫻本性當事明大體多幹畧年十八歸同邑胡公廷玉爲繼室歸後三年而胡公卒胡公卒後

黟縣四志

卷十四

雜志 文錄

三

一月而子元吉生先是胡公旣卒太夫人計以身殉念尊章在堂有身不審男女死則死耳義固尤有重於死者姑忍死待之洎元吉在育不死之義無可逃於是兼子職於雞鳴期藐孤以燕翼忍相從於地下冀摭在於宗祊元吉幼羸弱五歲不能斷乳子有禁禁母子有藥藥母蓋母以子爲命云元吉勝衣就傅率教異恒兒太夫人慨然於安定家學與夫新安文獻之舊不欲元吉小成也學甫通益張之名師嚴友旣命從同縣程徵士朝儀游更命遠負笈湖北萬京卿斛泉門然後元吉乃得深究宋元以來先儒學業劃然於純駁慕陳氏獻章張氏履祥李氏中孚皆具



堅苦卓絕之詣遂學三子之學而約以紫陽居敬之功元吉之名乃以聞大江南北有清光緒戊戌以前海內士習亦稍靡矣娉誕之士拾歐墨唾餘以侮弄耆宿佔俾小儒彌復硜守有司繩尺大率不識時務叢天下詬病疆吏若李文忠張文襄輩方溝洫新舊鑪錘東西既已興書院剏學堂成效相望朝廷亦鑒於多難更且與民更始詔悉改科學舊規行學堂新制當是之時皖藩于公蔭霖皖臬趙公爾巽以當代名流鑣聯轡並來治吾邦則循循以樸學提倡爲多士澹其先導諗元吉命聘爲書院學長又延主高等學堂講席元吉遂盡出所學告諸生無少隱於是元

黟縣四志

卷十四

雜志 文錄

五十四

吉之名益大著太夫人乃顧而樂之曰曩昔不死爲恨今則不死喜以觀吾子之成于公開府湖北召元吉入幕庚子之變于公調撫河南已戒行太夫人在家病元吉馳歸太夫人拊床責之曰兩宮蒙塵和局未定豈人子寧親日乎汝弗去余亦弗藥元吉抵豫于公曰此母異於絕裾者矣元吉仕魯令荷澤有聲壬子國體改革元吉遽解組歸大府屢移煩劇皆不就辭書有云清帝遜位元吉爲臣之義已終說者謂母之亮節子之高風皆不媿胡氏家學焉元吉旣歸養越八年太夫人壽終里第春秋七十有一子一人卽元吉清廩貢生山東荷澤縣知縣孫某某曾孫某



某太夫人治家一本禮法恩嚴和肅施罔不宜事親極孝胡公卒時年才二十四卒後十八年太翁始棄養姑老病雙目瞽太夫人事之數十年如一日太夫人五十八歲時同邑士紳狀其行上聞於朝得旌表節孝如例論曰昔歐陽永叔母鄭太夫人之喪郡守爲文祭之稱孟母三遷軻成大賢母有子如軻可以無恨今太夫人有子不亦永叔之流亞乎

余母汪孺人家傳

盧 琪

余母汪孺人者松嶺太學生福養長女署理貴池蕪湖訓導桂芬先生之繼配也生而淑慎喜習女紅循循孝謹爲

黟縣四志

卷十四

雜志

文錄

三十五

父母所鍾愛年二十二歸先生舅姑雖逝執婦道惟謹以未及孝養爲憾遇諱日潔蘋蘩盡誠敬歛歔者累日先生家世寒素自曾祖以下並列膠庠不治生產除書籍外無長物值兵燹十餘年貧窘益甚先生教授鄉里孺人紡績以佐之永夜青燈書聲與機聲相和且樂此而忘其貧也及從先生遊者日衆館穀日豐孺人紡織不輟服飾操作一如曩日先生爲人排患釋難解紛亂無所取孺人遇婦女爭執必力爲勸息先生教族鄰貧家子不受束脩且衣食之孺人間給以筆墨其無父母調護者梳盥之事孺人獨任之或以急告孺人量力欣助無顧恤辛卯先生司訓



貴池孺人隨往荆釵裙布躬自浣濯在任署與居家無殊  
貴池歸途中感冒由是多疾蓋亦數十年操勞所致也光  
緒甲午四月三十日以疾卒年五十有一生子三長召棠  
早逝次毓棠郡庠貢生三毓楨州同知女一適五都南屏  
光祿寺署正葉新旺孫三啟照布政司經歷啟沂國學生  
啟棧幼讀女孫一適五都南屏花翎知府李顯猷之子聯  
朋嗚呼孺人歿二十餘年矣鄉鄰常舉其事爲後人勗其  
賢德之感人爲何如乎烏可以無傳

論曰史通稱秦嘉妻徐氏動合禮儀言成規矩慨東漢一  
代賢明婦人之寥寥也孺人嘉言懿行久爲鄉里矜式徐

黟縣四志

卷十四

雜志 文錄

五

氏不得專美於前孺人雖不及事舅姑於諱日見其孝敬  
待孤貧子弟見其慈惠而共儉德不以窮通異不以今昔  
殊歷數十年如一日此尤難能者也作範母儀昭宣壺則  
無媿色矣

余母王太孺人傳

邱慶瀾

予幼居城之東與城中望族余姓爲鄰前後四旁接踵也  
聞有桂峯先生者族人咸敬憚焉及從南園夫子游夫子  
爲先生同族又先生高足清制每逢春秋試期又嘗令附  
先生門下受業初聞知繼親炙嗣嚴命侍浙就學中丁外  
艱念餘年來饑驅在外別違先生者日久然先生爲人行



事耳聞目見固無一不令人起敬也洎前數年予長女姪  
許字於先生愛孫啟棧由交游而婚媾情誼日親今年冬  
予佐伯兄星農治五河權務歸過從益數先生高年八十  
有七適得曾孫之慶予爲先生賀先生亦滋慰焉閒談往  
事輒述當日艱難境遇以語予一日出其德配王太孺人  
事畧相示屬爲之傳予愧無文烏足以傳太孺人哉以先  
生命敬爲序次於后按太孺人王姓城東隅人清脩生秀  
巖公之女贈奉直大夫大成公之姪歸先生時翁姑健在  
家貧太孺人藉女紅以補助有不足力任其難弗使翁姑  
知也旣而姑有風疾太孺人於姑病時日夜伏侍不離左

黟縣四志

卷十四

雜志 文錄

五七

右未及旬日姑與翁相繼歿然冀先生讀書成名之心切  
操勞益甚節儉所入有餘輒用濟人荆釵布裙不改常度  
自若也洪楊之亂嘗避難於南屏山巔寇至意圖擄掠衆  
皆懼太孺人與衆約人持一石以禦之已獨先寇弗敢當  
乃駭走寇退恐其復來隨遷地焉其智謀有如此者生二  
男二女均不育年僅三旬一病不起傷哉更有爲先生念  
之手顫不忍握筆疾書者因囑予小子必爲記焉太孺人  
當病革時自知萬無生理顧其同儕相契者曰我今日矣  
如良人何男子無妻誰主中饋幸促其續娶無以我念也  
太孺人之言若此此其心豈以己之生死爲憂哉蓋痛先



生子然一身耳先生言時淚流盈睫者再予慰藉者久之而先生猶泫然謂糟糠王氏相從十年無一日之安患難與其何日忘之伏念先生生平剛方中正大公無私至於今繫鄉邑重望者數十年長官敬禮里鄙稱賢所謂仰不愧而俯不怍如先生者蓋足當之矣今日何日固一愉樂境地也而於太孺人每一念及迺若有悲不自勝者予生也晚不獲親見太孺人之聲音笑貌然就先生悼亡之情狀思之復重思之於以知太孺人之內助其賢德度有什伯千萬於尋常婦道者豈過譽哉自太孺人之歿五十餘年矣先生奮志功名卓然師表清光緒間歷署蕪湖貴池黟縣四志

卷十四

雜志 文錄

五

宿州訓導兼署教諭地方所至多士楷模繼配汪太孺人別有傳子毓棠字萼園清府增生毓楨字維幹清州同銜孫啟照幼殤啟沂啟棧曾孫大楣一門稱盛五世同堂其太孺人在天之靈陰相之耶宜先生之慨然有感也爰拜手稽首而爲之傳



書後

舒節母胡太恭人家傳書後

壽州 孫家鼐

爲善無不報而遲速有時歐陽公所謂有待者非屬之孝子慈孫哉天之報苦節者必生賢子孫往往當時不及知後之人從而追慕之詠歌之以流播於無窮未嘗不由其子孫之信而有徵也吾皖舒母胡太恭人以苦節稱其孫之翰投筆從戎累功進階太守得錫予如典禮太恭人歿太守奉其尊人封君之命謀所以不朽於後乃備述冰潔之操儉勤之德出以示人余由是獲聞嗚呼天之遲其報正天之彰其節也而太守喬梓之孝思爲不匱已若夫紀

黟縣四志

卷十四

雜志

文錄

三十九

行之實闡揚之美則有劉司馬之傳在亦奚俟余之贅言



贊

余文敬公像贊 有序

湯球

公諱莊字文敬明成化間舉於鄉官江西任廣信府同知十年不調公蓋以吏隱者乎然世遺其賢民食其德迨公歿遂祀於信陽又豈偶然也宜乎公之三子至今繁衍滋大而我縣舊志失載嗚呼此可見公之生平矣

贊曰皇天無親惟德是視有善之實報在後嗣不顯之名儻在孫子赫赫名宦邑乘遺紀有十稔勞無一言誅公之門閭行看駟馬高車以光大於余氏

處士余公龍起像贊

程楷

黟縣四志

卷十四

雜志 文錄

三

公之生也歧嶷端莊公之壯也意氣昂藏天倫孺慕就養無方怡怡則友以協雁行每疏財而義周同氣常解推以善著一鄉爰擴堂構用阜倉箱同德聯關西之耦義方啟河東之良鳳羽連飛於泮壁麟趾丕蔚於膠庠宜寢昌而寢熾永拜命乎龍章

汪丙文先生贊

汪宗沂

丙文先生年望六述懷詩兮存簡牘少遭離亂兮之江右爰棄儒而就賈兮得一知己與孫陽相追逐出覆舟兮留後福九江歸兮修譜錄宗祠肇造兮營老屋我昔至祁閭講授兮下榻華堂客不速息塵勞兮安夢轂伯子穎秀及



余門兮餽上庠而食天祿頭銜五品光宗族我謂先生誠  
欵似鳩江陶封君兮各有哲嗣邁塵俗我今重蒞碧陽館  
地兮詢及君家歎風燭長君挾策遠從戎兮叔子青囊技  
精熟第五好學復從余遊兮信名門之重耕讀爲紀實行  
頌高躅兮森森五桂播馨馥兮善人有後方將徵信於蘭  
玉兮

胡价人先生畫像贊

并序

俞正燮

於虜此吾里老成通儒价人胡先生暨德配汪孺人之遺  
像也胡故封尚義至先生兄弟稍緝於財然藏書富性通  
敏資於故實不競務時好而細審人物情狀所著杏墩日

黟縣四志

卷十四

雜志 文錄

三

鈔及手訂縣志皆可信傳之筆壬申志實先生及孫君立  
人程君輔之所撰先生顧好余讓署余名以今思之亦老  
成軼事之可傳者孺人慈儉明肅與夫同德相勗式垂令  
名今謹述讚曰杏墩有賢懿古淵雅高行牆東辨才稷下  
彊力爲善惟日孜孜立言示後與古爲期孺人賢淑克莊  
克敬慈範長留福鍾子姓古之所重三復五更頌茲餘慶  
永法老成

姚奉直振思暨配胡像贊

何承培

漳霽之間孝友姚氏伯奮市隱仲堪泮水季爲奉直恂恂  
儀止善平原書手摹萬紙束髮受經遭亂蠡徙常山之陽



蒙業安只既冠而孤三年無改和通墳篋敦彼行葦載修  
家乘置田昭祀收族敬宗祠宇煥燾建社開渠靡廢不理  
前曙後光曠無倫比教人樹菽桑柘成里博施刀圭拯人  
創痍耳鳴陰德老彌積案舉孝興廉門庭蔚起肅肅奉直  
黻民之紀有懿安定作嬪君子順事尊章睦於諸妯相夫  
持家動必由禮萊婦鴻妻彤管有煒雙像眉齊百世人軌

黃氏三代孝思贊

并序

程鴻詔

誥封奉直大夫黃殿元府君行誼甚高載縣志尙義傳長  
子登仕君榮慶聰穎特達爲奉直君之胞伯所鍾愛遂立  
爲胞伯之嗣孫并迎養於家生膳歿葬如禮登仕君前卒

黟縣四志

卷十四

雜志 文錄

三

有子二人長補縣學武生次候選從九今者以同治十年  
十二月命工寫三代柘主并及本生用永孝思而請恩進  
士教諭姚養泉先生屬余爲讚余與登仕令弟契懷贊鴻  
兩君交誼既深且久又附葭莩夙聞義行矧重姚丈之言  
乃作贊曰

周道親親敬厥宗今之古人見黃公本根培滋恩誼隆登  
仕不年神所恫爰有令子揚家風追爲畫三代栗松孝思  
維則心無窮所願武達與文通百世馨香福來崇

姚養泉林歷望雲海圖像贊

有序

許懋和

雲山疊疊興風樹之深惊人海茫茫驚電泡之幻影我思



不閔維莫之春因虎頭癡之寫真識鹿門山之偕隱畢然  
望之蓋我養泉姚老世丈暨德配周太孺人之遺像也世  
丈徽承名父譽重難兄孝友本於性成詩書敦夫夙好先  
德秋芬早擷銓司馬以監州仲弟夏課常勤策輕驪而隨  
侍羌乃獨肩家政高擁皋比米廩程材桃李被春風之煦  
麥邱協祝柏松傲冬雪之寒劫灰燼而池水彌清嘉木茂  
而園丁已老榭枿作貢苜蓿註官未嘗輕去其鄉惟知有  
貴於已前游回首仰止高山佳處關懷不趨捷徑因寄所  
託爰作斯圖用誌棲遯之蹤兼繪家庭之樂而林歷山者  
名著於牒籍蹟筆於周秦左瞰武亭遙瞻墨嶺當夫輓嵐

黟縣四志

卷十四

雜志 文錄

三

尙溼嫩日初升古寺生涼曉鐘乍動入山晴而出山雨都  
是閒雲大波瀾而小波淪居然渤海憑欄一望坐石半時  
思乘畫鷁之舟儼等釣鰲之客惟妙惟肖臨果如淵非幻  
非真觀難爲水我世丈手披蠹簡瑞草生煙周孺人膝繞  
麟孫芳蘭含笑非貌尋常行路無煩唐代將軍是宜毫翰  
標題有賴秦時博士懋和侍坐綴羣賢之末論交自數世  
而遙省記垂髫蒙加英盼如橋奉席頻陪跋燭之筵負劍  
趨隅屢造面城之館緬溯卅年舊事心寫允臧得瞻一幅  
遺容目瞿見似習乎有感難已於言謹作贊曰

黟北黃山三十六峯黟南林歷境小靈同靈氣所積出雲



降雨不雨而雲譬海斯巨林歷有石如海上槎林歷有亭  
仙人移家望海者誰仙人有偶清光往來左宜右有沐茲  
清光並臻大年陽闢陰闔海隔雲連黼繡以絺暈翟以服  
世俗所榮賢哲弗欲斯圖之作精爽斯留子孫永寶用享  
千秋

宜貞余封翁五十春秋喜圖贊

程愈

見君之貌丰采悠揚佩君之德和吉溫良交君哲嗣悉君  
行藏君幼失怙襁褓悽惶煢煢子處艱苦備嘗長能成立  
邁跡有光經營服賈陶朱頡頏弘猷漸啟式廓盈堂玉枝  
滿砌伯季成行詩書韞積式穀有方長君卓犖頭角軒昂

黟縣四志

卷十四

雜志 文錄

百四

英英年少早廁宮牆鵬翮萬里指日翱翔君耽山水徒倚  
徜徉衍年旋屆預祝無疆追隨諸子顧盼非常咸徵國器  
德後永昌

姚君春杉年兄暨嫂夫人像贊

胡元熙

論交必誠徵事必信念我與君心心相印雁塔同登鶴班  
共進爲溯家聲鳴琴清秩自守遺經青氈弗失煮字療饑  
截蒲爲筆貧乃士常益堅君志徧研羣書博聞強記更養  
性天厚培心地外侮忽來松楸訟起一介書生傍徨何恃  
欲罷不能祖骨在此據册陳情鏡昏不決耕讀無力冤抑  
必雪奔訴戟門披肝瀝血內助多賢自典衣飾成君之孝



用佐旅食幸逢太守法嚴貪墨洞爛其奸斷爲台墓親定  
讞詞永堪保護得展孝思秋霜春露誠可通神理能禦勢  
古有孫鍾若合符契天佑善人卜年卜世襄治通州江波  
清晏民無不懷政無不辦載道口碑允稱名宦茲仰遺容  
如覲良友乾範坤儀兩堪不朽後嗣振振天長地久

余荷浦先生像贊

邱慶瀾

名賢世采種德本支繫維歷史想見丰姿幼遭險阻會際  
艱危始商漁驛旋賈鳩茲什一利逐措施權宜與友朋共  
無毫髮私急流勇退坐享多資優游田里光大門楣惟仁  
者壽亦孝而慈相期友愛更樂唱隨孫曾繞膝子婦齊眉  
載瞻風範不盡欽遲

黟縣四志

卷十四

雜志

文錄

三

贈修職郎余邑博敬修先生像贊

歙縣

汪宗沂

峩峩偉人生名賢里抱道家居上岸端士剛日陳經柔日  
肄史訓失趨庭北堂依恃賈董之才曾閱之軌張杜之書  
淵乎備矣哲嗣承家高年兒齒示我典型在行看子松下  
風清檐牙傑峙兀立其間容逾強仕再拜欣瞻爰頌爰企  
令族孔多夙知素履述其生平隆重典祀祀產如雲勤稽  
耒耜九穀斯登秋收色喜逮至於今陳筵列簋微先生力  
尙不及此我聆我評贊歎懽起宇內賢豪五方轉徙聚族  
而居聿惟桑梓匪無魚菽弗供良恥亦有然黃一時奢侈



仰公容止篤實輝光慕公懿行正直剛方居家孝友處事精詳先猷丕振遺緒弗忘賢哉內助允矣偕臧鹿車其挽鴻案相莊既和且樂亦豫而康椿榮蔭茂桂馥蘭芳曰耄曰耄寢熾寢昌詒謀垂裕世澤綿長

葉端書先生暨德配汪宜人像贊

葉新第

南屏毓秀實產哲人性成孝友圭璧持身平陽名妹實爲佳偶琴瑟三秋痛公撒手乃撒環瑱柏舟誓守孝事翁姑爲公終養立繼承祧家聲有望甫及成室強幹中摧熒熒寡媳呱呱遺孩支撐門戶備艱辛哉粵逆竄夥潔身遠害難靖歸來室如淘汰克勤克儉漸復小康孝孫能賈先業

黟縣四志

卷十四

雜志 文錄

百六

克光婚娶既成蘭芽又折一室三嫠呼天泣血宜人乃言人定勝天再謀式穀玉樹聯翩曾孫來止庭內懽然節旣上聞輜軒入告錫匾額祠冰清雅操况兼善行賑困周親捐貲平道惠播鄉鄰年屆古稀爲公寫照載瞻影堂伯鸞德耀垂之雲仍用光寢廟

胡錦華先生暨德配余太君像贊

黟縣知事

潘 陞

漢代輕商元廷賤士四民立國焉取歧視修身齊家至善是止親親仁民愛物而已於穆先生早歲冰霜義門承緒士寓於商財力合作相得益彰利逐什一義守倫常色養重闡負米何路萬里驚濤服勞無怖人以險託天以坦付



永永延延未堪屈指豈若余宗綿綿葛藟經理得人繼承  
弗已曰千斯倉播聞遠邇餘慶思源敢忘道揆後學微才  
碧山礪砥遐溯流風景行行止準之物情推以數理神永  
丹青門崇金紫五世克昌千秋趾美

安禔宗先生暨汪孺人像贊 集文選句 何宗遜

於休先生有睟其容式瞻清懿穆如和風琢磨道德組織  
仁義仁義在躬用之不匱守茲孝友眷戀庭幃孝實蒸蒸  
友亦怡怡疇昔不造爾宗惟瘁振恤遺孤俾無隕墜 兄弟皆早

歿撫諸姪成立身窮志達居鄙行鮮畏榮好古不干執權厄運初

邁王畧未恢朔馬東驚胡風南埃百姓流亡號天以泣惴

黟縣四志 卷十四 雜志 文錄 三十七

惴士女倒懸之急君乃義發變色易容傾倉可賞以救貧

窮聞善若驚仁風潛扇石杜飛梁舒虹爍電 助建屯溪藍渡石橋

嶇重阻恤其陵夷通莊九折安步三危 助修屯溪河街石路憂世忘

家先哲所躋卓卓若人有義風矣自古在昔高人何點違

豐安匱居備勤儉篤生吾子誕茂淑姿僉曰休哉繼此洪

基身歿名垂匪爵而貴如彼竹柏碾碾高致我聞積善盛

德日新遺像在圖想見其人之子之生復有令德保又夫

家修成內則既稱萊婦亦曰鴻妻實佐君子一與之齊芳

風旖藹義炳丹青金石難敝用垂頌聲

際平族叔祖暨德配胡孺人像贊 余麗清



分塊銅山擷華寶樹孝友之性篤於雁行仲困磨蝎復厄  
紅羊以振以奮用集用康馮夷效順災澹馬當櫬槍旣靖  
歌嘯太平階蘭庭桂欣欣向榮操奇算勝推豐讓盈家臻  
隆盛基固書城閨房靜好伉儷彌篤戚畹延陵飄零似續  
妥其幼弟資之廩祿繼配曰余相金質玉於穆先生派衍  
先儒士志於道商也誰如琴瑟式好昌大門閭百世子孫  
永奉權輿

胡在乾親家暨德配余宜人贊

黃啟蓉

杏墩之下古君子業則爲商行則士幼而讀書習詩禮長  
而牽車老鄉里孝於二親慈顏喜友於二兄稱難弟厥兄

黟縣四志

卷十四

雜志 文錄

頁六

不祿早夭死鄂不之華不復韡嫂有遺腹延兄嗣少年頭  
角隆然起爲擇名師課書史文章麟鳳才把梓心勞力瘁  
四十載家政商業勤董理獨介不欲盜泉水嫌疑不納仄  
田履蓮塘精舍東山趾衣食裁足斯可矣訓兒讀書蓄文  
采何用求官佩青紫淑配曰余同荼薺相夫育子和妯娌  
古稀稱觴觥晉兕一門雍雍復濟濟今君逝矣遺容在古  
貌古心傳素帟載瞻德範思仰止視此蕪辭無溢美

晉贈中憲大夫遂齋舒老先生像贊

舉人

張學袁 江西

新安山水古稱大好民樂耕耘稼穡是寶黟山古邑曰小



桃源山多田少人習懋遷嶽饒接壤介在密邇爰有豪傑  
世業於此溯其始至年甫成童晨昏服習相隨乃翁乃翁  
採販言往鄉曲忽然邁疾勢甚危篤星馳往赴藥餌弗痊  
雞斯拔衽搶地呼天扶襯而歸越數百里上慰護幃殷勤  
奉侍繼領母訓仍就市闈間歲歸省用慰慈顏母年七十  
囑勿稱觴施德致壽不恡解囊白傅之裘不止千丈三載  
不勸覆庇斯廣同胞七人公居其三怡怡無間和樂且耽  
宗族稱孝鄉黨稱弟四海之內皆如兄弟以義爲利謂錢  
爲泉生財有道克濬其源市道之交居奇索價惟公好義  
恥爲狡詐日居市肆夜誦詩書章釋句解搜索無餘企慕  
儒林引誘後進憶予幼時屢叨資潤疎財仗義出自性真  
文公書院倡首更新饑饉流離瘡痍滿目暮給青蚨朝施  
饘粥生者醫藥歿者棺埋比茲義舉公必與偕在家在外  
質行如一赴召修文四十有七莫延鶴算克荷龍章省府  
志乘紀載標揚子孫螫螫蛟騰鳳起簪紱傳家永膺福祉  
忝來遠道拜公遺容高山在望仰止無窮

張君此贊原書甚佳因兵燹後舊紙漫漶 董園兄重

加裝池予謂邇修省志府志爲張君所未及見宜補入  
焉自莫延鶴算句至永膺福祉句皆拙筆續貂雖與原  
作筆墨不稱然意似較完備也 胡朝賀跋



中議大夫董園舒老夫子像贊

受業 葉新第

觥觥先生屏山世族名列巍科才登薦牘將母承歡不求榮祿粵匪構難黜爲要衝大帥困守羣賊環攻先生憤起遍籲榆枌團練禦寇搜粟餉軍先生鬚眉森然如戟先生肝膽逢人可白排難解紛片言金石邑有興革咨詢必先所見者大所策者全髦猶好學几列丹鉛昔侍函丈坐我春風釋褐而歸拜瞻遺容巖巖道貌長在太空

敬題慰黎族叔暨淑配玉照贊

黃啟蓉

族叔慰黎爲予少時同學幼劬於學長益多聞見科舉時代屢擢高第非其志也性孤峭而好潔有元章之癖落落

黟縣四志

卷十四

雜志 文錄

三

與人寡合外狷介而內和易非相習者不知之其立身之峻如長松干似不可攀援其心地之澄淨如寒泉積雪不受纖塵而其志趣之堅定又如千年枯木百鍊精金不隨世界潮流爲轉移中年以後閉戶寡營埋頭故紙堆以課孫自娛間爲詩憂憂獨造不襲前人科臼亦如其爲人家居米鹽凌雜不屑措意內助程氏恭儉靜穆獨操家政長君宓山以文翰擅名次立莊工美術畫孫亦聰穎蓋天之待君亦厚矣哉使君而富貴而仕宦未必能獨行其志有如此者宓山以寫照囑題聊以述君之爲人弁系以贊以誌傾慕贊曰



少小共學端本堂今我與君鬢毛蒼我隨衆鳥相頡頏君  
獨振衣千仞岡脫離世網掃秕糠窮年閉戶注凡將清如  
孤鶴下寒塘淡若秋花傲嚴霜今之獨行古之狂攬鏡照  
見雙瞳方耳不壞兮壽無量驥子龍孫燦成行齊眉況有  
老孟光



序

七都社學序

明金聲

今之學文者不求道今之談道者不能文文與道必不得同途而處乎抑所謂文未必文而道未必道乎天下大矣英豪亦何敢為誣而睨其互相非咲者則固確乎各有可受非咲之處而未嘗誣也嗚呼天下事固未易為一二俗人言也大聖久不作吾身誰適歸既為文而不以捷科第為道而不借資以徼利名則舉天下而無一為文為道者則今天下之所為文為道者大抵如此而已則其所為文與道者方各自非咲之不暇而暇非咲他人乎則見道而

黟縣四志

卷十四

雜志 文錄

四

敢自命能文不能文而敢矢口談道者吾皆弗能信也國家而誠得人而為主司從文章中相天下士落紙如見肺肝紛紛以科目為不足而又別開途徑何為皆循美名而不復究其實者也負我國家矣負我高皇帝矣余本以六邑道學講會適赴黟也而會上諸君子以其本都之所謂斯文會冊來請道乎道而文乎文不相非咲而相合併和同其諸異乎人之學文人之談道者歟肅然起正襟危坐書此呈之

毛詩補禮序

黟縣知縣 王蔭森

昔周室既衰而禮教陵遲去籍之害漸於七國燔烈之酷



極於嬴秦其詳不可得聞已然漢藝文志尙有禮十三家  
五百五十五篇班固謂所記多天子諸侯卿大夫制雖不  
能備猶瘡後儒推士禮而致於天子之說今廟有存學禮  
者惜之無己則取之羣經無己則取之先秦書又無己則  
取之漢儒傳注庶或存十一於千百故西河毛氏傳春秋  
首明禮例張編修說易釋鄭氏虞氏易禮別行殘編剝義  
彌可寶貴獨說詩禮者未有成書且夫詩於禮非細故也  
孔子曰誦詩三百不足以一獻言徒習詩辭而不能學詩  
禮也又曰不能詩於禮繆言行禮必須詩也而後人曲見  
好議論有謂以禮訓詩按迹以求性情繁塞而多失者有

謂以禮牋詩難與論言外之旨者其亦異乎孔子之明訓  
矣惟王厚齋稱詩禮相爲表裏可云篤論然以楚茨詩見  
少牢饋食禮而不知鐘鼓旣戒鼓鐘送尸諸父兄弟備言  
燕私皆夫卿大夫禮則徒循誦習傳於毛鄭故訓未深思  
也歛朱理堂先生鑒其若茲謂學詩言禮必本毛鄭毛公  
學出荀卿讀荀子禮論深達禮本鄭尤精禮學其言當與  
經傳並重乃采傳箋中言禮者條分目系證以羣經注疏  
先秦書唐宋及近儒言詩言禮者亦博涉而慎擇之名曰  
毛詩補禮聚生徒而講論者有年道光己丑余官黟至歛  
謁先生適類次是書未成編也丁酉再至黟先生舉是書



以示余余受而讀之見其說采蘋之詩謂父醴女在嫁女之日毛言將嫁明不以教成祭與禮女爲一正義爲非說葛生詩角枕錦衾申毛鄭義爲大夫妻攝主以祭歎爲致確今世之士日從事於帖括以弋科第毛鄭之言有終身未一寓目者如先生之耆年懋學張皇補苴豈非經師之表儀乎往者山陰章君宗源課學童輯夏殷禮聞者迂之而嘉慶丙子江南鄉試張君頡雲文實師其言涇縣包君世榮撰毛詩禮徵及其舉鄉竟以經學爲主司賞識夫樹穀非授衣而衣以之成投石非教戰而戰以之勝道固有不相謀而相資者是書視章包體例不必同而啟迪後人

黟縣四志

卷十四

雜志 文錄

高

學於古訓則無不一知必有用之帖括而弋科第者况其所爲補禮者亦非小補也道光丁酉七月旣望錢塘王蔭森序

續澹園羣芳吟序

陳之澍

余君石舟嘗於七旬後手錄其先人雪江先生黃海紀遊黃海遊草畫梅雜咏各卷楷法秀潤絕不類老年人書知其作字之甚敬矣君又因先人有澹園羣芳吟一種兵燹燬失故於教授之餘手自闢塾前小圃遍植羣花雜卉多至百餘種仍欲各繫以詩以永先人遺澤乃以課讀鮮暇每作旋輟自停科舉曩所從遊諸弟子負篋羣散始得以



其餘閒爲續澹園羣芳吟得詩若干首并附各雜作於後  
哲嗣映青以其稿屬余爲序君以耆年碩德久負鄉里重  
望平日閉門授徒不常與人往還或相遇市中必側讓再  
三俟余過乃行偶與晤坐亦靜默不作多語人皆望而知  
爲雪江先生家法故余尤重其爲人君之續此吟豈必欲  
以詩人自命哉毋亦同於南陔補亡之什足以徵其孝思  
之不匱而已然則君固不必以詩名詩亦何足爲君重君  
旣足重則其詩亦奚不足貴焉

芝陽詩草序

黟縣知縣 湯鼎烜 味齋

黟邑汪君小槎以同邑江君靜庵所著芝陽詩草屬序於

黟縣四志

卷十四

雜志 文錄

五

予芝陽係江右饒州江君僑寓於此與其地之薦紳先生  
以及饒州太守諸名公之宦遊於斯者日相唱和讀其詩  
醞釀深厚神味淵涵蓋學吳梅村而深入其堂奧者也夫  
梅村係江南人而江君亦籍隸徽郡蓋淵源有自矣獨論  
詩者向別西江爲一派江君久居其地其集又以芝陽名  
篇蓋欲取西江水以洗滌胃腸其立意不可謂不深其居  
心不可謂不淨然吾獨怪學西江派者輾轉相仍入於魔  
道拘折生硬至不可句讀讀江君詩當知所取法焉余於  
江君憾未傾蓋訂交諷誦一過如鐘儀之操土風如莊舄  
之爲越吟穆乎其若有所深思也窈乎其殆有所不得已



也蓋江君奇才卓犖鬱鬱不得志而爲王粲杜牧之遊雖江右士大夫欽遲者衆桃李盈門羔雁踵至而其至豈以地限乎哉他時獻賦明堂和其聲以鳴國家之盛蓋於江君有厚望焉抑聞之芝山下有止水祠高風亮節炳於萬禩江君集中有謁祠詩句誦先人之清芬爲生平之圭臬讀芝陽草而知江君以詩負盛名於時尤願江君遠紹前徽而不僅區區以詩人自負已也是爲序

芝陽詩草後序

王廷鑑

王仲宣之作賦寄跡南荆杜少陵之吟詩感懷西蜀自來文人抑鬱才士坎軻涉歷飄蓬栖皇行李閱他鄉之景物

黟縣四志

卷十四

雜志 文錄

真

覽異地之山川聯契合於苔岑訂知交於流水雲煙過眼每覺流連風月關心頻深根觸紗籠題壁錦貯攜囊踪跡所經楮毫斯託送客廣陽關之柳懷人盼驛使之梅落霞秋水之詞閻公心折鸞枝鯉庭之句白傅情傾江東播昭諫之名劍南著放翁之集永垂金石咸奉圭臬前修旣歷歷可徵後起尤蒸蒸益上餉遺有屬嚮慕維殷徽黟江靜庵先生幼秉異姿少懷大志研經讀史腹蘊曹倉染翰操觚聲騰洛紙文入韓蘇之室氣象淵涵詩登李杜之堂光芒炳爍方冀一條齊列早誇清貴頭銜從教萬本爭鈔競愛新奇手迹而乃罡風輒阻未看東野之花劫火頻經莫



間茂陵之草磊落之才誰拔斫地空歌巖巖之氣猶存凌雲自惜風煙滿目故里難安衡泌棲身鄰邦暫託由是青袍作客白舫辭家等杜牧之遊揚禮隆僧孺比陸機之入洛譽重張華疊嶂層巒名區玩賞荒亭古寺舊蹟摩集蓮幕之賢豪兔園唱和課芸窗之英俊馬帳追隨蠡水昌江藉居停於勝境黃山白嶽牽魂夢於故鄉淹推詞翰之精感別離於綠波碧草總擅文章之妙寫穠豔於玉樹瓊花尋薛振之遺芳賡范公之雅詠情因景觸地以人傳此芝陽詩草所由著也

廷鑑

素獲識荆夙懷慕藺久欽履憲

敬贈弁言講席曾叨十二載同欣結契騷壇獨占數百年

黟縣四志

卷十四

雜志 文錄

頁七

其羨揚芬從茲遙祝瓣香宛足衍西江之派應許重論斗酒好仍開北海之樽是爲序

雉山文會譜序

盧 培

觀乎天文以察時事觀乎人文以化成天下文之所係大矣哉吾族范陽自宋遷著雉山雉爲文明之象山川孕秀代產哲人予生也晚雖不及接前賢之豐采而流風餘韻髣髴如昨讀其書未嘗不想見其人也夫文運之興必有二三人振作之而後生小子執經問字日積月新郁郁乎炳炳乎寢盛而不覺者先文林公設帳傳經負笈之輩不遠數百里來規矩當前周旋可式所薰陶而成就者不必



在一井一邑而已迄今雖無老成尙有典型手澤猶存奈之何其弗殫精而研思也族叔櫟園詩禮世家高曾祖父並爲一族之望見前賢代謝懼後起之步趨無由也乃歷集族內先後文學縷註履歷科名於后秩然成書問序於余余重其命意之深用心之瘁其亦有守先待後之功也歟於是乎書

又

盧 皋

余家石門山下奇巒飛翥峭壁凌空故昔人以雉名焉嘗聞大易之象離爲雉有文明之義其爲禽也五色成章而賦性耿介不屑與雞鶩爭食鸚鵡鬥舌士人一命初膺藉

黟縣四志

卷十四

雜志 文錄

頁六

以爲贊豈無謂哉然則文會而以雉山名者何系以地也夫運會相乘文與獻並重非獻而文不著非文則獻亦不傳世固有當時赫赫迨沒世而無聞再傳而不知至或考其譜系稽其履歷子孫竟有味然於祖父者比比然矣吾村自諫議公開族由宋迄今數百有餘歲緯武經文代不勝舉况幸逢作人邗治春夏干戈秋冬羽箭莫不爭自奮發仰沾菁莪棫樸之休故或名高虎榜或聲著雞林或鳴琴而栽桃李之花或握符而寄干城之任炳炳麟麟不愧桃源望族至如翱翔泮水彪炳成均卽悉數之不能終矣脫無家乘以紀之以傳於後將世遠年湮文失而獻亦泯



不大可懼哉叔櫟園有心人也其先世尊人倡建此會維持斯文而叔更能善承先志不惜搜羅攷訂表其發名之年月并譜其建生之甲子與其三代之名諱第昆之行次令觀者披冊了然不至數典而忘也誠吾叔之力與間有一二先達名列而實缺非畧也緣世代寫遠後起式微無從查攷耳設吾叔不臚此冊更閱百餘年去古益遙則其散佚泯滅者寧止此耶揆諸舉會之意毋亦有顧名而難安者耶吾故曰叔有心人也也能善承先志者也爰樂爲序之

程徵君所著書敘

長洲

朱孔彰

黟縣四志

卷十四

雜志

文錄

五

程君抑齋少受業於先博士咸豐紀元先博士詣闕上所著說文通訓十八卷多屬抑齋校錄由是抑齋早通叔重之學暨洪楊寇亂余依先師伯堅先生避地黟祁山中伯堅先生抑齋兄也亦受業先博士之門精研經書時彰年十六七雖顛沛流離師弟三人未嘗不講學行則負笈憩則說經聞舉說文字質疑於師得解則錄之而抑齋斐然有述作之意逮余從曾文正公游不一年伯堅先生遽赴道山抑齋會皖後授徒山中自是不常見面回思患難之際師友講學之樂渺不可得予旣飢驅南北流浪無成獨喜老友抑齋學成名立前歲于侍郎蔭霖專疏薦於朝有



詔徵之以老未赴天下想望風采皆稱曰徵君蓋名實相副猶見海內重真儒也抑齋所著詩古文詞皆有家法說經書數十卷道遠未獲見近蒙郵示六書假借一隅二卷朱子解經引用說文攷一卷千支各有本義錄一卷說文通訓拾遺一卷皆極精覈今士子競言新學舍六書而不講棄義理而弗談徵君之書能保國粹充足救世哉伯堅先生緒言彰所編說文簡本許書罕用字錄重文補注多述焉他日錄副以質抑齋不知其說有合否

抑齋記聞序

朱孔彰

余與程抑齋爲總角交今皆老矣憶抑齋十五六時從先

黟縣四志

卷十四

雜志 文錄

五

博士游卽授說文之學故讀經史諸子百家訓故名義超然領會皆迎刃而解其在黟山教授徒衆數百人多行修名立而高第胡生敬庵獨能傳其學抑齋嘗自視欲然以學無常師又屬胡生謁萬清軒布衣於興國州每遇江南鄉試屬主余爲其擇師訪友意甚切也胡生示余所著錄皆有實獲余歎曰他年當如何仲弓之薦桓榮也其後于次棠中丞果因胡生言疏薦抑齋學行於朝明詔徵之以老未赴胡生嘗條記師說題曰抑齋記聞凡六卷議論醇正以躬行實踐爲主傳曰夙夜強學以待問懷忠信以待舉抑齋師弟有焉嘉興沈子培方伯延攬人才如渴如飢



前年護理安徽巡撫卽請抑齋商辦存古學堂今屬爲監督將刻其全集先以胡生記聞排印行世蓋以激薄俗重眞儒也不亦美乎

送胡敬庵之皖敬敷書院學長序

朱師軾

安徽方伯于公廉訪趙公相繼之任未數月也亟亟以興起文教爲己任省垣舊有敬敷書院重整飭而更新之求齋長於通屬人士聞黟胡生元吉年少力學潛心性理於是撰書詞札縣尹持函造廬以禮敦請生固予先後同門友也聞聘就予決行止且曰元吉自從抑齋程先生遊得友吾子數年來談道講藝相得益彰茲一旦應聘遽出深

黟縣四志

卷十四

雜志 文錄

十一

恐不稱其職以爲師友羞吾將辭焉何如予曰昔蔡文勤年二十六應張清恪公之招入鼇峰肄業君今膺聘視文勤受知之歲僅加一齡有爲者亦若是惟益自刻勵期副所知又何遽辭以鳴高乎矧黟僻處萬山見聞孤陋一二師友而外所與居遊者不過鄰里鄉黨之人無遠識宏議以激發其志氣增長其德業敬敷書院爲通都人士肄習之所其間豈乏通人正士苟慎擇而納交焉自可獲以友輔仁之益君爲一已身心計亦宜乘時出游而況乎感荷知遇之深也嗚呼義理之學不講也久矣士之馳騁詞華獵取浮譽以求公卿之知者比比皆是君潛修有年淡泊



自甘其爲道至寂寞于趙二公之訪求得君馳書遠聘致  
敬盡禮實欲式浮靡而風頑懦君旣繫心民物宜體承斯  
意應聘而出以爲都人士觀感之方固未可以不赴自諉  
也雖然吾人赴事也宜勇而自修也宜怯從來立名成業  
端在始基發軔之初國人皆屬目焉使聘而不出人將謂  
處士純盜虛聲然一出而名實稍有未副則春秋責備賢  
者尤嚴惟願君立志堅定無閒初終持己以敬接物以誠  
處衆以和事賢而友仁博文而約禮與人不求備檢身若  
不及今日爲齋長所以表率諸生者如此他日服官政所  
以致君堯舜者亦如此近希文勤遺風以上承先聖先賢

之緒而爲師友光斯爲不負所學又豈可遽辭以鳴高乎  
君聞予言而趨之於其行因書以爲贈

治蒔隨筆序

周寶第

有地百里左右奔走之人以百數其祿足以仁其三族及  
其親戚故舊樂乎其心則一邑之人喜不樂乎其心則一  
邑之人懼丈夫官至邑侯亦榮矣雖然邑侯於民爲最親  
民生之休戚風俗之醇澆人心之厚薄水旱癘疫之不期  
田野之不闢耕稼之不時無一非邑侯責爲邑侯者不亦  
重且難哉吾蒔界在西鄙民性剛勁且素多盜號稱難治  
故大府爲蒔擇人輒慎重之非良吏不之遣然吾蒔雖多



賢有司而卒以不治吾嘗竊竊然惑之以爲吾蒞誠不獲治也辛亥秋胡公奉大府檄來宰是邑不數月而蒞大治民之休戚無不聞風俗日以醇人心日以厚是何術也而入人之深且速也如是以是叩公公笑而不答是歲冬公奉命移宰齊河行有日矣乃出所著治蒞隨筆相示且曰是余數月來所自記知我罪我其在是乎子其爲我序之寶第自愧不文未習吏事何敢妄贊一詞然莊誦一過始恍然知我公之治蒞非有術也乃有道耳今夫渾渾噩噩之民是其太璞未鑿非其愚也爲之宰者果能如保赤子心誠求之即使機械變詐之人猶將有恥且格况渾渾噩噩

黟縣四志

卷十四

雜志 文錄

三

噩之民乎獨是理亂之不知呼籲之不聞民日蹙而法愈峻民就窮而歛愈急猶且朝發一號夕施一令當此之時民日救死而不贍奚暇遵奉之哉彼宰民者不揣其本方囂囂然曰民難治民難治是豈民之罪歟今讀我公治蒞隨筆一書知公之與民相接無一事不出於至誠懃懃懇懇若家人父子然以信術治民無怪其入人之深且速也昔韓昌黎云士不通經果不足用吾於我公益信之得是書也吾之惑以解吾雖不文豈敢已於言哉謹拜手而爲之序

疊山問目序

胡元吉



吉年十八讀胡文忠公遺集卽知興國萬徵君爲今世儒宗及執經程抑齋先生之門側聞緒論益悉徵君之學由平湖上宗朱子得道學正脉遂不揣譎陋肅柬自通光緒壬辰仲秋也徵君手書獎允許列門牆明年春負笈自黟山取道豫章省叔父於馬當然後揚帆西上經九江入廬阜謁濂溪周子之墓四月十二日始抵興國明日謁徵君于涂公精舍講習旬日告歸同學祖餞者二十九人有賦別者徵君爲之序復由馬當奉叔父渡皖江以歸已六月初旬矣里中親故咸來問訊并叩吉以徵君之學之行及立教大端亟解裝出語錄一卷讀之已而竊自尤曰昔程黟縣四志

卷十四

雜志 文錄

三

予謂某在何必讀是書不能心徵君之心行徵君之行負笈千里敝敝焉僅於其言錄之編之曷足以釋程子之誚乙未秋掩關碧陽雨過涼生秋香滿院偶檢朱子延平答問嘆聖門重善言德行之教誦法其言亦心心行行之一端也因復傾篋取前後手書合爲一編并誌其顛末於首荏苒十稔駒隙空馳親炙高賢無補怠棄此吉之自愧也夫

南陽商學偶存序

胡元吉

于次棠先生語錄一卷光緒辛丑先生旣罷官養疴南陽與元吉商證舊學元吉退而錄此先生時加訂正寫於眉



端元吉先後從游五載皆先生開府治事之時其杜門掃  
軌師若弟相對講學惟此時爲然南陽荒僻無可眺覽獨  
城西玄妙觀園亭清幽方丈靄如道士善雅談蓄書畫甚  
富元吉每旬日輒侍先生往游游必流連竟日或詠詩或  
操琴蕭然自得天機幾忘其爲憂患之餘也昔李忠定退  
處梁溪喜闕釋典陸宣公謫居嶺表愛錄醫方先生惓惓  
君國不異兩公而歸田之後獨取古儒先克治之學以勵  
其身而傳諸徒視兩公所得其有合耶否耶今先生墓草  
已宿展覽遺編不禁泣然涕下爰重加哀錄并附先生文  
一首詩五首元吉記一篇皆可爲當時之故實俾異日徵

黟縣四志

卷十四

雜志 文錄

墓

求先生逸事者有所取資焉

榮祿大夫舒桂圃先生九十壽序

吳可讀

皇帝大婚之前四月吾鄉蘭山書院諸生等以可讀舊主  
講席郵寄壽西園方伯尊甫桂圃公詩就正且言軍興以  
來書院無絃誦聲自西園方伯權道篆首興學校侍讀春  
巖節帥率僚屬同捐廉爲膏火費生等之爲飢寒驅去者  
得還重理舊業己巳庚午兩科又請節帥以下捐給資斧  
且遣兵護行以故書院得分本省中額之半而次年亦遂  
有捷南宮登玉堂者非方伯栽培不及此今歲桂圃太老  
夫子攬揆良辰生等哀詩爲壽敢請序取閱其詩雖其中



不無瑕瑜互見要皆導揚盛美固無庸求全責備云夫公之積德行仁積數十年不少懈其陽德當不在大門閭植三槐者下今雖因方伯貴受朝廷極品榮封而天之報施正未有艾諸生所詠何能罄其萬一然卽此而觀亦可見公之生平而卜其福壽無量矣可讀耳公名最久悉公事最真嘉諸生之感方伯恩因壽其親且在方伯卸道篆之後三年也固不辭譎陋敘次其詩敬綴數言於末公覽之當掀髯而進一觴也謹序

鍾山金氏追遠會序

胡元吉

戊午孟秋金君式玉偕其族子美齋訪元吉於杏墩述其

黟縣四志

卷十四

雜志 文錄

真

十世祖積高十一世祖有忠皆葬休甯東鄉小姑潭與黃口十二世祖應學葬休甯東南鄉五城中洲舊有祀會曰源聚以供祭掃之費嗣因墳山餘地被他族盜葬及害松楸一再理之於官得復舊觀而祀費因之告匱祭掃愆期烝嘗不繼皆子孫之罪也爰於舊秋集議醵金若干公同存貯歲以息入作休甯祭掃旅食之需名曰追遠附於舊會之中另訂會規以防歧用請予序之用示不忘余曰仁哉二君之志也墓祭雖非古然墓人之職詳於周官五尺崇封肇於至聖歷朝典章具列皇帝上陵之禮而馬醫夏畦之鬼皆得享子孫麥飯之奠漢唐五季以來未之有改



也蓋禮貴從宜不妨義起况體魄所託尤報本追遠之不容已者乎我黟地狹人稠馬鬣牛眠不得不旁及鄰境然山嶺崎嶇跋涉匪易歲久懈生徃徃有望哭野祭適墓而不及登壟者一再傳後塚樹摧殘碑銘斷折茫茫荒野安得一一榔曼父之母而問之卽孝子慈孫亦付諸無可如何之一歎而已今二子首籌及此慨捐兼金以爲之創族之好義者又佐成之立會訂章俾垂久遠吾知聞風慕義者必接踵而起民德之純風俗之厚其有望乎余旣嘉二子能展不匱之孝思又幸附名簡末遂樂而爲之序

恥齋詩存序

胡元吉

黟縣四志

卷十四

雜志 文錄

七

程君敬乾晚年自定其詩曰恥齋詩存若干卷以授元吉校閱且屬爲之序恥齋者君自署齋名也君於學無所不窺尤服膺亭林顧氏博學有恥之訓遂以名齋云元吉弱冠時聞君工制舉業兼治詩古文心焉慕之介同族約軒博學請納交君長元吉以倍屈齒爲友時相過從猶憶光緒壬辰歲暮風雪中訪元吉於杏墩舊廬斗室孤燈商訂所學君作敬庵記元吉撰恥齋說以古人志業相期許又嘗偕程抑齋先師暨同學朱少坡乘月訪元吉於雙溪草堂彈琴詠歌蕭然意遠主人姚若泉爲具壺殮時天下承平久士惟聲律帖括是習見吾徒往來於寂寞中未嘗不



目笑存之厥後元吉講學皖江從戎河洛服官齊魯行踪稍疏然郵筒之寄未或以時地限也君之詩不名一家尤長於樂歌爲王子裳宋子材兩太守所稱賞有定評矣惟元吉自歸田後青鞋布襪徜徉山水間風景依然而約軒抑齋若泉少坡諸先生不可復覩獨君蒼顏白髮開樽話舊如平生歡回憶承平之際師友講學之樂豈復可得然微君誰可以語此哉君年七十餘而志趣不少衰方將買舟攜子爲江右之遊吾知其覽山川之雄秀擷文物之精英以吐其胸中之奇其新詩之可存者猶不止此他日歸尙其傾篋示余也因書卷末并贈其行

黟縣四志

卷十四

雜志

文錄

真

題韓隱廬詩鈔序

侯官

黃嘉爾

世有才與學之士不克習舉業以博取科名往往藉此以少慰其抑鬱磊砢之懷者或有之也蓋今世以制藝取人土雖有賢人君子始之自視身若甚重者久之爲人之輕已而亦自輕之豈不悲哉限於資格也予宰彭澤時黃子嘯伯以詩來見予謂其市人也漫然應之置之而去揣其意殊怏怏後檢閱之始覺其詩有根柢有淵源方知嘯伯蓋隱於市而不爲市所困者也繼見之談竟日不少休從此時相唱和嘗掃榻延居署中及披全集益知作者性情之渾厚襟懷之淡遠期許不凡皆於詩中見之其詩始尙



清新效法青蓮丙午以後漸近淳摯沈厚洎及江州復參  
入山谷一派而步步層層踏入佳境直至百尺竿頭矣予  
今以得罪去官嘯伯諳諳然索序其詩以作臨別贈言兩  
載相交一朝作別亦屬人情所難遣然予一官何足惜惜  
此後不得見嘯伯更不得復與嘯伯共酬唱之歡於此去  
不無悽然於懷嘯伯篤行君子也後必以詩名天下何待  
予之饒舌也哉如以非科名中人而忽視之則失之矣

留別胡徵君敬庵先生序

朝鮮 金起漢

起漢自國家變極奉師命奔走於事爲十年於茲矣昔壬  
子亦以事到燕因訪謁清軒萬先生於鄂省之興國則惜

黟縣四志

卷十四

雜志 文錄

夏九

先生已故矣乃與其子弟門人遊夙聞皖南有胡徵君敬  
庵爲其同門高足且讀先生年譜敘文知其學之高明心  
慕之卽擬歷謁時徵君在魯省作守宰未知其歸鄉與否  
且自興國至黟縣水陸千餘里其間有崇山峻嶺之險或  
恐徒費往返之勞遂直回東省今年夏再遊燕都適晤徵  
君同鄉人探悉徵君自鼎革以後棄官歸隱奉母教授心  
喜之卽從海路透迤轉游長江踰山穿林間關訪之至則  
先生頽然一室左右圖書與子弟門生講磨古人之學嚮  
嚮自樂起漢一見輒推示絳府假館治留賜以藥石之教  
又出示其平日所著及詩文讀之皆治心飭躬明道發微



之言蓋先生生於朱子之鄉品姿英秀自少讀書輒以朱子爲期其又得程抑齋及萬清軒二先生淵源授受之正則宜其學之高明光大至於如此也其風流所暨當時公卿大夫之賢折節推挽使出而試用於世一宰蒞澤時月之間澤流政成赫赫有厥聲是可觀先生之學體立用達固非後世末學所能侔儷也雖然時當搶攘之際烽煙四起乃才志未伸而慨然矢爲國殉身手自述其平生行事編爲一冊如陶靖節之自狀其行期城陷定死節計幸以措置之善城得保全而先生亦無事乎是又觀先生之忠義大節有振天地而耀日月者矣嗚呼何其偉也是固先

生天資之高加以學道之力宜其如是之卓卓而若夫尋源溯本則實有其母氏之賢爲之地矣蓋其母氏孫太孺人年二十一而寡居清守苦節事翁姑至孝先生以遺腹而生艱難煦育教之以道義終至如此成立則若先生之門可謂忠孝節義無不全矣嗚呼世亂道傷之餘加以歐風鱣浪翻天倒地三綱滅而九法頽天下不得有正學之士士大夫並與其廉恥名節而弁髦置之惟先生母若子如此是可謂剝上碩果雪裏秀松足爲模範於天下百世矣況先生又有大於此者雖身隱林泉而心不忘天下乃以衰世之感方欲修明禮書以待王者之作又安知不有



地底之陽雷從此噴發徧揚光於九宇也耶先生真無愧於生朱子之鄉矣先生勉乎哉於其去也不勝別離之感畧述如此既爲先生贊又爲先生勉又攜歸以爲誦法之資云爾歲旃蒙單闕夷則之月朝鮮金起漢書於新安之杏墩書室

續羣芳吟序

余攀榮

石洲先生之續澹園羣芳吟也因其先大夫雪江公生平好吟咏所著遺稿不一澹園羣芳吟一卷徧索未得考證無從緣於讀書作文之餘兼學古今雜體遂有續澹園羣芳之志類捷後開館授徒館旁隙地遍植花木別其種類夥縣四志

卷十四

雜志 文錄

夏

稱爲羣芳之處閒時對此吟咏續其詩以繼其志庶幾先人遺澤不致湮沒而無聞適因嗣君映青攜詩屬序於予信乎有志者事竟成可謂無忝所生已爾予拜讀之見其詩根諸孝友本之性情真得雪江公之遺意焉今而後不特續澹園羣芳吟傳卽雪江公之澹園羣芳吟亦因之以傳予顧樂爲之序

又

姚國儀

雪江余先達先王父春杉公同學執友也同時城北俞公理初以攷據博洽有名於時城西余部郎夢巖公與先王父輒相勉以經濟之學獨雪江公翛然意遠徜徉山水以



詩酒自娛四人者所詣不同而性情投洽歡然無閒時人稱之爲四友雪江公之有澹園羣芳吟經兵燹散佚予友石舟雪江公季子也慮澹園羣芳吟實亡并名亦亡積以歲月得續吟若干首甫脫稿遽歸道山嗣君映青承先志將付手民袖全稿見示余展讀一過不禁呼負負而淚漉漉也蓋理初公生平著述如癸巳兩稿久風行海內今石舟之有續羣芳吟行世則雪江公澹園羣芳吟亦雖亡而不亡而先王父在通州太倉任所所著從政隨錄煙銷露捲曾無片字存然紀實之作無從想像更續以視石舟之克紹先緒映青之能成父志其相去何如也石舟詩情近

黟縣四志

卷十四

雜志 文錄

三

古讀者自能涵玩得之始誌予慚焉可也

又

胡 樾

澹園羣芳吟者余友石舟太學之先大夫雪江公遺集之一也續澹園羣芳吟者則石舟補亡之作耳雪江公遺集不止羣芳吟而羣芳吟獨佚於咸同之世天下猶未平之前當是時石舟雖未壯欲補不敢補及其壯也豈真欲補不暇補哉蓋欲老其才華以抒其滿腔蘊蓄庶不負羣芳之清奇濃淡春華秋實夏綠冬青露韻雪香然後形其形色其色伸其磊落豪宕之姿以寫其清新俊逸之品徒謂其詩才豪宕詩品清奇當乎哉石舟之心其亦不敢忘其



親之詩於補亡後耳然與否與

太乙籌算淘金歌序

王元瑞

昔時渡臺謁劉壯肅以壯肅爲吾皖之豪傑也謁後上書言治臺有四要壯肅得書以爲意見相合如其平日所欲行而未嘗言之事也壯肅亦待吾爲國士壯肅自少在軍中好讀書一開卷則得解故能下筆爲文洋洋數千言見者無不驚此皆洪蔭之大令述祖所語吾也洪大令在壯肅幕府所辦摺件關於地方大政者人讀其奏草比作陸宣公壯肅亦以宣公重之其何以遭讒被劾則小人沈某設計害之也洪大令又常語吾一若悔其因何以再渡臺

黟縣四志

卷十四

雜志 文錄

三

而未從注仲伊京卿宗沂之勸阻也汪京卿故知易以其請卜不吉則預戒焉吾旋里值汪京卿主講碧陽書院得相見一日與吾言及洪大令請卜事始悉其學易已五十年致有周易學統一書刊行於世吾於書披誦之益加敬焉汪京卿有時過吾廬手一卷示曰此爲太乙籌算淘金歌乃宋進士邱濬所撰予易學由其入門是卷可傳也元瑞受而讀之不意吾黟僻處萬山中尙有邱公其人聞是卷曾爲俞理初汪南士兩先生所採取未及刊行茲付畝颺遂欣然書其大概

程伯專先生五十壽序

許懋和



夫神仙雖不目見然記籍所載前史所傳其有必矣至於  
導養得理上獲千餘歲下可數百年固亦有焉若夫出處  
不違其時窮困不易其素幼秉殊操少而英明自弱冠涉  
乎知命之年興廉舉孝列於學官定迹深棲前後招辟折  
衝萬里光昭諸侯以帷幄之功無苟進之志參戎作弼班  
命彌崇而體氣和平英華外發情志逾廣暉光日新其仁  
聲寥亮於區宇敦穆於閨庭其才學經國之大業不朽之  
盛事猗歟偉歟頤性養壽非夫體性通達受之自然其孰  
能至如此乎先生含元精之和應期運之數其先出自有  
周大司馬魏晉以降新安忠壯之烈塗歌里詠自茲厥後

黟縣四志

卷十四

雜志 文錄

三

是用西遷永惟此邦邑氏遂傳惟祖惟曾本自諸生並以  
明德積善餘慶伊君顯考孝友溫恭幽思絢道德摘藻挾  
天庭邈投身於鎬京啟夕秀於未振羣百郡之廉孝總禮  
官之甲科伊思梁岷學優則仕作令化行邑里牧州感達  
民祇三蜀之豪蹈德詠仁宜享遐紀稟命不融於斯時也  
先生曾未齟髻永言必孝特深恒慕喪過乎哀愛敬同歸  
無誘慕於世僞英才卓犖誦先人之清芬味道研幾鉤深  
探賾由是崇師之義跨汪氏之龍魚伯牙操籟鐘而教有  
定式每覽史籍經目而諷於口有所述作下筆不能自休  
年始十四侗儻博物觸類多能自三墳五典八索九邱至



若曲臺之禮九師之易樂分龍趙詩析齊韓陰陽圖緯之  
學百家眾流之論經脈藥石之藝射御書計之術或因枝  
以振葉或沿波而討源元元本本強記洽聞至於高言妙  
句音韻天成並直舉胸情非傍詩史又善草隸之藝篆籀  
之則文若春華思若湧泉翰動若飛落紙如雲自初呈試  
論者莫當縣令王君既眷同國士巴蜀太守申以婚姻於  
是歷吉日楊旆西邁方江泳漢載謠南國經途所亘帶二  
江之雙流抗我眉之重阻擇地而住實號成都施衿結襦  
恩隆好合閨房肅雍和如瑟琴青瑣銀鋪是爲閨閣旅食  
南館高談娛心仰司馬揚王遺風此焉游處固以和昶而

黟縣四志

卷十四

雜志 文錄

臺

足眈矣而先生赫然發憤思入京城遂乃風舉雲搖播名  
上京旣筆耕爲養亦傭書成學鸞龍之文奮矣三技三捷  
第一選名升學利用賓王甘泉遺儀南宮故事畫地成圖  
抵掌可述七年之間癸甲丙午高第明經在已選衆而舉  
師氏之選上庠肆教愛深善誘顧邈同列蜚英聲騰茂實  
觀者駭視而拭目聆者傾首而竦耳若夫一言一行維慕  
維愛雙棲一朝隻撫存悼亡時發乎篇雖清辭麗曲潘陸  
特愛未或能比於時也西河忠志之士江南英宰又申之  
婚姻先生居母艱有歸歟之歎音雖事緣義感而情均天  
屬泣涕沾衣癯瘠改貌行路傷情雖顏丁之合禮二連之



善喪亦曷以踰遂隱邱山築室種樹汲流舊巘葺宇家林  
其居也傍峻厓右高岑周望山野郊牧之田水澍稷稼陸  
蒔稷黍菜則蔥韭蒜芋青筍紫薑靡不畢殖藉萋萋之纖  
草蔭落落之長松倚南窗以寄傲臨清流而賦詩撰錄先  
訓俾無遺墜收朋勤誨翱翔乎其巔同時親故聞而造焉  
酌彼春酒扶寸肴脩恣語樂以終日譬猶池魚籠鳥有江  
湖山藪之思方解纓絡永託茲嶺置酒絃琴陳書綴卷遭  
遇時變寇害尋興剖符專城紆青拖墨之司奔走失其守  
者相望於境先生恐之嚶鳴相召首倡義兵先帝五年五  
月率勵義勇獨當羣寇兵盡器竭野有委骸猶轉戰無窮

黟縣四志

卷十四

雜誌 文錄

裏

凶醜駭而疑懼及其整蘭筋揮勁翮臨重岫登絕巘列營  
緣戍五年之中東西施翼罷困相保守之彌固當此之時  
湘州相國持節都督揚州諸軍事探隱拯沈舉不遺才謀  
出股肱任切書記辟書始下曾無與二先生旣允焚林之  
求士感知已最以丹青之價文擅雕龍於時景燭星火風  
馳羽檄自朝章國紀典彞備物奏議符策文詞表記皆取  
定俄頃發言可詠用而不竭若成誦在心借書於手曾不  
斯須少留思慮幕府與羣賢同行握牘持筆遠近觀者便  
望風推服今天子三年秋九月相國掃除凶逆虎步秣陵  
先生於是順流而東臨江而翔鳴女牀之鸞鳥攜公子以



雙游其制宅也。齋驩安福居無塵雜。明年究徐接壤豺兕當路互相扇動。元渠時殄而餘黨實繁。相國祇承皇命。元戎啟行。先生時從在軍。算無遺策。復類昔日當斯之勤心。煩於慮而身親其勞。及臻厥成。寵命優渥。顯授符虎使。同台司。於是覽知足之分。庶浮雲之志。功成不受賞。且歸來以釋勞。優游典籍之場。休息篇章之圃。託情風什。留意文章。成一家之言。常覽國志。修之歷旬。辨時俗之得失。性樂酒德。攜幼入室。以敘骨肉之歡。恩豈必親。魚鳥樂林泉哉。亦云介性所至而已。雖然。志意修則驕富貴。衛霍不足侔也。逸奔驥而逐遺風。良樂之所急也。鈞天廣樂。必有奇麗。

黟縣四志

卷十四

雜志 文錄

夏

之觀帝室。皇居必畜非常之寶。是以鳥棲雲而繳飛魚。藏淵而網沈。昔歲元冬。月合肥丞相持節都督郢司。又申前命。不俟終日。公弓旣招。星陳夙駕。然後揚節而上。浮推轂樊鄧。近綴岷嶓。朝嘉其能。歷觀前後。來入軍府。使持節山東之國。進以顯秩。將亞台司。由是言之。方將上繼三靈之流。終有榮顯之福。以含一之德。據上台之位。佐命則垂統輔翼。則成化何必假仰。屈信若彭祖。煦噓呼吸若喬松。眇然絕世離俗哉。今者十一月吉日。良辰。先生五十之年。斯賢達之素交集。同好縉紳之倫。濟濟焉壽觴舉。故考其行述。約文申義。言其梗概如此。若乃閑舒都雅。取予時適。郁



郁乎建永世之功留金石之業典歷二司位超先達公子者任土作貢跨騰風雲歷金門上玉堂或莒發穎豎皆揚清風過此而言萬祥必臻願舉泰山以爲肉傾東海以爲酒賦詩稱壽或襲故而彌新凡事有宜豈今日之論乎固可得而畧也

重修劾上堦序

余毓元

城北臨章門連戊己橋漳水環遶橋下由石山下達浙江過礮里許卽劾上堦當漳水之衝水深魚聚日暖風和魚常浮游水面過其處者無不臨流眺望翹首而觀前對芙蓉峯秀若列屏向辰樓峙其左高聳雲霄碧山橫於右四

黟縣四志

卷十四

雜志

文錄

真

時樹木葱蘢斯亦北隅外一勝景也地當孔道行人絡繹不絕直行過漳嶺通太平大路光緒壬午年洪水衝斷下低上高不便行走城西余種德捐資修理堅固一如其舊

孫理和先生七旬壽序

胡存慶

代

今夫星精耀地昌明燦河渚之光銅狄摩人神異侈霸城之說彭篋流西域則八百盛誇白海遇東方則九千能算老聃居室支筠杖以談天勾漏飛仙鍊丹砂而開井莫不金液玉脂功深九轉郊食吞氣藥探長生藉補導以延齡餌朮芝而善養孰知四皓商山恬淡養沖和之氣百年高允慈祥卽壽考之徵有諸內必形諸外盡乎人自得乎天



如我理和先生者富春名宗龍坡後裔幼習勤苦勵仲期  
牧豕之操鑑別人倫有伯樂相馬之識陰德則法叔敖之  
埋蛇退居則高志舉之榜舍北州賢智不讓君家彥龍洛  
下耆英足徵今日文獻使其志慕登庸卜式居然顯宦卽  
斯居近城市韓康亦已知名自持清約蹈文度高世之風  
雅善貽謀博蜀人書樓之譽爾其孝友持躬仁慈表德雅  
度溫溫真誠懇懇負仲由之米菽水能歡居荀匠之喪髮  
毛盡禿韋賢教子一經珍於籙金王佑植庭三槐卜爲國  
器雖復屢斷弦絃牧犢子雉飛有操而亦三傳樂事榮啟  
期琴曲能歌使徒觀其才猷之應世也則智珠在握法矩

黟縣四志

卷十四

雜志

文錄

五

從心冬資絺而夏資裘策無遺算貪者三而廉者五物盡  
察情未嘗不入賤出貴掌食貨輕重之權母飛子還操金  
融盈虛之柄然治總三官上林錢原以調劑卽侯同千戶  
西州賈非所願爲究其置身闖闖混迹泥塗不過名位不  
貪江湖遠徙如王烈之商賈自污干木之駟僧與伍也而  
其平心若秤立論生風博覽索邱岫嶺深探古奧恥談章  
句拘迂不類腐儒讀未見書與古人友經窺青囊豈徒辨  
壬燕癸趙方傳扁鵲聊以代墨炙筆鍼推此奇能因而壽  
世研精物理達爾文稱人道福星畏避勲名范仲淹爲醫  
國良相矧復恕能及人譬先取已擴胞與以爲懷泯物我



之界限魯困可指屢助子敬之糧馮券能焚藉市孟嘗之  
義由其行高衡嵩故能財輕築籜趙熹篤義婦女亦解懷  
恩楊椿卹貧姻黨於焉無恨讀范晏陰德傳更僕數難觀  
文正義莊規條理井秩是則仁漿義粟悉種福田食德飲  
和咸推人瑞也故其優游物表感召天和福以仁基壽由  
德至唐田鄉裏菟裘築以徜徉白嶽山中芒鞋曳而輕捷  
游山歷福地固是地行神仙結社會樂天早知天爵榮貴  
笏佩魚而繞膝綵舞極娛杖刻鳩而手扶飴含足樂長君  
林芬推事學富青箱名登黃榜曾補尉官能亭疑法林宗  
入太學亦已冠絕諸生巨源策賢良稱爲今時賈誼次君

黟縣四志

卷十四

雜志 文錄

夏十

洪芬碩士早採芹香馳聲鬢序鵬程萬里渡瀛海以求師  
龍領一珠探睡驪而得寶西法原來自東方先知因而覺  
後進桐枝百尺種盡稱龍華祝三多歌宜戩穀洵家庭之  
盛事增閭里之光榮攀榮等居鄰枌社誼篤蘭交冬郎鄒  
鳳早慕清聲春酒介麋偕殷祝嘏臘鼓將敲適值降寅之  
日霞觴競進正趁生申之辰因獻蕪詞以標芳躅所賴仁  
風常被壽宇宏開瑤草琪花種是恒春之樹泰山北斗高  
瞻老人之光陶隱居澗東晚歲眼初轉夫方瞳呂繼美開  
寶當年爵許膺乎公士先爲導引不盡掄揚

又

葉新元代



昔者英之合算者八百歲其紀香山鄉里之聯名者三百人並稱揚引若必指開屏爲侈事請張宴爲俗風負彼生申禁茲書亥則書中何以留洗腆岐下何以志稱觥也如我理和鄉丈先生家敦古義樹先代之芳型人是歲星實富春之耆舊負大貝明珠之望明從湖海而來鍾黃山白嶽之奇秀得江山之助臘月吉日爲先生古稀誕辰固宜發小言之思藉代大斗之祝先生生而穎悟幼乃端凝放棣花第五之枝沾慈竹無雙之蔭無奈紅羊劫厄家室難安幸而蒼兕兵馳烽烟漸靜痛靈椿之先謝對萱草以忘憂停機聆教誨之言入室盡晨昏之禮初寄跡於江西繼

問津於漢上家書頻寄養親無缺旨甘風木驚摧陟屺徒深嗟望先生則終身孺慕篤志顯揚本此孝思蘊爲友愛壘簾同氣炊煙則縷析東西肥瘦關心沾澤則枝無南北家居兩載專分田氏之財身處一清不著季銓之服而且以商業期仲氏喜繼志有叔兄博士牽羊分封貢樹廣文繫馬援例資郎廉讓所成間言遂泯其孝友之純篤有如此也夫天生至性厚重者有威而人事善謀勤勞者致富先生則赤算生涯朱提開業歷徧五都之市險阻備嘗流通九省之衢情形熟悉操宏羊之心計不怯錢荒等申濬之牙籌漸看銀湧及乎知音屢遇執事連番三年決勝運



籌極操縱金融之能事六月暫充協理開稽查水電之先聲爲票號所推崇歎公司失信用謂合資不如獨股念舊誼於贛江旣就熟而又駕輕開新牌於漢鎮他若茶香馥郁味亦畧嘗酒釀清純坊曾大設創草廠於和悅洲邊意切振興國貨運紅茶於海參歲境志存推廣華商工於撲滿善於持盈其經商之優勝有如此也自來權衡子母者每囿於一隅操計奇贏者難通乎百貨先生眼光遠大言語優長利弊深知經權兼有侃侃而談時事歲月靡遺歷歷如數家珍精神不倦久居會董之席理案周詳高瞻團體之間折衷至當以故手訂條章字斟句酌神分函牘大

幅長篇王景畧捫蝨而談段干木僧馭是鄙其名譽之隆重有如此也尤足述者先生幼耽典籍酷嗜堪輿疑龍撼龍之經瞭如指掌淺葬深葬之法了然心胸念三世黃腸未封馬鬣廿年赤地莫卜牛眠果而考證有資佳城連得葬父母於白坦葬曾祖於祁門而祖父母則就村西之石墩頭營葬焉枝葉旣繁松楸永蔭幾番辛苦經營大事漸次告畢且於祁之裡黃山上又葬德配葉汪兩恭人五法合全一毫無缺仰瞻清晰分野新造羅經大盤陰陽旣經指點乘納無不詳明其地學之精深有如此也先生醫術兼通方書博覽探內經之奧妙悟脈學之精微生平大病



者三回天有術自古折肱者九易地爲良笑隱市之韓康  
未能濟世同富資之李某奚事沽名著手生春起沈痾於  
到處細心辨症斷疑案於臨床親友多受三指之禪室家  
無須七年之艾其醫道之神通有如此也吾聞多藝者多  
材古今並美壽身者壽世人已何分先生秉性慈祥存心  
胞與外賜戚郇常分囊橐之金內濟鄉鄰不吝倉囷之粟  
最重者慎終追遠兩修祖祠振贖發矇一興義學淮海偏  
災則躬親散賑黟城積穀又首輸鉅資辭皖藩請獎之虛  
榮籌家山平糶之善後彼夫製上池之藥頒長府之錢施  
墨子之棺賦陸續之粥除道成梁之贊助通財借券之有

無平日美不勝書臨時事難細數其仁義之發揚有如此  
也而況爲善忘名後人食報先生籍詩書之雅洗市肆之  
囂訂交則友擇綠衣課子則師延絳帳大哲嗣林芬副車  
早採泮水之芹半折蟾宮之桂報捐知縣分發武昌欲以  
溫公簪杏之才聊試潘岳種花之手研求法政聽鼓鄂州  
廣習方言驅車歇浦及乎時移世易入都考取法官小用  
大才赴浙派充推事二哲嗣洪芬茂才幼博一衿習西文  
而人棄帖括積功八載居大學而士稱秀優旣受獎給之  
憑卽助文華之教更欲專門深造學礦化於美洲果然碩  
士青年通格致之新法重洋萬里五載歸來膺光榮於海



外開講席於金陵作室肯堂克家有子璠璣異寶梓杞同  
林看孫枝之茁秀先發雙株著珠樹而騰芳更徵滿馥其  
門第之昌盛有如此也然此猶未盡表先生之行誼概括  
先生之平生先生當年未周甲時繼配程恭人又謝世曾  
輿不娶半爲佳兒向平有言未了吾願繼而次郎授室三  
女子歸媳婦多才侍奉常留雅韻媚鄉無恙潤清偏缺中  
流先生乃代葬方家之墳立修祀會垂憐程氏之後撫育  
遺孤惠徧三黨之施義切五中之感觀於提攜諸姪推薦  
之力不遺保管遺財維持之志弗替其待外戚厚親族皆  
足並傳耳雖然世變滄桑誰能逆料人情變幻難以預防

黟縣四志

卷十四

雜志 文錄

夏四

先生當辛亥改革之秋爲書院保存契約迨南北共和之  
日歎市房盡化燼灰波及遺棺爛茲大劫猶以資財損失  
補救有方而債務清釐進行須急不辭勞怨條陳先宣布  
於商場乃被拖延判斷催呈於法院卒理紛絲獨操勝算  
且也建築市場曾參諮議創興省館亦列贊成本見義勇  
爲之心行樂善不倦之事他如勘修緩口之溪路移建村  
中之支祠無一不助多金無一不捐巨款此皆犖犖大端  
足以昭示來茲者也總而言之先生抱先憂後樂之懷應  
享自行可久之壽婆娑兮老子矍鑠哉是翁賢智貽謀不  
待箕裘紹業文孫繼起終稱詩禮傳家祖棟等或歡託桑



梓或誼聯葭莩或早依仁宇或晚庇族親卓爾高標仰魯國靈光之殿肅然起敬欽杜氏多寶之田伏希天錫遐齡受駐壺中之長日人推洪算健作地上之行仙謹序

集益文社序

汪維駿

曾子曰君子以文會友後世文會之立其義蓋權輿於此然則會以文稱其必以詩書相討論以道德相切磋而非以酒食游戲相徵逐可知也今我同會諸公慕騷壇吟社之高風敦聲應氣求之雅誼各願集貲合創此舉以期士林有所裨益故名之曰集益蓋取易集思廣益之義也其捐款條規臚列於後故不贅特弁創始之意於簡端云

黟縣四志

卷十四

雜志 文錄

五

贈姚省羣序

常熟 屈承福

蓋廸前光裕後嗣事若相判理實相因如種植然根本固則枝葉茂其素所蓄積也黟縣姚君省羣昆季家於城西溪南村自前明至今聚族居二十餘世代有令德樂善不倦事蹟均載邑乘省羣仰體先志凡邑中善舉多先倡率癸酉夏予蒞是邦深知境內地少山多土脉高爽爰因地之所宜課以蠶桑邑人氏咸樂從焉而省羣築室植桑尤爲勤奮閱三稔扶疏繞屋蔚然成林且赴澗東購縑織諸器俾家人嫻習爲里黨法又熟思善後貽厥孫謀將每歲所獲提儲蓄貲作後人讀書膏火諸義舉之用其立法用



意可謂良且美矣戊寅春予差次瀾溪晤省羣談憶前事  
又喜勸立蠶桑會以爲久遠計更令余穆然思之不能已  
於言者故敘姚氏世德相承省羣昆季克紹箕裘有加無  
已光前裕後夫何閒然後之人能曲體倡始者苦衷而世  
世永寶之是余所深望也已

五修屏山舒氏宗譜序

休甯 金聲

今人家政可勿如國法之森嚴也今人家乘當勝於國史  
之祥核國史首紀三皇皇名至今難定而謂古來皇子皇  
孫能一一而紀其實不誠難哉卽能紀實繁莫可詰見者  
不疑其誕必疑其誣此國史所以疏畧而不必如家乘之

黟縣四志

卷十四

雜志 文錄

百六

詳明也屏山舒氏宗譜載始封叔子公實本伏羲氏皇孫  
傳其初臨紆地也尊民重事爲而不有物而不拘毓材以  
致用禮幽以任衆紆地洵洵紆民紆紆致傳國最長其間  
皇而帝帝而王閱歷世代幾遍洵非羲皇莫能德庇若是  
遠也舒國世傳簡策遞載蟲鳥科斗形字畫怪僻人多難  
曉周時有支裔名賢者能曉古來字體因取舒姓傳國簡  
策逐世譯名逐名譯其事實更註以周時爲變之字體而  
古體字簡竟無從稽查此亦如經文旣譯今字而古來書  
字竟湮沒無傳誠可慨也譜載始封紆國地正是爲廬江  
郡舒姓次受秦封涇陽君是爲京兆郡舒派次又受秦封



絳大夫是爲平陽郡舒派迨漢駿翁爲丹陽太守愛黟山  
奇秀遂南遷歛黟旣又分居石埭池陽各地原原本本歷  
歷詳核所以晉世有尙書右僕射舒逖表奏家傳譜牒曾  
經尙書左著作郎邢廣宗勘明唐世又有光祿大夫舒讚  
表奏家傳譜牒復經中書舍人郭宏勘實是知舒氏宗譜  
固歷朝校正之宦譜非若他姓肇自周漢而下修譜藏家  
者所可比聲幸託卽墨侯舒老夫子之門牆日暇蒙示續  
訂宗譜敬披之下得悉其祥始則皇孫受蔭國祚世傳繼  
則縉紳輝映簪纓世美近又書香克紹流芬世傳名宦碩  
儒後先競起高山仰止在斯家聲丕振在斯蓋嘗神遊於  
黟縣四志

卷十四

雜志

文錄

七

吉水屏山之間知此地靈人傑繼繼繩繩益可卜其世德  
世美世傳之光大

歷代兵制沿革自序

舒斯笏

粵自郊原布肅軒轅興鹿野之師雷電揚威帝警整熊泉  
之旅堯弓舜鉞神武彌昭禹誓湯征威稜遠振章矣然近  
古之時規模簡畧書缺有閒稽考無從洎乎成周以後競  
爭日烈制度日繁舉凡蒐軍實簡車徒或數代而相仍或  
一朝而屢變他他籍籍萬緒千條非故爲此委曲更張也  
蓋所以備內憂而防外侮者國家胥於是賴焉烏可忽哉  
目今海禁大開列強相競鷹麟鸚睨所在堪危我國際此



時艱鑒於前失深知旗綠各營不可復恃也乃備取東西各國軍制參酌折中分期編練一面廣設陸軍各學堂並派遣有志之士出洋游學練習其技能研究其學術意至善也惟是知今而不知古則昧於歷朝立制之原通外而不通中則難免數典而忘之誚不佞學殖就荒區霑無識謹就歷代軍制考訂羣書撮採機要起周以迄國朝都爲一編名曰歷代軍制沿革首述軍制沿革總係歷代制度之大綱次述禁衛軍制沿革卽所以衛王宮者也次述郡國軍制沿革卽所以備征調者也其或文義艱深則註以釋之規制繁瑣則表以明之至如車乘舟師軍械馬政諸制暫從畧焉嗟乎當此二十世紀之初兵學日精軍制日善我國經武圖強亟須取人之長益我之短以重軍政而立國防若茲編所述直芻狗耳然藉此以備參稽資考鏡或亦不無小補云

余仰文先生六旬壽序

歙縣 汪宗沂

以積善之躬產名賢之里環山在望壽可比焉桃源設廬才其偉矣夫其天性孝友言語肫誠潔菽水以承歡悅詩書而養志剛直允孚人望慷慨超越恒流及至邑有粵氛劫成兵燹望門投止孰知張儉之寒擇地移家爭羨葛洪之逸先生迺遷漁亭之山而棲息真人出水火而不渝景



林歷之阜以瞻依游子念里閭而思返旣而兵革寢息闔  
闐充盈立業維勤存心罔懈溯講學之遺烈效名德之解  
紛維祠會開義學有善必舉無役弗從花甲甫周黃鐘肇  
應令子從名師成實學邀遊上舍超邁羣英養老乞言禮  
文具在奉觴上壽躋祝同欣敬爲頌曰

峩峩余氏爲邑華宗人才輩出碩德榮封石舟桂芬皆推  
耆宿均享大年居鄰比屋先生繼之壽世壽人三冬文史  
延年有因九老之會於斯爲盛頌美摘詞衆仙同詠

余氏三鄉賢序

黟縣訓導江浦

蔡侃

嘗觀先王建官自一命以上皆用士士未仕也惟立師則

黟縣四志

卷十四

雜誌 文錄

夏

以卿大夫之老爲之何哉蓋古者四十而仕五十命爲大  
夫六十服官政七十而致仕此四十年間涉世深練事熟  
旣老而命爲師則凡所以教人者皆其已試而效焉者非  
嘗試而漫爲之比也其子弟成材出而用世譬如得和扁  
屢驗之方以治人隨手輒效豈獨其才之異哉其所教者  
然也故明王以其有功祀之學謂之馨宗周禮大樂正所  
載是也此其垂訓之意深矣不佞觀余氏三賢俱以英科  
奮身握瑾抱瑜其宦跡顯於四方旣已勒銘樹軌矣旣而  
歸老又能推其餘以教族之子弟俾興於孝弟禮讓以誘  
化其邦人迨其卒也公論益彰當道以聞於朝祀之學宮



豈亦古之瞽宗祠典所謂施於民則祀之者歟夫余氏自  
藍田遷黟不二百年而列於鄉賢者三人誠曠世僅見也  
今觀陽山公學務實用不爲空言進能以儒術飾吏治聲  
名著於洪都嶺嶠間無愧古之循良退能修德葆光遵考  
亭鄉約以率鄉之子弟邑大夫諸生薦登鄉賓助宣朝廷  
風化可謂難矣今又深惟本源釐正家譜使百世之下知  
有余氏由此以風邑人各知重本睦族而孝弟禮讓之化  
蒸洽於黟而旁暨於新都者將在茲矣由是以談陽山公  
之賢追前三人而有光則繼三人而記者舍公其誰哉不  
佞於公不能爲役然衣以蘭馨物因人重青蠅附驥而行

黟縣四志

卷十四

雜志 文錄

墓

千里其所託者然也不佞始至黟見名宦鄉賢合祀一祠  
心甚疑之其夜夢人投刺報客至亟出迓之見數十峩冠  
博帶絳袍紫綬揖不佞言曰某某輩昔宦於斯客也某某  
輩產於斯主也惟賓與主生而同遊死而合食何町畦之  
有且也邑人之祀我也齊功德而已矣其先後遠近奚論  
焉不佞驚寤旦而診其夢諸生云先生朝夕出入於斯或  
有疑於合祠先後之嫌此殆賢宦神明假以相告乎不佞  
固弗然也旣夜又夢如前而加詳不佞聞之寤若未寤將  
神所云云繹而聯曰今古同祠齊功德無論後先依然伯  
仲主賓合食萃精英有來右享丕著儀型恍惚間又若衆



賢宦賞之易丕著儀型爲儼若生存及旦又以語諸生僉以爲此先生精誠昭假也不佞領之越明日遂以夢中聯句付剗氏刻而扁之神座兩楹細註曰夢神云云覺而成聯以志不忘焉至是修余氏譜僭爲引其端中載三賢得祀爲千載曠見凡數易稿鎔詞頗澁一日午睡恍若有啟不佞思者亟起揮毫頃刻成篇讀之爽然豈不佞爲三賢闡發世德三賢亦感於不佞之愚而牖之耶詩曰無言不酬無德不報嗟乎嗟乎三先生有感於不佞之誠而啟之則其德陽山公而啟洎其後昆暨族人者當無弗至矣繼自今因德公而波不佞易世之後倘得侍公俎豆共嬉

黟縣四志

卷十四

雜志 文錄

夏

此堂固在公族之後人哉固在公族之後人哉時萬歷丙戌仲夏一日也

余君熙佐長兄六十壽序

翰林院侍讀學士  
浙江學政汪澹

昔先吏部遊藝楚漢自入籍汝南取解時與二三同人建會觀瀾日對黃鶴晴川當月明夜靜水天一色磬音漁火中隱隱領其幽趣故其爲文亦非復塾叢經生尋行數墨膚辭縛句之可幾及每一文出隔窗爭傳咿唔拈紙飛去窮鄉僻壤潛心揣摩之士偶獲見之如乎吸沆瀣上凌大清服丹砂而壯其神靈也至從遊於門牆日益以衆先吏



部心既樂於接引雖後生逢小試亦必爲之辨等列決得失殘膏賸馥少有摘而竄施於場屋者往往叨售前茅於是數年之間不特聲溢衡湘而知人之明得士之多涵泳其教澤已無在而不傳辦香方位於朝直紫薇省簪筆弘文秘書同校京兆於銓衡歷歲擇人建官論文分品十五國經明行修彙送禮部試闕廷近上卿選錄其才上獻之御座其爲典隆以重矣乃出自先吏部者又若明霞天漿黃鐘大呂合天下才人之嗜皆相似焉及發而爲經濟嘉謨贊翊異政臨民盡可驗之於鋪繭濡毫之日故先達執友有言曰論事功先問文章鄉也唯吾友優爲

黟縣四志

卷十四

雜志 文錄

頁三

之矣上之二十二年先吏部奉假省親明年甲子典試秦關撤簾復命取道於家以是兩過里門桑梓俊彥日贄伺兩楹時同郡桃源余子熙佐年甚少曹偶中卓立傑出爲文汨汨超人意表間與家伯仲氏講論一堂鍼芥相投見聞於上座其言無所不悅嘗動容擊節稱之曰能以開物成務之旨發爲功名事業異日者其余生莫能或之先也初受知於學使者科歲頒布之文遍噪大江南北采風君子擢於人人之中拔尤彙征傳奏輦下天子臨軒眷注念學校養士綦重師儒非品望素著文行兼優不足以爲模範當塗江東首邑人才淵藪聖明喜爲得



師一覽其文而 命之曰欽哉爾以是爲宣化將士風丕  
變一至於道其茲往乎甲午以來春秋六遷所以矜式斯  
文從容禮樂之場駸駸乎向風而起者皆蔚乎豹立南山  
矣推左席者有雲間徐君同德聯心藜火光分蕉葉芹池  
一帶研丹相對賞識於牝牡驪黃之外歐陽廬陵梅宣城  
不是過矣以故鴻才高足破壁連飛以去而英銳慧秀之  
子若錐之出囊中光芒上燄浩乎其不可揜也濂溪先生  
曰師道立而善人多余子修學校之政一本於孝弟忠信  
躬行心得之餘雖宮牆廟貌上棟下宇亦皆煥然聿新古  
之被絃歌而乘朱轡者城池道路隨在足以驗其勛績以

黟縣四志

卷十四

雜志

文錄

百三

賢有司之治先形於秉鐸之時其於聖人人倫之教有裨  
於 王化夫豈尠哉庚子春王正月躋六十誕辰客於姑  
蘇之鄉友共謀稱壽予與余子通門同道同業敢以其臣  
職之宜及時商畧謹摭以人事 君之誠長育菁莪上爲  
國之楨幹而余子方以雄心壯志三年射策入承明著作  
之堂於斯時也則予與子猶將有事焉在矣聊以其幼之  
聞於家傳敘而貽諸鄉老長者以示江東人士及余子令  
子文孫命侑一觴知父師相承之有自來所爲啟後之意  
正在斯文康熙庚午五月門生趙臈書

林君得暉先生八旬壽序

舉人 舒 濟 泉遠 教諭



今世之士大夫或文章事業彪炳於時求其實行克彰而爲里黨所倚賴者蓋不多得吾世丈得暉先生世居黟縣之漳溪代有隱德先生性純謹奉母以孝聞稍長貿易他方誠篤勤謹凡司人之事無不盡分以供職中年家道稍潤與人合創事業先生責己常刻待人甚恕朝夕勤勞所億多中故或有時勢變易不能久合而凡共事之人莫不眷念先生依依不舍先生兄弟四人先生居長三弟不幸遇難早逝三弟媳幼寡無子先生時存撫恤不使缺乏所尤難者當同治建元之歲我徽賊氛不靖先生閣舍付之一炬而族中子遺之民多至絕粒先生解囊以贈不少吝

黟縣四志

卷十四

雜志 文錄

高

惜蓋急人之急雖自處於流離顛沛之中不暇恤也夫豪華富厚居擁萬貲往往於族中之貧乏者如秦人之視越人肥瘠乃漠不關心聞先生風亦可以少愧矣他如治家則儉節訓子有義方建亭補路之善舉莫不踴躍爭先排難解紛之事無不力行恐後先生子一人克繼父志家業日漸光裕孫三人長孫庠序有聲次三尙幼亦騰達之資曾孫繼起一門四代方興猶未有艾焉

林君履平先生暨德配胡宜人六旬雙壽序

鉛山舉人

曾以文 輔丞

市易之道發軔於庖犧至虞書而懋遷化居規模粗備司



馬遷作史記貨殖列傳首推端木氏以爲廢著鬻財實商家之祖豈陶朱倚頓概謝弗若哉蓋必有讀書明理億事多中之材而後操奇計贏肆應而不窮於用此非市井狙獪委瑣齷齪者流所能髣髴其萬一也吾於林君履平深有契焉先生吳產也籍隸徽郡漳溪世有隱德維時髮逆猖獗蹂躪中原盜竊安慶者八年佔踞金陵者又十餘年大江南北求一片乾淨土不可得而所謂析骸易子幾禽獮而草薶之無一遺留猿鶴蟲沙慘莫言狀先府君游賈豫章君生遭多艱之秋侍母家居重慈健在伶俜徒跣避寇深山內空隔宿之糧外絕監河之粟采薇拾橡病莫能

黟縣四志

卷十四

雜志 文錄

五

與祖母母不幸遇賊搜括金銀及剽頭面君憤賊氛之太惡親體之重傷躡踊哀號賊爲感悟隨取山中銀花爲祖母母服患處漸次告痊意古所謂丁公藤劉寄奴草必非人力皆神靈呵護使然吾想先生至孝格天可以化兇虺爲馴良卽可轉瘡痍爲平復求之三代下百不獲一而在齠齡則尤憂憂其難也祖母曰林氏一塊肉惟汝存汝其行乎毋以我二人爲念君間關跋涉出死入生適父遠回悲喜交集縷述村墟灰燼族衆傷亡三世四人天幸無恙蓋不禁淚涔涔下破涕爲笑者久之君年十二侍父遠遊學經營精書計暇則流覽詩書兼弄筆墨耽吟善畫習若



性成魏晉人酷愛牡丹搗管時君其有富貴癖耶旅棲鉛境蓋越有年歲丁酉父病篤嚙指心動星夜奔馳山漲暴騰殆哉滅頂歸侍湯藥不兩旬父卒不起又二年遭母謝太宜人之喪哀毀骨立葬祭均如禮然後歎君之孝孺慕終身後福宜未有艾也先是君弱冠受金某聘石塘湖坊兩鎮紙號悉委任焉嗣居停曹氏如之最後隻身創業游賈申杭家計畧豐然不屑鰓鰓爲子孫計咸同間兵燹頻仍宗祠傾圮君捐金提倡建醮告成數什伯栗主彙書總牌捐已山瘞焉遇急難親鄰指囷汎舟揮金若土此外造橋修路載在口碑蓋君之以仁成孝又如此光緒己亥先

黟縣四志

卷十四

雜志 文錄

夏

華方伯保舉帮辦湖坊保甲宣統己酉李明府檄委協助陳坊鎮調查十餘年來地方公益百廢漸興息訟平爭風潮靖謐人羨爲賈才之善吾歎其儒術之優焉德配宜人年甫十八歸先生時寇亂初平田廬未復母經紀家政口瘖手据克儉克勤心力交瘁君寄身數百里外得以紓內顧憂者繫母力也尊章具在食貧無怨言後來生計日充所以治滫瀡營旨甘者子職婦供未嘗缺乏否則高堂二老亂後驚魂無人焉調護維持必不能養天和登上壽享遲暮承平之福母之孝與君之孝是又兩全其美者性賢惠解衣推食一視同仁天佑吉人舉丈夫子三女子二婚



嫁一切所費不貲庭桂堦蘭森森玉立旋得三孫男四孫  
女外孫又若干人今長孫已授室矣回憶四十年前天荆  
地棘一髮孤懸驟語以晚景桑榆天倫聚順齊眉點頷家  
慶團圞真其夢想所萬不到也長君由茂才異等食餼虞  
庠現充玉山鐵路文案叔季弓冶箕裘克承父業尙書酒  
誥云肇牽車牛遠服賈具父母慶自洗滌致用酒禮也以  
今季春月爲弧帨六旬雙壽遙想木公金母鴻案偕莊橘  
叟麻姑兕觥並舉戚友稱觴而祝嘏孫曾捧杖以承歡絳  
蠟輝煌紅綸爛熳意必求達官顯宦世所謂強有力者爲  
之鋪張藻采揚挖休嘉顯揚之願方足而廼命一老學究  
黟縣四志

卷十四

雜志 文錄

頁七

援筆立言當必非君所深快雖然文傳人乎抑人傳文乎  
先生之孝之仁於人言驗之而談論風采道範粹然非盛  
德不能致是皆可傳之永永者也伊川謂張良有儒者氣  
象吾於先生亦云因不辭而爲之序

林君履平七秩壽序

進士

徐士瀛

夫人之立身處世也不必高談道義以爲顯達於一時又  
不必驚世駭俗以爲超越乎儕輩士大夫無論矣求其居  
約而能施積行不求聞合乎孔子有言曰庸德之行庸言  
之謹有足爲里黨矜式者吾於履平林老先生常仰慕其  
人有足述焉先生居皖黟之漳溪黟故多山漳水又爲浙



源山川秀鬱其中多隱德之君子而先世以孝義聞先生幼時值紅羊劫亂干戈紛擾之際避寇流離人多四散先生侍祖母母於途不幸遇賊搜括殆盡賊猶又傷祖母母頭面先生躄踊哀號賊感舍去旋取山中銀花爲療以愈當是之時常人之所難能况乎髫年迨至孝之根於天性歟出生入死者屢及後重堂合敘父亦遠回談及前事破涕爲笑者久之承平以還先生已習商於鉛山湖坊鎮游賈申杭不屑錙計珠較躬自厚而薄責於人分財不苟貨殖每多億中裕足樹立時歸里省親每見村族里黨故家搖落宗祠會祀物產蕩析則昔日遊釣之所亦不勝滄桑

之感怒焉憂之捐金首倡栗王之舉舍己山以助葬修祠會藉復舊觀族之貧苦者俾利賴焉光緒己亥華堯封方伯保舉帮办湖坊鎮保甲及育嬰局經理宣統元年己酉李明府檄委協助陳坊鎮調查員又宣統三年辛亥彭令監督創辦自治選舉鉛山西二區甲級議員民國元年壬子郭知事復立自治又選舉西二區鄉議員凡屬地方公益靡不盡力於財物無所顧藉遇人尤篤厚純摯能急人之急修橋補路毋稍吝惜當先生之至湖坊年纔舞勺恨少失學閒輒涉覽詩書研精深思後能吟咏擅丹青尤長於牡丹得者珍之閒居申申以詩畫自娛鄉鄰有爭者得



其一言莫不紛解人多敬而畏之先生子若孫恂恂謹厚望而知爲受家庭教訓之深曩者士瀛 權運建昌與其長

子嘯眉共事年餘間嘗過談道及先生言行心嚮往不已己未八月始晤先生於玉山精神矍鑠芝宇盎然得親雅

教快何如之今歲春三月爲先生七秩大慶遙想北海樽開孫曾繞膝鴻案齊眉躋躋踰踰同堂四代非有積德其

何能臻宜乎天之報施善人方興未艾彼都人士必有挖揚藻采以紀人瑞者矣士瀛 不敏乃以曩之所聞銓而次

之敬爲先生壽并以佐嘯眉之稱觴舞綵爾是爲序  
送黃石蓀曾源 太守移任青州詩序 程桂芳 馨巖

黟縣四志

卷十四

雜志 文錄

新安江好宦迹傳任溪呂灘之名太守山高民愛遺譚嶺

黃墩之蹟徽國屬在荒僻郡守代有循良梁鼎則寵錫銀黃劉贊則榮膺金紫任昉吏民戴德千百輩有同情羊欣

父老銜恩十三年如一日類皆草從風偃葵向日傾所以學聖擢遷三挽張弓不住之鞞移去一肩行李可風以上皆新

安郡守 故事 莫不碑立去思棠留遺愛結樂公之社建石相之祠當時傳爲美談後世載諸志乘吾聞其語未見其人恭

維石蓀黃大公祖大人神羊一角丹鳳五文隸籍龍衛軍中漢 築宅雞籠山下候官 序其世德文章則江夏無雙代

有達人政治則潁川第一爰以蒼珮烏臺之峻秩出典黃



山白嶽之名邦五馬遙臨一麾出守黃滔本監察御史諫  
章卓著於閩南黃誥爲徽歛郡官謝表流傳於漢北三年  
考績賜璽龔黃之勲十月爲良移篆齊青之地於是合桃  
源之耆老效芹獻之野人將以抒下情頌德政焉禮也特  
是泱泱大海匪蠡見之能窮蒼蒼者天豈管窺所可測使  
翻瀾搖嶽鏤月瑠霞飾遐篆以挾張逞曼詞而修襮正恐  
文馳天口筆禿霜毫終爲毛舉之詞難逃目孔之誚蓋陽  
春有脚言德化者必究其原造物無心要端倪之有可以  
指準斯爲斷可得而言今夫棧樸作人菁莪育士東郡環  
園橋觀聽者萬西京增博士弟子盈千積分遞升宋行三

黟縣四志

卷十四

雜志

文錄

百七

舍之法因材器使唐定六學之門公乃化雨隨車春風入  
座廣招青年新進重拓紫陽舊居經義偕治事分齋安定  
授蘇湖弟子諸生與有司並勵昌黎作國子先生異日棟  
梁皆成國器此時桃李盡屬公門其可頌者一也若夫品  
裁甲令糾察寅僚非太史輜軒而採風同孔子微服而過  
宋閒逢野老聒話宰官術非漢代距鉤意倣兵家間諜用  
能秦鏡照膽如見肺肝心胸禹鼎鑄奸莫藏魑魅罔兩彈  
章再劾仍南臺侍御之餘威朝服三褫烹東阿大夫以警  
僞子民愛之如慈母寅吏畏如嚴師吏治風清官方澄敘  
其可頌者二也至若懸鞞衙前芟舍棠下盆覆天而冤雪



冕被露以觀風獄可折於片言明若見乎千里案無塵積  
簿書悉杼柚在心事必躬親胥吏無上下其手一二語平  
情論斷輒褫魄而驚心千百隊任意譁張終藏頭而露尾  
筆燦五花作判里巷編之歌謠獄成尺簡爰書婦孺聞而  
感泣鐵案則南山不動冰心與東海同清其可頌者三也  
若乃儒言墨行人面獸心有虎而冠如狼當路朋淫糾狗  
狐之黨節婦捐軀健訟喉鷓蚌之爭漁翁得利民之蠹也  
魯無鳩乎公乃孫寶嚴霜趙盾畏日拔薤一本郡人欲龐  
參之鋤強宗擊柱三周校尉捕張朔而襍奸狀懸蒲鞭以  
警衆庶威作稜芒拒關節而謝權豪膽如斗大三移郊遂

黟縣四志

卷十四

雜志 文錄

覓

褫佻達之青衿一登堂皇判淋漓之白簡凜凜然猶有生  
氣仍是鐵面無私落落然不徇人情自昔芳心獨守其可  
頌者四也他若令肅陶公禁擄菹豬兒之戲徒興太叔靖  
萑苻狗盜之風設警則更僕分防遺制若師乎采棒編保  
則按圖稽戶奸迹永靖夫綠林民教馴則水乳雙融羣下  
嚴則涇薪一束循聲鼎鼎衆口交稱政譜觥觥僂指難數  
擅佛子神君之譽來召父杜母之歌黃次公遷郡國長官  
仁政有芝草鳳凰並至黃道真入桃花源襄邑人之桑麻  
雞犬皆仙號六一翁良二千石宜乎功膺懋賞官報喬遷  
賜履銘勲懸車表績也已

桂芳

世居樵谷系衍篁墩受一



屢而爲氓託廣厦而庇土身不謁私室懷中之刺生毛足  
不入公門眼角之芒有鐵每見琴堂去職縉紳陳情漫爲  
頌莽之文胡天胡帝等諸自鄙以下無刺無非所謂隨波  
逐流卑無高論依草附木餘不足觀者矣孰若我公白鶴  
立羣彩鸞表質政聲則雷出地上治象如日麗天中雖夏  
禹莫與爭能常卑自牧仲由願無伐善不受人諛然而獻  
曝有心聞風起慕昔之人獻甘棠之頌繪瑞蓮之圖陳借  
寇之情歌思劉之句亦以愛留冬日恩報春暉凡在黔黎  
咸紓丹悃矧如桂芳者以官爲族本朱邑之卜居數典不  
忘望黃堂而念祖

郡志名宦始祖程元譚公爲新安太守子孫因而聚族焉黃積代元

黟縣四志

卷十四

雜志 文錄

覓

譚治郡

嘉靖府志黃積以晉大興三年到官代程元譚治郡後積子孫亦居於此地名黃墩孔融是

李膺通家公義私情合并交集用是條舉郭冲之事大放  
厥詞編署杜詩之堂傳爲後法桃譚千尺別意與此水俱  
長輪蹠一雙魂夢願爲雲而去並綴詩草聊代疏麻不盡  
萬千姑陳一二云爾

詔璽宣傳表海東黃堂太守五花驄嬰兒在抱離慈哺父  
老無端怨帝聰枳棘原非棲鳳地扶桑終徙大鵬風他時  
宦業銘鐘鼎此是當年第一功

使君此去鄭公鄉文物聲明任主張齊國官方推卽墨漢  
家吏治數龔黃侯封表海今猶昔叔度澄波那可量爲地



擇人人擇地大風終古自泱泱

穎上桐鄉勝事存此間宦蹟說黃墩公如孔李通家世我亦清廉吏子孫不是薰葭思倚玉須知葛藟本同根前緣後果思量久待到行時仔細論

淋漓濡染筆如椽閒把歌吟治譜編有道題碑無愧色郭丹署室紀當年識荆御李時猶昨鑄范圖雲見也憐後世重修名宦志徐詩寄璫集同傳

環山余氏重修族譜後序

程壽保

戊午花朝之後二日余君桂峯以其族譜告成而屬序於壽保乃得受而讀之不禁喟然嘉歎曰懿平仁矣余氏諸

黟縣四志

卷十四

雜志 文錄

三

君子之能敬宗追遠克彰其先之美也當元之季君家始祖環山府君與寒族均佐府君同時展轉遷居黟城式好無猜申以婚姻均佐府君之兄均保固余氏婿也以武職筮仕關中別成家室而嘉耦興怨焉壽保少時侍親賃廡臨章門內固與君族人比戶居也聞長老言米價石值五千君族則出祠穀以濟其宗稍長得見君族舊規卽君序所謂完養府君昆仲所貽之家法也約束整齊任睦之目燦然衆著輒慨慕至今不釋益羨祖澤之留傳未艾也先祖鄉賢府君與夢巖中憲論交都門先君又與君族先輩創辦鄉團重興書院君暨壽保復嗣其事迨壽保謁選而



以院事一畀於君別廿有餘年重晤滄桑之後徵諸輿論  
驗諸事實固完然信近而可復也聰聽夔訓抑何偉哉夫  
譜牒之學盛於晉唐肇於世本系姓旁行表上蘇歐則敘  
配儷疏子姓墳墓所在加詳而宗法寓焉舊譜距今百數  
十年君與族中羣賢躬任搜討勤劬編輯凡兩寒暑始竣  
既就正於前黟縣廣文陳君筱農之澍亦云慎矣至若君  
之列祖列宗碩行顯於朝襟於鄉者備載邑乘殫闡斯錄  
卓哉煌煌無俟僥言獨敬君之遵先德以勵後昆一洗多  
賴好閒之習人執一業爲閭里所欽式詩曰繩其祖武又  
曰聿修厥德殆庶幾矣尤願率時以往繼美無窮由誠正  
乎是爲序

環山余氏重修族譜序

舒斯笏

翳夫蒼昊演生生之象詳其系則有天官書黃河分浩浩  
之流導其源厥惟星宿海蓋萬殊雖隕本繫權輿而數典  
無忘責歸苗裔是以著離騷於屈子詞必冠以高陽歌商  
頌於詩人衍亦先夫烈祖來朝馬走周之盛肇自遷岐此  
地麟游漢之興原於徙沛瓜因縣而愈茂椒以衍而彌繁  
欲誦清芬先編家乘統宗旣著譜牒斯光蘇明允藉以別  
途人朱文公因之立宗法攷環山之余氏爲黟邑之華宗



姓協商聲系傳夏裔坦坦名賢之里代盡鳴珂循循孝行之門人皆折磬激揚悉當吏稱郇國之賢規畫皆宜邑有長城可倚麥畦瑞兆神人徵治化之隆荆樹花開兄弟合循良之傳宰縣則去思誌感齊家則古禮同遵遙溯前徽定昌後裔其先也因封塗而得姓其後也屢遷地而皆良義重宏微何分舍北宗傳李昉合任城西此江謚不敢競之華儕亦周敷所難求之簿閱也且夫蒼天鍊石黃土搏人倘舉九州萬彙之繁漫援四海一家之例謂圓顛方趾盡是同胞謂右穆左昭皆爲平等何以禮詳祭統曾載禘黃郊鯀之文何以周重宗盟猶煩簪絳獲麟之筆五世二

彰縣四志

卷十四

雜志 文錄

夏

千石鉞鏤何以成書七姓十二君金繩何以訂冊可知志名氏族歷朝則故事相沿不獨集號綵綸後嗣將美談永播然或者緬遙遙之令緒思渺渺之前光續修縱具深心列系無從引證李悉劉悉不知誰出彭城襄陽濮陽竟至見遺工部其甚者我雖欲門分而戶別人且將蔓附而籛牽或稱林逋第七世之孫或奉李耳爲一朝之祖或營求顯官援閔子以侈賢門或希冀告身引梁公而誇世胄冬烘騰笑誤認顏標秋水寓言妄尊泰始支離實甚瀆亂奚堪借我門楣通伊聲氣若非慎之又慎仍是編如未編體例蓋不得不嚴徵求又安能不備哉斯一譜也有數善焉



雖曰人爲詎非天幸秦灰燄冷尙賸遺經汲冢藏深欣逢善本一編周禮發諸巖壁之間數卷漢書出自葫蘆之內非賴祖宗之呵護早經兵燹之摧殘茲以書坊所得者作周行復以親屬所遺者備商榷爰資衆證迺集一家支派分明源流貫注等章編之三絕而孔子集其成如隋史之五家而鄭公綜其事先賢後哲郭淮之冠冕蟬聯持節分符長孺之孫曾鵲起此日懸諸通國僉云克紹前修他年副在名山爭欲見卿家譜笏才非鮑俊文豈班香慚庾樹之詞枯愧江花之筆禿幸同安國數言居書傳之前竊比卜商一序弁詩經之首貴族固遷鶯已久羣推鄧騭之宗

黟縣四志

卷十四

雜志

文錄

夏

鰥生將附驥以傳敢詡徐陵之作

余祝祺君五十壽序

程鴻詔

曩予居黟與俞君伯申善道光乙未邑試余君祝祺裒然舉首明年邑令換縣去祖於南郊始識祝祺儔人中旋別去咸豐癸丑軍興同理邑局伯申恂恂似不能言祝祺言論談笑風生四坐盡傾然處大事善斷定大難毅然不可動凡九年如一日伯申嘗自謂不及祝祺予則不及伯申遠甚予久防高漳羊棧嶺也機宜偶中然商榷於祝祺伯申爲多而祝祺之言簡明尤中要綦其籌局事洽鄉邦者勞更倍蓰於予且言曰不爲禍始不爲福先不爲利回不



爲威懾此吾志也伯申亦已謂然又其於師友昆弟親舊  
歡感一致存往不渝初終無二其文章爾雅每下一義鑄  
一字通人頰首然又不屑章句迂儒之學亦無門戶彼我  
之見存於心意之中故樂與之交久而彌歡今年予在湘  
鄉師幕欲效仲顏相贈處而十二月適爲祝祺五十初度  
予亦四十二矣憶南郊祖客時忽忽廿有餘歲歎日月之  
不居休修名之未立然祝祺之言行犖犖可名則固與年  
俱進因著而序之郵伯申墨諸屏以詞識吾祝祺者尋常  
醜酢頌禱之文則不具若夫疊荷保薦晉階州牧及子孫  
之蕃衍家室之偕老盈安未嘗非俗之所稱然非祝祺意  
已蓋其善於處禍福利威者貞之久而彌劬也已

余祝祺君六十壽序

惟天生才惟才濟世才未大展天必報以頤齡世正需才  
人皆願其益壽蓋有功於桑梓宜繫竿於松喬非如二首  
六身絳縣虛增甲子三山五岳黃庭徒守庚申也重光協  
洽之年嘉平中浣之吉余君祝祺六旬攬揆百福駢臻上  
相傾心隔歲贈丹楹之帖同人拜手先期製朱錦之屏僉  
謂談笑而經緯萬端指揮而弭定衆變莫若余君之才者  
夫豈常人所及哉憶自咸豐癸丑以來迄於同治甲子之  
歲潢池鼎沸鄉井鐘移繞三市而樹無靜柯守四鄰而郊



常名壘君主持練局籌濟軍儲延陵觀風原識衛多君子  
洛陽間俗固知周有富人但恐射乎之爭賢者不免澤也  
之竭魚則何依於是輯睦得人和以寬舒保元氣魯仲  
連排釋紛患元漫叟薄滅征輪遂使廉藺同車而成城禦  
寇陶猗安業而赴義急公其才之不可及者一也當夫旌  
旗日繞戈槩雲連或景昃而調銅符或宵深而傳契箭救  
兵似火端賴羽檄之飛馳探賊如風尤盼軍書之速達君  
晨揮千紙日答百函洞醜虜於目中走雄師於腕下復嚴  
斥堠知城頭子路之蹤更集衣冠過江左夷吾之燾其才  
之不可及者二也維時連營壁壘環境烽烟頻來大將之

黟縣四志

卷十四

雜志 文錄

夏

旌麾每見健兒之身手或假羽旄而不返抑索芻牧而難  
供凡如韓宣之玉叔魚之錦悉力持大體不避小嫌爭承  
則至日中登陴而弭火患其才之不可及者三也至如權  
船爲賦轉饒練軍月要歲會之書酌盈劑虛之法水恃源  
而弗竭滴必歸公河亦潤而無窮波還及晉莫不賴君之  
力成後善之圖始奮武而終揆文指流泉而掌雨寶百廢  
漸舉一紀於茲其才之不可及者四也今夫才由學而充  
亦以識爲輔君幼而神悟長更精思文成下水之船敏過  
姚洎賦有生花之筆艷勝江淹下一字而耆宿解頤出片  
言而通材頰首用能折衝樽俎不獨高步坵壇其才與學



之不可及者五也若夫鷹韞鉅定危疑朗如列眉洞若觀  
火覽三千餘年之史籍古訓爲師羅二十八宿於心胸慧  
光普照斷大事有如馮簡決羣疑不假靈著用能決疆場  
之戎機修鄉邦之志乘其才與識之不可及者六也况復  
才與德兼固宜福爲才報篤行則孝乎惟孝持躬亦醇乎  
其醇蓋自贈公亦梁丈累仁積善信義著於薊溪裕後光  
前徽猷垂於閭史君秉承庭訓丕振家聲是馬氏之五常  
白眉稱最看竇家之五桂丹蕊齊芳而且澹臺之徑莫由  
陳蕃之榻屢下單父敬而兄事武城歎其得人一言而庶  
獄平反秦寃盡洗兩解而羣情悅服芮籠質成其才與德

黔縣四志

卷十四

雜志

文錄

冕

之不可及者七也卽今奉龍綸頒鸞誥書名茂宰將露版  
之銓除待刺大州先冰銜之焜耀而乃雲懶出岫泉清在  
山不涉宦海之驚濤自饒家庭之樂趣中郎已游芹泮諸  
嗣並茁桐枝屢見蠡鳳之孫又抱石麟之子冠裳簪笏恩  
榮萃於門庭酒醴笙簧歡譙聯夫師友座多舊雨常爲杜  
老而來室有朝雲長侍端明之側其才與福之不可及者  
八也詔等忝屬心交欣逢耳順滄桑共閱幸大夏之重支  
椒柏同斟先立春之七日爲東坡而製曲文中日月常新  
伴南極而稱觴醉裏乾坤不老

世丈玉田江老先生七旬壽序

程士盈



封翁玉田江老世丈八旬開壽同學諸子囑盈誤言以祝  
盈考周王之言曰恭則壽孔子之言曰仁者壽子思言壽  
兼名與祿孟子言壽並德與爵夫若恭若仁壽之基也若  
名德若爵祿壽之華也今封翁躋大夫致仕之年享古  
人稀有之歲其恭其仁與夫名德之尊祿爵之榮實與所  
言相符合者盈請試言其畧焉封翁少時受業曾大父  
際虞公之門循循有規矩曾大父爲講析經史疑義輒多  
解悟曾大父恒誇獎於座人謂爲晚年高足迨曾大父棄  
養時以封翁屬門人孫文學養恬世丈養恬者經術文  
章冠絕一時封翁以事曾大父者事之而養恬世丈以

黟縣四志 卷十四

雜志 文錄

封翁有同門誼呼爲小友後養恬世丈捐館封翁從  
明經項先輩游弱冠後補博士弟子旋貢成均邑中名儒  
若文學公南士汪先生孝廉公理初俞先生大尹公卿五  
余先生孝廉公鼎初俞先生皆重封翁名封翁事以  
師禮時從講論退然與弟子之列由是益明大體先是  
封翁尊人俊瞻公善貨殖其諸父俊衡公亦曾大父門  
下十兩公皆以施濟爲心封翁承二父志讀書之暇兼  
講籌算以故賑貧周急不缺於推解咸豐癸丑粵寇踞皖  
會難民流入黟境封翁集都人士設立文孝分局籌米  
給賑每人二升歲乙卯都堂張文毅公督辦皖南軍事駐



節徽郡檄屬邑練鄉兵助剿時文孝局首設團並聯四六  
兩都互相友助事皆 封翁創始及寅申歲徽甯淪陷鄰  
境皆賊巢窟黟南一線孔道難民麇集 封翁囑弟紀雲  
斗南步雲德輝商同先君子施粥於柏秀亭日給數百人  
自十月至次年三月計所費薪米 封翁家最多 盈嘗備  
書其事邑侯採載縣志 封翁初爲辭章之學自列成均  
專廣體用聞出師友淵源課其子弟雖值兵戈擾攘而環  
溪書舍中呶晤聲恒不輟自江南底定後其季弟贊卿以  
廩貢官廣文次君毓山暨猶子作梅宇功獻之晚蘭立之  
先後列黌宮食廩餼十年之間已七八人而繼起如囊中

黟縣四志

卷十四

雜志 文錄

三

錐網中珊者又復林立芝蘭玉樹叢生庭階實 封翁之  
翹楚 封翁初以團練功得優敘辭不受又遵籌餉之例  
踴躍輸將其應得銜秩俱讓子弟爲仕進階 封翁恬然  
樂以明經老其弟玉輝慨然曰自先嚴見背家事皆兄處  
分今弟子翹然多致通顯俾祖父膺 誥贈光泉壤皆兄  
教也顧兄頭銜未新仍與諸生齒無以自耀不稱令德於  
是聲於大部請以本身四品 誥命讓 封翁卽今職總  
之封翁尊師重友是其恭也急公恤難是其仁也訓子弟  
以學業顯於時名孰大焉身膺上大夫之封爵莫榮焉夫  
若恭若仁壽之基也若名德若爵祿壽之華也就封翁之



行人封翁之年由是而躋耄耄宜也享期頤理也仙時盈  
請與同學諸子扶鳩杖稱兕觥借 翁家諸郎生花之筆  
摘藻揚芬大放厥詞更爲 封翁介百齡之壽

余母程太宜人八旬壽序

胡元吉

壽序非古也濫觴乎宋元而極盛於近代稱功頌德累牘  
不休論文體者又謂人生積日以成年至耄耄期頤特累  
日較多非有奇特不可幾之理胡序之爲 元吉 以爲二者  
皆非也年壽者天予人以立身進德之程也自垂髫以臻  
耆艾歲月遙遙由今日之康強逢吉以溯生平所歷棲枯  
棲苑往往有悲喜交集不憚縷述以爲子孫儆則者年高

黟縣四志

卷十四

雜志 文錄

三

德懋福報攸隆所憑愈高所履愈厚則其所可述者愈大  
此禮經有乞言之典幽雅詳朋酒之文壽序雖不徵於古  
然不防以義而起必詞而闢之不幾於隘乎己未十一月  
二十八日爲黟縣商會會長余君履莊之母程太宜人八  
十設悅之辰同人以 元吉 歸田以後閒嘗賣藥於市固亦  
受屢爲氓之人且於余氏爲世戚深知太宜人懿行請  
撰文以爲之壽遜謝不獲乃論於衆曰 元吉 讀周禮每嘆

近世設官之疏古者一市之政有司市以專其官又設質  
人屢人賈師肆長等以分其職凡所以通貨賄平市價止  
爭訟禁暴客者各有專司故商賈皆願藏於市焉今皆無



之惟寄其責於商會會長秉承於邑大夫而已誠哉其難也黟雖僻陋固亦數百年之市又值有事之秋履莊君自任事以來風鶴之警鼠雀之爭多藉以維持市人歌詠其德莫不追美於太宜人內教之良雖年登八秩精神強固步履輕翔上觴之日而履莊君夫婦年俱六十曾孫秀發融洩一庭家門興盛可謂享人間之備福矣又聞太宜人雖居名門大宗而待妯娌族黨以至嬖婢乳媪皆溫恭慈仁篤於爲善遇鄉鄰之貧乏顛連者往往節衣縮食以濟之而不欲人知純德如此宜其仰邀天眷長享高年而蔭及孫曾也八十生辰可述者彰彰如是更晉而大耋而期

黟縣四志

卷十四

雜志 文錄

三

頤其揚諸楮墨頌諸鄉閭更復何如

元吉

不文無以稱祝

請履莊君以此誦於太宜人之前當必爲之首肯莞爾爲盡一觴也至山阜岡陵流俗頌禱之語皆畧而不陳亦以質諸當世立言之君子云是爲序

江母孫太宜人六秩壽序

翰林

關耀南

桃源有種蟠根開瑤島之花瓜壤縣庠勁節挺富春之竹萃精靈於地脈葆貞固之天真壽攷維祺諸郎毓秀觴稱曼福釀從休映之廬萊舞層階輝耀文通之筆闔室拜天邊之露 寵榮咸迓夫 君恩黟山有林下之風樸厚式遵乎母訓如 誥封宜人江母孫太宜人乃瑞芝昆仲



之壽母也人稱尹媿派溯樂安懷女誠之七篇肆公宮之  
四教和含玉質曾吞女史之花巧奪針神善製天孫之錦  
儉惟守夫荆布動輒中乎規繩每懷激石家風珍明珠於  
在掌適字挽車孝子納采幣而齊眉其歸我德輝贈公也  
充玉璵以來嬪續琴絃而在御舅姑早逝謹薦蘋蘩賓客  
臨門勤陳酒醴渾忘異乳之雛撫二女無分毛裏共作營  
巢之燕致一鄉雅慕慇懃無何白雁譁傳紅羊劫至歎流  
亡於滿目憫窮困而酸心餓有翳桑爨虛曲突 贈公出  
泉刀以賑恤 太宜人亦脫簪珥以助勸應星象於玉井  
天樽相基爲厰造福田於楚養宋衍坎地理鍋半稔於斯

黟縣四志

卷十四

雜志 文錄

三十四

保全者衆而且寒憫無褐嗟冰上之凍蠅掩僅做帷哀道  
旁之遺蛻旣施衣而施櫬亦贈笠而贈薪甚至體恤入微  
慈悲在抱拯窮氓於涸轍助以謀生憐婉嬪之無家爲之  
儼厲以及善書廣塌義塚新增嶺重修夫馬金資又惜夫  
蚩串凡 贈公婆心棖觸皆太宜人贊力居多也 贈公

讀貨殖之書羈蹤江右議田房之置設塾里中竟有願而  
未酬倏歸真而棄養時則稚鳳冲齡孤鸞矢志首簪蒿而  
淒楚心集蓼以綢繆措置咸宜鄉鄰取法姻婭都羨厥德  
妯娒從無閒言課讀挑燈五夜食和熊之報擇師振鐸兩  
郎騁繡虎之才 長喆嗣瑞芝星應天厨鬻宮食餼 四



詰嗣華芝聲蜚庠序類沼揚芬 遐之蘭之兩詰嗣剿皆  
納粟成名聯芳國學近 蘭芝以急公好義加二級賜封  
於 遐芝仲兄盛稱陶侃有名非此母不生子待卜江湛  
爲政能壽世愈能壽親茲逢春仲喜做壽筵耀寶婺之一  
星動歡聲於闔地滿庭珠履爭介祉以擎觥一曲霓裳共  
登堂而侑筯 曜南 情殷放鴿跡阻趨鳧祝老壽其期頤劇  
慕榮葵垂蔭聽好音之入耳報來寸草春暉况隔幔選才  
兩射屏而中雀會館供樂六取竹以名龍簷前則絲裊綠  
楊永護恒春之樹堂下則豔舒紅杏定開及第之花釐祝  
九如羨此日競抃嫩頌起居八座卜他時再荷溫綸

胡徵君壽母圖敘

合肥 李國松

國松往客安慶因吾師桐城馬先生獲識黟胡君敬庵知  
其君子人也別六七載未嘗一通問舊冬以集虛草堂叢  
刻致君君大喜復書盛言隆師親賢之誼且引湯文正公  
之事夏峯尹孚元之事望溪相勗勉國松雖不敢任然以  
是知君不猶自爲君子其於交友皆古誼也今年夏君母  
孫孺人年六十矣君爲壽母圖而倩其友朱君師轍爲之  
敘以徵詩文書抵吾師雖以國松之不敏亦與及焉吾師  
夙有壽言之戒因以命國松謂不可無言蓋君未生而父  
處士君歿時孺人年廿一以舅姑老而身有娠欲綿一綫



之嗣忍死自守逮誕君鞠育彌勤稍長命受業同縣程先生朝儀程先生固長洲朱豐芒先生高弟子也又因程先生知興國萬先生斛泉開堂講業裒然儒宗大師孺人節縮衣食不遠千里恣子從游君遂慨然有志宋儒義理之學名日有聞其後于公蔭霖趙公爾巽同時涖皖銳意興學召君爲敬敷書院學長於是才雋雲集皖學彬彬稱極盛矣及于公撫鄂撫豫君皆隨入幕庚子之變兩宮西狩時事岌岌河南當四方衝君聞孺人疾馳歸省視至則孺人怒曰于公賢者也汝事之得所主矣且于公遇汝厚而汝唯私是便吾誠不願有此不肖子君悚息請行于公聞

之嘆曰賢母也于公罷官後君歸安慶爲高等學堂教師而趙公督兩湖朝廷下詔求才復舉君以應故海內士夫知君之賢者益嘆母教之有素焉黟人士旣以孺人節行聞於朝得旌如例君念母氏劬勞之苦今復因晉祝之辰思託文字以彰顯之吾知孺人下撫賢子而回憶處士君之歿歲月遙遙其必有悲喜之交至者矣昔李二曲嘗謁顧亭林氏求表其母節顧謝不作以謂文必關經術政理之大若一人一家之事不足爲也李不以爲憾卒成關中大儒而其母亦遂以不朽今吾師與君交誼不讓顧李又於君父處士君之葬嘗有述矣則今茲之靳於文非獨夙



戒之不渝也亦古君子相厲以實之微意也與國松敬述  
斯指以質於君未知其有當否也

募建丁二公祠啟

姚宏甲

蓋聞惟戰止戰功莫大於活人知恩報恩事原存乎在我  
是以西蜀崇武鄉之廟南陽泣羊傳之碑燕齊海疆立樂  
公私社駱越蠻土構新息生祠大抵有功德於民享馨香  
之報我聞在昔創匪自今若乃諸父諸兄我疆我里幸免  
紅羊之劫實叨汗馬之勤感此鴻施天蓋高而地蓋厚敢  
忘蟻報春曰禰而秋曰嘗當同治建元之二年正曾相去  
邠之三歲湘江敗潰之寇鼠竄新安徽甯遷避之民麇集

黟縣四志

卷十四

雜志 文錄

三

漁市當是時也我旅星稀寇來蜂擁欲圖堅壁則銅馬之  
勢方張欲請援師則紙鳶之飛莫及鼓有聲而動地民無  
泣以呼天我老湘左營總兵丁公長勝後營副將王公明  
輝張許同心韓彭倚角田橫壯士只五百人萬福威名勝  
十萬眾設疑兵於齊雲山下安陷阱於藹岡田中如張網  
羅問赤眉其安遁遂摧山岳擒青犢以成功有淮陰背水  
之奇陋文遠斷橋之却威震萬里擒賊擒王福庇一方如  
天如帝將軍真泰山可靠吾民當飲水思源迺者事隔數  
十年不乏口碑之載澤流億萬戶曾無廟貌之修於汝安  
乎何其恕也用是謀集眾力議建崇祠推崇德報功之心



切臨上質旁之願大成大而小成小尙難預定規模道可  
道而名可名要表非常功績嗟乎汪越國奠安宣歙功散  
見於六州張睢陽翼蔽江淮事已更乎數代我都人士猶  
切奉崇况茲溺仰手援恩皆身受桃源雞犬長安世外之  
天樵谷人家免作溝中之瘠念此恩與此德皆親見而親  
聞知必踴躍解囊共切青鳥含環之報行看經營不日允  
符黟民好義之稱倘蒙概許同情請各隨緣酌助謹啟

募修漁亭石橋啟

光緒癸卯春月

程朝儀

竊以改木梁爲石梁原期槃固聯永濟與普濟必溯由來  
惟昔有好行其德之賢豈今無踵美於前之舉既嗟醜壤

黟縣四志

卷十四

雜志

文錄

貢

應事興修邑之東南漁亭鎮地當七省通衢水值百溪總  
滙曩以橫流之秋曾建徒杠繼緣利涉之資聿更華柱虹  
腰左池楊善人發之於先雁齒右排孫明府培之於後儼  
東新西新之並峙洵上便下便之交稱乃因暴漲爲災旋  
致長霓復墮有胡通議擬古陶朱爰出巨資更籌良計合  
二以爲一仰蕩蕩之爭趨先易而後難瞻峩峩之益聳從  
此鯨波永靖熙來攘往亡曳輪濡軌之虞其如鳳紀迭更  
朝圮夕傾漸負笈擔簦之慮經百廿年之久謂宜舍舊而  
圖度三十丈之長欲得維新如願舉廢修墜貴在工堅量  
高測深將毋費鉅然以今方昔誠知獨力之難而由少積



多尙冀衆擎之易所望愛施在抱樂善爲懷凡我士商量  
予飲助廉泉一勺新使君犀帶早捐義粟千鍾諸君子狐  
裘同集要使濟川有賴僉傾心而通仁政之平庶幾憑險  
無憂咸駐足而企德流之遠謹啟

漁亭爲數省往來通衢河道寬廣數十丈舊有小洲砥中  
流分河水而爲二兩岸皆有橋跨渡中洲西岸架木爲之  
其東則有石橋名永濟久圯乾隆二十四年邑人楊君捐  
金二千數千兩爲之倡建復之二十七年知縣事孫公維  
龍捐俸並勸邑紳士樂輸於西岸亦建石橋名之曰普濟  
與永濟並峙五十三年蛟水發中洲廬舍漂沒兩橋亦圯

黟縣四志

卷十四

雜志 文錄

三十九

壞西遞胡君學梓重修之接二橋爲一橋總名漁亭橋歷  
今近百二十年中更兵燹石欄十圯八九行人稍不慎則  
傾跌隨之甚有殞命者竊思建橋所以利涉今雖未至病  
涉而傾跌時聞亦庶幾與病涉同等緣是重謀興建庀材  
鳩工費用不貲特請踴躍輸將助成善舉庶楊胡二君倡  
美於前諸君子繼美於後以垂芳於悠久幸甚幸甚

姚君懷箴百家姓考系序

皖南 周學熙

古者姓氏掌於官而淵源易辨後世姓氏傳於民而統緒  
難稽蓋古者天子建德因生以賜姓若神農生於姜水曰  
姜姓黃帝生於姬水曰姬姓舜生於姚墟曰姚姓之類是



也其不得賜姓者則有以國爲氏以邑爲氏以官爲氏以謚爲氏以字爲氏又有以名爲氏者則其後推其所自出而氏之氏之變例也嘗考其故封建之世爵土官祿得相沿襲故生其間者恒以保姓受氏以守宗祊爲克家之令子是以晉范宣子告魯穆叔曰昔甸之祖自虞以上爲陶唐氏在夏爲御龍氏在商爲豕韋氏在周爲唐杜氏晉主夏盟爲范氏此其以氏族自矜者也若庶人則無字無字則無氏無氏則不能自成其族第爲氓隸爲戶口以故諸侯盟誓之詞每要以墜宗殄氏不得與列爵齒耳然則古之姓氏其關於王者治天下之族制顧不重哉秦漢以降

封建法壞官失其守姓氏亦滋紊迨南北播遷禍變相尋於是黃炎之世胄多更其本宗而華戎雜處又多冒中國姓而支分派別益不可究詰因是講姓氏學者殆以納音屬之又詳其遷居之地一以某郡別之俾同郡異姓異郡同姓異郡異姓同系者不相混淆若元和姓纂風俗通通志通考諸書所載雖未必悉合而先王賜姓命民之遺制猶可得其大要謂非學者所宜究心乎百家姓一書相傳爲宋人所編故首國姓閒有挂漏後人輒隨時羸入自士夫至於樵牧幾誦習之一民生日用之要典也吾友黟縣姚徵君懷箴三餘之暇因元和姓纂諸書人不易讀乃取



是編原文用爲字首別爲四言而詳詮於句次名曰百家姓考系使古今姓氏之沿革可一覽而知讀是書者益穆然吾中國神明之胄裔綿綿翼翼至於今日而有以動其數典無忘之思也豈曰小品云爾哉

李輝亭觀察七秩壽序

許懋和 質人

夫生有所自來故多壽必屬神仙之裔德有所當得故延齡實由陰騭之功上溯古初歷觀載籍書藏亦笈五千言道德開宗人在青城八百歲容顏不老笙歌繞樹鄴侯彰鏤骨之奇鑪鼎生雲孔日妙鍊形之術膺茲長命役使金童凡厥羣真姓多木子然必廣恩博愛利物安人趁年卅

黟縣四志

卷十四

雜志 文錄

三

六旬本務餘閒法佛家十二種因緣布施乃得名標縹簡居儷丹邱和神而氣象恒新駐景而相羊泰適蓋天仙之一千三百善以漸而行斯人世之七八九十年不復能限也懿維輝亭仁兄先生觀察大人庭堅系古隴右族華葉茂枝繁仙李根紆榮最遠地靈人傑小桃源鍾毓特隆水經注內之博山近隣衡宇貨殖傳中之端木得此替人亶觀夫皖水運籌樅山播譽遷義安之鉅鎮抒幹濟於瀾溪駿業丕宏億則屢中鴻才聿展和而不同流通九府之圖刀運轉三江之鹽筴黃紫標帙翼往復十萬貫一紙風行白黑色虎形崢嶸四千里廿艘雪散勝鑿山之卓鄭導源



而又暢支攷煮海於齊吳便民而先裕國平歉豐以質劑  
左爲發而右爲收啟揚豫之肆塵注乎茲卽抱乎彼至其  
視端容睟心廣體康遨遊常挈友生動靜胥饒樂趣飲嘯  
水酒黃嬌白墮以俱酣花愛山茶紫姹紅嬌之悉植選勝  
徧東西之境遠行周南北之郊廿四橋屢訪遺踪三分明  
月十二院閒尋舊址雙漿清波津門之風雪迷離滬瀆之  
雲霞變幻龍驤營畔頻叩石鐘鳩茲江邊時乘畫舫近復  
登鶴樓覽鸚洲而返怡騰介兕觥擘麟脯之歡說者謂其  
富有也其超乎人者才之優也其寬閒也其賦於命者福  
之懋也由稟受之資獨厚廼康疆之券堪操而和則更有

黟縣四志

卷十四

雜志 文錄

三

進者焉今夫壽之義爲酬酬者報其丕績齡之文從令令  
卽善之別名苟非令德之殊常曷望酬庸於彼吳伏諗觀  
察敬宗尊祖葺基建祠迎養靈椿旅處潔蘭陔之膳綏成  
葛藟咸亨妥椒實之蕃合南阮以延師阮膏並繼效北邙  
之葬族馬鬣親封飲助嫁婚仿范相卹賜之例但諳書算  
皆陶公器使之材至如道柏弦嫺鄭黃葉出以及杜田舊  
戚賈孟通家罔不明析秋毫周其乏困不啻恢宏夏屋庇  
此孤寒其敦本也有然若夫開東閣以留賓比西京之置  
驛或班荆道故歸生逢椒舉之車或拔茅彙征馮煖入孟  
嘗之座或春風振袂共希杏蕊之舉或秋月揚輝羣作槐



花之踏裏蹶饋而長安居易三載代儲過夏之糧鯉尾燒  
則建業宴開萬間早闢翹材之館雙眸電炯預知岷玉丰  
裁一騎星馳迅報泥金姓字且也元禮以鑒衡自任門庭  
有八及名賢平泉之花木都佳講席盡一時俊又允偕宗  
秀並永芳聲其好士也有然爾乃助鑲報主因利惠人繭  
織同功湯煎續命興孤兒之義塾筆墨分頌憫嫠婦之清  
操米薪迭給其或弓隆肆暴眾幾爲魚抑當旱魃爲災民  
靡有豸爲粥食餓挾溫禦寒流氓獲匏繫之安土著泯萍  
漂之苦鳩形目覩澤旣旁敷雁足書來求無不應砥平矢  
直羊腸闢百里而遙蹟古橋長壘背復千年之舊解兩家

之爭競丸弄宜僚聞幾處之歡呼券焚薛邑賢愚共見觀  
縷難詳其博施尙義也有然他若鄉關肄業之區助膏火  
則裒然居首夙昔舉比之士統遐邇而敬之不衰請崇祀  
於宿儒搜遺書於故里鄉大夫沒祭於社增重枌榆老名  
士博學於文廣鑄梨棗廿四史汗牛編富重價購求二百  
年繡虎才多全集畧備六朝日錄敬謹虔藏萬點露研句  
章析讀聚三十車於高閣將俾壯武以流觀列九千卷之  
標籤悉付長恩以典守加以愛聽古事知酈生對韓魏之  
非兼能問難奇文譬陸義索瑯琊之解其崇儒嗜學也又  
有然然則酬勞酬功出於天多壽乃不誣之理令邑令儀



稽於衆延齡洵自致之祥作平地之神仙所生無忝積如山之陰隲厥德聿修蒙庥蓋有由也晉祝不爲諂也今也開七秩之華年值百花之生日木公金母舉鴻案以齊眉驥子龍孫和鳳鳴而繞膝僉云瑞命總集當茲春景方暄曰老曰耄日期頤胥由此肇式飲式食式歌舞亦固其常而觀察獨以爲損則有餘謙乃能受客喧宜避不妨有託而行器有難盈待納無窮之祐信如斯也將見恩疊碩夫鸞誥躋柏署以游蒞薇垣蘊貞世兄藉已註夫鵷班折桂枝而直登蓬島僧綽公雅戲鳳蠟而芸冊淹通燕姑葛羸賡益詵而蘭徵載兆勳勛之後勛助齊年玳瓊偕生琪圭

黟縣四志

卷十四

雜志 文錄

重四

已壯本一心之慈惠迓百福以緜長皆得見之弗可及已

和 孱軀周甲漫詡長庚蹇運類丁愈懷知己猶憶蕭條北

上宋贖曾叨暨夫罷耗南歸郭臺竟築進以禮而退以義勢相隔而情相親譚讌仍殷徽猷默識念當日身依劉表不興舉翼鳥之思矧去年詩詠微之渥受夜飛蟬之贈仰行誼實無儔匹鶴算當增欣掄揚尙有毫翰駢詞特綴謹綜實事同賦大言祝籌添而紫氣常瞻知壺投而碧翁亦笑似夢得君家妙筆遂成飛花結蕊之章試更繙吾祖說文爲篆嘉福長生之字

祝姚君澧珊先生七旬雙壽序

汪述祖



歲辛亥五月十四日爲姚太封翁七十之生辰次子百純  
廣文時肄業京師法政學堂將歸而奉觴請文於余憶余  
總角時奉先大夫如漁亭見先生漁亭鄰接我邑先大夫  
歲數往返先生亦時過余家嘗爲我道其家世今忽忽三  
十餘年矣余髮漸白聞先生尙強健如壯時其長子小珊  
巡檢官於閩去歲往視道武陵尙過余季之館寓書於余  
波折曲伏不類老人書也先生自補博士弟子員數不得  
志於有司就聘司會居漁亭數十年諸業鹽者翕然稱之  
嘗與同里余桂芬廣文善鄉之人有事必就二公陳曲直  
事輒解每邑中有大役集民財得二公倡輒立辦云家祠

黟縣四志

卷十四

雜志 文錄

三十五

燬於兵亂平先生歸議新作竟底於成居家以孝友爲教  
有弟早歲卽世先生撫諸孤爲之婚嫁視如己出有姊氏  
賢而寡無子抑鬱於中先生時有餽遺且爲立後配金太  
恭人治家勤儉雖年邁猶手鍼紉不輒子孫衆多而又同  
享高壽積善之報也先生之行莫如予審故書其所知以  
示賓朋來者夫壽誠有必得之道有可養之術惟此所致  
者同而所以享之者或異是以古之先覺有視爲辱懼之  
地獨至好善君子天既有以報之必將有以樂之先生之  
二子仕學於外方孜孜然日求其所以益進者天之錫先  
生壽其使先生得以觀二子之成也歟



舒維漢族兄母堂清封孺人汪太孺人八旬壽序

舒斯笏代

蓋聞九五福曰壽陳疇垂上壽之徵八千歲爲秋舞綵屆  
中秋之節西河女子德冠銀臺南嶽夫人班儕玉闕瞻綠  
鬢朱顏而日茂福祿攸宜問翠嬀元扈之年華疏提有紀  
是以延年美意荀子曾著爲文益壽宜家易林預占其兆  
况乃淩寒之貞木節早重於枌榆益徵不老之靈萱齡永  
齊夫松柏陵親卓識懿範風高侃母居鄉壺儀日永宜乎  
蕭陳結綬舉頭來觀寶婺之光管鮑摠衣傾耳共聽靈璫  
之奏歲在戊午夏建某月某日爲舒老伯母汪太孺人

黟縣四志

卷十四

雜志 文錄

三十六

上壽雖設悅之良辰已過而同袍之祝嘏尤殷爰占八月  
之良補作千秋之祝時則護庭晝永栢館秋高冠佩輝煌  
簪裙絡繹桃開千歲爭誇王母之花桂實三秋羣拜嫦娥  
之樹梓舍則雙株濯秀欣蘭芷以同升蓀枝則一卉先榮  
卜萌芽之繼茁筵張玳瑁酒釀玻璃集三代以臚歡眞一  
門之盛事鋪揚疇昔資宓娥拊瑟之歡詮次艱難博天姥  
投壺之笑維老伯母生玲玲之名門樹珩璜之令德花  
開姊妹五鳳同枝曲奏堦簾三龍繞室于歸吉水披內則  
以曾嫻作婦屏山佐外庭而必肅循循師氏媿媿碩人璇  
扉永奉爲女宗珂里咸欽其闔德其尊祖也則蘋蘩昭其



潔其持家也則荆布飭其儀其事姑也則孝養致其誠其濟世也則慈仁徵其愛相夫盡禮同賡弋雁之章與子言慈並肅九熊之教匝月得四十五日鍼可通神匹絹無三數兩絲織偏稱巧釜魚門雀洵巧婦所難支女布男錢得賢親而咸理寢門之內治其業辭孟德曜之鉛華下戶之輪散其家媿劉夫人之仁惠如斯素行永播彤編且夫由困而亨處之者其機常順由豐而窘安之者其勢良艱老伯母幼處蘭閨長歸華戶以無愁之嬌女爲作苦之勞人調厨下之湯菜羹致敬翦園中之韭菽水承歡藜藿能甘其歎梁鴻有婦萊蕪自適安知高鳳長貧隨所遇而皆

黟縣四志

卷十四

雜志 文錄

三

安樂其天而若素此其難一也假使時非板蕩運不屯遭商量豐歉之間黽勉有無之際年年耕饁自可分冀缺之勞日日糟糠亦足佐宋宏之志而乃紅羊釁起青犢妖來烽烟罹匝地之憂兵燹造彌天之劫卽君遠賀時方寄跡於江西季女斯飢孰不憂心於門北 老伯母沉機應變運智如神當茲家計之艱益見支持之力櫛縫筭而下拜鮑姑之井水常溫沾蔬菜以爲炊董奉之園林益茂此其難二也又使甌縱生塵室如懸磬風雨或一椽可蔽雷霆或百里無驚呼天但求萱室之安避地亦得桃源之樂而乃初則流離之可歎繼則轉徙而靡常篝火狐鳴家家飲



血風聲鶴唳處處皆兵 老伯母親侍衰姑猝逢劇寇忽  
聽一聲之斷喝豈容數語之支吾身被七創氣存一息忍  
痛覓刀圭之藥難中之辛苦誰憐裹傷籌珠桂之供堂上  
之旨甘無缺此其難三也或者年遭凶歉既曾備受薪勞  
身歷艱危嗣後或多蔗境全家庶漸臻平順無病亦何愧  
神仙詎知日瘧纏綿竟厄三年之蝸繼以風痺淒楚幾同  
一足之夔威姑遽棄人間夫子旋歸天上茹荼不少集蓼  
何多 老伯母壘以當門辱焉持戶兩丁大故傷哉婉婉  
之舉魚一例窮愁痛矣淒涼之別鵠內棺外槨值倉猝而  
皆周女嫁男婚益咄嗟而立辦此其難四也至若智深先

黟縣四志

卷十四

雜志 文錄

三十六

覺古傳善果之慈親性本真誠今鮮駱牙之令母 老伯  
母解紛排難推女界之魯連講禮修儀作族中之馮燎論  
曲直是非之所在準理爲衡統慈祥愷惻以兼施憑公作  
秤巾幗具鬚眉之氣珠璣收咳唾之功衆曰惟賢僉云足  
式此其難五也又若嗇於奉已豐以待人豈有懷清巴婦  
之臺亦無珠斛夫人之寶 老伯母解推願大苦在荷心  
贍給情殷甘分樾蔭錢刀散處輸六姻續命之糧釵鉞拔  
來舉九族同功之火布比閭之陰德如耳潛鳴修道路之  
危機將心比直此其難六也是以人皆高其懿行天亦佑  
此善人麻姑之氣色常春邠母之神明愈健宜男有草雙



珠並耀於蕪城生女如花片玉應歸於蕭史壽而兼福子  
又生孫仰賴佛心延茲家慶斑衣粲錦歸來開八秩之筵  
仙醴流霞懇款祝千春之算某等獲交玉樹共契金蘭夙  
企春暉叨居晚輩緬郝鍾之闔行心寫難忘聆任姒之徽  
音耳聞已熟或占吉日而誠抒奉爵或望 慈雲而目送  
飛鴻延壽宮開長生館啟玉衡絢彩李星競指夫遙天金  
鏡春輝桂月怡懸於上界綜計一生之苦節徵則悠遠博  
厚則高明定躋百歲之遐齡身其康強子孫其逢吉此日  
杯銜西母謹濡毫而揚彤管之芬他年算衍南山當側帽  
而效朱輪之捧敢陳椒祝藉侑芝觴

黟縣四志

卷十四

雜志 文錄

三九

葉蔚華先生暨舒宜人像贊 并序

黃啟蓉

公諱蔚華姓葉氏葉爲邑望族代有明德公少孤事母以  
孝聞幼習儒業嶄然見頭角旋爲甘旨計改習計然術初  
貿遷屯溪繼至武穴整理舊業義利必辨有古君子風年  
念四賫志以歿淑配舒宜人聞訃痛不欲生然念上有高  
堂下無繼嗣不能不勉留一身以奉二母以延一綫含辛  
茹苦其勤至矣其撫繼嗣如所生營喪葬而盡禮樂善好  
施六族以賴非所謂巾幗而丈夫者歟嗣子抱齋以畫像  
命題敬爲贊曰早歲習儒富縹緲琢磨道德發奇光中更  
世亂辭故鄉牽車負米謀稻梁厥配曰舒淑且莊嗹嗹鳴



雁相翱翔秋風吹折雙鴛鴦藁礎夢斷洗紅妝上有高堂  
兩鬢霜下止弱女纒扶牀欲死不死心旁皇孤燈耿耿淚  
盈睚寡女之絲織七襄偏絃獨奏叶笙簧以妥先靈肅烝  
嘗以教嗣子嚴義方嗣子肯構復肯堂壽母期頤樂康強  
前沈後揚理則常矧爲作善有餘慶畫圖展拜集冠裳傳  
之奕禩揚芬芳松貞而壽孝荀香南屏山色鬱蒼蒼

姚中憲澧珊老丈暨德配金太恭人八旬壽序

休甯 汪德光

清帝遜位之歲五月姚太封翁七十生辰喆嗣伯純遊學  
京師乞文先吏部以歸爲先生壽今十年矣夫唐虞之世

黟縣四志

卷十四

雜志 文錄

三十一

其民雖壽百歲不識不知二典而外幾無可記之事及至  
五代五十餘年之間歷姓五君十有三夫舍其耜婦失其  
蠶雖當始衰之年而迹其所躬歷若有深於中天者故余  
謂先生之壽自七十至八十歷上古訖明清世變之亟未  
有甚於此時者也十年之久視前此七十年有過之而無  
不及是先生雖壽八十而固已得百四十矣己未之夏余  
遇先生於屯溪往來酬酢談色之間甚強健今歲筱珊伯  
純兄弟以事如歙還至屯溪余屬長休甯商會偕來訪又  
以文壽先生相屬余惟先生之行先吏部序已詳小子何  
敢贅焉且曰改朔以來於茲十載世異事殊變速革亟紙



不勝書史不盡紀先生之壽如南山比先生之德恒久若始剗前之說則先子不可欺爲今之稱則先生不可誣執筆而埃二子將何以啟吾乎曰昔西伯瘞骨以行仁陶公運甕以習勤家君昨歲逍遙乎漁川之濱感彼不葬狐蠅出沒遂買青山盡埋白骨牒於有司毋踐毋發容膝旣安更拓池園菖蒲松柏益植滋繁暴風烈日朝陳於軒暮運齋外雨露以沾老母知書未嘗自娛坐猶執鍼行時荷鋤斯皆近事使君之文不虛余應曰唯唯退而序其語以進先生先生讀之將嗑然以喜

王翁華甫先生八旬晉九壽序

姚宏甲

黟縣四志

卷十四

雜志 文錄

三

蓋聞稟天地剛方之氣其道必光執聖賢強毅之操其學必固是以周易占不息而推其本於自強中庸論至誠而究其徵於悠久浩然者能充其體粹然者自固其神綜先哲之名言驗後賢而益信恭維世伯華甫王先生孔門剛者史魚直哉皓皓見於鬚眉巖巖昭其氣象雁行序齒黃石不敢爭兄虎觀談經伏生猶稱後進蓋明年歲次癸亥先生壽兆期頤都人士詢謀僉同歡欣忭舞將以上人瑞之頌博長者之歡誠盛事也惟是毛舉細故或貽蠡測之譏語戒鋪張庶合奚斯之旨則如紅羊劫後青衿賦初同道皆攘臂以企魏科先生乃悉心而端蒙養良以蛾賊之



禍幾教海宇崩騰而烏合之徒要皆椎埋惡少毒流家國  
過在父兄倘早端以聖功何至流爲匪類故先生教興槐  
市化比杏壇其樂育聚乎英才其功效關乎世局迄乎經  
師名著物望羣孚及門方共仰師承閭邑乃亟思借重蓋  
邑有碧陽書院者乃曩時博士弟子月課之堂而今日高  
等小學日講之舍也夫人才之盛衰關乎學校學校之興  
廢係於財源書院當年集捐原不豐而不儉後人因事應  
付實匪易而匪艱先生仿周禮之理財任宣尼之會計預  
算宗泰西成法要令贏餘當官責張博風速不徇故舊用  
能日積而月累頓教繼長以增高此所以歐化東來幾度

黟縣四志

卷十四

雜志 文錄

三三

易乎學制而青年學子不至輟乎絃歌也昔王判請錫慶  
之院廣惠生徒文翁看省府之支厚遺博士古今相較先  
後同符固不徒臨書摹書心正筆正瀉毫端之雷雨走腕  
下之龍蛇足遠追草聖之楷模而永爲士林之矜式矣若  
夫君子之道造端乎夫婦詩人之教嚴別乎貞淫蓋多露  
不致其譏則世風必滋其患乃有妖婦出自本宗冀盜松  
貞柏勁之裘藉掩濮上桑間之迹先生性原方鯁氣更騰  
虹手草彈章誓滌遺臭但激濁揚清之有效甘銜鋒冒險  
而不辭而卒之冤雪未飛愁雲已掃蓋請讞之意非有仇  
於匹婦匹夫故解襁之來自出於不知不覺然而殊因磨



而更赤金以鍊而彌精人欽甯武之愚世重長孺之戇後此權輿憲政領袖議庭公論德望之克當無過東西之二老縣自治第一次成立先生當選副議長自由來也豈徒然哉雖然先生鷹鷂逐惡未嘗不麟鳳行仁獬豸觸邪未嘗不爽鳩善察試占兩事畧見一班清季當咸同之時儼民避洪楊之亂鴻鵠在野蝸舍同居百什成羣二五爲耦有人忽遭鼠竊貧婦遂被狐疑先生一見渡頭之頑童決爲梁上之君子婦冤有同燭照珍物遂亦珠還又有事涉曖昧情未分明無業之徒有心相矚傲華元之故智劫於登牀捲石氏之家財充其私橐先生不爭道地不告所天

黟縣四志

卷十四

雜志 文錄

三三

但學呂端糊塗急令楚獄寢息茲二事者當夫風聲鴉噪之時皆有性命鴻毛之懼一經塵拂立見波平然則如先生者守經亦可達權處常尤能應變行行兮英雄肝膽惻惻者菩薩心腸故觀其功德之及人而宜乎福祿之綏我矣今日者計距百齡之介壽不待一星之及期靈光之殿屹然壽木之華爛若龍孫驥子競舞萊子之衣爬衍瓜綿又慶曾孫之稼家蓬勃而鵲起身強健以鳩扶或登東皋從容而放鶴或臨濠上負手以觀魚洵陸地之神仙備箕裘之福壽此日金屏一十有二敬陳畫錦之堂他年鶴算三萬六千再獻羅浮之頌謹序



汪君蘭庭先生五十初度

朱師轍

昔歸熙甫李氏榮壽詩序曰三代之盛未有遺年者也年之貴於天下久矣而無爲壽者幽詩稱躋彼公堂稱彼兕觥萬壽無疆自此而詩之稱壽不一顧亦相祝頌之詞如史之稱爲壽者云耳迨後世壽節慶賀始於朝廷而及於公卿然爲文以稱其壽者亦無之又曰今之爲壽蓋不過謂生於世幾何年耳又或往往概其生而書之頗類於家狀其非古不足法也然歸氏雖云非古而其集壽文固盈帙也豈非以孝子之愛其親喜其親壽考康疆欲申其慶祝之悃而賢人君子嘉孝子之用心有不能已於言者乎

黟縣四志

卷十四

雜志 文錄

言四

吾鄉 汪蘭庭先生仲子幼亭肄業北京大學一日走謁余曰吾父今夏五月五十正誕鄉人咸擬致祝欲求子文焉余竊以蘭庭先生樂善好施聲名丕振居黟碧山有山水之勝家素封六歲失怙母葉太夫人撫育勤勞旣長入邑庠以滬公佑局乏人經理先生祖業將墮乃躬自經營家業日益興盛性孝慈仁愛凡善舉事莫不殫力輸助於滬江則思恭堂孤兒院戒煙局紅十字會於屯溪則思安堂於鄉里則立義塾設醫局皆慨捐多金其他恤親族濟貧窮施藥餌修道路諸端所費不可殫述洪楊之亂宗祠毀於劫火屢議重建皆未果先生感祠宇之久墟思繼志



之匪易苦心經畫力籌鉅貲商諸族衆剋日集事輪奐之  
美樂觀成焉先生施與無吝而持家勤儉咸有法度絜治  
其身型於閨闈元配余夫人繼配胡夫人胥能內贊脩齊  
外昭懿德生三子一女先生訓子或儒或賈各當其業年  
才五十子皆有成諸孫玉立信大福人也吾聞先生常往  
來於黟滬之間踰羊棧過九華沿長江以達於滬經姑蘇  
渡錢塘道嚴陵而歸於黟徜徉山水陶寫性情已足樂天  
延年矣又况富厚足以潤其身子孫足以順其志康健足  
以娛其心爲善足以極其樂所謂備人生之厚福享希世  
之愉快庸有如先生者乎是烏可以無祝則其仲子幼亭

黟縣四志

卷十四

雜志 文錄

三十五

欲爲壽宜也余爲之辭亦宜也謹序

組織黟邑中醫學會序

胡存慶

竊以靈素傳自黃帝疾醫設於周官由是上藥中藥下藥  
別畏惡而立君臣五氣五色五聲察虛實而砥生死湔腸  
滌藏俞跗實擅異能理腦解顛淳于正多妙技苟有窮神  
達化之功自奏起死回生之效躋斯民於仁壽普宇宙以  
太和振古如茲胥是道也然而疑義難明佚文待攷內經  
不盡原文越人特多問難明堂於今佚卷鍼法乃以散亡  
巢氏但論病源而處方須憑妙手肘後特傳古法而見症  
乃可類求脈訣爲僞託之書至瀕湖而範正矩傷寒有諸



家之論迄嘉言而集大成凡茲懷疑有待論定是以思邈千金至晚年更傳翼論外臺秘要因困學得以成書不特此也義取變通理資闡發古人有甲乙之經或謂鍼灸爲有害世俗傳驚風之論或謂瘧症之別名四氣各有推遷五方因而異治賦稟不無厚薄施治必辨陰陽瘟疫與傷寒異源誤認必毫釐千里運氣闡天人奧旨過拘又求劍刻舟所以主脾胃主火熱河間與東垣異轍重滋陰重益火丹溪與景岳分途論雖各造其極端義實揚發所未有苟能融會其精微奚事紛爭夫門戶又況西法流傳名詞各異腦筋主知覺運動卅一封與十二經不同藏府無包

黟縣四志

卷十四

雜志 文錄

言天

絡三焦甜肉經以五寸長特著五藏之重量葉數與難經微有不符人身之炭氣養酸於理想不無裨益白喉爲新流行症古書不詳斯篤乃各種瘟名消防宜預凡吾國舊學說固期國粹之保存於他邦新發明尤宜虛懷而容受我徽州代產名醫人多好古石山特傳醫案有執素擅傷寒汪昂則功深本草正通則書傳眼科諸君心存濟世志切同仁或私居研究或篤志力行知強種必在於衛生健身乃能以富國探陰陽之奧必當救濟其偏思診戾之來尤在防閑於漸謹臚陳夫管見作學會之宣言願集同人用資探討



鶴山李氏宗譜序

江春霖

列子謂燕人而長於楚者老而歸燕過齊魯之城社或給以爲燕也愀然變容過塚墓以爲先人之壙也泣然流涕及真見燕之城社廬墓悲心反滅今世之大家勲閥往往援疏族之貴者顯者聯爲譜系傳會成書相與敘及輒曰我伯叔兄弟也而於其真伯叔兄弟漠然概不相關是何異燕人之見給者據以爲真而爲有識者所竊笑哉黟鶴山李氏爲唐高祖淵之後十三傳至昭王季子京因兄喪赴歙州逢黃巢亂不能返遂留寓焉廣明庚子居於饒傳三世德鵬公遷祁門孚溪新田二十世重公遷黟北豆山

黟縣四志

卷十四

雜志 文錄

三十七

塢再五傳福安公始遷鶴山代有隱德皆未通籍及吾友麗川宦游閩嶠始與訂交其後麗川觀察奉天而余亦旋入察院宣統庚戌余罷察院歸養乃叔蔭青巖尹適辦七場鹽釐密邇敝廬公餘朝夕過從稱莫逆交始知李氏多藝多才其竹林皆賢而特出者也每與余論譜學謂統修則並蓄兼收弊近於濫獨修則條分縷晰義取乎真余深韙之客冬書來並以鶴山李氏宗譜見示請余數言爲弁余讀之尊祖功而欽宗德晰右穆而列左昭子孫不紊尊卑有等仿史傳體裁成一家言令閱者切水源木本之思焉識敬宗收族之道焉所謂孝弟之心油然而生者其在



是乎其在是乎昔王荆公作相欲刪汰宗人恩禮謂祖宗親盡亦祧何況賢輩是欲蔑其親也蘇老泉爲族譜只敘祖父以下所由生其餘以次從畧二公居心雖不同然於宗盟之系務專所親是可爲後世言宗者法今鶴山李氏譜第敘其親之所自出而唐以上不之及焉第詳其新田所分之本支而於嚴田畧田李氏之貴者顯者不之及焉則其所見城社皆眞城社也其所見廬墓皆眞廬墓也徵其可信而專及所親上治祖禰專於孝也旁治兄弟專於愛也下治子孫專於慈也合諸三者而宗法以治後之覽者其亦興起其親親之誼也夫是爲序

黟縣四志

卷十四

雜志 文錄

三

姚氏三修族譜序

休甯 楊 亶 子允

尊祖敬宗收族禮之大經也孝友睦婣任恤鄉之善教也我徽聚族而居世系班班可考信今垂後端賴家乘以傳第中經兵燹不無缺遺幸際景運中興四萬里皇圖同歸底定族姓安堵垂三十年譜系增修誠宜亟亟古黟雙溪南姚氏系出西漢龍驤將軍袞越四十二世諱仲者肇自有明由秋浦遷黟代有聞人孝悌傳家禮讓成俗迄今五百有餘年譜凡三修始修於雍正癸卯再修於道咸間三修於光緒壬辰派別支分釐然一遵舊例河海溯其源委葛藟庇其本根意何篤也姚生銘恭茂才黟敦篤士銜父



命以三宗譜請序於余亶鈍於資慳於學乃先徵君通奉公不肖子何足以塞斯請顧喜盛舉之克成爰忘其固陋而爲之序

百家姓考系序

胡元吉

百家姓考系雙溪南姚徵君課徒之作也徵君隱居著述不求人知所編桑溪文錄桑溪隨筆多可喜者茲編蓋懼後世氏族之學不講必至昧其所自如陳司敗之譏魯昭故不憚蒐取之勤以餉髦士間嘗攷之百家姓之作椎輪趙宋國初宋九烟以其有韻無文加以潤飾湘鄉曾文正復廣爲五百家姓每句以姓冠首其下引一先賢事蹟以

黟縣四志

卷十四

雜志 文錄

三

實之皆不及遠行徵君之書卽本曾氏之意而省其繁蕪且意在明系括爲四言以授家塾子弟俾童而習之不至數典忘祖有志之士得以沿流溯源亦復禮範俗之一端哉元吉與徵君同游南田湯先生之門而爲其後進授徒桑溪晨夕過從與聞次輯之意忽忽二十年謝官歸徵君頽然老矣復出此編相商慨禮教之凌夷傷世變之未已回憶戊戌以前朝廷紀綱不修而草野抱道之士著書立說猶殷殷然爲越禮犯分之憂所以維繫於家族者如是今皆不可得矣則茲編不尤可貴也乎因太息爲書其後而歸之丁巳秋序於杏墩之學稼園



江母孫太宜人六旬壽序

余麗清

粵稽魯頌崇壽母之徽稱肇自唐山奏壽人之雅樂坤儀  
主靜厚德斯符頤養安貞遐齡克享况天生淑質仙桃託  
千歲靈根性秉慧心慈竹留四時美蔭林有壬以萃福花  
開甲而恒春如 誥封宜人江母孫太宜人者乃瑞芝昆  
仲之壽母也夫其婺宿儲祥莊姝協度采富春華胄歸濟  
陽名宗蘋蘩久習於宮中栗棗虔修於牖下德音工貌內  
則無慚淑慎溫恭闔儀足式戚里其揚其行姻親咸述其  
賢淑聞有如此者既而月老繫繩星期佩幌門迎燕喜充  
玉璫以于歸旦警雞鳴續琴絃而在御乃視膝前二女少

黟縣四志

卷十四

雜志 文錄

壽

小離親宛如掌上雙珠維持有母 太宜人則教養兼施  
恩勤備至拈花刺繡雅號針神鳴杼投梭妙稱機絕埒桓  
少君之令範手挽鹿車希孟德耀之高風眉齊鴻核相夫  
有如此者夫羅谷生駒香盆浴鳳發祥丹穴定產九苞種  
德藍田連獲雙璧未瞻銅木已知英妙多才甫畫荻灰便  
識之無兩字學詩學算花萼相依爲士爲商荆枝並茂游  
庠食餼天家之祿初頒貨殖生才端木之風共仰教子有  
如此者且夫富不忘勤儉而中禮持門戶之健檢黠必親  
修中饋之虔烹調有節冬裘夏葛勤補綴而忘疲截肉斷  
慈信方寸之合度粢盛豐備先祀所需荆布咸宜浮華不



事爲孫枝漸衍拓大厦而雲連爲食指愈繁增原田之鱗  
次持家有如此者當夫徽郡之城郭一空海陽則烽煙四  
起桃花源裏偏是流民柏秀亭邊行多餓者惟吾 太宜  
人目覩流離志存散贍義漿濟困雖操白其奚辭仁粟恤  
貧則脫簪而不吝且鶉衣獸炭贈以禦寒甘草芳苓饋而  
愈疾彰彰善行夫資內助之賢種種陰功母樹與門之德  
慈惠有如此者 太宜人今春二月晉秩六旬令子文孫  
綵舞崇階觴稱壽域禮也 等獲交賢梓致敬維桑躋繞  
膝之堂侑介眉之爵筵開玳瑁斑衣偕玉笋爭輝屏設琉  
璃錦帳與金縷交映鳳毛濟夫四美鸞誥賁以重光愧乏  
鴻篇歌天保章如山如岡如阜台祈駿福效華封祝多富  
多壽多男

黟縣四志

卷十四

雜志

文錄

三

孫簡庭先生關東蒐異錄序

胡存慶

夫廣滑稽之傳總屬烏有先生作神異之經託言東方曼  
倩或則語涉荒唐附以長安鄙俚或則事多神恠究同齊  
東野人侈文士嘲笑之詞等諸都公談纂負周秦行紀之  
謗有累牛相盛名雖曰志怪搜神無關風教究竟笑林諧  
史祇助清譚同學孫君簡庭博涉墳典遠歷關河雪窖餐  
羶十數年有同蘇武尚谿染翰一二卷不讓次雲成節竹  
杖一編施偉長見聞綦確作玉唾壺二卷王一槐考證亦



多豈徒志廣夷堅藉作晚年遣興卽茲語襍規戒誠爲漏  
室暗燈矧今日博物有園理化成冊西學東漸墨守固難  
語通人格物致知遠游乃能臻博覽得孫君書而會通之  
印證之神州之外有大瀛海矧其未出中國幅員之中生  
物之數其種萬千要皆可作吾人學問之助是以山經爾  
疋不失爲聖賢之書野乘裨官亦採入藝文之志嗟嗟北  
窗炙輶不少箴言南部新書亦資攷據專餽釘者妄徵殘  
編斷簡工詼諧者僅供酒後茶餘究之無稽荒渺悉是莊  
周寓言怪誕不經或爲縉紳不道曷若茲事有本源語無  
假借摭拾異聞原是太平清話搜羅軼事大異鄉里閒談

黟縣四志

卷十四

雜志 文錄

三三

庶幾價重雞林不數硯北雜錄定可珍同鴻寶稱爲枕中  
秘書

胡瑞林經學教科參攷書序

葉新滋

治經之學莫善於漢詰西漢經師搜遺訂墜續述聖緒尙  
矣東漢賈馬許鄭諸大儒博攷羣藉註明古義集經訓之  
大成焉降在六朝皇熊沈劉諸家又各抒心得標爲義疏  
其學寢盛唐撰正義專持家法抉擇未精南宋以後偏重  
義理儒用稍狹清興經術大昌魁儒碩彥復崇實學若黃  
顧王之興於南孫李顏之興於北大都覃思研精著爲論  
說以紹正傳同時閻胡二子更能好古敏求力承漢統一



洗晉宋明疏畧之習至於乾嘉惠戴繼起流風所被天下咸奉漢學爲依歸精義新疏迭出於易有惠氏江氏李氏於書有江氏王氏孫氏於詩有馬氏胡氏程氏於禮有金氏儀禮有胡氏周禮有孫氏於春秋左氏傳有劉氏顧氏公羊傳有陳氏孔氏穀梁傳有鍾氏於論孟有劉氏焦氏於孝經爾雅有阮氏邵氏郝氏凡此皆取精用宏曠代絕作學者不思博觀而約取之無怪矻矻窮年苦其難而不知其益也今天下儒術微矣一孔之儒謹嚴章句墨守一先生之說罔觀其通識時俊彥或競趨東西各國語文政法歷算測繪理化實業諸科目以應世而於吾國聖賢授

黟縣四志

卷十四

雜志 文錄

三三

受源流經師精確之說束閣不講識者憂國粹之廢焉吾友胡君瑞林性穎敏能文章平居設教鄉里篤志通經致用之學去年以師範畢業充蕪湖公學教員課餘之暇搜集漢後諸家經說分類編纂數十萬言名曰經學教科參攷書呈請安徽提學使沈鑒定頗見嘉許袖以示余余愧構瞽不學遑知大道然旣幸與商榷竊喜是編有四特色旣善闕疑又善徵信一也精粗條理曲暢旁通二也語必徵實不矜空理三也博采衆長折衷至當四也凡此旣爲漢學之正鵠亦卽科學之精神又況所編八門首法制卽今法律學也次政事卽今政治學也次天文卽今測繪學



也次象數卽今歷算學也推之地理卽今輿圖學名物卽今博物學譜系卽今種族學禮樂卽今國際音樂也以一科而具諸科材料吾知國粹誠無阻於歐化也由是引伸而觸類之卽此證彼取長棄短神州五千餘年之文化豈徒供學堂教科之用哉是爲序

葉濟生先生六旬雙壽序

胡存慶

今夫烏衣門巷蘭玉生滿庭階綠野山莊冠服喜安蕭散詠池塘之句康樂則詩思暴生作竹林之游仲容則風度雅稱斯固封胡羯末謝氏之秀彥惟多亦由酥酪醍醐穆家之和風早釀所以偕老延禧合羣季而獻頌永錫受祉

黟縣四志

卷十四

雜志 文錄

三

聯少長以揚休也闡茂歲在老人星光葉子抱齋爲余述其世父 濟生先生之齒德並一門雍睦之風求序於余余惟禮隆豆三自古杖鄉有典老觀星五于傳眉壽稱尊朱子序學庸正當晚歲公孫爲博士亦在暮年又況句漏仙鄉兼紉越井之艾上虞賢宰同乘皂莢之雲則覩懸家之著明少微光照洵鼓說採藥之軼事阮郎路入天台允稱人世之偶仙亦屬家庭之盛事恭惟 濟生先生系出南陽風承少蘊三齡失恃孤身往寄程嬰千里經商扁舟游同范蠡逐什一於蠅頭家興鼎業齊倡隨於鴻案室偶廡春膳潔蘭陔謀承堂構樓開華萼曲譜堦筮視姪猶兒



馬援書規畫虎開阡營葬陶侃德致眠牛內無間言人皆  
翕服此其內行之純粹足徵者也至若平心若秤守正從  
繩義利必辨於毫芒清濁不淆其藻鑑杜五郎兒子行迹  
不肯旁游徐八行先生家居不聞政事恩酬漂母一飯難  
忘義重魯公一斛不吝比勞謙之宋翼綽有古風託冠冕  
於劉麟下信羣小與車不告姓名居閭稱爲長者此外行  
之卓絕可貴者也迨乎晚境惟務家居不辱守老子之言  
招損遵尙書之訓瓶能守口緘懷金人之三策以數車馬  
符輿中之六消除煩惱祇緣毋強出頭絕少糾紛全因不  
較唾面有伯淳甘露之度生平能去一矜嚴曾子出位之

黟縣四志

卷十四

雜志 文錄

三

思守身至於三省杜門却掃世稱江湖散人游水登山是  
亦六一居士此則學問以老而愈深修名至晚而益礪者  
也孺人程氏湘湖世胄簪纓名家雞旦晨興鬪更夜守撒  
釵鈿而去華飾服澣濯以崇儉風夢兆蘭徵旗鈴早降天  
上珠生蚌粒機杼曾斷閨中愛而能勞勤則生善有文伯  
之家風得歐陽之母教鍾琰卑躬得親長姒王郗倒屣不  
拒故車斯則東海西陵共欽禮法名媛列女宜入篇章以  
故任卹風隆和平福養一莖男草秀茁春園連理孫枝榮  
爭露腕舞綵衣於階下老萊子大啟歡顏種嘉樹於庭前  
顧愷之益宏遠望休徵畢至壽考維祺介堂獻酒羅列難



第難兄祝嘏開筵無分南阮北阮慶居近芳鄰素瞻道範  
交王謝之郎君覩荀陳之孫子婆娑老子居然魯殿靈光  
荆布門風久聞少君懿範茲當弧懸周甲雙星燦爛於雲  
宵悅設同庚九如賡歌於松柏聚東華西華之氣不憚揚  
觴爲詞挹南斗北斗之漿用敢飛觴而祝

崑曲譜序

胡紹書 味馨

譜曲之有崑腔由來尙已古調如清平三闋旗亭四絕大  
都以詩爲曲風雅獨絕嗣乃短長其體號爲詩餘有宋一  
代最盛亦名填詞沿及元明遂以制科取士院本有南北  
二種世換聲移北曲寥寥南詞充棟夫詞旣南調與字面

黟縣四志

卷十四

雜志 文錄

三十六

均南字宗洪武兼祖中州腔則有海鹽義烏弋陽青陽四  
平樂平太平之別雖口法不同而北派消亡殆盡矣嘉隆  
間有魏良輔者流寓婁東鹿城生而曉音慨南曲之陋俗  
盡洗乖聲調用水磨拍捱冷板聲則平上去入之婉協字  
則頭腹尾之畢勻功深鎔琢氣無烟火啟口輕圓收音純  
細所度之曲非折梅逢使則昨夜春歸諸名筆採之傳奇  
則有拜星月花陰夜靜等詞要皆別有唱法絕非戲場聲  
口腔曰崑腔曲名時曲當時號爲曲聖洵當之無愧色矣  
沿及於今閒有練習之者類皆源流莫辨徒知韻叶宮商  
而已南屏葉君劫莊性清逸善音樂絃索諸譜備極研求



而於崑曲一門尤有得心應手之妙余憶曩者潯陽作客同聽琵琶相聚日久深知其崑曲之學妙能入神常於花晨月夕與二三知己度曲徵歌雖無絲竹管絃之盛而一腔一拍亦足以暢敘幽情甚韻事也君嘗以譜曲傳抄每多謬誤輒喜蒐集善本手自抄錄釐正其字音辨析其腔調有條有貫以求合南曲之遺可謂知所本矣頃以抄本示余并屬爲之序余恨非知音難廣同調竊幸與竹林輩之素工於此者常相過從得以耳食略知皮相故特述其緣起弁諸簡端序云乎哉

葉村永濟橋同善會會簿序

胡紹書

黟縣四志

卷十四

雜志

文錄

三

慈善事業不一而足惟修治橋梁利及行旅賴以免於病涉斯爲先王之善政抑亦仁者所同心也雖然天下事難於謀始而尤難於圖終苟有樂善者願捨貲力以營於前若不得同志者設法彌縫以善其後恐閱時旣久繼起無人必不足爲永遠計此定理也惟我東區永濟橋其附屬有同善會俗稱橋會是也橋爲我村達下八都及休邑孔道係築石堞九座餘成以杠橋會名曰同善殆取義於善與人同歟會內原置有田租且期積累爲補苴計是爲立會之本會務必舉地方公正之人經理之橋之東首舊有關帝廟藉爲修橋事務所焉橋成於前清康熙乙卯迄今



二百四十年矣惟橋會成立不悉年月當在橋工告竣之後也現因原有會簿散失各據亦大半無存其一切會章僅得諸父老之傳聞而已嚮使有橋而未立會無以爲久遠之圖惟有會以備修橋故能符永濟之義歷年既久而橋會依然俱存於以歎前人立法完善盛舉同襄功德誠不可思議也竊維永濟橋創造之首功者爲鄉先達余大祥楊正茂楊向元楊廷選族有麟等輸貲倡建海澄禪師佐以募集克底於成此康熙乙卯年事也繼而出大願力先後勤加修葺並鞏固橋會者則有我族先輩笛農正宣序東諸公其於橋會事宜辦理妥協者則以楊兆興君爲

最蓋乾嘉之際橋遭水患其下一帶民田盡爲洪流漂沒笛農公倡議代爲報災得以蠲租免賦其橋畔荒地又復召農開懇爲田定福祿壽三壤隱分三則佃之承種者納租有差歲取其穀於會爲補助修橋之費是大有功於橋會者至今區人嘖嘖稱道弗衰故後人師其遺意爲會內添置田租繼以財喜二字爲號焉洎道光間橋久傾圮賴正宣公獨任修理費用亦屬不貲同光年間橋之石堦兩座又被洪水衝折支木爲橋者累載序東公更倡捐集貲舉而修之此二公者并於橋會維持甚力況復得楊兆興君經營會事頗著勤勞數十年如一日其他助資重修及



贊襄會事者尚不乏人無他賴有同善會之名目易於提議修葺故樂善者能接踵而起也並聞曩者每值五月十三日關帝誕辰區內公正紳耆必衣冠詣集於橋首之廟共襄祀事歲以爲常旣聯善士之雅集兼察橋梁之圯否且因而稽核簿記督收穀租一舉之中數善備焉從可知同善會之立足以維持此橋於永久能濟人於無窮然必藉後之同志者輔助之力而善舉乃可終始克全也否則無以繼續修築詎不負前人創造之盛心故曰莫爲之前雖美弗彰莫爲之後雖盛弗傳信非虛語矣不意邇年以來橋會經理屢易其人遂致事無專屬似非重視善舉之

黟縣四志

卷十四

雜志 文錄

三

意同人於是欲將一切會章重行組織也族叔吉雲熱心公益以其先伯序東公曾致力於前不得不與謀於後日與溪東溪西諸君子磋商規復極爲周詳公舉楊心齋健庵二君接理橋會諸務咸慶得人并新立會簿一冊屬序於書不揣譎陋爰敬紀其顛末如此願我同區之人念茲善舉顧名思義實力奉行俾保持於勿替庶利及千萬人而無窮業垂數百世而不敝其惟永濟橋與同善會乎他若疊次修造橋工及輸貲多寡之數橋首廟中勒碑猶在姑略而弗陳焉是爲敘



物之美者莫如玉玉之溫潤以之比君子寶之者韞匱而藏好古之士愛書畫如美玉韞而藏之摩挲若親炙古人誠以所好異於流俗也昔歐陽文忠有集古錄目序蘇文忠有寶繪堂記而二公皆以忠孝大節政治學問文章彪炳宋代匪以好古而貽譏玩物喪志也蘇文忠謂寓意於物非留意於物其以此乎徽州處萬山中疇昔盛時大族故家弃藏多古書畫以遺子孫及洪楊擾亂兵燹之餘所藏名人書畫數百中僅存一二者蓋慨然於物之聚散有時數存其間無庸計也予嗜古書每向書賈搜求善本因限於力所不逮而所得書籍無多朝夕潛玩樂此不疲殆

黟縣四志

卷十四

雜志 文錄

書

亦如古人嗜書成癖歟予友何君祝三先世喜藏書遭喪亂書多遺失所剩無幾而何君又嗜書畫所藏如先代之嗜書故書畫多聚於所好此韞古齋之名所由稱也何君爲人篤實重然諾恤貧乏自奉恒儉約嗜藏書畫有甚於予所藏者數多忠孝賢哲之真跡如宋之文文山明之方希直戴文進近世曾文正胡文忠戴文節俞曲園諸公俱以忠孝政治學問文章昭著一時其精神所聚蔚爲國粹祝三韞而藏之傳於子孫皆有教忠教孝之意類皆寓意於物非留意於物也昔我黟胡汝華先生平生尙義以積善忠厚傳家刊有筆嘯軒書畫錄附載邑乘所藏名人書



晝遭粵寇今多不存可知物之聚散無常等烟雲之過眼而胡氏積善食報今其子孫復有嚮學振興者何君祝三企慕前人之忠孝政治學問文章著於當時者聚其書畫真跡遺之子孫使後人觀之如見前哲忠孝之心油然而生卽謂何君祝三以教忠教孝之意寄於書畫於以傳家不亦可乎予故樂爲之序

葉紹武世丈暨德配汪淑人七旬壽序

汪聲浩

夫陰陽大保合之符每於一家集其慶河嶽挾效靈之異恒憑五福著其麻故深山大澤其氣厚者其生必貴而新

黟縣四志

卷十四

雜志 文錄

三

安實爲人傑之鄉舊族世家其源長者其後必昌而頂遊是卽崧生之地此東王籙術木公與金母共慶長春南極星明寶瑟興瑤琴並賡難老也若我世伯紹武先生品峻如山顏溫似玉家敦古義樹北斗之先型人是歲星宛南屏之耆舊負大貝明珠之望胸藏智水疑從湖海而來鍾黃山白嶽之奇度靄春雲實得江山之助伯母汪老太君荆釵散譽彤管揚芬內助久已稱賢敵體允宜婉德今歲壬子孟秋之吉爲先生太君雙壽之辰舉鴻案以齊眉七月慶七旬天上煥雙星之彩挽鹿車而白首同心更同德人間隆二老之稱衍餘慶於門庭鳩杖扶身不屑



講延年之術相起家於勤儉鷄鳴戒旦未聞披致富之書  
人第見其膺厚福享太年不知綿綿日月艱辛幾歷而齒  
德俱尊浩浩春秋險阻備嘗而身名愈泰也當其幼侍庭  
幃早勤榻枕長經離亂遂棄毛錐烽火晨飛習質當於里  
閭藉伸烏哺烟塵夕起力捍衛夫桑梓終嘆狼奔豸山當  
荆棘之秋風利一颿繫念高堂遠避武水慰瞻依之願波  
平雙漿從容千里迎歸蓋飛蓬始定已得心安而福蔭方  
長難甘家食 先生於是披星帶月別故園之松菊每戀  
庭幃沐雨櫛風犯客路之星霜遠謀甘旨邦江隨侍能助  
伯業重光漢上問津更得新基丕振起中宵之舞聞鷄不

黟縣四志

卷十四

雜志 文錄

三

寐比越石傲惕彌深惜分寸之陰運璧何辭較士行勤勞  
尤著敢耽逸豫管幼安之木榻積日久而皆穿不事繁華  
晏平仲之狐裘歷年深而不易交遊欽其丰采卓卓高標  
鄉黨奉爲楷模怡怡偕樂乃家書頻寄養無缺於晨昏而  
風木驚傳望徒深夫岷岫 先生終身孺慕篤志顯揚旣  
讀禮以飾終方期廬倚幾聞詩而增感仍賦脊征懼先緒  
未恢估計舟車卻喜鴻毛遇順幸家聲之勝昔勞形市井  
漸看鶴髮成翁奉公守潔己之誠廣種福田非奉養不嫌  
淡泊好善能濟人之急栽培心地豈老諄不念子孫蓋其  
立志也堅故其收名也遠其立德也厚故其獲報也隆果



而文郎俱譽擅充閭能承厥志 先生亦年當週甲可息  
仔肩一生况瘁念林泉足樂不如結伴侶於烟霞萬事經  
營既付託得人何若話桑麻於故舊尋桃源而歸隱歲時  
伏臘難忘鄉社之雞豚聞義舉而爭先淮海偏災又痛流  
離之鴻雁慷慨重恤憐之誼有令子能全公德無非一秉  
義方褒揚推錫類之恩爲高年藉博歡心何幸疊膺盛典  
先生前助賑已封奉政大夫至是晉中議大夫 德配亦  
由宜人晉淑人奉綵綸於日下恩傳鳳詔六珈誇偕老之  
榮騰蘭桂於階前瑞靄龍光再拜效如賓之敬敘天倫之  
樂事白頭唱和弄四代之孫曾話往事於當年黃髮婆婆

黟縣四志

卷十四

雜志 文錄

三

歷五朝之甲子萬松亭畔看雲放鶴爭傳海上仙翁五柳  
橋邊嘯月吟風共識山中處士 先生年彌高意彌下貌  
愈古心愈慈客歲以稀齡將屆謙光自守不欲開北海之  
樽西于方懸磴未修利涉關懷遂合運南山之石詎知  
先生以壽身者壽世推食解衣而外尤期普施濟之功而  
人謂 先生以壽心者壽身牽羊擔酒而來咸願上岡陵  
之頌占景星於下里大椿應運實爲稀世禎祥數盛事於  
德門寶婺爭輝尤屬宗邦嘉瑞此日康寧好德仰松筠之  
節操共躋堂而稱五福之完人他時耄耄期頤羨龍馬之  
精神再珥筆而祝百年之上壽是爲序



葉丈振聲觀察六十壽序

南屏葉丈振聲觀察以宣統己酉解組歸田越六年乙卯三月五日爲其六十初度之辰同人擬載酒登堂援詩人戩穀俾臧之義製爲詩歌以相慶祝屬元吉爲之序吉惟人生上壽百歲爲期觀察花甲甫週春秋方富哽噎之祝未臻其時而康強蒞祿之文世俗所稱尙者又不足以盡其真無己乃取其高尚知足之懷足以膺福祉而紹天休者爲侑觴之助可乎觀察藉先人餘烈府有餘帛廩有餘粟髫年勵志於學有聲庠序每試輒冠其儕及其筮仕八閩一宰德化廉惠風行大府奇其才方欲儲爲大用俾之

繁劇而觀察見朝綱之日替民俗之日滿天下岌岌將致大亂慨然投刻以歸營頤園於里第之旁鑿池種魚澆花蒔竹日與德配孫孺人含飴弄孫於花明柳媚之間每春秋佳日元吉與二三耆舊携琴造訪觀察必爲之下榻設餐醉談累日雖中原擾攘而深山之中悠然忘其患難之餘此亦一時之佳趣矣昔韓魏公身爲將相名滿天下忘其所有而企羨於樂天取其池上之詩名其堂曰醉白夫樂乞身於未老之年極詩酒園池之樂與觀察所得累同而觀察諸子皆循循畏謹卓有家法諸孫又嶷嶷然漸露頭角此又樂天之所無矣其足令人景羨而託諸歌詠又



何待言於是爰踵詩人晉祝之意以序其端更繫以詩曰  
以月之令以日之良曰維上已綺筵宏張南極星朗寶婺  
同光階前玉樹燦燦齊芳萊衣斑斕玉笋趨蹌福昭德備  
瑞集澤長大易有訓積善必慶洪維我丈旣壽且康追溯  
髫歲早擷芹香旋食廩餼譽擅膠庠一行作吏小試巖疆  
治昭德化頌聲洋洋維時閩帥方倚才長擬畀劇邑爲國  
之防乃惟我丈高蹈退藏蕭然解組歸去柴桑南屏山下  
雲樹蒼蒼清酒在壺瑤琴橫牀花石臺榭俯仰相羊池上  
之篇醉白之堂是維我丈與之頡頏敬秉斯義用侑壽觴

雪眉詩鈔序

胡元熙 笛農

黟縣四志

卷十四

雜志 文錄

三

雪眉先生以詩鳴蓋三十餘年矣憶予鼓篋時卽耳熟文  
學士羣相推許謂古之所云登高能賦者卽其人也及稍  
知章句嘗取先生詩讀之籓籬莫窺未能領其旨趣歲戊  
辰予入都以應制體詩見賞於少司農左田黃先生每從  
講求詩學聞其論古今體詩則必爲雪眉首屈一指司農  
海內宗工鴻章鉅製膾炙人口其論詩也每至雪眉而心  
醉蓋先生蘊醇茂之德具瑰璋之才咀味道腴激發靈響  
非然者安能得司農之欣賞如此乎丁丑冬予請假歸省  
復取先生詩披吟於駐春館中如游名山大川讚揚不盡  
惟以司農所評許者書之編端用誌嚮往至其詞賦之工



亦司農所推賞也茲不復綴云

雪眉詞鈔序

巴樹穀 孟嘉

詞為填詞亦名倚聲未有詞而不講聲者也夫聲天籟也出乎自然而無所句矩昔萬紅友著詞律廿卷於句讀之斷綴字脚之平陂窮究極細而按之律呂往往不諧此無他束於習用之韻而不察乎自然之聲反不若衢謠孺唱之調商而應徵也雪眉先生以倒峽之才吐驚人之句古今體詩各極工妙而復以其餘溢而為詞櫬唐模宋直追大晟之響且近宗承中詩老一洗浮縟拗折之習宜其溫柔揚抑比之聲而聲合律之韻而韻諧也穀既倦於詞復

黟縣四志

卷十四

雜志 文錄

三

瑱於聲敢述所聞知以志諸後 先生必有以教我

雪廬印存序

注 柳 覺遠

黃君雪橋余窗友也曩同學橫岡宗柏家塾時 柳甫八齡

辨字析義常獲教益君則長於美術好琴歌書法尤優秀顧性高逸不羣一若塵世事不可得而撓者越二年君客黃山白嶽間稍稍以工篆刻聞旋為予言雕蟲篆刻雖壯夫不為顧為之亦必興至乃凝於神即以頑石一方丐其奏刀歸而見諸人僉曰可予摩挲而喜凡簿眉書而皆蓋之以為榮人之問之則曰此吾總角交黃君雪橋手筆也雖曰童心然爾時忻賞之情其真切有非尋常所可比者



今年春君自滄浦歸出其所購刻書所集印譜以示予并  
彙拓其年來精心結構之章曰雪廬印存者以屬序予固  
未諳此中秘奧第玩其所作殊雅而古視前作尤精進君  
性本放傲其寄傲於金石中者耶問何以工此始知君學  
多出於其舅氏胡君一貞而一貞君又傳自其外祖雙溪  
余公其淵源遠矣然使非君性之所近則不能學使性非  
絕慧卽學焉亦不工君更語予曰向所謂做法浙派鄧派  
今皆屏棄不學尚法同族延清芬室之遺作謂喜其勁健  
有不屈意勉哉雪橋苟舉畢生精力以殉此一事者將遠  
紹次黃約圃小松蒼雅濟叔茂椒菊癡魚門諸先哲之家

黟縣四志

卷十四

雜志 文錄

三

學於不墜以自名一派匪難也昔姚姬傳壽劉海峯曰天  
下文章其出於桐城乎予將曰天下篆刻其出於黃氏乎  
勉哉雪橋生美術競爭之世一藝名家亦足以豪矣

黟縣積穀總序

積穀者周官委積之法朱子社倉之遺意也黟之爲邑在  
萬山中地瘠人稠豐年所入僅供三分之一餘悉仰給於  
鄰境而北通石太西距祁閭山嶺崎嶇馱運不便若逢歲  
歉輸輓不時則有斷炊之虞此積穀之舉爲黟之要政也  
邑治之北舊有常平倉經亂圮廢邑宰陳令德明勸捐重  
建十二廩未及購穀調任以去宣統紀元桂峯余先生歸



自蕪湖與良生禮和兩孫先生建議積穀邦人贊同僉謂  
與其掘井於臨時曷若綢繆於未雨越明年姚子在邦江  
子徽五徧歷各埠從事籌捐時禮和先生適在漢上諭其  
族人曰此義舉也不可以後首輸銀幣二千餘圓以爲之  
倡漢皋一埠所捐至六千餘圓之鉅而武穴九江安慶蕪  
湖上海杭州屯溪婺源祁門饒州景德鎮樂平之黟商皆  
慕義爭先以蕞爾之黟未一年而募集至二萬三百有奇  
古所未有也乃移建倉廩十一間於城北廣安寺市穀以  
儲之設倉司置典守規制未具而江姚二子相繼殂謝禮  
和先生傷盛舉之甫集而倉務之乏主爰集邦人一再咨

黟縣四志

卷十四

雜志 文錄

三頁

商未得要領倉穀漸有紅朽之虞而各埠亦騰書相詰於  
是程子夢餘發起董事會每都選董事二人復由董事邀  
集闔邑設立公穀維持會而推李先生蔭青爲之長元吉  
與孫子林芬副之稽其倉儲得穀二千八百餘石存息銀  
幣三千四百餘圓蓋建築倉廩暨歷年折耗之餘所存者  
尙如此也事在八年六月適大府秋滿許公方下社倉之  
法於所屬蔭青先生旣率在事諸子陳請備案復刊己未  
以前庚申以後出納之冊以示邦人用昭徵信更督汪子  
清泉遜夫錄先後文牘與現行規程存於倉中蓋自宣統  
之初倡辦積穀以來至是而規制始釐然具舉然先生猶



歛然不自足屬元吉序其端元吉竊以先生之用心勤矣諸君子關懷桑梓切矣惟以今日之戶口而濟今日之倉儲蓋不逮什之一二加以累歲歉登市貴鬻賤不及十載倉中之積行將告罄又將何以爲繼乎昔朱子行社倉之法於崇安其始得穀六百斛耳歲一歛散令貸者出息什二行之三十年積至五千斛而里無凶歲大儒作用自異尋常後有君子能取朱子之意上下而變通之爲鄉閭立無窮之計使之可程可久則諸君子與先生惓惓之懷將與黟山漸水而長新矣弁竊志之以爲之序杏墩胡元吉

何君錫鴻六十壽序

程鴻詔 伯勇

黟縣四志

卷十四

雜志 文錄

三

人之壽或由先天稟賦之厚或由後天培養之勤其福壽兼者則由累世與及身積善所致歷浩劫而康疆逢吉也何君錫鴻今年六十令子麗和廣文與余同客皖會襄修通志請假歸覲將以季冬上吉率其弟妹子姪捧觴介封翁壽而屬余一言余憶咸豐乙卯麗和始從余游適值寇警太翁殿超先生來余山齋余時與麗和兄弟聯絡鄉兵有五月七日石鼓山之戰其事若在目前然屈指計之忽忽十八載矣此十八載中滄桑變遷出處不常親朋大半寥落其在兵戈之間取義成仁者不可勝計卽幸能獲全而老成英妙修夜不暘者又不可勝計輒常疑理數之難



言今觀於封翁之精神強固子孫承歡而知數固有之理  
仍可信也蓋自殿超先生以純孝而錫類尚義而輕財服  
食而却病壽考而宜子孫善以輪積八十餘年其未竟之  
志與未畢之善舉則又封翁能成之大略載於邑乘至於  
居家孝友教子義方以禮淑身跬步必敬以儉制用取予  
不苟則余知之尤深昔嘗與人共事不逆不億至受虧負  
處之怡然又嘗爲他人事橫遭口語大度置之犯而不校  
且昔爲素封中更兵落德配夫人秉禮殉烈允光彤史在  
常人之心不能不爲境所移而在封翁則守分安命怡志  
田園綜家政課諸孫能以道力戰世緣而使之勝是其稟

黟縣四志

卷十四

雜志 文錄

三

賦不必較人加厚其培養不必較人加勤其累世與及身  
所積之善蓋有足迓景福而引大年者繼自今壽彌高德  
彌劭將見左彭右佺長生無極永樂昇平猗歟盛哉麗和  
昔與余從曾文正公北征耐勞更事其後教諭南陵尙孚  
清議居鄉亦能退讓明禮諸弟循謹庶幾承祖澤而守庭  
訓矣余尤願其博聞強識敦善行而不怠馴至於爲朝廷  
有用之才並爲鄉黨無瑕之彥自茲以往溫恭朝夕長以  
延恩北陞而集慶南陔歲歲稱觴無有窮期也是不虛余  
文也謹序

葉紀功先生七旬壽序



當魯公叔復東銜之時溯蕪子瞻游南屏之日史書良月  
律中應鐘爲我 葉翁紀功先生暨德配程孺人七旬夔  
壽之期人頌齊眉詩歌得耦國稱上瑞里耀德星哲似香  
圃君時任職武穴商會總理本於一喜一懼之心恭上千  
春千秋之祝禮也翁堅不許以爲戲彩事親固知老萊之  
孝然而分甘娛目未極逸少之歡乃不知崔慎兒遲商瞿  
息晚必玉果之非凡豈珠胎之終闕又謂松柏有心故能  
久歷風霜若樗櫟不材徒使虛延歲月而不知年重古稀  
禮隆杖國爲祝嘏之常儀非鋪張之盛典嘗聞翁之爲人  
矣生姿明敏秉性冲和比德於蘭虛懷若竹待人則何妨

黟縣四志

卷十四

雜志 文錄

三十一

後己戒子以毋多上人謙謙自卑鞠鞠如畏古之君子又  
何加焉而况孝並悖復甘旨盡所入而供悌勝蔬菘荒頓  
雖所安不取千金一諾信字銘心九鼎片言誠能格物所  
以名重刊江人稱隱市雖少歷紅羊之劫四壁蕭條而長  
讀朱公之書一厘確立克勤克儉以垂後昆亦仁亦慈更  
拯急難江上固少麥舟之助鄉鄰具見纓髮之心橫覽俗  
情斯尤足爲今之賢能道也更聞 程孺人之持已矣姆  
教素諳莖儀允順系出華門世胄安於荆釵布裙卧縱牛  
衣對王章而不愠餐同鴻案比德輝於相莊蓋其淑性有  
足稱焉至於事舅姑則執節虔恭處妯娌則秉心和婉有



汝南之德杵臼躬操具韓范之賢荻丸不輟錙銖毋吝周  
急時聞稱物平情輕重悉當蓋言德工容之均備而幽閑  
貞靜之足欽也而謂天之報施寧有艾乎夫積善之家必  
有餘慶大德之人必得其壽 翁暨 孺人處鄉曲原爲  
長者善人之儔論聖學可作修身齊家之範宜乎嗣君馳  
譽大江之間領袖羣商之上韓康居市老少同欽梅福入  
吳聲譽以著玉樹已見參天之態芳蘭自有滿畹之時袁  
簡齋六十生兒雖云遲暮郭汾陽八五弄孫亦足歡娛 履  
莊等 以孔李通家之誼兼江黃姻戚之親久仰月白風清  
沉靚婺輝星燦讀萬石君傳頌門第之榮披九老圖詩祝

黟縣四志

卷十四

雜志 文錄

三

岡陵之壽亦所以祛翁惑而博翁榮云爾謹序

葉公國光岳丈暨德配岳母張孺人壽序

子婿 成 允

竊晉卿成室張老有詞魯侯作宮奚斯致頌是古人落成  
飲酒尙有美輪美奐之歌而民國介壽稱觴能免祝鯁祝  
噎之語今年嘉平之月爲我 岳丈大人懸弧令旦攬揆  
良辰祥開益壽之花瑞獻長生之果香山九老畫裏風生  
羣島三峯人間春永馬伏波精神矍鑠無假引年之方廈  
元規身體康強自提養生之印優游沐道純固保真積德  
既多收效故速謝氏之芝蘭繞膝鳩杖怡情燕山之桂樹



參天鳳毛濟美備天倫之樂事增商界之榮光羣稱陸地  
神仙衆仰人間山斗固其宜也豈不休哉凡屬孔李通家  
陳雷友誼聽霓裳之迭奏喜桃宴之宏開雍雍肅肅歌天  
保之九如濟濟踴踴郊華封之三祝婿分屬半子捧竿情  
殷道駸千程摠衣跡阻擬序平生之概畧表上壽之微忱  
惟是宦海飄蓬江文通筆花早謝案牘忙碌王子安復稿  
久空欲廣陽春之歌臨穎而詞慚下里願描洛社之畫濡  
毫則筆愧寫生然而羣瞻鶴姿莫不鼓舞我仰鴻範甯能  
默然爰假管城謹述梗概 大人世居皖水僑寓刊江家  
聲清華襟懷卓犖聰穎天賦幼披王氏之清緗牙籌躬親

黟縣四志

卷十四

雜志

文錄

三十三

狀負朱公之奇策操勝算於商戰利歸握中播合譽於市  
場財不溢外方之西州大賈比夫南陽行商未必過焉無  
不及也而且天性孝友宅心慈祥其事親也有嗜棗之心  
其愛兄也有讓梨之美其交友也有指囷之雅其留賓也  
有投轄之誠律身若陳太邱雅量如黃叔度光儀偕春雲  
等潤英華與秋月齊明實行實修古心古貌身勵節用力  
矯侈風脫粟維餐朱晦翁自甘粗糲新衣罔嗜桓子幼悉  
屏浮華如斯云云允作後生之圭臬似此種種洵爲薄俗  
之靈光也第宜家必先好迷坤順而後乾健旣騰嘉名於  
市井必得淑配於閨闈焉 德配張孺人系出名門夙嫻



姆教迨歌桃灼正及瓜年萊畚同操桓車對挽牛衣作被  
罔出交謫之言鴻案舉眉長表相莊之敬蓋敬慎是其至  
性勤儉本於素心用是得陰陽之和協修齊之道植鴻基  
於不朽貽燕翼於無窮也茲者瑞集華堂誠清門之盛事  
歡騰萊彩亦仁里之休徵婿寸念遙馳一言恭介望南天  
而頓首傳東海之添籌從此頤養安居庚星永耀自應豐  
亨坐享子舍騰歡似菊開晚節而彌香載頌林壬百福如  
春屆大年而更茂預祝君子萬年

贈葉抱齋茂才序

胡存慶

攷宣和圖譜古器猶見尙方稽西清鑑言真形如存內府

黟縣四志

卷十四

雜志 文錄

三

是則採歐陽哀集之說考古誠有定評讀肩吾品論之書  
名家必非小藝蓋好古者聚三代精英傳其文章典禮而  
志學者從一編摹繪仿其欵識形模則兇鹵雖尊不徒象  
形惟肖抑鵠首蚊脚洵稱大雅不羣也吾友葉君抱齋勝  
朝文學師範生徒既善籀文又工繪事觀舞劍而得書法  
褚遂良夙悟天成觀遺籍而畫地圖張茂先博覽素著况  
復下馬而觀碑文貼牆而張絹素晨夕臨摹枕中探秘夢  
魂結想月裡傳神斯則潑墨隨形宛覩禾稼山雲之狀垂  
針作態特饒飛舞生動之姿古色斑斕疑入明堂清廟象  
形日月確瞻烏篆蟲書誠足稱近代佳手要不數無聲詩



章且夫擅丹青之譽者雖妙極神采而未必其體善玉筋精竹帛之學者卽勢若鳳鸞而未必其圖參粉米是以十門分自南宋而鐘鼎不入畫科六書列於周官而繪懸爲絕藝今君於誦讀之暇兼書畫之工合倉頡夥手爲一家雙管齊下信木雞爐火之旣到全牛都無邇者出其意匠之工以表心知之雅直線曲線果規矩之從心立戈橫戈信轆轤之在手寫形則方圓合度絕無筆墨之痕着色則濃淡適中不失古雅之致信乎銀手如斷投嫌者盈門傲骨生成裂絹兮却幣儼紫金之在目宜蓬室之生輝在昔文人雅致書寫陶情或興來管握假水墨以自娛或索有

黟縣四志

卷十四

雜志

文錄

三臺

裙來屬交情之難却以致鍊成氣骨藝苑蜚聲曲盡精微專家名世君今者揮毫象物立格成形得箇中三昧成絕技一時比顧長康之三絕惟有不癡成燕文貴之一家要非無法神似不徒形似敢嗤坡公換羊之書藝成無異德成恍見神禹鑄奸之象定是壺傾墨汁灑出蝌蚪文章休云圖媵詞華題來鷺鷥詩句

孫簡庭關東蒐異錄續集序

胡存慶

萬里窮荒不知一身作客半生清福偏能到處來游濡殘墨汁白髮添絲開遍筆花禿毫成塚悟昨非而今是故紙空鑽甯消夏與避寒翦桐載錄我聞如是語無鑿空於意



云何言足傲俗脫前人窠臼不數東南絕聞异委巷議談  
差比癸辛雜識且夫智識以閱歷而愈多見聞以新奇而  
愈拓著述多迫之窮愁文章最憎夫命達所以禹穴窮搜  
龍門修史冷山嗣響夷堅成書揚子困窮因作奇字鄭虔  
矢志乃採异聞雖曰文得江山之助無非詩如郊島之寒  
萍梗多愁何以胸澆傀儡風月小住自謂身到蓬瀛 孫  
子簡庭車笠舊盟敦槃名宿文高班馬詩歷元白琴樽間  
作酒興詩情雲樹相思魚來雁去乃燒燭之期未久而攀  
條之恨又長春風隨筆固已抉厥言泉碧里雜存茲又撐  
其腹笥七層支白傅之陶瓶當然部分甲乙十手佐蘇公  
黟縣四志

卷十四

雜志 文錄

三

之筆錄正如境入瑯環見見聞聞象幾窮夫諸方色相奇  
奇歎歎集英視爲過眼烟雲所可感者買山錢少賣賦金  
空脉望食餽長守蠹簡長安索米未息牛車路鬼相挪陋  
梁園之賦麗言鯖得味視石室之珍藏若謂游戲文章却  
不是憑虛公子卽教生涯筆硯也足稱公是先生劉郎採  
藥君爲仙境之重逢山谷摘詞我亦枯腸之再索



跋

求安錄跋

績溪汪榛

余與梅泉交最久梅泉嗜好多與余同論古今同論文同論詩同論醫同獨論形家之旨不同梅泉好論幹龍大結動輒言千百里如指諸掌娓娓不倦幹中枝不足道也余則以爲士庶埋葬得有生氣處足矣其要在入首八尺靈光一點他勿苛也以是梅泉常嗤余爲不廣余亦笑梅泉之大而無當也梅泉善議論好品題而獨不喜言人過惟於醫師之庸者地師之妄者則指斥不遺餘力其言曰醫有性命之寄地尤不止此一族一家繫焉若輩學術未精

黟縣四志

卷十四

雜志 文錄

三

惟利是視猶未能操刀而從事於割其傷實多余攷之余非得已也故二者之享虛名高位置者或與梅泉會於稠人廣衆中皆默默如寒蟬側聽梅泉議論未終席多稍稍引去無敢與旗鼓抗衡惟竊竊然私謗梅泉而梅泉不顧也其學愈勵其見愈別近游飛布諸處皆得古人心印余第鑑衡隨焉歸與余言甚悉去夏別梅泉迄今一歲矣相晤於鳩茲梅泉把臂無他語亟出其新著地理求安錄見示余展卷未竟不覺且驚且喜曰何梅泉之去大而求小先粗而後精也耶昔以余言爲河漢今抑何乳水也耶是不同者而終同而吾兩人事事同矣梅泉曰吾爲惑求大



地而不葬者言非故抑而就子也子且勿誇於是哄堂大笑而命余書其後

余石舟先生跋

胡文郁

予與石舟先生髫年老友也憶先年每於春秋佳日常促膝談詩文於先生之澹園見夫羣芳競秀桃李爭榮羨其栽培之善殆後盥讀先生之尊人黃山紀遊諸大作益以知淵源之有自今讀先生詩不徒以風雅見長實以繼先人之志而補其遺意郁謂先生平素孝友工於詩文而懷才不矜今大哲嗣映青又以先生詩葉傳世所稱孝友傳家書香世守殆無愧歎喜綴數言以附諸大雅序之末

黟縣四志

卷十四

雜志 文錄

三

信孚公黃海紀遊跋

黃啟蓉

吾族涵齋先生諱元治綱圍集中有黃山紀遊詩一卷刻於滇中少時讀之輒欲往探其勝因循未果然三十六峯無日不在夢寐間也今族弟宓山出其令祖信孚公黃山紀遊一冊示余其寫景狀物之工足與涵齋公詩後先輝映爲書一通付還宓山予老矣腰腳疲茶日誦此篇聊當臥遊山靈有知能勿笑予乎

林歷山集跋

胡元吉

林歷邑南小山耳而其名特著於史籍泉石之奇前人言之備矣有明中葉邑士朱元英孫濟聘與石埭桂大璉講



學建書院於山中魏闢之亂廢爲禪林國初王坦齋黃自先許補峯程掘存閒齋諸君子游而樂之添闢四景題詩紀事和之者數十百人釋曇衍梓其尤者以傳此集是也吾祖崇乾府君卜葬於斯歲時入山展拜松楸歎洞壑之猶是慨人物之全非發願欲搜輯山志聞同族蔭吾明經藏有是集亟假錄之辛丑燬於火蔭吾亦歸道山遺書散佚是集不可復見每一登山未嘗不憶及之滄海以還法門冷落廢寺殘僧名山亦爲減色回想康雍全盛之時匪特嶽瀆效靈卽窮山僻壤之中文人方外景物流連楮墨偶寄猶具彼都人士之觀尙可復得哉因題其後以志余

黟縣四志

卷十四

雜志 文錄

三

感

程母孫太恭人秋鐙課紡圖題跋 天台 王詠霓

余以戊戌春月再至新安得識程清泉光祿恂恂儒雅有長者風越一年清泉造門而請以其賢母孫太恭人秋鐙課紡圖出觀圖中題詠皆當世賢士大夫之作余何贅一辭然余竊觀北江洪先生有機聲鐙影圖一時名流題詠殆徧今諸家文集流傳往往見之近吾家腴夫樞部爲其母繪秋鐙課詩圖徵題亦遍宇內蓋孝子之於親自有不  
能已之思思其親而不見則思託於文字以廣其傳論者不察乃疑厚於母而薄於父豈情也哉君篤於內行年逾



七十孺慕不少衰詩曰永言孝思孝思不匱清泉有焉是亦可以風已因書以歸之

學稼園詩集跋

第二師範校長 胡晉接

敬庵先生遭逢世變隱居杏墩耕田養親不應徵辟以朋友山水爲樂所經之地所歷之境均託諸詠歌以抒所懷其一種堅貞之操高尚之情所以自適其味道之天真者至足令人欽佩然先生固非獨善其身者流而常以世道人心爲念者也夙慕還古書院鄉先生講學之風頻來吾校講朱子之學以爲學者修養身心之助蓋百餘年來久不聞有此嗣音矣吾願讀先生之詩者有以知先生之志也

黟縣四志

卷十四

雜志 文錄

墓

書胡徵君學稼園詩集後

章壽椿

敬庵先生自辛亥解組歸山閉戶著書養親訓子暇或叱犢扶犁入城賣藥瀟灑出塵翛然物外蓋有隱君子之遺風焉所著詩多沉鬱之作間或取境閒澹每自見志多可傳者不佞謬攝桃源愧乏治術自得交於先生卽承賦以宰荷治譜竊嘗奉作南鍼希欲有所規撫而終未得其百一慚負殆不可言茲以奉調南陵行有日矣又承寵以佳章並索書萱庭春意詩堂幅以爲別桃潭千尺喻此深情而先生孝養之誠雖楮墨間亦自流露此則尤可敬而可



慕者既書並題其詩卷以誌欽仰之忱

敬庵劄記跋

桐城 方守彝 倫敘

劄記二冊論學問語功夫塗軌精專由闇然以進乎廣大高明之域凡持身處境歛晦儉德大義皎然而灑落自在之樂皆由平淡刻苦中來至於正己率物以居鄉退讓明禮以型俗誠悱誼切以教授一一皆納之於聖賢君子之途莫不本之反己躬行出以從容篤實是足以立己足以立人勉勵進修方且未已際茲四海橫流正學剝晦疾首痛心衰劣待盡之年猶得躬接斯人任道力而講道明抱絕學以安身立命日月會有當天之時開啟重新發揚徽黟縣四志

卷十四

雜志 文錄

一頁

國大賢之道脈以翼景運趙仁甫許魯齋兩先生風規未甚遠也負荷甚大願先生勉之辛酉七月二十三日桐城方守彝讀竟記此以質有道

韓心農表丈雙鉤手卷跋

程壽保

偶閱叢綺室曲話錄及詞統陳眉公挂眞兒注張小山題贈玉娥兒三弦玉指雙鉤草字雙鉤語見於前人文字只此然魏唐碑版每有鉤勒上石之說其殆厥藝所由昉與獨山莫邵亭丈唐說文木部箋異亦雙鉤以付劄牘者仲容弟以心農表丈雙鉤卷囑題卷中邑前輩各跋大都用飛白爲證當否必有能辯之者質諸孟侯弟以爲何如丙



辰秋孟三日程壽保敬識距去歲八月諳諉已將暮矣若夫字體莊重溫潤非矜平躁釋莫克臻此固有目共賞無待繁云

黟縣四志

卷十四

雜志

文錄

三



碑

際村忠孝社碑

直隸徽州府黟縣爲申明鄉約以敦風化事抄蒙欽差總理糧儲兼巡撫應天等府地方都察院右都御史陳案驗備仰本縣遵照洪武禮制每里建立里社壇場一所就查本處濞祠寺觀毀改爲之不必勞民傷財仍行令各該當年里長自嘉靖五年二月起每遇春秋二社出猪羊祭品依式書寫祭文率領一里人戶致祭五土五穀之神務在誠敬豐潔明虔祈報祭畢就行鄉飲并讀抑強扶弱之詞成禮而退仍於本里內推選有齒德者一人爲約正有學

黟縣四志

卷十四

雜志 文錄

三

行者二人副之照依鄉約事宜置立簿籍二扇或善或惡者各書一籍每月朔一會務在勸善懲惡興禮恤患以厚風俗鄉社旣定然後立社學設教讀以訓童蒙建社倉積粟穀以備凶荒而古人教養之良法美意率於此平寓焉果能行之則雨暘時若五穀豐登而賦稅自充禮讓興行風俗淳美而詞訟自簡何待於催科何勞於聽斷而水旱盜賊亦何足慮乎此敦本尙實之政良有司者自當加意舉行不勞催督各將領過鄉約本數建立過里社處所選過約正約副姓名備造文冊各另徑自申報以憑查考其舉之有遲速行之有勤惰而有司之良否於此見焉定行



分別勸懲決不虛示等因奉此除遵奉外合將蒙案驗備  
等因刻石立於本社永爲遵守施行大明嘉靖五年二月  
朔日徽州府黟縣知縣林文炳立石

黟縣四志

卷十四

雜志

文錄

三頁



記

曠矚山房八景圖記

休甯 汪述祖

曠矚山房者古黟澧珊姚丈之別墅也爾乃家居負郭結室城隅在邑若埜近市不喧可以登高可以眺遠朋簪所盍題襟斯暢述以二月乘暇來游於時園杏如雪溪桃未華山色空濛烟霧霏結人家春樹若在畫圖主人指而示余曰此所謂倩邨煙雨也旣而雲霽天表山青郭邊沿溪之樹若排魚鱗隔岸之煙若染螺黛東溪蓄翠彷彿見之主人復導余東行緣溪踏青憑闌觀水千頭百頭細鱗競躍一寸二寸游魚可數莊生知其樂趣宜聖於焉浩嘆川

黟縣四志

卷十四

雜志 文錄

三

上觀魚又其一焉迨夫所之旣勗林壑倏腹古塔當空高矗層霄寺鐘敲晚催殘夕照雖浮圖之七級莫辨何年清夜之八百罔稽其數然所謂石塔影廣安鐘聲亦見見聞聞之矣無何林端月出石上泉流星斗倒涵皆在波底琴筑雜奏如出水中白石粼粼蟾光亦碎活水潑潑月流有聲梅灘碎月是證舊聞主人曰未已也斯室雖小頗擅厥奇窗前遠岫是曰靄峯仰視煙雲預占晴雨余聞其勝在笏諦觀時方欲雨雲氣蒸騰濕翠黏天彌川滿谷占雲之俯良不誣矣獨所謂屏山霽雪者惜未之見時當春仲忽然沍寒同雲在天積雪滿埜馬耳露尖鴛篲奪潔逮乎林



表呈霽城中增寒好山如屏殘雪在樹勝景畢臻可云無憾念述祖與先生三世聯交五載睽隔乃以歸省之暇訪安樂之窩眼福斯誇襟期益洽所惜簡書敦我未克幽棲叢桂留人難忘招隱又興西笑仍賦北征此則平原燕飲期以十日而何氏園林待夫重過也已

延壽亭碑記

民國四年三月日

吳 翥

翥不敏不獲與吾鄉父老兄弟習處里閤棊桑敬梓有益於地方公其之舉頻年服賈遠涉申江迎養慈親得承色笑前年吾母七十生辰戚友之在滬濱者相與其獻一觴爲壽而吾母聞之則進翥而命之曰祝嘏虛文也慈善實

黟縣四志

卷十四

雜志 文錄

三

益也余與汝去鄉久獨不念故鄉父老兄弟行者無所憇耕者無所息炎暑雨雪無所庇蔭乎汝其擴此筵資多爲亭於吾鄉近里以休之庶承吾志翥唯唯敬受乃謹擇中途之要者築亭十有二亭成吾母又進而命之曰有舉莫廢古之訓也歲月遷流風霜剝蝕亭詎能終無壞哉汝其捐資修葺求所以永久之翥復唯唯敬受今年春暫歸自申因捐田五畝以爲善後之費竊願吾鄉父老兄弟一念吾母之誠相與顧惜而保存焉庶吾母之垂老不忘桑梓者爲不虛矣翥不敏弗能文辭謹述其事實而泐之於石

重建石山挹秀橋碑記

知事 章壽椿



黟處萬山中夙多慷慨好義之士橋梁道路樂於興修宰斯土者每忻羨之縣南五里許曰石山諸水所匯湍激深洑有石橋焉以利行人爲休祏往來衝道清順治間邑紳余起光汪瓊吳經世捐貲建造乾隆中汪瓊後裔櫛佐德昶等重修邑人士嘖嘖稱道之前任寶林兩公皆有碑記文載邑志經今百數十年洞圯石裂橋面傾塌行者不免病涉適有六都吳君子敬者業商於滬熱心公益慨然獨任之謀賢能者董厥工其族人堯敷茂才者樸實耐勞士也願爲之督理謂經一番大工須數百年而不毀故重修不如重建之計久遠也然以今日工艱物貴伐石庀材估

黟縣四志

卷十四

雜志 文錄

三

計價值蓋倍於疇昔焉自甲寅冬經始越二載而工成其用銀圓壹萬貳千有奇橋則仍其舊名曰挹秀從其初亦不欲攘前人善也形式依前而工程多剏新其建築之堅緻堯敷一身監理不憚勞瘁洵不負子敬所託矣不佞前幸承乏斯邑與聞其事上年夏子敬回鄉得罄談知在敝鄉無錫獨造鋼橋一所費貲數萬可見其好善之量不僅石山一橋已耳不佞奉調陽谷適值橋成未獲登覽其上爲往來慶幸爰郵文以記之竊祝邑之人能多如子敬者子敬之後人皆善繼志者則此橋也豈獨可其石山不朽已哉



重建駟車橋記

教諭 鄭 宏

駟車橋在縣治東北三十里許上通京師下通江浙實往來之要衝宋進士盧公臣忠之舊居也公歷仕顯要功德昭彰高宗朝贈諫議大夫故橋因此名左有廟祀公賜額褒忠右有祠祀周宣靈王揭額翊應古昔駕木爲橋不知其圯壞者幾矣宣德癸丑裔孫盧得辛作倡於前鄉人協贊於後始易以石甃纜經數十年亦圯壞成化辛卯盧得序繼甃之丁酉盧彥祿盧志溫重甃之俱未久而圯壞弘治癸丑秋盧志良志輔世偵閱其圯壞之速首先倍出已資擇良匠以委託之鑿磐石以固其基熟米汁以填其隙

植以砥柱架以修梁不再逾時而橋遂成工役凡若干費用凡若干皆其所勸施往來者莫不歡欣鼓舞而歌之曰橋久傾頽誰復介意仗義疏財懿彼盧氏率衆重修工巧狀麗我往我來感惠弗替又歌之曰河流洋洋莫測其勢爾橋爾成我利我濟願爾富壽爰及苗裔薦膺貴顯踵美先世夫一橋之成而人歌之如此者蓋以歲成徒杠輿梁王政之所不廢修理橋梁道路律條之所登載誠有官者之責也盧氏一門非有官序而能倡是役者乃義氣之所感激耳宜夫鄉人樂爲之助而行人喜爲之歌也昔宋郊編竹渡蟻尙爲狀元若盧氏之子孫適觀厥成世濟其美



殆必有乘駟車而過此橋者矣豈徒人歌之云乎哉庠生  
盧世傳請余記余故述其家世之源流建置之始末以告  
來者使知有所考焉若夫助其成者則有碑刻在是爲記

重修羊棧嶺路碑記

上虞 徐立綱

黃山白嶽諸峯巋然鎮峙於新安者自昔標爲名勝而崇  
岡峻嶺率多隱嶙鬱律爲之攢羅而迴抱扶輿之靈淑磅  
礴而不可遏文人俊乂出其中慷慨好善之士亦出其中  
辛丑夏初使者按試徽郡自宣州蘭石鳧山邈迤而南道  
由羊棧嶺蓋徽北界之要衝也危峯峭壁突兀雲霄盤盤  
焉嶮嶮焉若猛獸奇鬼出沒不可名狀石徑斜通千迴百

黟縣四志

卷十四

雜志 文錄

三

折絕頂攀躋脩然有振衣千仞之概而路之平坦康莊似  
修理初落成者詢之士人則曰昔浮屠悟澄之所開闢也  
百餘年來不無傾圯近沙門維新募化修葺而又幸前督  
學秦端厓前輩捐俸爲之倡當道名公暨好善諸君子爲  
之助以故坦步而無傾險之患夫錫飛杯渡浮屠氏多虛  
無變幻不可測之說茲乃以修葺棧道爲務其濟人利物  
之念亦自足嘉顧千金之裘非一狐之腋也九仞之山非  
一簣之功也曩非諸君子樂善而贊助之何以成茲美舉  
也哉抑更爲諸君子有厚望者生人有正路焉推修棧道  
之情以修其素履將砥礪而矜持世路之崎嶇亦且消融



於不覺書曰無有作好遵王之道無有作惡遵王之路詩曰周道如砥其直如矢君子所履小人所視卽小以見大平康正直之風當有因此而興起者今浮屠開之應亦於金繩覺路有默悟也夫

鎮河橋泉水記

戴之傑

鶴山之陽曰際村左右二水夾繞左曰大溪盡納北源諸水右水濫觴風來嶺屈曲抱村南行其流較狹故名細溪二水至村盡處滙合鎮河橋橫跨細溪以通孔道泉水在橋之北距二溪合流不過數武然其源迥與二溪別夏水盛漲二溪水皆渾濁而此泉獨皎然清澈居人甃石分爲

黟縣四志

卷十四

雜志 文錄

三

二小池上池正方專供汲飲下池較長用以澆溉池中草綠如碧玉時有赤魚浮泳取之則潛不見當冬日氣騰騰如蒸冰衣入濯頃刻融化泉味極甘飲者少疾病值大旱二溪皆涸池中澄泓如故雖終日挹注不少耗也予嘗偕鄉人吸惠山及雨花臺之水見座客傾甌歎賞竊相視而笑以謂故鄉之水類此者所在皆是蓋新安山水甲天下而吾黟又居新安上游故水尤勝今此泉出吾村復超然衆水之上毋亦靈秀獨鍾鬱而發洩歟或曰斯泉信美然非昔人辨淄澠分涇渭則介居二溪將混同而莫別噫物之美者吾特患非其至焉者耳果至美焉雖厠諸衆美中



固將翹然獨出而不可掩斯泉豈真藉人品題而始見爲異哉於是感嘆而爲之記

繼述堂記

于蔭霖

吾友胡生敬庵徽之黟人也光緒乙未余始至皖卽聞生年少篤學以古人自勗時值集生徒入書院以書招致之延爲學長學長共四人生最優然謙遜常居人後余屬訂課程一依程氏分年日程而少加變通令皆易遵守屬選朱子文爲諸生誦讀折中悉當恂恂好學日守儀禮經傳通解以自課予故異之分教今襄陽太守鄧公季垂謂予曰此人與衆不同殆偉器也戊戌秋七月予去皖生亦遂

黟縣四志

卷十四

雜志 文錄

三

歸己亥冬聞予病兩至鄂上年北事起季垂促予速召生欲委以練軍事生欣然而至適予調撫河南以生有老母速之歸旣歸旋返詢之因豫方有急師友家人以負予楮責故也居豫四月資俸最儉而事最勞同事咸服曰胸中無世俗絲毫計較者惟此人也予旣罷偕生至南陽敦留課孫重熙生亦願留朝夕過從予愈識吾友之爲學其課重熙讀戴禮也一宗朱子法不棄古注兼採注疏釋字義必據說文於朱子之書無不讀而能撮其大要不忽於細微學勤而意下志謹而氣謙於予執弟子禮甚恭予止之弗己與論存心致敬之事往復攷證辨晰精微吾未有益



於敬庵而敬庵益我多矣檢身如恐不及語及時局則悽然深痛慨然發憤嫉世之遺親後君者若無所容於已生於朱子之鄉而必以朱子之學自勵蓋吾友之志也予嘗謂曰以君之學之志年力方壯可期大成不僅爲謹身寡過之士已也相契旣深各道家世敬庵戚然曰吾家先世寒微亦無讀書者先祖錦華公年十三卽習賈兄弟三人二兄相繼逝撫其孤如已子亂後痛母黨無人表弟吳有東逃亡募人訪求數年始得之教以讀書作賈今亦能繼其先人吉迨事先祖十八年每見一粒一絲皆躬親料理一几一箸俱有安置愛讀書因吉父早逝學業未竟課元

黟縣四志

卷十四

雜志 文錄

三

吉讀書嘗夜分不輟塾中歸或坐立不正嬉笑閒游則切責之喜述古人嘉言善行令家人環聽元吉幼耳熟焉晚年少有蓄積買田築室創立祀會聯睦族誼未竟之緒叔父在乾繼之悉如先祖條理以故吉與叔父同居家口近二十人咸服叔父之教元吉嘗負笈遠游幸無內顧憂者以此叔父嘗謂元吉吾與汝尙能守先人之法後來子孫却不可知此尤吉所惴惴焉昔丐萬清軒先生於所居屋名以繼述求題數語示子孫毋忘先祖叔父勤苦作室之意予不敏於文然聞敬庵之言知敬庵之志而有以卜敬庵之必有成也吾見世之偉人大抵其先世有篤行隱德



而不彰故鬱而挺奇譬如深山大澤之中人跡罕到之區  
土厚水深未嘗發洩故篤生異材云昔大中公以兩程夫  
子而名韋齋先生以朱子而顯繼述之大孰逾於是吾是  
以有望於敬庵敬庵勉乎哉

繼述堂後記

孫葆田

胡君敬庵嘗從湖北萬清軒先生游得其正學之傳萬先  
生爲題堂額曰繼述蓋以古人志事相期也光緒辛丑余  
始識君於南陽時君寓前河南巡撫吉林于公邸爲課其  
孫讀戴禮而一遵朱子法以經傳通解爲教余固心異之  
君徽州黟人也黟在近代多樸學而君少承家教獨一以

黟縣四志

卷十四

雜志 文錄

三

朱子爲宗其從于公至南陽因于公罷職閒居相與講學  
不忍舍去間求于公爲繼述堂記叙君志行詳矣余與君  
相別數年宣統紀元君膺保薦授職知縣分發山東余乃  
復與君相遇君因出示于公所作堂記俾余書其後余謂  
繼述之大者在忠孝于公紀君言先世讀書者少自君大  
父以質行教子孫而君與叔父繼之今同居三世無間言  
方于公在鄂撫任內患病君聞親往問視及北事起于公  
議率兵入衛招君佐軍事君聞命不辭其後雖不果行而  
義氣尤足感人君每語及時局則慨然發憤嫉世之遺親  
後君者其平居持論如此故與于公相契尤深于公又稱



君胸中無世俗絲毫計較而因以程朱之顯其親相勗夫  
立身行道揚名於後世君固已有其基矣由是而勉盡忠  
孝充其學行之所至如于公所稱終成一代偉人其繼志  
述事不更大哉請書此以爲後記憶同治癸酉余隨侍先  
人興國州署嘗一拜萬先生見其道貌偉然今忽忽已近  
四十年先民不作學術日歧而余之不學而衰如此余能  
不有愧於胡君耶

杏墩記

胡元吉

黟居萬山中城小如勺溪水環其東北蕭梁時先太常公  
鑿渠引水經城中綿亘屈曲以達於橫岡至今賴之太常

黟縣四志

卷十四

雜志 文錄

三

父子俱祀於社明初吾祖來居城南淮渠之上誅茅築室  
編籬植杏土人名其地曰杏墩載於志乘迄今六百祀墟  
煙相接昔人種杏之處渺不可尋惟渠流清徹映帶其下  
而已國朝乾嘉中族介人先生始斤斤思表章之以顏其  
居并題其所著曰鈔兵燹以來老屋半欹遺書就佚而邑  
人猶目余家爲杏墩胡氏先生力也昔宋范成大嘗乞孝  
宗書石湖二字以榮其居近宋尙書犖亦乞聖祖書西陂  
以題其別業先生以老諸生窮愁抑腕力所不能又不及  
發爲文章以爲此地增重蓋知先生之志尙有待也陶靖  
節曰今我不述後生何聞元吉爲先生族子讀先生遺書



惴惴焉懼先生之志不復白於後人也作杏墩記勒於淮渠石上

慶周堂記

江 煦

堂之有記昉於柳州記新堂而祠堂之記則權輿於曾南豐記顏魯公祠也慶周堂者道光丁酉歲先大兄玉田所署蓋冀如周之八士也維時我諸昆思此取義穆然意遠謂古人將營宮室宗廟爲先早存建造之志以妥先靈遂於公業羨餘分年積累置田業造家塾需費不貲迨同治之季經始光緒三年告竣素志能償諸兄常命紀顛末以示來茲忽行年七十有六矣爰掇言堂簿云

黟縣四志

卷十四

雜志 文錄

三

澹園羣芳吟燬兵記

余良弼

先大夫喜植花木園地雖窄約計不下百餘種春夏秋冬香生不斷更嗜吟咏園中所植各繫以詩編輯成帙名澹園羣芳吟詎遭兵燹散佚花木亦毀且盡粥不諳詩復累食指何能步武丁丑年由柏山移館支祖心六公祠祠地寬廣圍以短牆督課之餘惟天惟喬陸續羅致分別栽培亦有百餘種欲繫以詩生徒課卷點竄不暇乃日復一日年復一年花甲旣周古稀將屆值興學堂士皆改途館中僅蒙童十餘人向之日無暇晷者今雖精力漸衰枯腸可以搜索榛蕪嬾剔繁卉尙未摧殘於是卽所栽培成古今



各體詩若干首名續澹園羣芳吟俾人知先大夫之澹園羣芳吟也俾人知先大夫澹園羣芳吟之燬於兵燹也俾人知澹園羣芳吟燬於兵燹彌不欲并澹園羣芳吟之名悉歸湮沒而因有續之之舉也嗚呼不克償願於壯歲猶能畢業於暮年先大夫澹園羣芳吟燬於兵燹而無存而澹園羣芳吟之名得未悉歸湮沒僉知先大夫有澹園羣芳吟此卽弼之志也夫

重修京師黟縣會館碑記

胡朝賀

國家輿圖一統列聖相承教化覃敷雖山陬海澨士多能文而京畿爲首善之區四海文人學士莫不志切觀光故

黟縣四志

卷十四

雜志 文錄

三

各省府州縣皆創立會館在任京職不難賃屋而居若需次銓曹及應鄉會試者必有會館始獲賓至如歸且藉以敦桑梓之誼也黟縣會館自鄉先達汪首禾中丞日章偕諸鄉先生創始規模宏壯章程妥善冀垂永久以邑紳之官於斯者歲整理而修葺之其本末備載邑志嘉道間族祖遜農太守元熙族叔書門業師積城并官部曹後先捐貲開拓且以餘屋賃諸人歲收其貲累積至六百金後因經理者不善金與計簿皆失去朝賀於道光庚戌以選拔應朝考見牆垣舍宇已有損壞維時同學孫春山孝廉雲程春棠孝廉尙椿先予在焉因與其謀時館中僅有西偏



餘屋賃與休邑程用和主政誠賃金僅敷祭祀門役諸費予三人乃合出小貲畧加補葺蓋損壞未甚薄力猶可支也及同治甲子赴春闈至館則損壞已甚矣同應禮部試者爲汪竹琴浚舒董園帷黃業南銘鼎黃藍玉樹田王黎書家瑞及予共六人然皆力不從心惟擇其緊要處稍爲補綴旣而念舒西園觀察之翰昔年從予遊近因從戎攝甘省藩篆遂函勸修理西園本以寒素從戎而性嗜義答書云弗敢辭然軍書倥傯不暇也迨癸酉以公事赴京乃鳩工庀材經營半載費朱提六百兩有奇始完好予因念西園之尊人桂圃封翁堯義與予有戚誼素多義舉今西

黟縣四志

卷十四

雜志 文錄

三

園見義必爲可謂能象賢矣會館所以便鄉會試及需次銓曹之人西園橐筆從戎承乏攝篆至京其偶然者耳乃獨以數百金繕葺會館視一邑之事如己事若此豈可多得乎顧會館中隙地尙多若能造小店舖十餘所賃租於人以爲歲修之計更可永久不壞然西園亦絀於力也時際兵燹之後闔邑瘡痍未復固難得此大力之人後此人輩出冠蓋紛來有志者竟從而成之以固始基於勿壞不惟補西園之所未及抑且與首禾諸先達後先輝映予實有厚望焉爰銓次其事以勒諸石

遊小劍門記

邑人 汪承恩



古今遊覽者舟車所至多在通都巨邑之區名山大川之境而遐陬僻壤之勝不與焉地以人重人跡罕到天若寶之如十洲三島終成其自勝而已吾黟之南地名小劔門擅一郡之勝峭壁摩空急湍奔注棧閣連雲簾泉霏至北爲樵貴谷西有李白釣臺其他靈跡實多未可以更僕數余嘗一至其間舉而問諸當世知之者十無一二焉噫可慨也已士君子懷抱利器埋頭蓬戶不能表彰於世亦猶是耳吾將使長房縮而置之通都巨邑之區又將使愚公移而遷之名山大川之境而猶曰人無知之者吾不信也是夕夢山靈讓之曰蜀道以路當衝要爲五丁所開鍾山

黟縣四志

卷十四

雜志

文錄

三

因地形勝爲始皇所鑿今吾幸居荒僻韜晦自安而子必欲顯吾於世何其謬哉老子云神龍以難見稱故至人貴潛子亦聞之乎予方笑謝俄而野鶴驚眠恍然而寤一燈熒熒不知身之在書館中也

琅坑硯石記

邑人

汪承恩

硯石之美者曰端溪曰龍尾夫人而知之矣吾邑之琅坑產石尤佳山深地僻世罕知者道光辛卯蛟水驟發崖傾沙漲益不易得友人盧某求之數載僅獲其一規以爲硯試之良善余閱硯多矣莫不質堅而色澤比注水研墨輒不適用非麓卽滑耳欲求所謂端溪龍尾者皆不近似尙



安得佳品如琅坑者哉今年夏得殘石一片縱橫不及五寸下銳上豐苔蝕蘚繡初不知爲硯材也棄之花圃間未幾雨淋日炙浮垢盡去瑩然粹然露其本質亟命工琢之一如友人所獲無少異什襲而藏愛逾拱璧甚矣博物之難也使余不見友之所獲則無以辨石之美惡石不殘缺見棄不遇雨淋日炙余又何以見石之真故夫穢硤燕石世多寶貴遂見良玉之見棄矣夫良玉猶遭見棄而况殘石乎雖然硯求適用而已苟不適用將琅坑之不顧又何論乎端溪龍尾也哉

重修漁亭石橋碑記

宣統三年季春月

姚國儀

黟縣四志

卷十四

雜志 文錄

三

漁亭橋全黟石梁之巨擘也初本兩橋東曰永濟西曰通濟中央間以沙洲旋因洪流暴發沙洲衝刷殆盡於是有害并之役當時橋并而名未改今仍兩存之從其舊也然一橋兩名稱謂嫌於贅累故通稱曰漁亭橋黟之河流至漁亭始能容舟楫而交通便惟交通便故漁亭爲邑之最大鄉鎮且爲七省之通衢而橋之關係特重乾隆六十年間永濟之工纔畢通濟之工旋興旋又有事於合并孳孳不已至再至三將勿爲此歟自乾隆至今又歷百廿餘年矣此百廿餘年中雨之淋日之炙漁翁敲火舟子曬罾與夫行李往來車馬之駢闐雜沓其浸尋而剝蝕之者將不



止水滴之微而咸同之交官賊對壘此橋常當攻守之衝  
刀矛之擊撞礮彈之突轟震盪搖撼又有倍蓰於尋常者  
其下爲舟楫所經擦磨而過更無一日之或無然則橋欄  
之半就醜頽橋跟之漸形滲漏夫固勢有必然夫其關係  
重大既如彼情形傾危又如此興修興修曷容緩矣予往  
來漁亭垂五十年月必一再至至停駐三五日或十餘日  
不等每過此橋不能無動於念惟自顧綿薄無能輸巨款  
以爲提倡又迫於賤役無暇朝夕從事殆所謂橋工者故  
往往欲建言而未敢歲癸卯本鎮十分銷與汪君綬卿創  
議興修首先謀於余廣文桂芬及予予久懷此志聞其言

黟縣四志

卷十四

雜志 文錄

三

極力慫恿并擔任勸募時則本鎮舖戶認捐若干本邑城  
鄉紳富商舖又認捐若干約計僅得半數逕鳩工伐石從  
事矣蓋慮美舉之中輟也逾年汪君出募所短猶巨又逾  
年予偕余廣文介姚孝子出募計得的款若干橋工遂僥  
倖葺事橋之修廣狹長短一仍舊貫惟橋心稍高取便於  
溜水此非古拙今巧倘亦幸借鏡有資耳是役也自光緒  
癸卯年興工至宣統庚戌年工竣計捐款收入若干支出  
若干總其綱者汪綬卿君董其工者歐陽衡甫閔緣兩昆  
季經理銀錢者十分銷十分銷者曰同福曰鼎隆曰元泰  
元昌曰義盛義生義達曰永新永泰昌元茂漁亭埠鹽業



之分銷店也所奇者此十分銷其居停其商夥不過偶然  
集合於此鎮乃能同心協力竟此巨工此殆見義勇爲根  
於天性故不覺聲之應而氣之求歟抑予於此有感焉黟  
山邑採石易石梁爲至多矣然於漁亭橋未逾二百年而  
動衆勞役者四蓋無有焉或者石質之堅凝有所未逮然  
此限於地利之無可如何以人事濟地利之窮後之君子  
與有責焉予喜夙願之得償故樂爲濡毫而記其顛末如  
此

西田李氏祠堂記

十四代孫

李則綱

吾族旣修譜之明年議續建宗祠於鶴山之西戊午秋始

黟縣四志

卷十四

雜志 文錄

三頁

事庚申秋落成首爲寢廟複以閣東西爲夾室正中爲堂  
偏爲廡前爲門又前爲堦背坎面離修九丈廣三丈六尺  
崇如廣之數廟之後方別築一室度諸雜器廣如堂修三  
丈有二尺環祠東西道皆甃以石糜銀幣萬元匾堂之榜  
曰德啟取周史伯加以以德可以大啟之義懿乎盛哉自  
古在昔大役之興先求其次度其地次量其力協其時  
有其人無其地弗臧也得其人與地而或絀於力戾於時  
猶弗臧也今祠之建當家君譜族後接以杯酒倡爲斯議  
族之耆賢父行如霖川羣從如鑑泉筱川柏青皆躋其事  
於焉余兄弟董其役而與九振如棣乾等爲之佐人効其



用非道謀也堂址距鶴山里許天豁地闊是曰西田其脈自九子山委蛇下垂如展軸如縵波前望山城天然圖畫丁巽二峰左右立而漳霽雙流匯焉卜云其吉矣族百數十人服家君一言罄橐傾籬不日而土木之費釐然具足於是伐石於岡度木於山陶人梓人應召而至上櫟覆瓦宜雨宜晴又適值家君倦宦之年林下居多暇日用竟其事此又贍於力而當其時者回溯吾祖自元季由祁遷黟之鶴山歷十餘世而族始大至清康熙紀元爰建宗祠於山之麓堂曰敬德居爲地限族以裔遷一拓於溪灘再拓於西田子孫蕃衍未艾視鶴山幾倍之於戲有吾祖

黟縣四志

卷十四

雜志 文錄

三

其人而局於地後又或嗇於力或奪於時更數百年其艱若此今得其人得其地又得其力與時吾祖之庇大矣莫爲之前雖美弗彰莫爲之後雖盛弗傳豈偶然哉天或將以昌吾李氏也譜以明宗法祠以奠宗祏載筆驩忻諗後人知作堂之始勿忘所自云是爲記

西田松鶴亭記

松鶴亭在松嶺鶴山石亭甘村灣天官里西田六村之下距城五里亭爲方式四向有門南北則跨大路以利行人其地舊有磚瓦窰附近各村以挖泥取土易傷地脈故備欸收爲公有民國某年六村將窰墩剷平築壩建亭蓋一



則免藏垢納汙一則可游目騁懷云

復山汪節母李太恭人建坊記

胡燮梅

夫不知其婦視其夫不知其母視其子既知其夫又知其子其婦之能婦母之能母可知也而况婦之能婦母之能母者得之其夫其子之所述云云而况婦之能婦母之能母不止得其夫其子之所述且得之芳鄰汪君汝綸李君春華等徵詩啟更得之表仲余秦瑤孫簡廷之口講予故知之甚詳焉繫維恭人當結褵之始孝重闈敬夫子和妯娌睦鄉鄰賢挂人齒頰所最難者當鏡分釵折之時際困苦艱難之頃卒能維持調護奉養高堂無懈無闕送終盡

黟縣四志

卷十四

雜志

文錄

三

禮無間人言撫幼子以成立含辛茹苦二十年如一日其節孝猶有足重者歲戊寅戚族爲之請旌建坊於漁山之麓學使祁公獎以額曰貞松慈竹惟恭人之德足以當之予嘗道經其處瞻赫赫巍坊煌煌天語輒爲之咨嗟歎息低徊留之不能去詢諸父老猶能述其軼事嘖嘖稱道弗衰益信表仲之言爲不虛而芳鄰汪君李君等之徵詩啟與其夫其子之述爲寔而可據也噫恭人之能婦能母可以爲我黟之爲婦爲母者勸并可爲天下萬世之爲婦爲母者勸其關係豈淺鮮哉故樂而爲之記

衡公祠記

十五代孫

余良弼



祠堂之建立所以妥先靈而隆享祀非徒爲聚族人議族事排解勸懲之所也憶自始祖角一公卜居城西建祠曰一經傳至四世房一公房二公合建種德堂規模濶大氣象恢宏洵足廸前人光遺後人休五世輒分九房越數傳支丁盈千各房半建有祠我房心六公會項無多僅置小店屋數間四時祭祀缺如也惟於東街製棉花店中每歲除日新正上七供奉心六公容像囂塵湫隘已覺不堪婦女樓上行走褻瀆尤甚先君子五中歉然道光年間始得購此棟宇於後進則升高焉於前面則圍以墻焉築了了削憑憑指示監督并飭老僕進才佐工點水不沾歸於省

黟縣四志

卷十四

雜志 文錄

喜

約以濶會項旁有餘地擬爲六世祖建孝子祠彌時方七八齡追隨左右猶能想象其大畧乃心六公祠成先君子咳嗽漸劇猶復約集各支開明祖先分別宗祏位置詎知事未竣而溘逝適夢巖兄由禮部致仕歸請碧陽書院主講山長題主先靈於是乎妥享祀於是乎隆先君子魂兮來歸度亦於是慰矣無何粵匪蹂躪十餘載門壁折毀牆垣坍塌彌於光緒元年掃榛蕪除壅塞鳩工庀材嗣而葺之戶牖庭堦煥然一新於是集眾議復隆享祀妥先靈祭期祭品仍悉如舊惟春秋二祭尙有邊席暫停不備俟會項稍紓然後議補逾年彌由江柏山館遷於是喜圍牆內



地空濶督課餘閒培養梅柳桃杏丹桂翠柏紫荊芙蓉修竹芭蕉廿餘種繁植雜卉點綴其中足增氣象而供眺覽心六公祠較各房祠別有佳致焉尤有望者維持祀會充足有餘追念前徽顯揚靡已餘地尚在能補前人所未逮爲六世祖建孝子祠與妥先靈隆享祀集族丁議族事排解勸懲與心六公祠後先輝映豈不懿歟豈不懿歟

重修向辰樓記

余良弼

樓名向辰者拱北也建自前明爲瑞竹園月形已峯發現挹秀之區故名曰望月亭道光中葉風雨摧殘遺址猶存有意復舊者未果成議光緒丙申自攀榮致仕歸百廢俱

黟縣四志

卷十四

雜志 文錄

三

興越明年丁酉集族人士議修向辰樓僉謂我族支丁蕃衍人文蔚起游膠庠食廩粟者頗不乏人惟有科甲遠遜疇昔正宜此時重加修理增復舊制屬予作文以記之予觀夫城西北隅勝狀佳景則在高城一山自縣龍蜿蜒而來平岡一片端立尊嚴城隍廟豎造於此因是曰城隍山爲我族種德堂屏障北風者斯山也迤西門二世祖等墳塋之發脈者亦斯山也亭亭挺立崢嶸呈秀者月形之文峯也七月旣望大工告竣樓上供奉文昌星焉平巒聳翠上出重霄飛閣流丹下臨無地時惟季夏節屆中秋族中人士設筵斯樓酒酣耳熱興高采烈人神之和允洽少長



之樂胥同憑欄俯瞰一水拖藍翹首遐觀則天都黃山峯

名究在筵前引瞻仰望則太乙北極星名如在掌握皓月

千里浮光耀金登斯樓也不有去國懷鄉心曠神怡者乎

極目四顧長烟一空城市村莊儼然蜂房溪濤似雷霆顯

聲雲山共長天一色風徐飄來芳草清而香幽幽月斜映

照嘉禾秀而影依依登斯樓也靈爽式憑肅然動恪恭之

念嗟夫予嘗求前人事蹟或見於一二者蓋有感乎太上

之不忘也

胡氏重建橫岡承澤堂記

清史館總纂

馬其昶

徽州之胡分兩宗曰安定曰明經安定之來自青州明經

黟縣四志

卷十四

雜志 文錄

冥

其先李氏唐亡避居婺源績溪更姓胡宋有雲峯先生講

學婺源考水建明經書院因以明經別其族然亦通稱安

定其自青州來者始遷祖為晉新安太守育愛黟山水之

勝卜宅橫岡居焉六傳至梁太常卿明星諫武帝事佛忤

旨告歸鑿渠引流溉田三千餘畝子孫蒙其澤立祠橫岡

之上春秋祀之明尚書程敏政為作承澤堂記即今祠址

也其後嗣散處黟婺源太平共十一派皆祖太常當明之

初有曰季發者始議修族譜至信陽令壽安而譜成信陽

以清節著劉念臺先生重其人嘗譜其行事以為世法承

澤堂之不已也亦賴信陽力至咸豐初構粵寇之亂而毀



今六十餘年矣其族君子友茹希蓮哲明等大合族舉首  
輸金議建統祠橫岡衆樂趨工不三載祠成堂廡階庭一  
踵前制當是時余友曰元吉敬庵者以學行用大臣薦爲  
令山東不幸國變棄官歸因得襄族盛舉於是僉曰胡氏  
之在徽郡如竹村樸齋以經學震海內然皆明經後其聲  
名文物之盛安定雖若未逮顧自晉迄今子孫傳數十世  
歷千餘載承澤不墜亦世所稀也其前之廢興有程記今  
幸祠成子之友馬君善爲文不可以無述乃來請吾聞敬  
庵之歸也以易教授鄉里易曰天地閉賢人隱賢人曷爲  
其隱也曰善觀天下者亦觀其勢之聚散而已聚則全散

黟縣四志

卷十四

雜志 文錄

頁七

則傾民之生也各有其地各本其族各具其心有血氣則  
有爭心以各地各族各心之人出營家國天下之事以遂  
其血氣之所必爭其潰散四出不可復收也決矣先王知  
其然也系之維之匡之直之制爲君臣父子昆弟夫婦朋  
友之五倫以綱紀之其不能不散者勢也而隱然有動於  
其中者焉萃渙之象皆曰王假有廟合萬國之驩心以祀  
先王天子之孝莫大乎是自天子以逮庶人等級不同而  
皆有廟所以動其惻怛不容已之誠也惻怛不容已之誠  
人人所同具也由是充之雖王天下可矣孔子爲之傳曰  
澤上於地萃君子以除戎器戒不虞又曰風行水上渙先



王以享於帝立廟夫立廟與除戎器並舉此聖人治世之微權散而聚之之術也而今之人乃惟恐其聚之不遽散也烏乎享帝立廟之事其終不可復見矣乎余感胡氏不忘其先而聯宗族書此以質於敬庵俾刻石祠中用示來者亦庶幾知所做云

記王華甫先生手書勵志詩後

胡元吉

右勵志詩城東華甫王先生淦書於碧陽書院以貽元吉者也藏之二十餘年裝潢成卷楮墨如新洵可寶也先生父康泰內行純篤以善書聞鄉里先生早孤家貧入縣庠爲附生志紹父業不應科舉每得古今名蹟廢寢食撫之

黟縣四志

卷十四

雜志 文錄

貢六

於董玄宰尙書尤有神契而臨池染翰又不拘拘於香光之法邑俞柏岑舒董園諸前輩皆亟賞之而汪子宜明經王松坪直刺同時負書名皆退然以爲不及故黟中名祠古剎榜書楹帖先生手題爲多雖然先生更不特以書重也生平守正不阿遇有闕範之不修青衿之佻健者直斥之不稍恕若能改行爲善則又憐恤之不暇至光緒季年邑中舉行自治衆推余君攀榮與先生至其事猶有素行端正衆望允孚之稱嗚呼如先生者豈可以一書家限之哉元吉肄業碧陽時喜夜讀先生方主會計一夕偶經窗前以指彈扉日夜闌且休勿過自苦也相與步遊西園秋



華覆砌蔓草啼螿院落無人月在梅梢劇談生平經歷久之不覺涼露之沾衣時乙未秋仲也明日手書勵志詩見贈此卷是己今先生年登九秩康強猶昔元吉志業不立宦學無成愧負殆不可言獨幸早歲歸田得追陪二三者舊於溪山明媚中鳩杖逍遙戲談往事以相娛樂陶然忘其滄桑之餘視淵明斜川之游殆已過之因展此卷并記其後亦以勵夫同志云爾

建造東門永吉橋碑記

進士知黟縣事

黃家甲

繼難繼之事其孝純成難成之業其功大勒諸貞珉永垂不朽宰斯土者誠不可以無詞黟治城東瀕河之上岸東

黟縣四志

卷十四

雜志 文錄

竟

西相距十餘丈前明舒翁志道捐千百金積歲月創建石橋以當章水濟行旅歷有年所康熙戊戌夏蛟水暴發梁遂圯嗣是佈石接木危渡甚苦有議建者以工費浩繁而止惟州司馬舒君謙吉慨然任之君爲志道翁賢裔性謹厚樂行善事尤好嗣先人業自戊戌橋圯旦暮以繼述爲已責而冢孫邑諸生朝岐嘗贊襄之甲寅冬命三子邑佐寧邑庠生健國學生願鳩工入山伐石取材乙卯秋聚徒興作朝夕董率凡十閱月而梁將告竣值丙辰五月中旬霪雨匝三日蛟橫水猛掃廬舍如風捲秋籜而橋復圯邑人僉喟然太息事之難繼業之難成若是乃君則志益堅



氣愈奮弗憚勞勩以要厥成功值費較倍加焉予往來斯土聞諸父老如此夫前人有善而後嗣繼之孝也况繼之不易耶前人垂統而後嗣成之不可謂非功也矧成之至再哉今君慨然力行是何作述相承後先一轍乎行見輿頌興歌懽聲載道固無待言者所冀邑人士履是橋覽是碑一舉足不忘先業一動念弗背先志斯又與人心繩祖武之機而可爲樂善好施者勸予是以悅爲之記且顏其額曰永吉以見斯橋之建與山並峙以常存者也君諱德兆謙吉其字邑九都人橋建於雍正乙卯之秋竣於乾隆丁巳之春例得備書云

黟縣四志

卷十四

雜志 文錄

三

碧山汪大本堂記

堂名大本飲水思源之意也基於黟西黃陂之前構於康熙之朝成於乾隆之時我族由井亭卜居於此始於七十五世祖葵卿公當時蒸芋濟衆煮豆賑禽迄今猶膾炙人口此後人崇德報功所以修其祖廟也文學之士代不乏人爲鄉賢爲名宦可見地靈人傑有我祖大德宜其有我族大本易曰王假有廟致孝享也周禮曰君子將營宗室宗廟爲先詩曰弈弈寢廟君子作之我族祖祠邑人推爲領袖堂額之義蓋以人生有自來如木之有本冠之以大迥非規模狹隘者所可比後自洪楊之役曾文正假館於



此謂吾周游名勝未見有我族祠氣象巍巍碧山倚於後  
靄峯拱於前斯真夔乎莫尙矣嗟乎以文正之賢足跡徧  
天下其贊賞如此後遭寇匪焚燬盡爲灰燼我族之貧弱  
由此而起雖族中支丁繁衍提倡重新祇以經濟困難欲  
前且却至光緒中葉族祠幸有薄產暫議建祖座上廊迨  
一世而後風雨飄搖將有大廈欲傾之勢於是集衆公議  
屢在惇大支祠開會討論焚香誓詞夜以繼日有一分之  
力盡一分之責於是踴躍輸將未及一月集數千金公衆  
以恢復舊觀不但大木難求卽落成亦不知何日建議仿  
造新式以妥先靈在祠支丁無不贊成公舉蘭庭爲總理

黟縣四志

卷十四

雜志

文錄

三

策六大芬爲監督雨生爲會計伯周岷瞻爲文牘熱心毅  
力堅持不懈特聘外面工程師創造經營三載氣象一新  
後世升斯堂瞻斯額尙知其所由來哉民國壬戌年記

萬山煙雨樓記

含山

張學寬

栗庵

昔子朱子結茅蘆峯之巔見白雲登入窗牖莫辨嘗詠之  
曰旣乏霖雨姿何妨媚幽獨寬三復其語而悲之而當時  
論者或遂以時人薦甚矣吾道之窮也天之生大賢不數  
生矣而又使曲折困頓以自放於山林宵藹曾不得效尺  
寸抑又何也吾友敬庵胡先生少誦朱子書深思力踐嗜  
若飢渴起家爲蒔澤令政平訟理百姓便之值改革事起



先生乃棄官歸而作小樓古杏墩故宅歌詠先王曠然遺世有萬山煙雨一詩人之句因以名集弁名其樓方丁酉戊戌寬與先生肄業省會嚴事吉林于公襄平趙公鷺時者方倡異說湖湘間先生獨被服儒者斤斤不失尺寸儕輩見之爲自歛暨同官山東曾未及期月遂乃循譽殷流達於遐邇而迫於時事遂欲以詩人投老其果有使之者耶夫古今邈矣而曲折之困頓之蒼蒼者顧若有成例焉滋足惑己寬之居距先生四百里許水陸數日可達乃因循牽率不得一至所謂古杏墩者然先生阻嚙道真初不以探賞幽勝相賓異則至與不至蓋不足道而極不忘者乃風雨如晦時也

萃英文社記

陳之澍

萃英文社爲靄門集益兩文會所合併而成先是嘉慶年間靄門之十二姓捐貲置田產建書屋於龍家磨地方造士培文一切章程行之妥善因遭兵燹息遜於前屢議踵行未果而城外之十五姓亦於己亥歲捐貲立集益文會欲俟息歛旣充再建家塾爲課土地蓋雖志切育材亦仍有待也葉君曉春吳君德瀚范君高晉維翰姚君聯達銘恭潘君立朝承烈第因靄門集益兩文會旣同居一鄉分之則力鈞不逮合之則事易舉行爰集二十七姓公議將



霽門一切屋產與集益各捐欸合併爲一曰萃英文社其堂額則仍聚奎之舊公立議約條規首重明倫實得三代建學之遺意末附積穀亦教養必兼也議既成諸君來請爲記其事俾泐石以示後人竊維風俗之成必由人才之出方今京師創設大學堂各行省暨府州縣均擬設中小學堂期臻一道同風之盛而諸君則已先自其一鄉始其會友輔仁之益敦族睦鄰之誼胥於是乎可見所謂觀於鄉而知王道之易易也余爲斯地司鐸有年方慚忝竊嘉諸君之志樂爲誌其緣起抑余尤有進者所願諸君多購有用之書俾多士講求經世之學庶幾有益身心有裨家國不徒沾沾於詞章科舉之學是驚將見人才之出風俗之成其效必有可觀焉

城外積穀倉記

姚銘棊

朱子社倉之制蓋仿周官委積之法隋唐義廩之規也黟最深僻歲稔不足以自贍故春夏之交往往糴貴而艱食光緒戊戌春沿江米商販米出洋夏鄰境遇糴邑中人心惶惶城鄉村鎮各設局以濟月餘然後定僉曰昔邑城有常平倉貯穀二萬數千石十二都皆有社倉各貯穀六千數百石同圯於兵燹無存以致有過糴之憂者正同人議復社倉舊制邑侯周適奉大吏札辦積穀於是各都急創



斯舉依舊規模惟一都向分城內外茲吾城外勸捐貲建倉屋於立川之陽買穀積倉豫備凶歉者歲未荒按戶口派領推陳入新歲偶荒出穀以濟本鄉庶有備無患而一切散歛掌守之規實事求是永宜遵守施行竊願有治法得有治人可垂久遠而無弊爰將善士輸金及規則列左以冀後之好善爲懷者推廣斯舉於地方更有裨益也故記之

葉特珍先生半春園記

胡存慶

先生高士也足跡絕不履公庭清末敘州判未就旋卜地於南山之麓方廣百餘步闢爲園顏曰半春清流帶其前

黔縣四志

卷十四

雜志 文錄

三

屏山障其後山川幽美極一邱一壑之觀園內爲楹三軒敞靚潔雖不尙藻飾頗得雅人深致庭前盈砌羅列花木棋布四時景色馥郁繽紛幾謂其萬象皆春矣左有隙地築垣周匝專爲栽花種樹之所其西北隅護以迴廊綴以雕欄方春三月雜花生樹園林景色點綴一新飛禽鳴聲上下有若笙簧時與一二佳客流盼怡顏樂而忘天下事雖然先生之以春名園吾知之矣春爲歲始萬物之所生也物不可以終藏故假之以和暖之風膏潤之雨溫煦之日以發洩其精英而馭蔓蘆薺之象卽孕於句萌甲坼之時特精華勿使驟發思留此九十韶光以養以育以延其



良辰美景正如壯者之方韶當從事以培植教誨其氣象方興未艾故祇曰半此先生持盈保泰之旨也先生靄如春和含光不露其後嗣綠葉朱榮含苞綻蕊將又有熙天曜日鋪蒸發榮之一時園特現象焉耳園作於民國戊午春成於冬凡十閱日余爲述其顛末

### 頤園記

頤園者南屏葉丈振聲觀察所築頤老之園也觀察仕閩中宣統間一宰德化政譽殷流見天下將亂歸養於家卽里第之左爲園編籬種竹鑿池蓄魚池之上有亭翼然繚以朱欄雜植花藥不芟不縛任其天然更拓其西曰又一

### 黟縣四志

#### 卷十四

雜志 文錄

三十五

村因其地勢高者爲坡坳者爲池曠者爲樓奧者爲室疎籬曲徑週廊繚繞而築亭於中央兩園之間卉木交蔭豁然以朗而高者闡然齋也齋之基旣崇而其閣更超然下臨羣木之杪前環武水背倚南山東則萬松蔽天濤聲遠聽西則古築茅崗夕陽返照紫綠萬狀每春秋佳日耕夫饁婦往來種作悉可指數環所居數十里之溪山雲物皆可玩於几席之下其所以怡情適性頤養天和者蓋將有得乎是也猶憶癸丑孟春攜琴訪觀察於園中觀察喜甚折柬邀里中耆舊程清耆司馬何笠農觀察李蔭青直刺注意誠明府置酒園林盤礴竟日誦老氏之嘉言彈猗蘭



之雅操彬彬乎香山洛社之遺觀察欣然謂元吉曰吾名斯園固有取乎幽風介眉之義也子其爲我記之退而沈思乃知觀察之所以養者大也昔杜少陵窮愁轉徙寄臥草堂慨然抱廣廈萬間之志司馬溫公出入將相身繫天下安危退居洛下名其園曰獨樂一若蕭然物外與世無求者蓋君子處世進則養人退則自養孔子贊易至頤卦於豕發養賢及萬民之旨而象傳又推其本於慎言語節飲食則養德養民詎有二道哉觀察早登仕版遭逢世變年未耆艾休養歸田蓋已協養正貞吉之占矣使其躬際休明久於其職則大庇寒士澤普萬民其所養不又更宏

彰縣四志

卷十四

雜志 文錄

三

哉因書以爲之記癸亥孟春杏墩胡元吉謹撰

明東洲公畫像記

何閏生 梅先

公諱其灼

省誌宗譜均作鑠

字晦之號東洲戶部員外郎性豪俠

幼貧舌耕養親年五十游於淮爲當道所器重總理兩淮鹽務今子孫所居曰鹽客上者地以公傳也所致家資分給猶子造石梁於桐城至今往來者且嘖嘖頌東洲橋不置此外周親濟戚拯困扶危善舉不可殫述邑侯陳旌其門曰尚義嗚呼我公之後葉茂枝蕃甲於一族而書香尤稱盛焉未始非公之遺澤長也相傳公所建支祠規模異常宏敞祠前爲汪某田素忌我戒勿售公亟購之其人故



設詞以相難曰無已其銀如禾苗數乃可公立如其言招  
之來某見田中無慮數十百禾苗其根際皆白金燦然乃  
大驚異書券焉嗚呼公之豪概不於此見一斑哉祠爲劫  
火所燼後人就地重建已非狹隘者比然視昔僅居其半  
四圍遺址可驗也歲正月例張公以下列祖畫像於中予  
小子隨族父老衣冠瞻拜見公生氣凜凜有令人肅然起  
敬者惜絹素歲久磨滅亟命工重摹之經營慘淡幸未失  
眞配汪宜人像亦然嗟乎公去今已遠矣然其生平義行  
猶赫赫照人耳目省志家乘足徵信也畫旣完因採而爲  
之記俾我後之人瞻其像卽知其人而慨歎希慕於不容  
幡然覺悟乎是爲記



銘

李爰得先生生壙志銘

江蘇全省學政

王先謙

爰得翁獲葬地於黟南五都舊庵實中段瑤山帶其左鍾山倚其右前臨大溪是曰武水原於武陵以達浙江其地重固阻深孕靈鍾淑精識之所未選愚士之所不究一旦發露自翁則相與聚觀驚歎歸美致福光緒十年翁奉高祖父母父母葬其中伯叔父母以下十人東西附餘地貽後人從葬其中之左築壙二爲翁與妻余夫人他日葬所取魏風樂土之意刻石墓門曰爰得我所無齊侯無死之悲而有張子吾甯之樂古有達士翁足當之矣壙旣成以

黟縣四志

卷十四

雜志 文錄

三

屬余銘翁姓李氏名宗煥字輝亭晚遂號爰得安徽黟縣人以商成業入貲得官江蘇補用道雖邇榮利處已猶約力於種德不私其財行事多違絕可稱誦易曰善不積不足以成名翁身隱闔闈之內心超塵埃之表其耆義也甘而赴之也勇一息尙存孰能竟其所至若取目前一二美行以爲章顯崇褒之具是隘翁也吾闕而不書以俟百歲後之紀述翁者其生年世系子孫亦不具茲文云銘曰天生善人以爲民紀出澤寰區處濟州里施無大小賤知所周華力而止不問其酬苟補斯人百齡猶短我私我利其死也晚予昔語翁翁曰匪然無窮者志有盡者年擾擾



一塵蚩氓何責但力吾爲而心吾適予偉翁語百世之儀人皆是則世奚不治天佑滋闕地靈爰顯表營有辭惟用勸善

余公茂春世伯墓銘

時霖 兩農

望出新安世居賢里三諫蜚聲四賢鵲起祭美於宋昭顯於唐枝繁葉茂源遠流長香繼詩書代傳軒冕五百餘年弓裘載衍誕生我公抱璞含真一鄉善士百里賢人族誼敦誠友于情摯恤寡矜孤輕財重義濟困憐危善爲恐後運米平糶窮黎惠受游心於淡味道之腴不求聞達不損窮居確露易晞駒光難繫俄騫山壽長悲川逝安其體魄黟縣四志 卷十四 雜志 文錄 竟

黟縣四志

卷十四

雜志 文錄

竟

貽厥令名生而爲英死而爲靈一生行誼百世儀型沒而不朽敬述斯銘

葉公克勤暨德配孫夫人墓誌銘

胡元吉

乙卯秋九月初吉葉君孟荷奉尊公振聲所撰王父克勤贈君事狀過余書堂拜以告曰先大父之葬有日矣家君命芳暄求吾子之文表於墓土用光泉壤敢以爲請再辭不獲乃按狀云先君諱勳字克勤姓葉氏世居黟之南屏

村同父兄弟六人先君居長年弱冠佐父理家政習商賈業於休甯之萬安街購地立肆拮据萬狀而業以隆家亦漸裕未幾粵匪擾亂與市人集團設防身先殺匪然竟以



積勞膺咯血之疾無何黜又被兵乃攜家避入山中迨亂定歸諸父皆成立授室先祖甫卒先祖母命析產各自治業先君得江西洵口鎮布肆亂後資財空竭先母斥首飾佐之經營之初辛苦殆倍於在萬安街時至今子孫繩繩衣食能足者皆基於此也生平篤於內行孝友純備又勤於爲善而不欲有其名凡遇興造賑救之役無不傾囊先之父老尙有能言其概者光緒壬午壽終里第距生於道光庚寅享年五十有三先母與同歲生後二十二年卒享年七十有五先母自幼聞外祖孫公靜存之教動必以禮先君患咯血十餘年瀕危者再皆先母左右侍奉調護有

黟縣四志

卷十四

雜志

文錄

三

道得稍延年壽先君既卒教不孝新鈴嚴而有方新鈴賴以讀書入膠庠食廩餼爲宰官吾母之賜也自愧碌碌無以顯揚不得已援例入官奉檄知福建德化縣加花翎道銜增三級封贈四代先君得贈通奉大夫母封夫人先母尙親見之而先君竟不及見矣嗚呼痛哉子一新鈴孫四芳暄芳曷芳暉芳旺曾孫四玉煒玉澡玉朗玉楛今以乙卯十月吉日卜葬於邑黃家山之原用妥先靈以亡妻孫氏祔狀如是宜爲銘銘曰

惟贈君之仁兮壽未登乎期頤惟贈君之智兮而才抱未竟其設施豈修德之不報兮抑天道之難知曰維積累之



久且大兮斯其發而逾遲彼長林與邃壑兮材乃鬱而挺  
奇觀後昆之蔚起兮知懿美之昭垂綿德音於無窮兮來  
者尚考此銘辭

黃嘯伯墓誌銘

胡元吉

君名瑞蓮字少白嘯伯其號姓黃氏居黟南之黃村父樹  
田兄啟蓉並以文學官知縣君年十六父命服賈江西彭  
澤之馬當非其志也馬當濱江山水奇秀而荒僻特甚市  
塵喧囂無可與語乃恣意於吟詠繪阻風馬當圖題詩見  
志桐城陳澹然彭澤高軒舉侯官黃嘉爾皆聞聲訂交詩  
名日盛而貨殖之業荒矣家人皆咎君君夷然不屑也光

黟縣四志

卷十四

雜志 文錄

三

緒丙午遂去馬當復居潯陽以醫自晦名其廬曰韓隱時  
年五十矣與浮梁汪龍光上虞潘普恩及同邑孫奇胡蘊  
山詩酒唱酬無虛日普恩爲梓其詩以行今所傳韓隱廬  
詩鈔是也君生仕宦之家而性甘淡泊不治生產晚年境  
尤奇窘君固恢恢然自謂山水朋酒之樂視古人不多讓  
也其曠率如此壬子九月十六日終於家年十五配郭氏  
子三孫四仲子之蕃娶元吉從妹弱冠時謁君於里閭癸  
巳與君遇於江上君攜酒飲馬當山絕頂見波濤洶湧仰  
天太息木葉紛飛慷慨談兵謂高牙大纛尋常事耳旣乃  
歔歔流涕而罷己亥元吉授徒城北姚氏草堂君策蹇過



訪淹留信宿賦詩紀事意趣猶未衰也逮國變歸來君扶病見過悲滄桑之變易悼歲華之不再悲慨淒涼無復人世之望臨別以銘傳相屬初猶以爲無可如何之天聊作感慰之語乃未數月凶問至矣若預知者異哉悲夫君竟以窮死乎自古詩人少達而多窮其理耶其數耶曷不越夫古所云耶君葬有日家人來請銘銘曰  
茅岡西坡一邱獨崇松楸鬱鬱下有幽宮惟君精魄永閟此中過者彷彿嘯月吟風勒銘表德垂諸無窮

清封奉政大夫在元治府君暨配程宜人合葬墓誌

銘

程定保

黟縣四志

卷十四

雜志

文錄

三十一

府君諱聯洪字元治唐越國公華裔元諱致道者爲黟王簿遂家焉幾世至葵有二子一生八孫一生五孫都十三支爲縣著姓考尙基子 人府君居長性孝友仁愛滬爲通商巨埠華與洋優劣市易頗因銀質參差多受虧折僉謀抵制合力組織公估推舉府君綜理其事中外商界傾心信服勞勩致疾命哲嗣賡續辦理乃養痾里居常以勤儉持家而於地方義舉輒傾囊助無所吝如修葺宗祠建築橋梁導達溝瀆開通道路以及救災恤患匡困賑貧鄉之人受其惠者咸稱道弗衰德配程宜人性行淑均動循禮法當府君外貿宜人侍事衰翁實能盡敬盡孝當是時



洪楊煽亂蹂躪徽郡邑人練團防守軍需孔亟宜人慷慨  
脫釧助餉急公好義允非尋常巾幗所能及故人謂府君  
之得以發箸起家者實宜人內助力也府君生於嘉慶十  
五年八月初九日卒於光緒三年十一月二十日享壽六  
十有八歲宜人人生於嘉慶十五年二月初十日卒於同治  
二年九月初七日享壽五十有四歲子國藩字樹屏後府  
君一歲歿孫汝升曾孫德宣德敷德新元孫誠孝女一人  
孫女二人曾孫女一皆適名族汝升時以窶窶未卜歎然  
於懷恪循姬周祔葬之禮於府君歿後三十又二年十月  
十二日敬奉雙樁封墓於琴上之陽事竣屬定保爲銘定

黟縣四志

卷十四

雜志 文錄

三

保與汝升爲僚婿知府君事稍詳雖不文曷敢辭謹述梗  
概以俟采風君子有所攷證庶不以斯文爲諛也銘曰  
君子之道出處兩端處則爲善士出則爲達官與其仕而  
名不立孰若隱而名永傳府君宜人梁孟賢修德施惠自  
生前身後吉壤獲牛眠章水之波瀾碧山之峯巒山迴水  
抱龍蜿蜒鬱葱佳氣護雙棺千秋萬禩固且安銘詞紀實  
題高阡願後之人昌熾而綿延

贈光祿寺卿銜直隸補用道舒公墓誌銘

仁和 譚廷獻 仲修

公諱之翼字星階號習軒姓舒氏安徽黟縣故家咸豐間



避亂湖北黃梅孔壠鎮因家焉曾祖諱德庭祖諱文爵父

諱堯義以公兄弟貴並贈資政大夫曾祖妣胡氏祖妣胡

氏妣王氏並贈夫人公兄弟四人伯之翰仲之翔叔之翹

公其季也幼而岐嶷讀書通大義年二十一補博士弟子

時天下騷轉潛拮据公平居勵四方之志慷慨輸家財

助餉部獎以同知選用會伯兄受陝甘督部穆公辟不遠

五千里毅然隨赴先是未嘗一日越里衙也至未幾鎮番

縣寇警羽書日夕至穆公議援難其選公請行以年少猶

豫急廼遣之而城中兵寡且羸賊悉獷悍環攻幾殆公疾

馳至慮與角必敗廼間道出奇兵盛夏酷暑力戰十晝夜

### 黔縣四志

#### 卷十四

雜志 文錄

#### 三十四

城卒以全捷聞穆公恨知公晚奏請免補本班以知府用  
明年計功予補缺後以道員用賞加鹽運使銜光緒五年  
候補直隸大府委辦省垣四關米廠七年隨辦山陵差奉  
旨加一級尋委辦守望局旋調辦水利局自是知公才者  
不獨穆公矣天津飢籌賑以非公罔可董其役者重委之  
公整躬率下力矯積習日夜按冊周給吏不敢私民廼大  
歡佩公勿諛既以海運功賞加二品頂戴再辦賑勤恪有  
加焉十二年委督催山陵調祭查道未一月督部李公委  
辦雲南轉運電務罹瘴毒遂卒時十一月二日也距生年  
春秋四十公之瀕行也同寮咸憐公顧而嘻曰丈夫避艱



險國家奚賴別妻子滬上遂行甫抵剝隘從者多物故或請適普洱暫息普洱公叔兄之所守也以公事未畢勿聽其侃侃矜名節如此既病劇從者失措公喑曰局促若鄉里小兒奚爲者懼行耳毋溷乃公卒亦無有去者其能盡人力又如此以是鮮有敗事公好施與少事父母有至性則其植本厚矣喪聞天子軫惜贈光祿寺卿銜詔所在給船舉傳歸其家賜錢物治喪宗黨榮焉丁酉冬十月二十八日公葬期也黃梅上沿鎮張英樓北公葬地也銘曰英英舒公志行絕羣經才以學考德則仁公功在甘公澤在津于邁斯溘炎炎蠻雲蠻雲終古公胡不振誼士永歎

黟縣四志

卷十四

雜志 文錄

三

弱一幹臣令聞千禩上壽貞珉

題信孚公生壙誌銘

黃啟蓉 芙初

壬子五月予居聖廬叔祖信孚公手持一軸示予展視則所拓生壙誌銘也予伏而讀之齊死生遺形骸其旨遠矣蓋我公少遭家難壯歷仕途晚稱善人於鄉里其於盛衰窮通之理循環消長之機靜觀有得感慨係之故其胸次高曠有如此者徵諸往事與生索輓章壽陳凶具者其何以異而予更有進焉者世俗惑於堪輿家言而吾郡尤甚蔓草荒原遺齒滿日妄以枯骸希冀福澤綿歷年代朽骨無歸慎孰甚焉今公此邱距故廬不過里許一望平曠風



景依稀不沾沾於堪輿家言而鬱鬱佳城一邱一壑死而有知其樂何極公之此舉蓋實足以式薄俗維世道若僅以曠達稱公猶未足以盡我公也今日者滄海橫流天荆地棘四海九洲渺乾淨土矧予鮮民之痛風木含悽繭足荒山窀穸未卜泚筆書此彌覺泣然矣

余公夢巖府君墓志銘

胡元吉

府君姓余氏名毓祥字鳳文夢巖其號安徽黟縣人也進士歷官禮部郎中誥授中憲大夫始祖子良系出元余忠宣公十一世孫甯爲安慶府學教授甯生長旦長旦生景位府君祖也贈朝議大夫配范氏封恭人父德治贈中憲

黟縣四志

卷十四

雜志 文錄

三

大夫配李氏封孺人同父昆弟四人府君最少甚鍾愛幼有偉志倜儻不羣年十二父使學賈非所欲也握算故悞乘除持衡操量故誤銖兩升龠督之則曰非兒所願願讀書父喜乃令就傅喜夜讀默識日則遊息徵逐爲文自闢蹊徑不拘拘於傳注又好博觀凡醫卜歷數堪輿家言靡不究覽以故久困童試年二十四始補博士弟子員嘉慶癸亥父憂服闋負笈江西從李工部春田學工部賞其文而憫其貧越明年甲子舉於鄉丁丑成進士授刑部主事京秩故清冷秋曹尤甚惟提牢一差稱最優且遷轉速尙書邵清安公欲以昇之力辭薦劉公韻珂自代尙書曰得



無畏難耶曰非敢畏難第初進不欲越次以速官謗耳卒不就尙書益重之在部引經決獄案無留牘旣任主稿事尤煩劇每退食家人見其若有所思叩之慨然曰獄天下之大命也審慎出之猶恐有失吾懼處理之不當也恒默計之以時補救耳西域戡定回首張格爾械京師獻俘禮成奉命承審監刑晉階一級時以爲榮道光初元有旨擇萬年吉地侍郎吳暄奏請從行力陳地卑濕不可用人告後寶華峪果水滲宣宗震怒嚴旨逮督理諸臣更命大臣禱恩詣東西陵再擇因前議驗復請以從乃定卜龍泉峪卽慕陵也又爲惠藩卜地穴向定矣以穴

黟縣四志

卷十四

雜志 文錄

三七

左有塚不忍平之問側向吉否贊曰吉王如此存心天固已相之王大悅旣營域乃顏其室曰培方寸地而作記焉府君浮沈郎署垂三十年淡泊寡營服食一如儒素其妻荆釵布裙雜家人傭作見者初不知爲官眷也由刑部主事遷員外郎再遷禮部郎中秩滿敘知府不欲外任乃解官歸歸十有八年卒年八十有六咸豐八年也葬二都瓦亭府君多隱德貧時除夕遇債逼垂死者解衣生之越明年適獲雋鄉里以爲美談又購地於邑之漳溪將葬其祖已啟穴矣地鄰林姓來言穴成不利於其族卽讓以爲閒田余氏本著姓祀產豐腴爲典守者侵蝕殆盡府君毅然



訟於官易其人更定規程孤窮有養荒歉有賑施棺掩骼  
至今猶世守之痛祖父景位歿於逆旅貧未能返櫬解官  
後年已八十矣親往江西浮梁迎柩歸葬人稱其孝黟考  
棚書院規模宏敞皆其手定云娶胡氏封恭人繼娶汪氏  
封宜人子兆元浙江候補同知孫汝楫汝梅汝杭曾孫紹  
曾縣學生元吉少時父老多談府君軼事耳熟焉歸田後  
拜其遺像於家與紹曾遊益悉其居官措施之大歲丁巳  
紹曾奉行狀來請墓銘禮不可辭銘曰

黟山峩峩兮漳水湯湯中有哲人兮德音孔長青年通籍  
兮皓首爲郎仕雖不顯兮道則彌光吉卜 慕陵兮忠鑒

黟縣四志

卷十四

雜志

文錄

三頁

天皇名室題記兮誠格賢王德邵福臻兮壽而且康邦之  
耆舊兮國之賢良嗚呼斯人兮可祀於鄉黟山之原兮瓦  
亭之岡崇封四尺兮實君之藏銘以表德兮子孫莫忘

節孝胡母孫人墓誌銘

桐城

姚永概

黟縣胡元吉官荷澤知縣值國變棄官歸里奉母九年母  
孫孺人以壽終既逾年葬於其邑某鄉某原乞銘於其友  
姚永概孺人諱茂林年十八歸同邑胡君廷玉閱三年而  
寡元吉方在娠上有重親而祖姑病盲性嚴切孺人先意  
奉將時致所喜親故常使愉悅如是者十年元吉既補縣  
學生有名聲安徽布政使于公蔭霖按察使趙公爾巽走



書聘爲敬敷書院學長于公巡撫湖北移河南以元吉從  
聞孺人疾走歸孺人怒曰兩宮西狩中原告警此何時乎  
于公報國汝當報于公不去吾且不藥元吉行反豫于公  
歎曰子母處茲皆賢也而母尤難能趙公總督兩湖應詔  
薦元吉得官辛亥秋孺人寄書諭之曰危不可去變不可  
從遜位詔下元吉乃歸孺人生七十二年而卒親賓咸嗟  
悼乞者過門亦泣子一元吉孫三榮先榮芬榮萱曾孫一  
貴菴銘曰  
母之懿嫩彰以子子之大節全以母生於斯里歿斯里有  
石完完其永久

黟縣四志

卷十四

雜志

文錄

三

清誥授通議大夫江蘇補用道鄭公墓誌銘

涇縣

胡韞玉

公諱恭字菊舫其先歛人也元末有諱晏公者以教授來  
黟十三世諱永濟名題彰善坊公高祖也曾祖嘉喜樂善  
好施崇祀碧陽書院崇教祠並載志乘父啟達以懋遷起  
家贈官通奉大夫公生方襁褓值庚申之亂田廬蕩然贈  
公長厚忌之者構訟落其家旋下世境愈窘太夫人以女  
紅佐之得不廢讀光緒己卯登賢書庚寅成進士籤分刑  
部改官知縣得江西之永甯巖邑也地瘠民頑山路崎嶇  
盜賊伏焉戚好尼之公曰不治朝歌焉知虞詡下車後訓



士課農通工惠商事必躬親朝夜不遑息期年政成衣食足而民俗於變闔邑人安亡何湘粵匪起蔓延及永甯勢張甚永甯城斗大匪數千人分三面環之礮聲徹天地彈下如雨公率鄉兵開城馳擊城上老弱鼓噪助勢殪匪頭目一人羣匪不虞其驟至也皆相驚以走自相蹂躪公追擊之捕殺過半永甯數萬生命得免於禍論者不多公之勇多公教導有素能用民於臨時之頃也以功陟知州己亥遷臨川臨川教堂林立號稱難治公與教士約謂宣教爲我國所不禁政權必不容干預乃按律懲其尤不法二三餘皆懾服用是民教相安庚子歲鄰邑用全力保護教

黟縣四志

卷十四

雜志 文錄

三

堂往往變起倉卒臨川則行其所無事也清廷試行新政公在臨川首先設中小學堂創辦書報社以開士風又購美國鑿井機器振興農工商業戴星出入一如在永甯遂以嫻新政名於時公曰政無新舊惟真能愛民者始能惠民會清廷開經濟特科李侍郎昭煒以公名應詔辛丑和約成江西教案賠款以廬陵爲最教民報復案至千百起株連至數百人大吏以公能奏使治之公至多所平反省釋無辜保全良善者衆地方以安甯廬陵幅員遼濶丁漕積弊深徵收不及四成公首除吏胥包庇於城設清賦局鄉設分徵局舉公正士紳經理曉以納稅大義逾年踴躍



輸將三載考績列入異等充癸卯科江西鄉試同考官所  
取多知名之士乙巳以候選知府升道職分指江蘇入覲  
時各省路權正劇公乃與同鄉京官縱論路權關係之重  
侃侃而陳衆爭違之皖路自辦之議遂決一切章程皆訂  
自公手旋出京李京卿經方以襄辦皖路留公駐燕察視  
路線不避寒暑有以節勞請者公弗聽竟以是嬰疾而卒  
時光緒丙午三月十三日也年五十七著有萱蔭山房文  
集十卷詩集若干卷隨筆二卷藏於家公初娶李未二年  
卒繼娶王子五長祖康福建建甌等縣知事次祖庚日本  
鐵道學院修業生三祖慶福建省視學四祖蔭津浦鐵路  
管理員五祖庭經商女二長適汪次適王孫五當公  
之知永甯縣事而擊匪也太夫人囑王夫人曰吾將與  
城共存亡望爲我善事姑夫人揮涕諾之圍城之中一夕  
數驚上慰姑下撫子女以交瘁致疾而卒公亦終不復娶  
公三子祖慶字積孫者往歲與同官閩省今來海上出行  
狀請曰先嚴慈已合葬於本邑陽干山之陽墓誌未立人  
子之疚也謹請君銘之

銘曰隆而穹維公之宮旣安且吉以昌其宗

中憲大夫儒林郎太倉州州同姚公墓誌銘

潘 陛



予既權黟合訪邑之耆舊聞姚先生樹芳者邑紳國儀之祖省議郎宏甲之曾祖也先生生際盛清士非科舉不進時則與同里俞孝廉理初余部郎夢巖余處士雪江皆讀書勵行並負時譽孝廉研精考據處士隱居陶情山水放意爲詩歌惟先生與部郎各孜孜於經世先生試不第甲科士屈於州倅然其學術官績在在皆繫人思稱之者不以四人異趣少貶也噫是可以風矣邑修四志甫成國儀懼紀載先生者不盡因持狀來請曰儀祖歿垂八十年銘幽之文猶闕焉有待敢以爲請謹按狀誌之先生姓姚氏諱森字樹芳號春山一號春杉黟之城東人宋巖州刺史

黟縣四志

卷十四

雜志

文錄

三

那公卜居休之賀川是爲先生遷徽始祖越十五傳慶輔公遷黟是爲先生遷黟始祖以世居東門故稱東門姚氏曾祖文元妣氏胡氏余氏胡祖爲琳妣氏金氏程考兆憲例贈儒林郎妣氏金例贈孺人世有隱德兆憲公三子先生居次生有異稟閭邑號神童年十四補博士弟子員性孝友鄉里無間言家世寒素十五歲卽訓蒙贍家教學相長慶輔公墓址被侵十年不得理會名翰林某公來守郡下車觀風得先生文大賞按訛時尤嘉先生丰采訟事遽直中式道光辛巳恩科鄉試四薦春闈不第授江蘇通州州同恭惠廉明安良除黠鄰封巨盜以戢辛丑大水爲災



飢民將蠢動威壓恩解市肆以安大府書上考調太倉州  
州同謝病歸民攀轅不忍其去年六十六卒於家先生爲  
學不苟爲同異與理初夢巖數子者交游當其欣然有會  
靡不快焉自足其講求天下利病一法乎亭林躬自刻苦  
策勵後進更以孫夏峯戴東原爲宗從之學者多成名以  
去家居訓人不爲高論嘗曰寒士讀書外無事業孝友外  
無道德勤儉外無生涯在通州擴充善堂特建朱子殿在  
鄉里公造考棚首議建碧陽書院勸捐輸定規程士林至  
今利賴生平博極羣書執事罔不精能志稱旁涉地理特  
其一端耳生於乾隆庚戌年九月十四日歿於道光壬寅

黟縣四志

卷十四

雜誌 文錄

三

年十一月初六日敕授儒林郎以曾孫宏基任內二次覃  
恩誥封中憲大夫葬祁門縣七都十保巖山大塢里桃樹  
嶺配吳蒸人子二必源必清均貢生孫七人曾孫十四人  
元孫現十一人來孫現六人銘曰

炎炎威隆絕詩禮源流無斷竭華實千春榮吉穴

雪廬銘

黃次功

胡取於雪昭其潔君子居之不可涅噫吁嘻炎炎滅隆隆  
絕行吾素不附熱世之人合汚同流謹謝曰是亦弗屑



表

胡昇平先生墓表

徐鼎康

皖之南多山嶺澗谷崎嶇之險自宋以後名儒大師往往輩出土生其鄉鑽仰私淑自振於一時蓋至今尙未有艾黟縣胡君敬庵粹然儒者不與今世士同流學於程朱之道數十年如一日嘗爲長白于次棠中丞蔭霖山左趙次珊制軍爾巽所推重宣統間曾一出爲山東荷澤宰悃悞愛民循聲載於遠近敬庵之弟文伯材行卓茂與予相依歷關內外數千里二君生於名儒大師之鄉奮於山嶺澗谷崎嶇之中官學終以就立不誠足爲當世稱哉今年冬

黟縣四志

卷十四

雜志

文錄

三十四

文伯敬致其曾王考昇平先生葬記乞爲文惟鼎康與文伯交久今來官斯土又習聞敬庵之行誼樂其邦之有賢士大夫其可不論次始終而詔之來世乎按狀先生諱國泰字昇平先世自青州徙安徽之黟縣父德興祖奇祝曾祖肇闕家貧爲商賈貨居以自給先生性好義輕財有古人風雖經紀市廛而不屑屑於自殖配吳太君嘗服苦以樵蘇紡績佐之荆布終身無華美金銀之飾信乎可謂以濟物爲功留貽子孫者厚也先生卒於道光己酉後十年吳太君卒以宣統己酉始合葬於先塋之次子三人孫五人曾孫九人玄孫十二人昔王介甫謂歛之爲州在萬山



中黜尤賢士大夫之所萃至今敬庵方以純儒篤光前烈  
文伯且將赫然爲世用曾謂衆望所歸能蔽於巨嶺層巒  
也乎然則先生之斂德弗曜以與世之奪利厚殖者計焉  
又何歉於彼耶爰表以遺之使鑱諸墓上豈特顯胡氏而  
慰其子孫乃亦以貽其鄉里

程君麗泉墓表

胡元吉

自元明以來取士之法一束以文藝而魁傑不羈之倫無  
所出於其途或有託而逃或沉淪以老此論人才消長者  
往往抱無窮之感喟也以吾所邁程君麗泉者殆其流亞  
歟君諱明銑號麗泉山宋顯謨學士邁之後貌魁偉性豪

黟縣四志

卷十四

雜志 文錄

三十五

爽有俠士風少喪父家貧無師學纔通章句年三十餘猶  
貧無立錫地粵匪之亂聞關至上海有甯波絲商延三肆  
務爲之累金鉅萬商卒子少不儉戒之不悛辭去堅留不  
可於是置酒餞君奉千金爲贖君曰吾豈爲此茈茈者爲  
哉麾却之子身走石塘石塘者屬江西之鉛山地多竹居  
民製紙爲業君長子正鰲先設肆於此君至更加營度業  
以大殖石塘爲埠中貫大河河水深廣居人多病涉君惻  
然與建昌羅某倡議規畫以鐵纜連舟作浮橋設機司啟  
閉通舟楫需費甚宏集募不足罄已資過半以成之主計  
者以告君夷然不顧也其好義輕財不屑屑於自殖大類



是晚歲築新居於古杏墩畔別營精廬蒔花養魚肅然物  
外自以少時失學喜接文儒篤學之士虛懷延納游讌幾  
無虛日尤愛聽說史鑑間以所見評論得失往往高出人  
意表有老師宿儒所未及年八十時江西華廉訪手書風  
傳渭水以祝其爲名流重如此嗚呼如君者豈貨殖中人  
哉礪溪呂叟不遇周文則亦老於釣耳士之不遇古今同  
慨光緒二十六年卒年八十有三君沒未二十年天下大  
亂清鼎遽移平時以文墨議論掇甲科膺顯仕之輩率多  
如脂如韋不能自振甚或倒戈相向謂非以文藝取士之  
弊哉君旣不能以文藝就有司試又不屑納粟得官旣老

黟縣四志

卷十四

雜志 文錄

黃六

以子正福捐職州同銜加二級封如其官妻范封宜人子  
二正鰲正福孫三家棟家誥曾孫國華國章元孫式  
新以某歲奉君暨范宜人葬於某原元吉少與家誥同學  
猶及識君風範國華國章又從問字因其葬來請言念君  
之志慨而老於商於以歎天下魁傑不羈之士沉淪不遇  
如君者豈少也哉述君行事并敘吾之所感著於篇俾刊  
墓上用質諸世之知言者云

胡公錦華先生墓表

黃啟蓉

公諱學濟字錦華姓胡氏居城南杏墩世有明德明正統  
間旌爲義門曾祖德興父國泰少貧困父遠遊無以贍家



隨母采樵執爨以奉祖母有成人風十三學賈東流刻苦逾儕輩而凡所經理又克盡其職肆主人倚重之若左右手主人隸軍籍閒歲有運糧之役公兩代其行遵淮河過濟豫以達北燕往返數千里既得名山大川以開擴其胸次而通津大邑瓊貨山積隨所轉運操奇計贏利恒三倍雖飽歷風濤之險而治產居積生計亦因以漸裕矣公篤孝友而輕錢刀仲兄設小肆於馬當時力微幾不能交公以貲加入既擴大之又躬整理之業遂復振馬當瀕大江赭寇之亂一日數驚家屬又避亂來歸老弱之累商務之煩繫於一身公處之裕如無事則教子姪習書算有急則

調護家人洗舟他徙迨及轉危爲安而心力交瘁有非人所堪者非具濟變之才其能若是耶賊平後以肆析歸兒子而別設一肆以營業焉勤劬數十年家臻小康今子孫繁盛而膏火之貲婚葬之費衣食之源胥賴以不匱者皆食公之舊澤也公以光緒戊子年四月十二日疾終里第春秋七十誥封奉直大夫初娶吳宜人先公卒吳有弟落拓四方無音耗宗祀幾絕公物色得之俾臻成立以慰吳於地下其施於親故者此其一端也繼娶余宜人寬厚慈愛治家有紀後公十年卒子二人長廷玉文林郎早卒次廷龍五品封職皆吳宜人出女一適孝廉方正姚銘棊余



宜人出孫三人元吉山東荷澤縣知縣元鑑邑庠生山東高等學堂教習元良州同銜加二級孫女一適黃氏曾孫八元孫二今將以庚申七月二十五日卜葬於邑東之蓮塘吳宜人余宜人祔焉啟蓉不敏忝爲戚末夙欽行誼敬以所習聞者俾揭於阡並系以銘曰

水之源遠流孔長木之根實葉青蒼先號而後笑前沉而後揚固天道之循環而人事之靡常唯積德累仁施及子孫斯乃理之不可易所以作善而降祥東山之下古蓮塘川原清淑鬱松篁中有誼士體魄藏千秋萬歲樂且康伐石刊銘鎮山岡下訛后土上三光

黟縣四志

卷十四

雜志 文錄

三

李觀察墓表

遵義 黎庶昌

君諱宗熿字輝亭晚歲獲善地於黟南五都舊庵實中段奉其高祖父母父母伯叔父母以次十餘人列葬其中別於左方隙地自營生壙取魏風樂土之意刻石墓門曰爰得我所因自號爰得安徽黟縣李氏本唐昭泐王後至宋銀青光祿大夫德鵬始遷祁門南宋時有名定者再徙黟之懷遠鄉家南屏山下十七傳而至君曾祖諱文耀祖號世墀考諱高琳皆以君貴贈通奉大夫妣氏胡氏胡氏王皆夫人君爲通奉君長子粵賊之亂皖城不守倉卒與通奉君相失君號泣四求卒遇之山谷中奉迎以歸後賈於



外一日心動還家太夫人方疾革語人曰兒不歸吾不瞑矣言未竟而君至母子大慰是夕考終人皆以爲誠孝所格鬼神或相之云安慶之未克也君賈於銅陵大通鎮無幾何居積致富起家爲素封金帛流衍修業而息益贏然非意所樂通奉君旣沒愈泊然寡營於是專力爲善以佐縣官之所不及其著者如晉豫大飢輸賑金至數萬兩燕齊蘇皖粵西江右鄭州諸大水輸金又數萬兩銅陵江堤敗獨修七千數百丈以衛民田輸金亦踰萬兩彙刊徽州鄉賢遺集數百卷捐置各省書籍致之國子監南學及焦山書藏自餘若宗祠義塾書院賓興橋梁道路救生公惠

等凡世所稱善舉無不黽勉圖維累輸金亦數巨萬兩他人得一已足者於君固自視蔑如也禮賢好古晚乃彌篤造次必依儒者嘗語其子英元曰聚財而不散是愚也散財而必邀名是私也可以想見君之性質矣昔孔子與子貢論富必以好禮爲歸春秋時陶朱公三致千金再分散與貧交疏昆弟太史公以爲好行其德漢時河南卜式上書願輸家財半助邊復持錢二十萬佐徙民天子謂式終長者尊顯以風百姓君之富果視二子何如而樂善博施力行不惑至老益靡厭倦斯豈所謂富而好禮者耶其與陶朱卜式同不同未可知也君卒以光緒十七年九月十



三日春秋六十有四先是光緒四年論晉賑功敘秩至江蘇補用道加三級嗣是不復再與時榮配余夫人側室林氏丁氏子三長英元附監生分部學習主事次英亨出嗣君弟宗輝早殤次英耆女子子三人孫一顯謨英元以某年月日葬君自營之生壙乞長沙王益吾祭酒先謙爲誌銘而以表墓之文屬余余始與相知在日本時未及晤也光緒十七年余奉使歸國拜四川川東道命道出長江君自大通附輪舟修相見禮懽若生平至安慶而別不謂其遂止於此也今表君墓神明契許其曷有辭遂書行誼如右揭於阡原使後世有攷

黟縣四志

卷十四

雜志

文錄

墓

李觀察墓表

長沙

王先謙

皖之南有隱君子姓李氏名宗燭字輝亭先世出唐宣宗第八子昭王泐至宋銀青光祿大夫德鵬居安徽祁門之新田其裔孫定南宋時遷黟之懷遠鄉南屏山下遂爲縣人十七傳而至文耀是爲君曾祖文耀生世墀世墀生高琳義行具安徽通志高琳子二君其長也生有至性幼遭亂與父相失嗚號山谷中往來尋覓卒與父遇學賈懷甯忽思母亟歸則母病甚逮夕而殤人謂誠孝所感旣以居積饒貲設肆十餘用當其才千里外無能欺毛髮家日益豐君顧不自豪也出所有建宗祠設家塾貧老孤嫠月有



賜給以惠其族推而至於姻婭里黨所以軫恤之者罔不周助書院賓興費及它義舉數十以仁其邑人推而至於鄰邑及各行省凡有善事所以匡贊之者罔不力嘗獨修銅陵江隄七千餘丈大吏將入告請獎君曰財不散愚也邀名私也力辭大吏夙重君聽之光緒間山西大飢捐巨金振濟議敘道員分發江蘇贈三代二品封典而君不樂仕宦未嘗一投手版謁大府常買舟出遊踪跡徧江南北遇名勝古蹟流連信宿興盡迺去居銅陵大通鎮之荷葉洲四面環江輪舶往來冠蓋鱗萃推誠欵接務盡其歡無識不識皆知君之爲善人也君雖席履豐腴而自奉儉嗇

黟縣四志

卷十四

雜志 文錄

三十一

鮮衣美食屏弗御遇人子弟閑游侈靡必正色規之扶翼寒峻推解衣食多至通顯敬禮賢士聞聲興慕於鄉邦文獻尤攷求弗懈祀俞理初先生鄉賢刻其遺稿羅端良金正希吳殿麟汪南士諸先生撰箸皆重刊流布之余視學江西介蕭君敬甫來見語大驩留十餘日見余刻 皇清經解續編曰吾幸遇此不朽盛事立捐貲助焉逮余假歸月通書問必舉所欲刊播之書相商權其用心深長樂善不倦宜獲天佑以補世庇民不意奪之如是速也君沒以光緒十七年九月十三日距其生道光八年二月二十六日年六十有四妻余氏誥封恭人側室林氏丁氏子英元



縣學生分部學習主事英亨殤英耆幼女某某幼未字孫顯謨君嘗獲吉地於縣南五都舊庵遷葬高祖父母父母以伯叔父母諸人耐自營生壙於側題墓石曰爰得我所遂自號曰爰得老人其曠達如此將葬英元以書來曰知先子者莫先生若願有述也余嘗爲君生曠志銘迺爲文遺英元表諸墓道君它事多可俾茲不具最其大者

福任公德配潘氏孺人墓表

余毓祥

國家崇祀節孝貴能節而又能孝節未必孝雖可謂之節不能兼謂之孝然今之所謂節孝孝不孝非所問苟青年喪夫未嘗再醮則人皆以節孝目之嗚呼此顧名而弗思

黟縣四志

卷十四

雜志 文錄

三

其義名實相附則吾於福任族叔祖德配潘氏孺人見之矣孺人姓潘氏諱七弟性淑慎年二十適任公入門敬戒乾隆辛亥任公病嘗藥侍疾衣不解帶者數月及革謀割股未果任公卒家貧二子俱幼翁姑嘗抱西河痛孺人含哀慰之不敢哭忍痛於心致成咯血疾事翁姑則較平日尤加誠敬嗟乎婦人年輕孀守職或未盡翁姑每事優容沿習既深婦媳之對於舅姑自以爲與他子婦不同不能責其婦職甚者歲時伏臘人家共敘天倫之樂彼故搶地呼天使一家人不克成歡而後快安望其孝事翁姑曲承色笑耶孺人則以人之所恃以養老者以有子也今所天



既失二老猶在代盡子職舍我其誰於是足不出戶庭日以事上撫下爲務針線所入不給食用則以飯食舅姑及二子而自食粥糜其翁姑嘗與人言曰吾得此媳歸不啻增一孝女以視世之所稱爲節孝婦者何如也卒之日享壽六十有九守節垂四十年族鄰爲之請旌於朝宜矣茲以丙辰年四月十二日葬於西城外社屋山毓祥恐孺人之行年代久遠湮沒不彰爰爲樹石於墓以表其德云

清朝議大夫翰林院待詔銜郡學增廣生吳君墓表

廣東巡按使 李國筠 斐君

嗚呼是爲黟橫岡吳先生在東贈君暨淑配葉恭人之墓

黟縣四志

卷十四

雜志 文錄

三

也君諱序鏞在東其字吳爲江南古族居宣歙者皆系在虞山君之曾祖培隨祖庭柏父士朝世有隱德君起儒素少遭寇亂以名諸生授徒於邑東之倪家灣卽先儒倪道川先生講學處也君挹其流風故立身訓子遂有本末云中歲歸館里門弟子益進邑有碧陽書院經亂垂廢時邑侯常熟屈公承福議廣興之旣集事西川胡通議小農城北俞中書柏岑稔君宿學清望以院事屬君董其成君綜理精密不一年堂廡學舍以次完繕凡院中脩膳膏火賓興諸大費出納挹注悉復嘉道間舊觀士論翕然已隱植今日碧陽學校之基在院八年得疾就養於家又二年考



終光緒壬午十二月十六日也距生於道光壬午年六十有一配恭人葉氏有懿行子三光詔國子生封朝議次殤三卽吾郡遜庵司訓翔藻以邑增廣生員任廬州府學訓導女三皆適士族孫三孫女二余旣獲交遜庵復與同應諮議局之選欽其學行具有淵源遜庵又爲余述其已得吉卜於黔東之橫塘將以葬其先人是塘氣脈出於南屏山東行十許里盤旋札川中墓臨溪河兌山震向南望漁亭復巖諸峯列如屏展洵吉壤也余神往久之值攝官皖上每思行部南游尋白嶽黃山諸勝兼訪舊雨遜庵於桃源樵谷間倘得拜其先人之墓以瞻其所謂橫塘者乃時

黔縣四志

卷十四

雜志 文錄

三十四

方多故旋拜巡按粵東之命斯游未果遜庵旣畢葬事書來乞文國筠按士禮子孫追榮其親得植墓表刻石器爰據家乘證以鄉邦公言揭辭壟端豈以慰我遜庵亦以告黔學者知今新校之有自台肥李國筠謹表



誄

許雲琴先生誄

休甯 汪述祖

嗚呼賦稱窮鳥文人抱窘困之嗟食嘆無魚游士作歸來  
之想類皆名場拓落泣下第之唐衢知己寂寥哭窮途之  
阮籍未有名膺鄉舉厄貧無異於諸生交徧當途蹭蹬尤  
傷夫末路若我雲琴先生者先生嚮辰媚學綺歲煽華出  
通德之門稟詣經之教載達卅角能成北海之碑仁顯垂  
譽畢誦左神之賦年少推其若穎耆儒許其宏通探秘閣  
之鴻文三壁盡淮南之簡集選樓之駢句九張織仙女之  
機固宜振翼天衢道聲雲閣而乃運丁陽九世邁亂離白

黟縣四志

卷十四

雜志 文錄

三十五

雁興謠蒼鵝應兆揭竿煽虐疑草木之皆兵簞瓢捽茹慨  
樵蘇之弗爨段淮惟賣文自給朱詹乃吞紙充饑亦幾幾  
乎試太行之獮飼長垣之豕矣逮夫日月重光九壑清泰  
詔選蘭台之彥聿開貢舉之科河津之魚咸思跋浪冀北  
之馬莫不空羣先生素抱高才遂登上第春明屢試秋卷  
仍溫嘆巨眼之難逢亦壯懷之漸減於是屏居里閭葺宇  
家園希巢箕洗涓之風結冠鉞履絢之侶晨露沐硯夕蟾  
睜簾校七誘十醉之交通九流百家之學訪蘿談桂廉泉  
讓水之間脫帽友筇秋澗春林而外亦可以婆娑風月頤  
養邱園無如饑可驅人貧仍作客理錢江之權尋勝於西



子湖邊泛潁水之舟覽古於老君祠畔或佐蓮花之幕杲之獨著風流或談槐市之經楊震咸推物望締古懽於名士悉鳳舉而鴻軒踐宿約於勝區每風謔而煙問然而湖山雖好終戀故鄉松菊猶存言尋舊徑今年八月自浙遊歸以疾卒於里第嗚呼哀哉龍蛇入夢鵬鳥集舍如何哲人倏焉殂謝我聞盡焉旁皇中夜謹作詠曰

龍集癸酉年當大比帝簡朝僚秋試多士觥觥先生熟精選理燭盡三條閑意眇惜遂魁墨榜闈藝流傳古若子雲密若孟堅述時幼穉得睹鴻篇心焉企仰不盡流連意謂先生博雅無匹當世燕許爲大手筆出入承明簪豪畫日

黟縣四志

卷十四

雜志 又錄

三

雞樹分榮螭坳晉秩而乃鬱鬱屈抑高才神山屢近風引仍回才豐命嗇謂之何哉借使先生不位通顯買山有貲屢空可免壹意著書騁其雄辨自有千秋豈不甚善而乃僕僕奔走道途窮年橐筆頤頰以餬游歷三江遠泛五湖風塵憔悴不亦悲夫述與先生未嘗相見尺素先通獻詩一卷猥辱還答疊疊不倦余時弱冠方習駢詞先生謂我毋趨於歧必則古昔厲其庶而自時厥後京華寄迹蒼雁赭鱗音塵閒隔昨歲南旋冀親顏色值公未歸武陵作客相逢輒左勞燕各天維秋之暮公賦言旋行李甫憩館舍遽捐嗚呼哀哉黟山蔥鬱代產宿儒俞程往矣僅讀遺書



如何先生並世與居不獲覲面親炙猶虛嗚呼哀哉述也  
不才賦質爲劣謬荷品題項斯屢說默數生平言之哽咽  
敢效延年私誄靖節嗚呼哀哉

金奉直德培先生誄

何宗敏

維光緒三十年甲辰某月某日誥授奉直大夫金府君德  
培春秋七十考終於家星沉南極燈搖太乙之壇日薄西  
山杖化鄧林之竹嗚呼哀哉公諱起本字德培世居邑南  
鍾山苔岑同契孔李本屬通家譜牒爭推彭城實維望族  
生異常童幼稟至性年十二失怙重闈逮事孝養無虧因  
謀菽水之供遂輟絃歌之業用能廢著鬻財居積致富第

黟縣四志

卷十四

雜志 文錄

三

恐豐於財者或嗇於德厚於取者或薄於施府君則義重  
高衡利輕策彜裁大裘之萬丈覆廣廈於千間駿惠颯馳  
鴻施津逮請舉其大詳哉言之蓋其秉心酌榘制行如銅  
讀葛藟而庇及本根結枌榆而情殷洽比一邱埋貉詩爭  
唱乎秋墳中澤集鴻歎不聞於夏屋又况巒堪棲鷺藉鳩  
工以紓負擔之勞影可亘虹借鵲填以慰題橋之志修魯  
宮則士皆嚮化建鄭館則賓至如歸善難毛舉德比耳鳴  
洵無愧篤實躬行之君子也府君處閭閻中五十餘載身  
居市井而志在濟人道善經營而心存利物齋居多暇廣  
訂茶經藝術兼攻旁通藥性度金鍼於貨殖傳裏贈錦囊



於貿易場中多能雖本於性生厚惠不望其獲報荀子所謂美意延年者非歟繼配程宜人先月餘卒得年五十有四夙能靜穆修儀柔嘉維則鴻案相夫熊丸教子比施黔敖之粥指子敬之困莫不贊自閨闈助之簪珥仁風曲暢淑德昭宣宜其克家有子早蔚文豹之姿洛誦爲孫交苗童犀之角今者垂眉溢逝攜手同歸花因絮果了卻塵世浮緣日馭雲輶借踐玉清舊約嗚呼哀哉是用嘉其素行表之靈旂誰向有道而題碑且繼仲宣而作誄其詞曰  
繫惟得姓系出金天鍾靈孕淑代產名賢仁山道脈安節學淵休聲令聞輝映後先雖爲市人希蹤前哲林鳥含愁

黟縣四志

卷十四

雜志

文錄

三六

杜鵑嘑血重闈在堂晨炊暮缺束裝長征牽裾拜別驥足之展實維浙東取海爲錯因山鑄銅蒙異吳下豐宜日中高掌遠躡法孔雍容遇旣日隆德益日懋蓼莪思親桑梓念舊仁粟義漿無鄰不富愛日欽遲慈雲廣覆修德獲報必後必昌粹文成理桐蔭連行魯芹擷秀竇桂含芳恩綸疊荷志遂顯揚壽寓初開瑤宮早築將摧靈椿先彫慈竹駕並駉鸞車仍挽鹿鶴弔借來牛眠旋卜嗚呼哀哉鍾山月冷樵谷風蕭庚寒葵散長空寂寥龍蛇歲厄薤露魂消黃墟杳杳丹旒飄飄嗚呼哀哉

范母胡孺人誄

胡元吉



吾友范君朝遴之妻胡孺人者同邑胡貢生叔堅之女年十三因母病養於范越五年行合祔禮生二男四女孺人性聰敏嫻禮教既笄益習勤苦范本素封朝遴少孤及長溺志於學不屑屑謀家人生計產漸落補博士弟子以授徒自給間從商於浙之南潯孺人秉家政幾三十年婚喪祭葬之大縫紉炊爨之細皆躬親之艱難拮据不使朝遴知恐以家務榮心也事姑孝姑歿遂遣傭婦曾無一時逸豫因勞致疾年未五十頽然如六七十人晚年朝遴及子厚植厚禠等樹立業漸復境稍康而孺人以長女歸胡氏者久疾不痊三女歸姚甫嫁而卒憂鬱疾日漸遂以不起

黟縣四志

卷十四

雜志

文錄

三

年五十有囚病日瑣務猶時榮懷問疾者皆強起酬答焉厚植等聞信過歸尙諄諄訓誥神明不衰其生平處事最爲精詳凡族鄰有不協得其片言卽相悅以解卒後村鄰老婦有慟哭柩前曰人之云亡嗣後老身有事誰可與語云元吉與朝遴爲同門友數往來其家知其妻賢厚植厚禠又奉行述求余爲文以誄誄曰

三五道邈異說猖獗裂綱廢紀橫衍支離家風旣乖國祚因移粵稽往史睢鳩成詩晏朝怠政鷄鳴刺之棟家幹國匪異其施猗維孺人淑德昭垂來嬪范氏越在笄時冀懿梁案媲美前規惟朝遴君遭數之奇懷才未遇隱於蒙師



久客浙潯孤館淒羈維時孺人家政獨支娛親潔膳祭祀  
奉卮婚喪禮節伏臘饋遺細及井臼躬自操持處煩以裕  
履險若夷惟仁者壽謂理則宜天乎不爽數蘊莫窺有知  
德者攷此詠詞

范母江太宜人詠

胡元吉

甲寅秋深范子朝遴述其叔母江太宜人之賢并示其弟  
高瑞高耀所述哀狀乞作詠以彰其行辭不獲命按狀母  
采濟陽諱海府君之女也性溫柔幼嫻禮訓年十七于歸  
吾家先業素裕兵燹後祖居被燬而江西休甯祁門之商  
業皆遭虧折田園亦因之荒頓先君商諸伯父仍赴江西

黟縣四志

卷十四

雜志 文錄

三

修先人業而吾母操井臼理田園有條不紊家漸復舊至  
光緒甲申遂承先志重新室宇未幾先君因操勞過甚遽  
獲心血兩虧之疾於己丑夏棄諸孤維時瑞就商於浙耀  
尚在垂髫一切喪事均吾母支拄共和局肇東南大震吾  
邑旅外商人紛紛歸來瑞與耀以仔肩責重未得遽卸言  
旋吾母時切倚門之望抑鬱中懷忽得肝氣之疾醫治旋  
愈旋發今歲中春瑞與耀偕歸安葬先王父母仰見慈顏  
雖屬清減而精神未衰一切事宜猶稟命而行事畢吾母  
謂諸兄曰吾今年七十有二翁姑窳窳已安子姪輩均各  
樹立爾父兄弟六人各自繁衍男女百餘衣食得無缺爾



等更宜自勵丕振家聲卽吾異日歿後見諸祖先亦得含笑於九京也七月二十四日竟遭大故狀如是宜誄誄曰緬宜人之雅操兮幸懿範之昭垂播清芬於彤管兮起末俗之靡靡溯俛從於姆教兮嫻詩禮以爲師羅酒漿而助奠兮歌有齋以尸之迫于歸於高平兮義更協夫唱隨旣靜好復肅穆兮美矣德耀之風規彼奉姑與鞠子兮又中值夫亂離志愈勤而任愈艱兮節不逾夫險巖羌和順且慈仁兮備百行其若茲年旣耆而德彌茂兮蔚爲萬世之母儀膺封誥於清時兮曰象服之是宜喜孫曾之繞膝兮釀和風於庭幃子旣賢而克孝兮極生榮而歿悲宜妯娌

黟縣四志

卷十四

雜志 文錄

三十三

與族黨兮聞溘逝而涕洟懼懿美之不彰兮爰染翰以陳詞

胡節母孫太孺人誄

舒斯笏

維民國九年夏建十月四日胡世伯母孫太孺人壽終春秋七十有二嗚呼哀哉此吾同案友敬庵仁兄之賢母也王褒失恃門人並廢蓼莪嚴媼歸真鄰里咸歌蒿薤而況愚如不佞交締賢郎同奉泮水之芹共酌名山之藁有不向慈幃而灑涕思懿行以銜悲者乎太孺人產富春之望族歸安定之名門嫵婉明詩柔嘉習禮事上則羹湯致潔相夫而荆布常安豈期家本多艱所恨天偏見厄三年寡



鵠痛已摧心一曲將鄒聲尤酸鼻司馬侯騎箕倏去石麟  
兒就蓐初啼孤露樂樂淒風瑟瑟畫歐陽之荻母以兼師  
斷孟母之機織能督讀勗其忠孝澤以詩書甯願兒爲道  
德之儒不願子作功名之士牛刀乍試卽令速解金章龍  
戰方酣只合長爲木鐸慈雲有託化雨無私凡敬庵兄此  
日之師資皆太孺人當年之母教茲逢大殯恰近中秋望  
松楸而福蔭斯長瞻綽楔而恩榮備至竊比湘州人士濡  
毫題陶母之碑敢同沛國諸生和淚製桓婺之誄辭曰  
猗歟萱範允矣芳徽儀型巾幗樹表閨幃來嬪杏墩三年  
鏡毀心痛所天腹遺孤子孺人之孝善事尊章孺人之節

黟縣四志

卷十四

雜志 文錄

三十三

綸綍旌揚勤儉持躬雍和著額教子大經先崇忠孝子爲  
教習勉以表坊子爲幕賓勉以匡襄子歸省親孺人心忉  
恩急須酬疾何必問賓朋酒饌弟子饗殮具餐截髮無聞  
晨昏壺德惜惜僕指難悉載在哀章無煩贅述余交令嗣  
敢告孺人均傷孤露並歎不辰憶昔髫齡文場馳驟彼詡  
才華此誇領袖芹宮同謁米廩同分商量經史賞析典墳  
或竊甲科或膺首薦或厠軍曹或銓花縣京華論古談笑  
雍容詩推秋谷品重夏峯祖帳出都荷澤除拜臨別贈言  
無忘母誠果爲良吏政績紛傳倚闥老母聞此愉然清還  
旣終唐虞揖遜相印心心同甘肥遜賢卽出處慈訓克遵



重理皋比肖子莘莘嗚呼孺人光閭耀里德懋千秋壽逾  
七紀飛飛丹旄冉冉素旂神歸瓊島駕返瑤池厥後克昌  
龍荀鳳薛敬綴燕詞冀揚苦節嗚呼哀哉

胡節母孫太孺人誄

余燦藜

毛詩有云螽斯爾士女從以孫子言士女之有賢德必得非  
常賢子孫也夫清貞守志勤儉持家此婦女之常所可異  
者以非常之賢母教子成名追蹤畫荻足以光先德裕後  
昆也辛酉年襄理縣志於節孝一門加意採輯其中恪遵  
女誡者頗多求如孺人之處常處變接物待人端壺範樹  
母儀者實不數觀孺人生自富春歸來安定駒光甫週乎

黟縣四志

卷十四

雜志 文錄

三

三載鴛侶遽拆於一朝天實厄之謂之何哉然天正欲藉  
孺人以風世必先故爲厄之然後從而報之故遺腹生敬  
庵先生卽其驗也孺人撫養遺孤謹脩淑範勁柏貞松飲  
冰泣露孝事翁姑和諧妯娌無何翁躬謝塵寰姑日危盲  
昧且性嚴厲氣鬱心焦每觸於衷輒形於色孺人從容致  
敬委婉進詞必如其意以得其歡乃已日夕追隨左右視  
無形聽無聲十年來如一日教子必擇師出告反面無時  
不諳諳以誠故入庠序食廩餼詩書飽飫子史旁通步履  
常嚴言辭必謹粹然儒者直欲接紫陽之宗派焉當敬庵  
先生之應安徽布政使于公蔭霖按察使趙公爾巽之聘



四方學士咸樂得師迨光緒庚子于公撫湖北復延入幕  
贊機宜多所規畫旋聞孺人病劇馳歸甫入門孺人拊牀  
切責曰于公遇汝厚此何時也九廟震驚兩宮西狩于公  
報國汝應報于公不速返吾不服藥賢哉母也斯言可以  
驚天地泣鬼神矣和議定後皖省創立高等學堂當事延  
襄教務每伏臘歸省孺人必詳詢校況與學生成績學生  
之成就者雖先生訓迪之功實孺人勉勵之力也厥後朝  
命內外臣工保薦人才趙公以先生應其選引見後以知  
縣用授山東荷澤縣知縣凡以見孺人教子之賢以故寵  
旌廊廟額表門閭賢節之報有如此者至孺人平日服甘

黟縣四志

卷十四

雜志

文錄

三十四

荆布食共媪婢女布男錢仁厚時形於外梨租橘算苛求  
不具於中冠昏喪祭之大米鹽瑣屑之微賔朋酬應弟子  
饗殮爲之規畫不憚其煩又其顯焉者耳先生歸省之日  
則正孺人頤養之時天當鑒此賢節而加以遐齡逾古稀  
接踵而曰耄曰耄日期頤歷旬一度海內賢士大夫皆樂  
以宜風宜雅麗藻成篇躋堂稱兕紀其事實以表揚其言  
行詎意災罹二豎空勞和緩之良醫痛抱一門永失郝鍾  
之令範雖然孺人死而猶生也君子疾沒世而名不稱孺  
人觥觥懿德秩秩鄉閭芳揚彤管聲溢環球行看子而孫  
孫而子繼繼繩繩處則爲名儒出則爲循吏皆孺人遺澤



之垂裕歷千秋萬歲而不朽爰爲之誄誄曰

玉孕藍田珠胎赤水婦有賢德卽得賢子飽飫詩書旁通  
子史蓮幕風清滿城桃李出作循良處爲名士非藉母教  
曷克臻此孺人于歸甫閱三紀遽喪所天迺適何似飲泣  
吞聲冰霜堅矢訓子持家有條有理上孝下慈聲稱桑梓  
闔範觥觥不勝屈指日月爭光千秋不死嗚呼哀哉

胡節母孫太孺人誄

戴之傑

歲庚申冬十一胡母孫太孺人壽終內寢於戲哀哉踰年  
仲秋子敬庵徵君奉母柩安厝邑東先期受弔徵求輓章  
闡揚先懿敬庵自幼厭棄俗學從名師友遊研窮性理毅

黟縣四志

卷十四

雜志 文錄

三五

然思續濂洛關閩之遺緒後以所學知名出膺民社遭逢  
世變潔身歸養出處之際胥得其正可謂能不負所學者  
予交敬庵在三十年前晤面日少又彼此寂不通音問故  
知敬庵僅如上所述而莫得其詳今夏敬庵以母喪來告  
後又以節壽集寄示余讀母之行狀始知敬庵之學涵濡  
於母教者甚深而母之賢真足以風世吾鄉地鄰紫陽遺  
澤沾被雖婦人女子多能以貞信自守嘗檢邑志節孝一  
門所載姓氏多於他傳不啻數倍其中節之苦而奇者真  
可頡頏徃占名媛而爲他邑所罕有若母之矢志撫孤孝  
事堂上冰清玉潔垂數十年登之邑志中亦翹然特出者



而予所心折乎母者則尙不僅此世衰道微人罕廉耻往往有口道德躬仁義貌爲端人正士弋取聲譽旣而倖售其術於達官顯宦則又巧探意旨飾所學以迎合固寵及值小利害望望去之惟恐不速若當顛沛危亡之時旣已脫然弗與矣乃復激於大義不顧身家不虞險阻慷慨以急其難此惟古之志士仁人能之而今無有也敬庵受知于公可謂深矣于公撫河南其時兩宮西狩大梁危急敬庵以母病歸省非避禍也甫入門母則曰于公賢者也遇汝厚今事急公不負國汝奈何負公因拊牀切責激令速行於戲何見之明而斷之決也敬庵宰荷澤適丁滄桑之

鄆縣四志

卷十四

雜志 文錄

三

變世艱奇局新論高濶舉往昔聖賢所以訓世型俗者盡狹小而迂腐之故君子制行有以合乎古必見訾於今欲求免於今則大戾乎古乃母貽敬庵書先之以保境安民繼之以見危授命敬庵仰承母訓飛鴻冥冥不干世議昔顧亭林先生之母遭明鼎革絕粒殉國遺命厥子無仕二姓母之深明大義視顧何多讓焉或曰母之賢亦賴子之賢以傳不然特一節孝中人耳噫古之成仁取義者非爲名也母亦盡吾心之所安而已傳不傳豈所計哉夫誅以述德予精力衰憊不能措意文字而母之行甚愜予懷也乃奮筆而述其大畧若夫生平孝順勤儉及他懿懃敬庵



交游多賢士類能詳焉而予弗之贅誅曰

煙霾塞空日星晦蒙萬眎皆盲萬聽疇聰疾風弗靡荷衣  
獨製彼弁猶難矧屬巾幌光光賢母集蓼茹荼千鈞一綫  
撫此遺孤勗爾向學程門立雪勗爾擇友惟軾與轍巍巍  
疊山一代儒宗爲爾治裝千里而從學成名立舉比樹望  
慮爾抗顏詢爾校狀卓哉于公昌明絕學性命之契延參  
帷幄公節移汴汴方多事子歸侍疾母驅赴義牛刀初試  
陵谷變遷臣道子道勢難兩全貽書教忠爾供爾職毋擾  
方寸類彼元直蟬蛻污穢歸隱衡門馨膳潔餐長慰晨昏  
天雨嚴霜摧護於背詩廢蓼莪血殷苦塊於戲哀哉我慚  
鬚眉於戲哀哉

黟縣四志

卷十四

雜志 文錄

三十七

子敬拜母登堂載企遺徽載敷清芳向傳列女賢明節義  
母廁其間了無遺議坤貞千古否晦一時視我哀辭羞爾  
花翎同知銜試用知縣葉君少泉誄 汪 聲

公諱自忠字少泉同里黟縣人與聲同學於家塾京師者  
有年以納粟得縣令冀行道以表學也遼丁父艱終鮮兄  
弟奉繼母撫幼子理家政營商業遺大投艱責無旁貸然  
盛暑涼飈霜天篝火絃誦正未嘗或輟也迨清社已墟中  
原多故先後歸里伏俟澄清少泉奉繼母徜徉於考槃衡  
泌間桑柘雞豚宛然鄉里聲則歷齊魯閩嶠而鄂車塵馬



跡迄無寧歲其視少泉間曠何如耶少泉以蘄陽有肆創自先烈向爲少泉尊甫所經紀自見背後幾有人亡政息之虞少泉乃亟起力圖冀以不墜正不僅整飭其餘更營巴河肆以輔翼之其意倣擾無常非此不足以善其後也少泉天性純篤任事果毅其間往來漢上與聲儻居妻孥驩然晨夕靡間豈非聯逆旅之驩而極一時之快耶不意少泉以咯血聞竟至不起居常之推心置腹重以婚姻者豈非千古神交惟留陳迹其感係究何如也惟是范縝寡交輒尋王亮荀攸未竟有待鍾繇有嗣子之不凡奉遺言以相付杜陵哀淚半落行間諸葛生平厥惟謹慎聲正不

黟縣四志

卷十四

雜志 文錄

三十一

敢有負於少泉抑不敢爲少泉所負也乃爲誅實以勒貞岷其詞曰物尙孤生人固介立履信曷憑思順曷寘年在身疾攖心疾視死若歸明凶若吉藥餌靡常禱祀非恤係幽告終懷和長畢嗚呼哀哉敬述少泉丕承堂構巍煥先烈克昌厥後永茲窆穴光垂宇宙嗚呼哀哉仁焉而終智焉而斃黔婁旣沒展禽亦逝其在少泉同塵往世子紹箕裘不墜厥志嗚呼哉其垂奕禩以不敝



雜體文

胡壽安事實

萬姓統譜曰胡壽安黟人永樂間授信陽知縣清慎自持以憂去詩遺城隍云神若有靈應識我去時還似到時貧知新繁縣自種菜一圃以供日用人呼爲菜知縣滿秩去囊篋罄然惟有書籍布衣而已餘事見前志

書煙波樓藏印前

黃次功

族兄穆甫未達時出其手鐫示某鉅公公曰子之印佳矣能旁涉經史則所造必有進於此者從之不數年技大精名大噪延清芬室之印譜卓然名家是言也予聞之鄉先

黟縣四志

卷十四

雜志 文錄

三十九

生云雪廬再姪少年聰慧以善治印聞近錯列他人圖章爲一帙以資揣摩索序於予予閱之中以延清芬室爲其伯祖小蘭兄所作者爲最多精湛出色令人展玩不置昔人謂文國博胸中多數卷書故能開朝花以啟夕秀信然今之奏刀惛惛有俗心者盍鑒諸

黟山源流辨正

舒時亨

古人以黃山有三十六峯奇秀不可名狀其山石皆黟黑色遂取名黟山隸黟爲黟縣來龍而不知乃黟縣之去脉也至唐始知其誤因有黃帝煉丹諸古跡遂改黟山名黃山時亨按黟山託始於鄩昔者禹王治南條水至大鄩山



稱爲三天子都迄今猶有巨碑刻四大字存於山上但不  
知何人所立漢時以徽爲鄣郡實因此山而得名也鄣之  
南屬婺及樂平以廣信河爲限鄣之西屬浮梁東鄉下及  
景德鎮皆是鄣之東北向時休祁未分山地皆爲黟所轄  
跌楠木圈西武羊棧右邊先抽一枝至屯溪次抽黟縣龍  
九畝龍又抽龍至休城外東夾溪止正幹過雙嶺抽松蘿  
天竹又過查木嶺閃分入歙界而至金陵蘇杭皆從此出  
人遂以爲三天子都之應焉以上皆黟山之右支而直幹  
正過查木嶺起雲門跌湯嶺聳三十六峯東行至太平府  
及采石沿江而上皆黟山之正出者也黟山由西武北行

黟縣四志

卷十四

雜志

文錄

三臺

南抽一大枝過大鴻嶺分九華出池州逆回至湖口縣與  
匡廬會合作一大迎送中包江西全省之水出鄱湖沿江  
而下凡內外郡縣皆黟山之左派也秦分天下爲三十六  
郡惟時州縣無多婺屬浙西黟屬歙州漢武帝立爲丹陽  
郡駿公奉命治丹陽因愛黟山奇秀始遷春谷傳有三女  
登仙之蹟特以古今地名多異按我黟之吉陽現有三姑  
尖三聖潭三姑園名多可據則春谷在今桃源樵貴谷以  
內無疑據池陽譜謂駿公遷春谷上沂地名七井平原在  
石城東七十里又卜居歙州益山下卽石埭轉遷壩上其  
後仍分居七井是爲池陽始祖但黟山縱橫千餘里凡七



井石城猷州益山實黟山之內隴支龍卽池陽亦黟山之邊疆其居其遷可弗深辨亦可無容深辨第取仙蹟爲據可也

### 節婦金氏事畧

李則綱

金氏係予族兄昭錡妻也年二十一來歸越五歲而昭錡病卒無子遺一女家貧舅年逾艾又不善治生姑亦易視節婦夫有弟才十三齡昭錡病經年始殯節婦侍病久已羸瘁不堪夫殯後欲以身殉絕噉數日矣忽念舅姑老夫弟童駭孤女又呱呱在抱乃忍淚屏息強進飲食持家操作如常時勤撫夫弟遇孤女餉甚數年中舅姑幾忘喪子

### 黟縣四志

#### 卷十四

雜志 文錄

三

之痛及夫弟成立娶妻生子門戶有託矣無何姑與姊相繼病歿夫弟商於外節婦旁皇哀思治二喪如禮夫弟有子二皆未成童節婦愛若所生二姪亦依如慈母夫弟雖經商而事著貲不能時贍節婦朝秉農耒夕操女紅以助之嫁其女名門是時舅年七十餘耳目聾瞶手足不仁節婦視無形聽無聲杖屨羹湯侍奉周至雖至孝色養無以加焉迨冢姪冠夫弟命爲節婦後內外翕然又二年季姪授室婚禮甫畢而舅旋考終享年八十有四夫弟與嗣子皆遠賈必待訃來奔節婦哀率季姪親視飯含附身附棺維謹舅垂歿時謂人曰吾子婦金氏矢節堅且孝也設當



時竟殉吾子人猶賢之獨濡忍以代子職養老立孤勤苦至矣今冰霜之後再見陽春其孝節必旌於朝吾亦得以天年終復何憾嗚呼其舅之言如是夫何閒然節婦今年過六十猶健一門雍睦喜抱孫焉後必有大食其報者吾族人皆奉爲女宗云

李灶鑫妻王氏紀畧

黟十二都鼎石臺李灶鑫妻王氏鑫外貿無分文寄歸作苦度日無怨言光緒三十二年五月鑫病還家欲食鴉片王氏籌畫買食詎未食而溢逝家無長物僅存田一坵託族人代易洋三十餘元爲殮葬費事畢絕粒族鄰勸之謂

黟縣四志

卷十四

雜志

文錄

三

曰自來夫死從子我年二十有二未得所出苦衣食無藉非帶傭不能延生村居苦寒客民雜居不一幫傭於外雖矢冰清亦招物議與其死於昏昏不若死於昭昭族鄰因而防守乃曰諸人憐我適以誤我由是防守愈密知其買有烟土急爲搜出已去其半徧搜不可復得或謂僅只有此詎經多日防守稍懈離未片刻殪臥在床知吞烟土救之不生蓋其殉夫心堅將烟土分藏兩處其一處最密以令人難以搜出俾如己願續隨夢軒氏曰若王氏者可謂深謀遠慮從容就義者矣

余母江氏烈婦事畧



江氏孺人城西余榮翰公之德配也幼嫻姆訓常爲父母所鍾愛及笄歸翰公承順翁姑荆布操作頗有少君之風翰公有志仕進入京考取供事未幾卒於京遺孤未滿三齡孺人含辛茹苦日以侍翁姑撫孤子爲事同治癸亥粵匪擾黟孺人老憊艱於奔避爲匪所執厲聲大罵卒及於難時年六十有三族鄰以孺人守節三十餘年慘遭戕害咸哀悼而爲之請旌敬爲銘曰

姆訓克嫻翁姑心悅恨結青鸞撫孤守節劫歷紅羊詈賊濺血嗚呼孺人亦節亦烈

公祭姚在泉先生文

許懋和

黟縣四志

卷十四

雜志

文錄

三十三

嗚呼歲厄元枵枉折靈光春風爲厲喬本其傷庸庸者輩汝汝而亡於維先生身歿名彰先生得姓肇自陶唐暢本交於吳郡旋定居於碧陽少而岐嶷寢饋縹緗名父之子應坎爻之四索哲兄之弟獲師資於一堂筆挾天藻手織雲章聳觀聽於風動挹頰璧之水香維時先德計偕束裝孝廉之船屢駛長安之居爲常繫奉盈之在念乃攬轡而出疆坐必侍亦食必偕于京斯館左爲佐而右爲右就養無方孝思不匱道阻且長姑儷南金之貢藉依北斗之旁車乘下澤譽滿上庠嚴君筮仕公子隨行丹臺墨嶺之間旣來旣往白馬緋魚之治曰贊曰襄企別駕之前徽白水



允符清節驂歸鞍之後乘紅霞猶映夕陽因心則友德音  
不忘箎吹聲叶雁序翼張才與難兄以相埒行泯他人之  
闕牆阿龍超哉培詞林之根柢惠連健者轉夢草於池塘  
產析而荆枝愈茂編成而花萼齊芳里有靜菘之號地真  
廉讓之鄉入則孝而出弟行爲表而言坊交朋以信善誘  
無荒睦族直比乎韋阮卹嫫弗聞於江黃祀有舉而莫廢  
業以拓而彌昌館假馬川不近晏嬰之市教逮鶉結非貪  
陸氏之莊所以伯牙鼓琴申婚姻於蘿蔦不但子華傾蓋  
贈壽序以琳瑯自少至老旣直且剛仁必有勇禦不畏強  
蹋堯廟而著鞞七步能走登趙庭而說劍十夫莫當力所

黟縣四志

卷十四

雜志 文錄

書

弗尙技妙於藏故泛交之儕伍遂末由而讚揚猗歟先生  
備致嘉祥宇構翬飛瑞迎雉堞德齊鴻案福集鴛梁豢就  
二龍定興雲而作霖雨率將兩驥早逐日以迭騰驥聽重  
陰之鳴鶴看九苞之蠟鳳躋七旬而有嬰兒之色施四體  
而無外物之戕長彌性之純嘏葆元氣於文康其德不爽  
俾壽而臧宜長生之註籍取地仙如探囊何期瞬息百年  
偏靳廿八稔之算疾纏一日忽罹十三月之殃竟蓬瀛之  
赴召軼埃壒而上翔凡屬志合誰不涕滂歌共悲夫薤露  
時倏及於葭霜悵伊人兮不見值吉日兮辰良謹牲牲兮  
肅列羌錡釜兮爰襄集苔岑兮蘭契奠桂醕兮椒漿仰行



誼兮不朽非覩縷之可詳聊總括乎梗概侑神嗜之豆觴  
魂歸來兮返故庶髣髴兮來嘗

胡一貞印存弁言

黃密 宓山

胡君一貞雅善篆刻寢饋其中垂二十餘年其甥雪廬彙  
舅氏所作印哀然成帙簡練揣摩奉爲師資而以弁言相  
譁諉辭不獲己乃拜手而墨之曰予聞新安爲印人生產  
之鄉如程穆倩汪詛葦吳漫公何長卿黃次黃巴雋堂諸  
先生皆一代名手與浙派旗鼓相當而吾鄉之王禦翰孫  
汝明孫函江延清芬室亦各負盛名後先輝映爲世所重  
勝朝以來尙纍纍如貫珠可約而數蓋薪盡火傳於今爲

黟縣四志

卷十四

雜志 文錄

書

烈也一貞工鐵筆予髫齡就傳時已熟聞之然當日窾啟  
寡聞卒不知其淵源所自近年從家雪濤叔遊畧辨妃豨  
好蓄金石文字與君爲神交始得聞其崖略焉君之外祖  
父雙溪余公好古君子也夙精此道惜不願以其技醜世  
故名不出里閭一貞幼聰穎居常究心六書研討始一終  
亥之義遂能傳其衣鉢更博覽古今名人印集勤摹而廣  
徵不徒守一貞先生之言以爲法宜其印存有筆有墨大  
雅不羣爲邑之知名士所共賞蒙謂其學力與時俱進再  
歷若干年月其殊詣猶不止此行且與印人傳中之鄉先  
生異曲同工矣嗚呼黃山白嶽靈秀所鍾圖章一燈不絕



如縷皆後來者主持之力也予不文言不足爲胡君重顧胡君自有可重者在予復奚言

王穀字禦輪孫克述字汝明俱以善治印聞見篆學叢書印人傳 宓山識

祭謝太孺人暨芷甫先生夫婦文 黃澤

予嘗偉歐陽永叔之爲人謂其歷官顯要尤以文雄一代及讀其敘瀧岡一表歷舉遭遇之隆勲名之盛悉由太夫人之善教而本修德獲報以爲徵竊歎永叔褒揚先祖善則歸親理之所應必盡如永叔所言修德於親獲報於後取必於茫茫不可知之數未必若斯之確爾可憑乃有懿

黟縣四志

卷十四

雜志 文錄

三

範旣昭著於閭里爲吾輩所目覩而耳熟而其子之能文章躋顯宦雖不必盡合乎永叔而早料賢母之後罔不興故夫金石篆籀之精丹青書畫之妙凡太孺人所出者其材其藝旣爲當世之所稱而唯芷甫先生尤足紹淵源於家學以經師人師而爲多士之準繩蓋先生之先君子早爲當世所式矜以鴻儒碩學司訓於宛陵先生早歲失怙賴太孺人勉勵故楹書能讀堂構能承其弱冠遊庠序卽以文受知於馬宗師召之於幕此不足爲先生名譽之增而至吐其胸中之奇氣發爲文者已足入六一居士之室上與昌黎河東眉山父子以爭能雖永叔則位列於朝先



生僅十載儒官抱才不過未見有運會之乘然永叔則久宦於滁爲滁太守先生亦久宦於滁爲滁山斗其不同而同者不僅文字之逼似廬陵若第語其著述之恢奇宦况之冷淡卽比以桐城之劉學博海峯者足當之而克勝昔楊伯起由教授至三公吾方謂三鱸之兆庶幾再見先生將自此升孰料其德配先逝越五六年亦歸道山竟長與古人以爲朋今與德配合葬太孺人之墓迨不減瀧岡之阡河山並壽歷久遠而崇嶺而吾尤幸先生哲嗣克相兢爽或操貿遷之術或已仕版之登仍無易永叔之言曰善人有後爲天道之恒嗚呼峩峩碑碣耿耿漆燈永絕芻蕘

黟縣四志

卷十四

雜志 文錄

三

之擾無虞防墓之崩繼自今鍾祥錫祚降遐福於孫曾尙饗

題芝草醴泉室畫稿後

黃啟蓉

畫之白描法昉於李龍眠近今美術畫流行寰瀛者實以此爲先導族弟立莊酷嗜乎此含毫吮墨日日爲之積成巨册出以見示予於此爲門外漢不能贊一詞唯有美其術之精而學之勤耳鏗而不舍何難由此而上窺龍眠豈僅美術而已哉賞玩竟日聊識數語而歸之

隸真八分三體書略考

孫應台

辭源引厲鶚文李斯作小篆程邈作隸書王次仲作八分



隸與八分顯分二種應有二種形式自歐陽修誤以八分爲隸遂混合爲一相沿不知其非孰知隸卽今通行之眞書閱微草堂註所引諸說俱屬相同不爲無見參考書云秦程邈作隸書王次仲作八分後漢亦有王次仲作八分又云眞書擬衛恒及王僧虔名書錄以爲後漢王次仲所作愚按王次仲作八分其說可信惟係後漢之次仲與秦時次仲無涉蓋秦時王次仲創造隸書未成而罹禍程邈續成之故程獨享造隸之名迨後漢王次仲創八分而人不察以其名同遂以爲兩次仲均曾作此如果秦時次仲作有八分次仲與程邈同時何以李斯定書體八種有隸

書而無八分此其明證愚故謂程邈隸書實次仲創而未成者卽今所行之眞書八分一體則爲後漢王次仲所創造毫無疑義至參考書旣謂後漢王次仲作八分又謂眞書亦後漢王次仲所作說雖有據究屬附會辭源引書苑菁華云唐杜光庭言隸書實起於周代左傳亥有二首六身亥字必從今文方合二六六六布算之式又云水經注臨淄古墓有太公六代孫胡公之棺所題惟三字古文餘皆今書此又在春秋以前知隸書非程邈所創此書苑俱以隸書爲今文今書所謂今文今書非其書而何安得謂後漢王次仲作眞書若以八分當今文今書而八分乃風



雅一部分所習非全國通行人人常用之字體不得混之  
曰今文今書其全國通行人人常用者蓋卽眞書也是知  
書苑謂隸爲今文今書當然爲眞書無疑唐六典校書郎  
正字體有五四曰八分書石經碑碣所用五曰隸書典籍  
表奏公私文疏所用審是益足證隸書爲眞書矣參考書  
八分註又謂八分當係兩種一爲篆隸間之八分一爲篆  
隸後之八分此說尤奇安見八分有硬分兩種乎書苑云  
割程邈隸取二分割李斯篆取六分是爲八分若如該書  
所云八分有兩種其一種已有取義尙有一種試問如何  
取義恐該書亦不能再有解釋也至書苑云隸書創於周  
時殆周時發明而字數無多故齊胡公題棺尙有三字爲  
古文至秦王次仲師其意增益若干厥後程邈復取而加  
爲三千字隸書於是大備人遂謂程邈作隸書云

代公衆祭同族良生先生文

孫應台

嗚呼虞淵易迫流水不還飛鵬集庭預徵於庚日白雞阻  
馭乃應於酉年慨夫我先生之長逝也作記赴玉樓之台  
返眞絕塵網之牽少微天上之星餘芒安在寥亮鄰家之  
笛舊廬空存當其下董子帷坐崔生室勤學而焯其掌讀  
書已等其身於是聲雋一鬢望鸞旂而載脉名高三舍賦  
鹿鳴而何難乃強臺廬登梯雲無自溘山垂到因風遽旋



李巽則席帽未臨虛白則麻衣猶在獨是先生胸懷洒落  
氣度雍容雖難攀仙苑之桂花亦自有公門之桃李束脩  
羊至鹿車駢問字之人苜蓿盤供馬帳溢橫經之侶先生  
更學深靈素術比緩和得心應手儼若捕盧之控弦潔已  
愛人不取高公之潤筆至若事上克孝撫下以慈薦堯堯  
之誼敦縞紵之交魯連解紛而能平士謙陰德之及物則  
又先生之穆行矣宜其後嗣繁昌繼世紹述張憑佳兒濟  
以鳳美蘇瓌有子不愧象賢兒輩旣嶽嶽於前孫枝復觥  
觥於後而孰知造物不仁哲人其萎遊神於紫泥之海證  
位於極瑤之天某等或忝軼輩行或齒居同列或爲五服  
殷鶴吊嗚呼尚饗

祭程清菴先生文

黃魯蕃

嗚呼滄海橫流萋萋一老魯國靈光胡然遽倒當之故交  
盛名之下如何斯人大年不假憶公綺歲健筆獨扛繼父  
修志蜚聲皖江龍門家學淵源有自邑乘踵修博聞多識  
溯公闕閱科甲蟬聯公藝奪魁登孝廉船匪侈世祿累代  
清門名賢之子廉吏之孫公摘辭藻熟精選理摘豔薰香



傳誦久矣乃父大集埵有公文雖屬幼作已自不羣西捻之役弱冠講纓詩人杜牧雅解譚兵書生戎馬亦能殺賊轅門草檄盾鼻磨墨癸巳丁艱聖廬伏處合肥相國召襄軍旅北洋餉需支應千里眾沸若麻公定如水水師學校調充監督多出將才有命不辱武衛練師陸軍召募料量饒輸蕭規獨裕冠冕南州才非百里歷任雷封非公所喜公之從政先晉後楚再後陪都神君共許公之愛士桃李手栽秋闈分校玉尺量才三湘七澤名宿淵藪公所賞鑑薦拔非偶有清未造政以賄成公性孤介鐵中錚錚差爲巧宦匪謀不臧萬車園轉一輪獨方其在京師入民政部

黟縣四志

卷十四

雜志 文錄

三

參議新政紛紜旁午東省疆臣羅致督署蠻府參軍亦資借箸倏閱滄桑山河改色歸歟歸歟欲行不得總統徐公設醴京邸平揖公卿公庭抗禮衮衮執政慨贈資斧白髮蕭蕭竟還故土神明可信未踰操守清風兩袖廉泉滿口述公生平不及詳縷犖犖大者尙堪僂數最爲公憾才大如海崔駟巨儒位終邑宰傲骨不拔磨蝎臨宮人以官富公以官窮冀娛晚景健誇腰脚釣遊話舊山水尋樂齊侯患疴瘳病君子何圖數月難康福履心兼憂國絕筆留詩一朝怛化傳說騎箕今之班馬與古爲徒天喪斯文吾道益孤哀哉尙饗